

六十種曲

5



春

英

目錄

- | | |
|------|----|
| 第一齣 | 家門 |
| 第二齣 | 訪友 |
| 第三齣 | 感嘆 |
| 第四齣 | 宴賞 |
| 第五齣 | 瞥見 |
| 第六齣 | 說劍 |
| 第七齣 | 探遺 |
| 第八齣 | 閨語 |
| 第九齣 | 慶壽 |
| 第十齣 | 言謝 |
| 第十一齣 | 構釁 |

第十二齣 邂逅

第十三齣 定計

第十四齣 宸游

第十五齣 阻遇

第十六齣 候約

第十七齣 訴怨

第十八齣 報仇

第十九齣 悲秋

第二十齣 訊病

第二十一齣 忤奸

第二十二齣 獻賦

第二十三齣 巧詆

第二十四齣 秋閨

第二十五齣 解嘲

第二十六齣 反目

第二十七齣 賜婚

第二十八齣 尋真

第二十九齣 團圓

春蕪記

明汪 鏡 箸

第一齣 家門

〔鳳凰臺上憶吹簫〕〔末上〕宋玉才華。清吳佳麗。天教會合良緣。仗春蕪作證。意惹情牽。不料奸徒設計。阻佳期拆散鴛鴦。幸交誼十年知己。睚眦方捐。堪憐。佳人斂怨。嘆才郎抱恨。無計團圓。遇王門獻賦。更洗流言。荷君恩賜婚相府。把百年姻契週全。播詞場風流節俠。千載名傳。

登徒履千般巧計。

李清吳一意憐才。

楚襄王天恩隆重。

宋大夫夙願和諧。

第二齣 訪友

〔滿庭芳〕〔生儒服扮宋玉上〕湘郢蜚聲。陽春絕調。風期獨邁時髦。一宮環堵。生計任無聊。漫笑我十年株守。儘拚他四海蓬飄。英雄志寧教垂老。劍氣尙凌霄。懶

向王門效曳裾。雲霄何日借吹噓。胸中賦就凌雲思。不是窮愁浪著書。卑人宋玉。楚郢中人也。生居里閭。志切巖廊。姿貌天成。不數依庭玉樹。文章日就。何慚擲地金聲。長才每忌於時流。高誼獨違於世態。向年與荆欵飛。唐勒景差同遊。屈大夫門下。但唐景二兄已致身王路。小生與荆兄悲同抱玉。義切斷金。他因世無知己。隱迹藏名。小生許久不與他會面。喜今日春和景明。晝閒無事。不免去看他一遭。正是男兒應會逢知己。世路悠悠何足論。〔行介〕

〔傾盃玉芙蓉〕憶昔風塵訂久要。奈雌伏鹽車老。誰憐我挫抑英雄。寂寞居諸。世路悠悠。義姤寥寥。悔將畏約駟玄鬢。拚取流年付濁醪。縈懷抱。喜窮交管鮑。且乘閒聊從市隱訪蓬茅。迤邐行來。已到荆兄門首了。〔問介〕有人在麼。

〔生查子〕〔外野服扮荆欵飛上〕任俠隱衡茅。玩世輕廊廟。冷眼觀時情。俯首微微笑。路僻惟通鳥。山深無過人。自家荆欵飛的便是。那一個在外面。〔見介生〕一別經年。徒勞夢寐。〔外〕

何期蓬華。敢望高車。宋兄請坐。〔坐介生〕荆兄。你我昔與唐景二兄從游。屈大夫。又不覺十有餘年。今屈原自投汨羅。他兩人致位通顯。你我尙然流落不偶。如何是好。〔外〕宋兄。小弟既非千里之才。

況兼自奇爲氣。動與世遠。那功名二字。只索付之意外了。〔生〕荆兄。不是這等說。看你片言警座。一語論交。豈終懷寶迷邦。謾說灌園避世。你聽我道來。

〔黃鶯兒〕你壯志薄雲霄。悵棲遲隱鳳毛。千秋俠骨誰同調。小弟呵。總屠龍志高。奈飛鵬路遙。怎如你浮沈用拙存吾道。〔合〕幸相邀。黃金卑世。青眼得吾曹。

〔前腔〕〔外〕湖海伴漁樵。任塵埃暗寶刀。枕流漱石吾堪老。因此上箕山掛瓢。緱山弄簫。幽懷盡付閒花草。〔合前〕宋兄。小弟近日頗集冰鑑之術。看你氣格清標。體貌閒麗。將來必然遠到。只是目下尙未偶哩。

〔琥珀貓兒墜〕豐神俊朗。軒舉似霞標。雕鷲乘秋奮羽毛。如今呵。霜蹄暫蹶困蓬蒿。〔合〕非遙。管取你通籍金閨。效用清朝。

〔前腔〕〔生〕泥途斂翮。空自望丹霄。愁覩青霜點鬢毛。蒯緱長夜氣蕭蕭。〔合〕焦勞。甚日得通籍金閨。效用清朝。天色已晚。暫且告回。小弟近日借招提寺僧舍讀書。荆兄

若念小弟。當到彼探望一面何如。〔外〕領教了。

〔尾聲〕〔外〕石林精舍鬻塵少。〔生〕仗爾高朋探寂寥。〔合〕握手千秋意氣饒。

閒齋清話正高春。

野寺殘陽又晚鐘。

縱是埋塵空伏驥。

還憐傾蓋似登龍。

第三齣 感嘆

〔薄倖〕〔老旦扮夫人上〕歲月如馳繁華似夢。見游絲蕩漾殘紅堆擁。杜鵑花外。又將春送。〔旦扮李清吳小旦扮秋英隨上〕將春送。瑣窗下羞蛾淡掃。清鏡裏雙鬢乍

攏。〔老〕憶昔夫君鼎盛年。王侯甲第自蟬聯。三千珠履盈階陛。十二金釵列管絃。〔旦〕曉傍妝樓梳墮

馬。春眠畫閣聽啼鵲。榮枯一旦同朝槿。母子伶仃倍可憐。〔老〕老身唐氏。乃季相國之妻。相國存日。

止生下女孩兒一人。花容百媚。蕙性多能。自幼好詠清吳春波之曲。因此小字清吳。家中僮僕十數

人。女使五六輩。就中獨有侍女秋英。性多便利。色擅芳華。雖居浣濯之流。實爲閨房之秀。但相國年

來傾逝。門戶蕭條。〔顧旦嘆介〕孩兒。我年已逼桑榆。爾尙未諧琴瑟。使我朝夕縈懷。怎生是好。〔旦〕

母親。孩兒幸得相府生身。萱堂鍾愛。金篋繡袷。既非裙布釵荆。玉饌瑤漿。豈是藜羹藿食。但願母親

高年康勝。孩兒勉力承歡。若論孩兒身世。自有定分。何勞母親縈念。〔老〕咳。你不知我做娘的呵。

〔二犯傍妝臺〕終日鎖眉峯。嘆淒涼。母子形影自煢煢。憶當時分鳳侶。到今日又龍鍾。闌干愁淚。露叢竹。飄泊生涯。泣斷蓬。我爲你的親事呵。〔合〕枉自白茅求吉。爲甚紅絲未通。怎能敲門闌女婿。近乘龍。

〔前腔〕〔旦〕無語恨匆匆。嘆椿庭早逝。陟岵痛無窮。拂輕蛾愁損黛。勻香臉。怨銷紅。〔背低唱介〕傷心縱是驚啼鳥。係臂還應護守宮。〔合〕春光無限。春恨幾重。早難道一齊分付與東風。

〔皂羅袍〕〔貼〕夫人小姐。莫把閒愁悲痛。看烏飛兔走。瞬息西東。聽滿城簫鼓度春風。尋芳且自閒拈弄。〔合〕休得葳蕤低揭。心愁意慵。且向銀塘緩步。趁春明日融。想百年一似蕉鹿夢。〔老〕孩兒。秋英這話。到也說得是。我與你且到後面花亭下耍子。回去。

〔香柳娘〕〔合〕出香閨數重。出香閨數重。藥欄花擁。盈盈蓮步。香塵動。望名園

如畫。望名園如畫。紅雨亂春叢。清陰掩平仲。且乘閒半晌。且乘閒半晌。回首東君把韶顏偷送。〔老旦〕呀。孩兒。我到忘了。目今正是三月初旬。我去歲因你身子不快。曾許下招提寺中觀音大士一個香願。趁此天氣清明。我明日着幾個小廝同秋英隨你前去。我還有手帕一方。名曰春燕。此乃外國波祗所產。大凡婦女佩服在身。香氣經月不散。你可帶去。免得中途穢氣相侵。〔旦〕曉得了。

〔尾聲〕這香燕佩服須珍重。〔老旦〕看樓臺罨畫夕陽中。〔小旦〕明日齋心謁梵宮。

小院香寒落燕泥。

平橋曲徑柳陰迷。

一番清話渾如夢。

不覺閒庭日漸西。

第四齣 宴賞

〔菊花新〕〔淨扮登徒大夫上〕錦城絲管日紛紛。對景還堪酒一尊。梅柳渡江春。郊外綠陰千頃。和風助律應韶年。鳥弄歌聲雜管絃。歲歲風光今日好。暫留歡賞寄春前。下官楚大夫。

登徒履便是。附炎趨熱。色厲內往。事喜敗而忌成。言鑠金而銷骨。無奸不做。人人道俺是穿窬隊裏班頭。有隙卽投。個個說我是勢利場中領袖。夫人任氏。貌比無鹽。性同跋扈。全無爲婦道的四德三從。只有降老公的千方百計。這幾日在勾欄裏耍子。不曾奉承得他。目今花事正繁。早上分付院子整酒。與他同賞玩一番。省得又尋鬧撒潑。不像模樣。院子那裏。〔末〕燕蹴飛花落舞筵。更逢晴日柳含烟。但將酩酊酬佳節。風景依稀似去年。稟老爺酒完備了。〔淨〕既如此。請夫人出來。〔末請介丑上〕

〔普賢歌〕奴家生得好儀容。月殿姮娥也賽不過儂。嘴兒搽得紅。眉兒畫得濃。只要喫醋撚酸打老公。〔見介淨〕夫人不要講這話。小廝們聽見。不像體面。〔丑笑介〕我一生只有這樁本事。不發賣人也不曉得。相公請我出來。有甚話說。〔淨〕今日春景融和。花明柳媚。特請夫人同賞玩一番。〔丑〕好好。院子看酒來。

〔榴花泣〕〔淨〕庭闈晝永。時序正芳辰。持玉罌。展香茵。滿前花色更融人。想韶華欲破三分。聽啼鶯滿林。促春歸兩兩聲相應。傍尊前且盡歡娛。恐明朝難必

陰晴。

〔錦纏道〕〔丑〕暖風輕蕩。游絲飄揚。錦亭桑柘雨初晴。喜簾移日影。酒漬衣襟。楊柳邊鶯遷綠蔭。鞦韆外燕蹴紅英。〔行介〕緩步向花陰。苔茸淺印。羅衫適體輕。一曲風光好。願年年相對眼長青。〔淨〕夫人。今日我們兩口兒喫酒。全沒些興頭。聞得勾

欄裏有個標致小娘兒。接來奉夫人一杯酒何如。〔丑〕這話好古怪。你這幾日想瞞着我又去嫖了。

〔淨〕下官一來守夫人的法度。二來是個大夫。怎麼去嫖。〔丑〕我實對你說。你若到勾欄裏尋小娘兒。我也去招提寺尋和尚。〔淨〕是下官說得沒理。院子。拿酒過來。罰我一杯。你與我送杯敬夫人。〔送介〕

〔凌霄竹〕華筵送夕陰。酒如澗。坐來春色撩人興。笙歌競。落日明。餘霞映。浮生回首如馳影。能消幾度閒愁悶。追歡拚取玉山頽。開懷莫問金尊罄。〔丑〕天色晚了。院子。徹了酒。〔淨〕夫人。晚景最好。怎麼就罷了。

〔漁家燈〕看霏霏山抹微雲。更潺潺水遠孤村。棹漁歌幾點殘燈。歸牧笛一灣。

月影且相偎。翠袖凌風並。春去也。花時難定。思省看盈盈鬢星。須早把邯鄲夢醒。

〔尾聲〕停盃問月乘餘興。赤玉闌前一樹春。願歲歲花前樂事增。

庭前花柳逐年新。

堂上笙歌入座頻。

萬物可人惟有酒。

四時佳處莫過春。

第五齣 瞥見

〔鶻橋仙〕〔旦同小旦衆上〕花豔新妝。柳舒媚眼。到處紅霏綠遍。〔小旦〕朱甍畫

棟繞祇園。看雲外幡風飄亂。小姐。此間已是招提寺門首了。〔旦對衆介〕你們去尋那住持老

僧。叫他開了殿門。〔衆叫介丑扮老僧上〕那個來了。來了。度脫諸衆生。令知法如幻。衆生不異幻了。

幻無衆生。〔見衆介〕列位何來。〔衆〕我們是季相國府中小姐。到此燒香。快把殿門開了。〔丑應介

旦對衆介〕你們且到殿外伺候。着秋英隨我進去罷。〔衆應下旦介丑〕這就是大士聖像。小姐

請拈香。山僧去看了茶來。〔下旦作焚香拜介〕

〔二郎神〕蓮臺下見飄香天花冉冉。念四大從來如夢幻。賴無邊佛力垂慈。幸免摧殘。因此上皈依釋子筵。度椿庭須登彼岸。還祝讚。弟子願母親呵。把慧日常瞻。壽考綿綿。〔小旦〕秋英也有一炷香。祈禱一祈禱。

〔轉林鶯〕旃檀寶篆籠瑞烟。齋心頂禮金仙。真成薄命空追怨。向春風枉卻韶顏。做綠衣微賤。〔小旦作笑介〕小姐。這次你也須要跪在這裏。〔旦〕怎麼說。〔小旦〕你自跪了聽

我說。〔旦跪介小旦〕願我小姐與秋英呵。蚤成就三生夙願。〔旦笑起介〕啐。這癡丫頭又來

風了。〔小旦〕仗良緣。輸誠供養。莫使誤嬋娟。〔丑上〕竹爐烹雀舌。花徑候魚軒。請小姐方

丈告茶。〔小旦〕小姐。我們就往西廊下走轉。看看兩廊新塑的佛像去。〔丑〕這等山僧先到方丈拱

候。〔旦小旦西行生東上〕

〔集賢賓〕空齋愁寂耽宴眠。芸窗懶事遺編。聽滿院松風清籟遠。把浮生暫爾偷閒。招尋僧院。〔相遇旦作驚介〕呀秋英。那邊有人來了。我與你方丈去罷。〔小旦作笑介〕小姐。

不妨事。他有眼睛看我們。我們也有眼睛去看他。〔生作笑尾後自語介〕還是這一位小娘子說得

是〔旦〕回身見生驚下生望介〕怎麼世上有這等標致的女子。不知誰家宅眷。恍疑是飛來仙媛。舒望眼。這愁情倩誰消遣。適纔聽得說到方丈喫茶。料必就來。還站在此等他出來。再飽看一回。〔虛下旦小旦上〕小姐。天色尙早。且再和你到殿前耍子一回。

〔鶯啼序〕相攜素手。方丈前。向珠林。且自游衍。趁春風。柳媚花妍。芳菲滿眼。驚變。〔生作遠望介旦〕秋英。你看適纔迴廊下的那人。又在那邊窺望了。怪何來無知少年。驀地裏將人流盼。〔小旦笑介〕咳。小姐。難道你怪他看你。口裏雖只如此說。心下一定思忖。道若得諧繾綣。不枉了百年姻眷。〔旦作微笑介〕呸。這丫頭甚麼說話。

〔水紅花〕〔生〕看他霞綃霧縠勝飛仙。步翩躚。新妝嬌豔。纖腰束素更嫣然。並香肩。瑤階踏遍。〔旦轉身介〕秋英。我和你來了這一會。天色將晚。回去了罷。〔旦〕又蚤是夕陽西轉。聽清磬出雲端。只索要離禪關也囉。〔旦小旦將下生撞上旦作驚避遺春蕪衆上同

二旦下介生〕適間前面走的那女子。分明有顧盼之情。只恨他兩人同行。小生不敢上前通問。這也都成虛話了。自到齋中去罷。〔作行見春蕪介〕呀。這羅帕想就是那女子遺下的。怎麼這等香得

緊敢是他有意於我。故意失墮在地。要我拾取。也未可知。但不知甚麼人家。好生想殺我也。

〔尾聲〕從今惹下相思怨。待我對了佛前拜個揖。望慈悲早成方便。這羅帕呵。就倩你做紅絲繫足緣。咳。不意今日出來。惹了一場風月債。怎麼是了。怎麼是了。

第六齣 說劍

〔高陽臺〕〔外佩劍上〕落莫驚秋。窮愁銷鬢。生涯尙爾飄泊。自笑投珠。誰憐抱璧雙。別悠悠滿眼多紛擾。向清宵夢擾魂越。望中原幾番搔首。壯懷空熱。蕭條對短榻。激烈投長纓。時人不解識。往往呼狂生。自家荆飲飛便是。布衣爲俠。負氣自奇。屠狗椎埋。混迹五陵年少。吹簫扣角。空悲此日英雄。相慕一方。相怨一方。姓名何惜人輕薄。得意一言。失意一言。世事從他自陸沈。自家曾得千金寶劍一口。向年曾斬蛟江上。年來倥偬。不曾看着他。今日晝閒無事。把他來拂拭一番。有何不可。〔拂劍嘆介〕哎。寶劍寶劍。你相隨我十餘年。我既坎坷。你又沈淪。如何是好。

〔高陽臺〕十載風塵。經年巷陌。寧教意氣摧折。看匣底芙蓉。寒芒電走風掣。到

如今輕撇蕭蕭永夜共鳴也。怕龍光漸爾消滅。正堪憐歌魚幸舍。向人彈徹。
〔末扮劍仙上〕十年藏一劍。霜刃未曾試。今日把贈君。爲有不平事。自家劍仙便是。因見義士荆仗飛。他本蓬萊仙種。偶然寄跡人間。無心紫綬金章。有意青萍黃石。俺待欲傳伊劍術。來到此間。已是他門首了。不免逕入。〔外作看劍末撞入介外〕你這道者。從何而來。到此何幹。〔末〕尊官。你聽我道來。

〔鬪鶴鶉〕只見你光閃閃手攬吳鉤。昏慘慘氣冲牛斗。猛可的叱咤風雲。驀地裏神情抖搜。俺待將龍劍相投。只索把獸環頻叩。〔外〕你敢是假此爲名。游方抄化的麼。〔末笑介〕差了。休窮究。謾夷猶。俺祇爲着四海紛爭。只落得一身奔走。〔外〕如今正是太平時節。你說個四海紛爭。就不識時務了。〔末〕你道是太平時節。俺且試說與你聽者。

〔紫花序〕早見那機槍明夜。又見那太白經天。又見那魍魎號秋。因此上向爐邊歐冶。早成就匣裏純鉤。還愁。〔外〕你卻愁着些什麼來。〔末〕俺只怕青萍誤落凡夫手。只索自迴風舞雪。勝比那傳術馳猿。恰便是理解屠牛。〔外〕噯。我且把個古人問你。假如行刺。

似那鋤麿。你道何如。〔末〕他劍術雖高。不諒彼己。可不枉了一死。

〔調笑令〕俺笑他死槐陰恁拙鳩。〔外〕說劍似莊周何如。〔末〕俺笑他三說荒唐罔趙侯。

〔外〕你道似何人纔好。〔末〕須一精神似木雞待鬪。還須解弄丸機殼。〔末把劍介〕你看

這劍呵。常兀自赤虹貫斗。好一似白練橫秋。俺試舞一會。你仔細看者。〔舞介〕

〔禿廝兒〕披長劍風生蒯緱。恣揮霍星昏旄頭。須得心應手。君知否。〔末把劍與

外介〕俺將此劍贈了你。你早提三尺殛蚩尤。莫教鬼哭與神愁。〔外〕請問高姓。何方居

住。日後待俺好來相訪。〔末〕你不必問俺姓名。你若要看見俺。竟自到終南山來便了。〔閃下外〕原來

是個劍仙。來傳我劍術。

〔尾聲〕你看他乘雲駕霧憑虛走。早把那崑崙祕術來傳受。我且自弢斂着奇蹤慢

慢的相便宜輪機偶。

第七齣 探遺

〔疎影前〕〔生上〕禪宮乍起。又鐘聲隱約。旛影參差。想邂逅情深。夢魂縈繫。何

年得遂恩私。事不關心。關心者亂。小生昨日遇着的那女子。原來就是那東鄰季相國小姐。一時瞥見。頗有盼睐之情。其時爭奈耳目衆多。只得佯爲卻避。豈料天緣輻輳。那小姐遺下一方羅帕。被我拾了。想他今日一定着人來尋。不免就還他去。或者因此得遂私情。也未可知。你看日已三竿。且到佛殿前探望一回何如。

〔普天樂〕悵臨春把玉貌成追憶。多應是千里曾相遇。下閒階欲步踟躕。望侯門深鎖嬌姿。咳。小姐小姐。非是我宋玉敢這等妄想。誰教你寄春情把秋波偷遞。料佳人此際。定成心許。想起來小姐縱有此情。他還有母親在堂。怎由得他。怕奇花點綴璠枝。逐東風飄揚無主。笑翩翩舞蝶。空是追隨。〔小旦上生望介〕遠遠望見個人來。好似昨日那女使。多分是來尋這羅帕了。且閃過一邊。聽他說些甚麼。〔虛下小旦〕

〔疎影後〕匆匆纔離朱門裏。早來到祇林佛地。〔俯身尋介〕看蒼蘚盈階。殘英滿砌。尋蹤問跡憑誰。小姐對我說。分明脫在西廊下。怎麼不見。多分被人拾去了。〔望介〕那邊一個人來了。且把扇兒遮了過去。〔作遮臉行生上遇介小旦背介〕呀。這人就是昨日與小姐撞着的。

〔生〕小娘子。宋玉拜揖。〔小旦作答禮介〕相公失瞻了。〔生〕敢問小娘子。莫非是季府中女郎麼。〔小旦〕正是。〔生〕小娘子。昨日是兩位同來。今日爲何一人到此。〔小旦〕賤妾就是季府女使秋英。昨日同來的就是我家清吳小姐。因到此燒香。調下了一件東西。以此着我來尋。〔生〕不知小姐爲甚緣故。調下的是甚麼寶物。〔小旦〕相公。你聽我說。

〔太師引〕趁春風蘭若曾隨喜。遇書生倉皇趨避。〔生〕嗟。小娘子不認得了。昨日就是小生。敢是一時唐突。小姐和小娘子一定惱我了。〔小旦笑介〕好搥賣。誰來惱着你。只可惜那春蕪呵。翻做了湘臯遺佩。那些個赤水還珠。到如今追尋無計。只踏遍芳草萋萋。旣尋不着。且自回去。小姐一定等我哩。料香閨盈盈望迷。怎知做滿船空載月明歸。〔作欲下介〕咳。可惜不知甚麼人拾了去。〔生〕小娘子轉來。

〔劉潑帽〕娘行不用多匆遽。料輕綃不遠東西。〔作拂袖介小旦〕好古怪。這分明是我小姐身上那春蕪的香氣。〔生笑介〕可知我與你小姐臭味相同哩。看餘香遍染春衫袂。〔作半露春蕪介〕看這香羅。其實可愛。須好護持。敢使他輕遺墜。羅帕到拾得一方。不知

是你家小姐的麼。〔小旦見介〕正是。元來你拾了。就該還我纔是。怎麼到藏過了。〔生笑介〕若是就送還的時節。小娘子竟去了。小生怎能設得與小娘子親近這一會。〔小旦笑介〕這些秀才家。專會弄人。〔背介〕

〔前腔〕看他翩翩玉貌多閒麗。向春閨夢遠魂迷。想憐香惜玉應閒事。〔生〕可

見小娘子是小生知心的人哩。〔小旦〕宋相公好說與伊。妄想成何濟。這次好還了我麼。

〔生〕春蕪是小姐的。我自親手交與小姐。也不枉了我這段慇懃。〔小旦〕這個到不勞得。我拿去說你的意思便了。〔生〕若是小娘子肯如此見憐。我宋玉感激無地。〔揖介小旦〕到好笑。有這等一個涎臉。〔生還春蕪介〕

〔尾聲〕香羅付與卿卿去。小生還有一句話兒。若得做紅絲相繫。願把纏頭報取伊。與我多多致意你小姐。

〔小旦〕絞綃失卻暗驚心。感取書生意氣深。

〔生〕正是着意栽花花不活。無心插柳柳成陰。

〔生笑介〕這事多分要成了。〔小旦笑介〕這也難道。

第八齣 閨語

〔風入松慢〕〔旦上〕閒庭日暖正春明。柳外啼鶯。妝樓睡起慵臨鏡。春衫半污脂痕。無那桃花漫眼。看花似不勝情。奴家昨日與秋英到招提寺中燒香。行至西廊。偶遇着一個秀才。那時慌忙迴避。不意將春蕪手帕一時遺失。我想佩服在身。懷袖氤氳。時存薌澤。一旦失了。豈不可惜。況近來真誠的少。薄倖的多。天幸誠實的得了。不過說我一時粗心遺墜。倘那浮薄之徒所得。他定向人前造語生情。指爲口實。豈不玷污了我。如今着秋英潛往那廂尋覓。怎的去了半晌。還不見來。不免向庭前等他一回。

〔大聖樂〕遶雕欄花塢冥冥。滿地蘼蕪襯落英。香閨人去無憑準。凝望眼。動銷魂。俺這裏少原自抱忘簪恨。怕他做知子相投雜佩情。漫啓重門望也。空教人幾番立遍花陰。

〔不是路〕〔小旦上〕蓮步輕盈。院宇沈沈。戶半扃。穿芳徑。〔窺介〕呀。小姐又早在此等。

了。你看他含顰無語自憐情。〔旦〕秋英你回了春蕪可曾有了麼。問卿卿多應是飄蓬斷梗渾無定。〔小旦〕小姐你且莫夷猶聽訴因自喜多僥倖。〔出春蕪介〕看珠迴合浦還重並更得一枝梅信。〔旦〕有甚一枝梅信。〔小旦〕你道是那個捨了。〔旦〕是那個。〔小旦〕就是昨日在西廊遇着的那秀才。〔旦〕既是他捨了。你與他素不相識。怎麼去與他討得來。〔小旦〕你聽我說。

〔解三醒〕離侯門忙投佛境。向迴廊悄悄地偷尋。我正在那裏東尋西覓。他到跟前驀地來詢問。我因此上訴與衷情。他聽得了。就向袖兒裏取出這春蕪來。道羅帕到捨得一方在此。不知是你家小姐的。我見了說正是。他說既是小姐的。小生親自送還小姐。我說這個到不敢動勞。待我自拿去還小姐。說你的意思便了。他聞言不覺相依允。料不是無情陌路人。

〔旦笑介〕這癡丫頭。你怎麼就見他是有情的。〔小旦〕他還相倩。〔旦〕倩你做甚麼。〔小旦〕他說對你家小姐說。春蕪便還了。只有一句話兒。權把做紅絲繫足。願結姻盟。〔旦微笑介〕啐。這丫頭又來說癡話了。我且問你。那秀才姓甚名誰。那裏居住。〔小旦〕小姐。你說是那個。就

是西鄰的宋秀才。〔旦〕元來就是他。我一向聞得他呵。

〔前腔〕那書生才高鄢郢。更翩翩逸志凌雲。他傾心屬意憐閨闈。我自合謝伊情。秋英世上有這等忠厚的人。我要你去謝他一謝。你好將雁帛傳芳信。我自向鴛帷候報音。伊將命。須索要言詞婉順。禮意殷勤。〔小旦〕小姐。今日晚了。明日去罷。〔旦〕使得。

〔尾聲〕〔小旦〕明日向招提潛投奔。〔旦〕正是有句緊要說話。幾乎忘了。你教他還將脣舌守如瓶。莫向人前作浪聞。

暗傳消息到禪房。

報李投璫意怎忘。

從此恩情應美滿。

願祈地久與天長。

第九齣 慶壽

〔普天樂〕〔小生扮楚襄王引衆上〕鬻熊創業開鄢郢。百二河山雄鎮。狎主齊盟。維城周室。一統天王明聖。春秋鼎盛。喜孜孜補袞。躋躋臣鄰。樂奏南薰。尊傾北斗。宴昇平。憑陵霸業振西偏。文武勤勞奕世傳。賜祚自矜承寵錫。分封端不愧承宣。寡人楚襄王橫是

也。職叨民社之司。都建荆蠻之地。分茅胙土。賴周天子寵綏。右拂左縈。憑項莊王餘烈。礪方城。帶漢水。久稱六百雄圖。車千乘。粟十年。素號富強大國。踐祚以來。幸臣竊政。信莊辛之論。肅清城社。連衡而後。羸秦肆虐。聞楚人之射。踴躍中原。今日春融日暖。柳媚花明。正逢寡人初度之日。百官到來稱賀。不免上殿。

〔遶地游〕

〔淨扮登徒履上〕

銀虬曉箭。閣道烟花轉。

〔外扮唐勒〕

集夔龍鳳池春暖。

〔末扮景差〕袖拂爐烟。身依閬苑。〔合〕排闥闔雲瞻九天。〔淨外末同進介〕主公。臣

登徒履。臣唐勒。臣景差。朝見。〔小生〕諸大夫少禮。〔衆介〕臣等啓主公。今日恭逢聖誕。且春日晴和。

烽邊息警。臣等敬陳瑤島之觴。竊效華封之頌。〔小生〕看酒過來。

〔玉芙蓉〕

〔淨〕臣登徒履進酒。

神樞繞殿明。華渚飛虹影。看桃華斂實。椿樹含榮。

攜將銅狄千春頌。並取瑤函十賚文。〔合〕胥歡慶。比華封祝聖。儘輸忠。把傾葵。

赤膽佐承明。

〔前腔〕

〔外〕臣唐勒進酒。

喬松蔭玉宸。介母臨僊境。願籌添海屋。算躋岡陵。筵開。

繡帳杯前壽。座列香奩勝裏人。〔合前〕

〔前腔〕〔末〕臣景差進酒。祥雲接鳳城。仙仗瞻龍袞。會箕疇斂福。軒筴長春。霓裳

競度飛仙曲。露掌齊稱上壽觥。〔合前〕

〔前腔〕〔小生〕寡人回敬諸大夫一杯。絃歌萬戶清。伯業千秋盛。捧璫卮更進。玉珮和

鳴。香飄寶殿春風轉。花覆彤庭淑景新。〔合前〕

宮殿參差列九重。

祥雲瑞氣捧階濃。

微臣欲獻唐堯壽。

遙指南山對袞龍。

第十齣 言謝

〔紫蘇丸〕〔生上〕竹林啼鳥春將半。掩空齋向誰爲伴。侯門如海思空懸。愁絕

魚和雁。暖日蕩游絲。春愁不自持。夢中不識路。何以慰相思。小生自見那季小姐之後。十分思念。好

生悶逼。昨日因秋英尋討春燕。已曾送去還他。就托他將我心事傳與小姐。不見個信息來到。未知

天緣若何。我想那小姐。生長侯門相府。他但知繡幕瑤樓。怎肯顧華門圭竇。多管將我這情思奚落

了。也未可知。今日喜得天氣晴和。且到階前散步一回。〔作行介〕呀。你看蝸涎滿徑。鳥跡盈階。禪房竹院。懶尋僧話須臾。雪案蓬窗。倦對聖賢探討。好生淒楚人也。

〔金索掛梧桐〕看閒階草色鮮。曲徑花叢亂。鎮日懨懨。底事尋思遍。怕今生緣分慳。憶嬋娟。料斟酌天寒有若個憐。多應是落花有意相留戀。難道是流水無情自枉然。還追念。幾將清夢共纏綿。恨悠悠隔斷仙源。心折仙源。盼不見桃花面。〔小旦上〕風弄鳥聲碎。日高花影重。欲傳湘女意。竟覓梵王宮。俺小姐因那宋秀才還了春蕪。着我

到招提寺謝他。來到此間已是。〔作相遇生驚喜揖介〕呀。秋英姐。甚麼好風吹得你來。請到書房中待茶。〔小旦〕如此恰好。〔生小旦行介〕竹徑通幽處。禪房花木深。〔生〕此間已是。敢問秋英姐。今日到此。不知還是小姐的意思呢。還是秋英姐思念小生。到來相訪。〔小旦笑介〕呸。我與你有甚相干。來念着你。這是我家小姐感你前日還了春蕪。特着我來謝你。〔生〕元來是小姐恩情憐念。〔作笑揖介〕小生就要謝恩了。但不知還有甚麼說話麼。〔小旦〕小姐說那春蕪呵。

〔東甌令〕只是金甌墜。已茫然。不料天台有信傳。延平寶劍重相見。謝得伊憐。

念。〔生〕正是小姐遺下。恰好小生拾着。真是有緣千里能相會。〔小旦〕這也難說。俺小姐呵。他奇花莫作等閒看。你謾說有天緣。〔生〕秋英姐。你怎麼把這話兒來說遠了。你還不知小生的心事哩。

〔前腔〕情脈脈。意懸懸。教我屈指風前倍黯然。香蕪拾取因非淺。幾度春情亂。終朝回首路漫漫。相望眼將穿。秋英姐。小生前日托你在小姐跟前說小生意思。不知小姐怎麼說。〔小旦〕俺小姐呵。

〔三換頭〕他憐才意堅。偷香情淺。任蘭閨寂寞。花慵柳眠。小姐到說得好哩。道你是金華時彥。又道姮娥愛少年。〔生〕小姐既是這等錯愛小生。來看小生一看何如。〔小旦〕

他欲見凌雲客。還愁多露難。情意殷勤。特遣青鸞雲外傳。〔生〕小生正在此間愁悶無聊。幸得秋英姐來報了這個喜信。十分悶懷。解了九分。還有一分不曾解。〔小旦〕這是怎麼說。

〔生作摟小旦介〕這一分是不曾得蒙秋英姐見愛。故此不解。〔小旦〕不要這等厭人。想小姐望久了。我要回去。〔生〕小生還有幾句話兒要說哩。〔小旦〕有甚麼話就說與我知道。

〔前腔〕〔生〕形孤影單。夢搖魂斷。只道三生分淺。誰道一時留戀。這其間喜得你佳人竟垂清盼。我結草須無地。怕牽絲未有緣。日斷深閨。想一段相思兩地牽。秋英姐。你與我拜上小姐。若是得便。還要會小姐一面。有許多心事。要親對小姐講哩。〔小旦〕曉得。

〔尾聲〕〔生〕去難留情無限。幽懷密意仗伊傳。〔小旦〕正是。我到忘了。小姐教對你說。鸚鵡前頭莫浪言。〔生〕這個一定的。秋英姐。若有佳音。千萬來回報小生一聲兒。〔小旦應下〕

第十一齣 構釁

〔阮郎歸〕〔淨上〕小窗春暖日遲遲。無端有所思。名園深處且私窺。鶯期知甚時。有意種花花不活。無心插柳柳成陰。登徒子爲何道此兩句。東鄰季小姐。姮娥月貌。西子花容。下官十分在意。要見他一見。也不能夠。近來聽得說到與那西鄰宋秀才有些緣故。不匡這塊好羊肉。到落在狗口裏。仔細思量。不要說我是個大夫。他是秀才。比我不過。就是他那幾句歪文字。季小姐也用他不着。小姐用的是綾羅綺繡。我有綾羅綺繡。小姐用的是玩好奇珍。我有玩好奇珍。況且桃來

李答一定也不折本。只是無緣。不會覲面。如何是好。且喜庭幃日暖。花柳爭妍。季小姐或者到園中看花。也未可知。若得遇着他。待我飽看一回。不然尋着他使女秋英。也好買囑他通個消息。慢慢的日親日近。那小姐水性婦人。自然喜我了。正是欲圖生快活。須下死工夫。〔虛下小旦上〕

〔駐馬摘櫻桃〕花事依稀。試問春歸第幾枝。想畫橋烟水。錦瑟銀笙。翠袖璠卮。咳。做我這樣人呵。誰憐閨閣閉嬌姿。空將羅綬封愁泪。〔打鶯介〕打起鶯兒。怕他解說香閨幽思。〔淨上窺介小旦〕小姐着我來園裏摘花兒。來到這裏已是呀。誰在外面。〔開門見介〕我且問你。你是甚麼人。這等不知事體。輒敢走到這裏。〔淨〕我口口耍子兒的。〔小旦〕

〔四邊靜〕俺是侯家庭院重門閉。何人敢唐突。莫不是岐路覓亡羊。桃源問歸計。〔淨〕諱小旦背介。看他言詞沒緒。藏頭露尾。敢是平樂浪無知。胸中有奸計。〔淨〕

姐姐。敢是秋英姐麼。〔小旦〕我便是。你問他怎麼。〔淨〕實不敢相瞞姐姐說。下官就是西鄰登徒子。聞得宅上有位小姐呵。

〔前腔〕羞花閉月真嬌媚。無緣共親密。如今下官欲勞姐姐到小姐面前。代言一聲。說下

官思想小姐。魂都想沒了。你若與我寄相思。今生敢忘德。自古道禮下於人。必有所求。姐姐。我就跪在這裏。沒奈何潛來花底。躬身拜啟。望你做蜂媒。向花間遞消息。〔小旦〕阿也。好不識時務。俺這裏潭潭相府。誰敢在此胡言。況我家小姐。聰明伶俐。月貌花容。看你三分不像人。七分不像鬼。要想我家小姐。正是那癩蝦蟆思量天鵝肉喫。

〔割歛兒〕娘行心性多聰慧。傾城玉貌世應稀。〔淨〕你家小姐雖然標致。〔搖擺介〕看

我也配得他過。〔小旦〕呸。好貨。虧你不識羞。怪伊家太無禮。把相門謾欺。〔淨揖介〕我的

姐姐。你便與我做個方便。〔小旦〕你無知小輩。胡言亂語。休在人前乞憐搖尾。〔淨

怒介〕這丫頭怎麼罵我搖尾乞憐。終不成我是狗。〔小旦〕我且問你。俺小姐是相國之女。你就敢

來輕覷他。〔淨〕你家雖是相國家風。我又不是朝廷的官。強似去尋那宋家的窮秀才。〔小旦〕甚麼

宋秀才。你且說來。

〔前腔〕〔淨〕我家聲赫赫多榮貴。定強如尷尬那窮儒。〔小旦〕可惜沒有此事。就有

了怕你怎麼了。〔淨〕你說不怕我。我就去許他深閨寄聲息。窺牆暗窺。〔小旦〕就是我小姐

看他干得你甚事。要你喫這等寡醋。好沒廉恥。〔淨〕怎麼就罵我無恥。尋思就裏令人怒起。只教你禍在蕭牆。風波倏起。〔小旦〕啐。我不與你這小人對嘴。且進去。正是閉門不管窗前月。分付梅花自主張。〔下淨〕這腌臢潑潑。我不指望他與我成事。反忍了他一場氣。眉頭一蹙。計上心來。他既然與那宋玉私通。早晚必定是他走脚通風。著宋玉進去。我這裏鄰近有個人。叫做王小四。此人雖是個無賴的光棍。到有些膽勇氣力。不免將些銀子與他。央他夜夜往季府後門帶領我家小廝們四下巡邏。倘若拿着宋玉。事兒發作。季老夫人得知。一定賣那潑賤到隔江過海去。不然也打他幾十下。消了我這惡氣。正是明鎗容易躲。暗箭最難防。

第十二齣 邂逅

〔珍珠簾〕〔旦上〕朱樓日上人初起。憑欄處不分漫人愁緒。〔小旦〕紅袖共偎

依。問誰嬌媚。〔訴衷情〕寶鴨香消簾半捲。夢初醒。天氣好。花事又凋零。〔小旦〕何處小鶯聲。輕輕繡

幕暗生塵。負春情。〔旦〕秋英。我今日身子困倦。睡起得遲了些。不知甚麼時候了。〔小旦〕小姐。是日

午光景了。〔旦〕我睡起無聊。且和你到後花園樓上耍子。一回去。〔小旦〕小姐。正是有這等一樁好

笑的事。早上我到園裏摘花兒。西隣的登徒大夫。在門外窺望。我問他你是何人。他說要見小姐一面。又有許多胡言亂語。被我搶白一場去了。〔旦〕這等我們不要去罷。〔小旦〕小姐。他如今一去就不來了。〔旦〕也說得是。脈脈心情祇自憐。〔小旦〕妝成束素更嫣然。〔旦〕年年來到梨花下。〔小旦〕瘦不勝衣怯杜鵑。〔作登樓介旦〕秋英。你看。記得春初時節。如今又是暮春了。

〔梧桐樹〕看殘英綴舊枝。弱柳搏輕絮。人面桃花幾度空相對。盈盈閨思迷。寂寂重門閉。暮草斜陽。漸覺春無主。把閒愁盡付東流去。秋英。我且問你。你可曉得牆

外這條小路。是那裏去的。〔小旦〕你不認得這條路。若打從東南上去。通着那前街官道。若從西北上去。正是那招提寺的路。〔旦〕秋英。你說起招提寺。我想起前日那春蕪的緣故。如今又成畫餅了。〔小旦〕小姐。豈不聞一飲一酌。莫非前定。況這婚姻事。是百年緣分。怎麼就看得這等容易。

〔前腔〕你難將月下期。償卻花間意。繡枕文衾各自耽憔悴。看你香消翠鳳衣。帶緩黃金縷。想淡月殘燈。密雨紗窗寂。都憑好夢尋鴛侶。〔二旦作望生上小旦〕呀。小姐。你看來的到像宋秀才模樣。待他走來。我們仔細看真。是也不是。

〔浣溪沙〕〔生〕日易西春難住。趁東風且自徘徊。〔作望介〕呀。你看那花園中樓上的。好像小姐和秋英一般。待我走向前去。〔又作望介〕噫。果然是。且喜園門又開在此。只見支頤漫想情千縷。怎能毅握手追歡話片時。〔旦〕秋英。想他見我在此。故意走來走去。〔生作聽介〕還堪取。只聽得雕欄畔一聲嬌語。頓教人不禁魂迷。〔小旦〕小姐。我且和你走下去。看他怎的。〔二旦作下樓介〕

〔前腔〕笑書生空留意。漫尋春步入花谿。〔生作望介〕兩個下樓來了。待我闖將入去。

〔旦〕我倉忙欲避。渾無計。〔小旦〕小姐。你邂逅相逢似有期。小姐。你看他竟不走動。

待我去。看他怎麼說。〔作近前遇生介〕呀。宋相公。請問到此貴幹。〔生〕小生因心事無聊。偶爾閒步

到此。不期幸遇小姐在前。小生欲求一見。〔小旦作笑介〕一個小姐。就是這等容易見得的。你空

浪語。他是松筠操似蕙蘭質。休猜做敗葉殘枝。〔生〕小生只要謝謝小姐。難道敢有甚

麼別意。〔小旦笑介〕既是這等。我對小姐說。不知小姐肯與不肯。你且未要過來。〔生〕曉得。〔小旦

與旦介〕小姐。那宋秀才要見你謝一謝。你肯見他麼。〔旦作低笑〕秋英。我與他從來非親非故。怎

麼就好相見。〔小旦〕小姐常言道遠親不如近鄰。他是我們鄰舍。就見也何妨。待我接他過來。〔笑對生介〕你今日不知甚麼造化。小姐容你相見。快請過去。〔生作喜容整衣見介〕小姐拜揖。〔旦〕秀才萬福。〔小旦〕小姐。我去那邊看看。恐有人來不便。〔旦〕去去就來。〔小旦應下旦〕秀才。奴家前日一時不檢。失下春蕪。那時若非秀才高誼。誰肯相還。曾着秋英寄謝。至今感激無地。〔生〕小生自那日瞥見芳容。自謂此生萬幸。不意又因春蕪一事。又蒙小姐錯愛。曾對秋英姐有言。願把春蕪權爲紅絲繫足。不知小姐尊意若何。〔旦作微笑不語介〕小姐。怎麼不回報小生。敢是說小姐是相府佳人。小生是蓬樞賤質。仰扳不起麼。〔旦〕秀才美意。我豈不時時在念。只是此事不是女孩兒家好啟口的。秀才。你不信時。就把前日春蕪贈你。當爲日後表證。〔出春蕪介生揖受介〕多謝小姐。〔秋夜月〕一霎時。謝得你輸情意。相逢不是曾相識。傾心便許諧姻契。料佳人意美。怕書生數奇。

〔前腔〕〔旦〕你休見疑。料天緣曾相契。恩情定不成虛費。看盟言共守應難易。暫參商別離。算雙星有期。

〔尾聲〕〔小旦上〕聽花前絮語情無已。你兩人好大膽。竟忘卻隔牆有耳。要覓愛追歡。還須待後期。相公。你快出去。裏面有人來了。〔生〕這等小生去了。〔旦〕秀才正是。還有句話。早間秋英摘花兒。遇着那登徒大夫在此。胡言亂語。被他搶白一場去了。他定記恨在心。日後倘秀才來時。須要謹慎些。〔生〕曉得了。〔旦〕正是情到不堪回首處。一齊分付與東風。〔小旦作關門進介生弔場〕咳。小姐小姐。我宋玉正爲你心事無聊。不意今日幸得見你。但你不許我這話也罷。如今教我怎生消遣。

〔犯尾序〕情思正茫茫。邂逅紅妝。花下偷傍。片語憐情。這芳盟怎忘。追想。他定不做言兒虛誑。翻惹得我心兒悒悒。想起來。小姐雖是真心。我如今是甚麼光景。還思憶。我是孤禽鍛羽。怎敢望鸞凰。

第十三齣 定計

〔字雙雙〕〔丑扮王小四上〕我每無恥又無知。放肆。不怕府縣與三司。惹事。打拳賭力。我爲師。把勢。有人問咱姓名時。王四。自家不是別人。卻是楚國中一個潑皮破落戶。

光棍王小四的便是。並無計策資身。只有掇賺度日。哄人說話。真如錦上添花。拐人錢財。好似甕中捉蟹。賭博是我衣食飯碗。偷盜是我祖代家風。況兼生來有力。名號千斤。因此只在市井胡行。不怕官司告訐。〔嘆介〕咳。只是命運低微。人情薄惡。覓利如大海撈針。攪禍似乾柴引火。這幾日賭輸了。正在家悶坐。不知我這裏登徒大夫。爲着甚麼。早間着人來尋我。我想那個人。雖然是一個大夫。到常在風月行中走動的。或者他曉得我也是個中人。要尋我去幫閒。也未可知。若得如此就好。口裏嗒嗒。腰裏撒撒。是一樁好生意來了。說話中間。已到他們首。有人在此麼。〔末扮院子上〕候門深似海。不許外人敲。是那個。〔丑譚介〕王四爺拜你老爺。〔末見介〕呸。我只道那個王四爺。元來就是王小四。噯。是了。早間聽得老爺說。有甚麼說話分付你。想是來叫你麼。〔丑〕正是。〔末〕這等待我稟過老爺。你進來。老爺有請。〔淨上〕

〔哭岐漣〕相思難捱。何時歡愛。書生可怪。搶人買賣。如今事體有安排。只教他臨期不遇空追悔。〔末〕稟老爺。王小四在外面。〔淨〕快着他進來。〔丑見介〕王小四磕爺頭。〔淨

扶介〕鄉里鄉間。怎麼行這個禮。請起作揖。〔對揖介〕院子。再看個座兒來。你自迴避。〔末應下淨

遜丑坐丑作不敢介淨」王四兄。我一向曉得你是個能事的人。如今一件事求着你。你再不要推阻。〔丑〕不知老爺要我做甚麼事。〔淨〕你猜。〔丑〕噯。敢是要尋我去嫖。〔淨〕若論這嫖行裏行徑。雖不是甚麼撒漫使錢的子弟。那些窮孝順。虛幫襯。假小心。極會得。〔丑〕這等敢是要去賭。〔淨〕若說這賭。我雖不是樗蒲百萬的好漢。那骰子鋪牌打馬釣角。極是長技。〔丑〕這等敢是要學幫閒。〔淨〕若說那閒中一節。我的頭極尖。嘴極長。〔丑〕頭尖嘴長。怎麼是閒中。〔淨〕譚笑介。頭尖會鑽刺。嘴長會呵騰。況且我又文理相通。那歪扯詩文。也來得兩句。以此不但城中幾家士大夫。都是我走動。那吳下有兩家大家。也用着我。〔丑〕這等說將起來。我懂了。敢是老爺要去做些不公不法的事。〔淨〕拍手大笑介。是了。是了。〔丑〕只不知老爺要做甚麼勾當。〔淨〕你不曉得。我這裏鄰居季相國之女。清吳小姐。十分標致。我一向看上他。不知怎麼到被我這裏東鄰宋秀才括上了。前日聞得他每日在後花園耍子。走去要偷看他一看。不意撞着那秋英丫頭。不由分說。一頓噪罵。以此心下十分氣他不過。我想起來。他既與宋玉私通。畢竟是那丫頭做脚。我如今欲勞你每夜黃昏時候。帶領我府裏幾個小廝。前往李府花園。四面巡邏。倘遇宋玉。那時拿住。也出得幾口氣。今日先奉開手銀五

兩日後成事。重重謝你。我決不失信的。〔丑〕若說季府。我最熟。裏邊我也常走。只是一件。倘日後把宋玉打斷了。老爺與季小姐好了時節。難道我是替買看喫的。我只讓老爺嘗了頭套湯。等我也括個粥碗罷。〔淨〕這個不通。我就要喫醋了。〔丑〕老爺且不要忙。鶻子石塞牀脚。未穩哩。〔淨〕你休取笑。聽我說來。

〔玉山頹〕爲冤家孽債。好姻緣未曾得諧。眼中釘無計消除。心上人有緣難會。你向東牆相待。使他們難逃機械。縱有佳期在。要兩分開。這回方得稱心懷。〔前腔〕〔丑〕恩官看待。念我是個區區賤胎。要折他此日鸞儔。須仗我平生蜂蠆。將他佈擺。方報得你深恩似海。不敢相耽捱。到長街。教他今宵難免這場災。

〔淨〕急去莫稽遲。

潛蹤休露跡。

〔丑〕眼望旌捷旗。

耳聽好消息。

第十四齣 宸游

〔出隊子〕〔小生淨外末隨衆扮宮監上〕祥光淑景。祥光淑景。烽火全銷四海清。傳聞

御輦出郊坰。簫鼓喧喧接禁城。翠葆迎風朱旗障雲。〔衆見介小生〕寡人自慚匪德。謬

承丕基。自受命以來。幸仗諸大夫戮力同心。交鄰禦侮。且喜比來四封無警。三農有時。值此春景融和。寡人竊欲效先子懷王故事。巡游雲夢。與諸大夫弔古探奇。以盡游觀之興。不知諸大夫以爲何如。〔衆跪介〕主公統紹千春。名高三郢。山河鼎盛。寰宇恩敷。正宜招尋勝地。共樂堯天。臣等願蹕屬車。敢辭驂乘。〔小生〕既如此。分付鹵簿儀從。竟往雲夢去。〔衆應起行介〕

〔普天樂〕〔衆〕翠華遊笙歌引。樂芳晨。旣韶景。嚴城啟。嚴城啟。騎從如雲。趁東君着意花神。〔合〕呀。見山川掩映。東皋麗日明。到處香車簇擁。簇擁舞隊歌塵。

〔北朝天子〕〔小生〕拍雕鞍。驪驪調瑤簫。鳳凰千官黼帳隨。天仗都人士女笑。歡呼道旁。沐恩光。霑宸賞。奏春波。激揚舞迴風。飄颺喜喜昂。喜昂喜喜昂。鬧駢闐。天街擾攘。天街擾攘。荷君恩。齊天壤。荷君恩。齊天壤。〔衆〕啓千歲爺爺知道。聖駕

已到雲夢。請爺爺登臺。〔小生〕分付諸侍從暫且休息。待寡人與諸大夫聘望。〔衆應下小生〕大夫。你看千峯岳峙。萬井雲屯。南接蒼梧。北連陞塞。真可稱四塞之國矣。〔作回望介〕呀。大夫。你看好怪。

前面崇山峻嶺。畫棟雕牆。乍有乍無。如烟如霧。須臾之間。變化無窮。此何氣也。〔外末〕臣啓主公。前面那飛臺百尺之處。正是先王所建雲夢之觀。那崢然直上者。正朝雲之氣也。〔小生〕大夫。何謂朝雲。〔外末〕主公聽啓。

〔普天樂〕記先王曾臨幸。夢仙姝來宮禁。〔小生〕那仙姝是何神。〔外末〕巫山女。巫山女。豔質盈盈。借恩私枕席會親。〔合〕呀。望嵯峨峻嶺。高唐護白雲。悵陽臺何處縹緲。縹緲玉貌芳魂。〔小生〕寡人一聞大夫之言。不覺情愜于中。叫內侍們取酒過來。待俺君臣暢飲一回。〔衆持酒上介淨〕臣登徒履進酒。

〔北朝天子〕敞瑤臺倚碧天。喜宸游值禁烟。似千秋豐鎬周王宴。霞觴引滿。願君王萬年。伯圖雄。金湯險。遠香貂御筵。護流蘇珠幃。赧赧顏。赧赧顏。愧微臣深蒙天眷。深蒙天眷。賀昇平皆歡忭。賀昇平皆歡忭。〔小生〕寡人適方飲酒之間。

想起大夫所譚神女之事。不覺神情恍惚。睡思懵騰。寡人意欲就此臺館。偃臥片時。諸大夫且往臺下閒玩一回。〔衆〕領旨下。〔小生〕正是祇將桑海千秋事。付與槐南一夢中。〔睡介小旦扮神女二

旦扮仙女隨上

〔普天樂〕寶幢翻雲駢整。度紅塵穿丹磴。香風送。香風送。玉珮清冷。駕蒼虬碧海雲平。〔二旦〕啓娘娘。前面已是雲夢臺了。〔合〕呀。看山川掩映。東皋麗日明。到處香車簇擁。簇擁舞隊歌塵。〔小旦〕妾本巫山神女。適見楚國襄王。談妾往事。遂爾神動色飛。念他

精誠所積。敢動神祇。今乘他晝臥臺端。不免喚醒他睡魔。顯應一番。多少是好。〔對二旦介〕女使。與我喚起襄王睡魔來。〔二貼介小旦〕襄王。你聽我道。塵緣未了。意徘徊。暫向人間去。復來。欲問妾家何處是。行雲行雨在陽臺。〔三旦下小生作起介〕呵。好怪好怪。內侍們。快宣諸大夫到來。〔衆介小生〕諸大夫。寡人有一異事。試與諸大夫言之。

〔北朝天子〕正華胥夢迷。見仙靈步徐。道向陽臺朝暮。行雲雨。乘鸞馭鶴被蹠。躑羽衣。下褰帷。情相御。恨匆匆。欲辭意遷延。還住。轉轉思。轉思轉轉思。笑塵凡空懷仙侶。空懷仙侶。意如癡魂如醉。意如癡魂如醉。〔淨外末〕此皆主公聖德格天。致

使山靈邀惠。願主公千歲千歲。〔小生〕寡人意欲將此事撰成一賦。亦可爲一時紀異。不知諸大

夫誰能任此。〔衆〕臣等凡庸，不足以仰副聖望。臣等博訪雄奇之士，爲主公賦之。〔小生〕既如此，今日天色漸晚，分付諸侍從，且回行在去。〔衆〕領旨。〔衆作行介〕

〔普天樂〕御離宮臨仙境，去途遙斜陽暝，千峰遠，千峰遠，翠蓋霓旌，見都城燈火黃昏。〔合〕呀，望嵯峨峻嶺，高唐護白雲，悵陽臺何處縹緲，縹緲玉貌芳魂。

第十五齣 阻遇

〔懶畫眉〕〔生上〕紗窗日落漸黃昏，烏軋江樓角一聲，何妨着屐獨閒行。〔作

聽更聲介〕閒雲不繫東西影，十二樓中月自明。小生自蒙季小姐十分錯愛，好生思

想，今早秋英來說，老夫人今日不在，小姐二更時分，到後花園中相期一會，天色尙早，且再少待片時。

〔前腔〕卻懷孤影在禪庭，珍重佳人惠好音，我魂消目斷未逢眞，只道是吳宮花草埋幽徑，今夜誰知笑對藏花洞裏人。〔內打二鼓〕呀，說話之間，又早二更了，不免去走

一遭也。〔作行介〕

〔前腔〕路岐兼得一般平。半踏香裾宛約行。此間已是季府園門了。爲甚的門橫金鎖。悄無人。只聽得風搖葉落填宮井。想此去處原是僻隅。今夜看起來。此地還成要路津。〔丑衆扮巡邏上生驚望介〕呀。那壁廂有人來了。且待我閃在一邊。聽他做甚麼。〔虛下衆〕受人之

託。必當終人之事。今夜老爺分付我們巡更。捉那宋玉。來到此間。已是季府後門了。須要小心。〔丑〕哥哥。方纔明明見個人走來。怎麼不見了。〔衆〕多是那話兒見我們在此。想躲在黑暗裏去了。〔丑〕如今我們且不要捉他。只做不曉得。待我唱個山歌兒嘲他。〔衆〕你不要胡唱亂唱。他是個有才學的人。到喫他笑。〔丑〕不妨。我把幾個牌兒名編個歌兒。唱與你們聽。

〔山歌〕西河秋霽踏莎行。好姐姐在桃源憶故人。他兩個只指望銷金帳裏風光好。囉裏知被我這秃廝兒隔斷子玉樓春。何如。〔衆〕果然好。我們如今再往那邊看看。〔作走好。〕

遇生介衆〕甚麼人。敢在此閒走。我們是拿那話兒的。若拿着了。活切了他。〔生作行〕這話好怪。〔丑〕我們且往東邊去看。那個敢大膽走來。〔衆作東行下介生〕

〔前腔〕一聞擊柝一傷神。運落風波夢亦驚。想杳無消息苦爲情。我曉得了。記得

小姐曾對我說。登徒履到他花園邊窺望。被秋英搶白了一場。今多分是那厮使的奸計了。我想來只怕小姐無情。小姐既有意於我。登徒履。登徒履。任你五丁驅得神功盡。定不教他寂寞流蘇冷繡茵。罷罷。且自回去。再作區處。〔下衆上丑〕哈。適纔見的。分明是宋玉。當面挫過。到饒他去了。〔衆〕既去了。我們自回去罷。各人自掃門前雪。莫管他家屋上霜。〔下生上〕小生今夜滿望與小姐成事。誰料被那厮所阻。咳。小姐小姐。非是我宋玉無情。只是

〔朝天子〕如此風波不可行。只索斜倚薰籠畔。坐到明。斷腸魂夢兩沈沈。淚沾襟。便從今莫自追尋。怎禁他。驀地來上心。驀地來上心。

第十六齣 候約

〔虞美人〕〔旦上〕含情無限傷秋思。偷把重門啟。〔小旦〕麝蘭烟斷冷金猊。香夢悠悠。已逐行雲去。〔旦〕青天無雲月如燭。露泣寒花白如玉。〔小旦〕霜烏一夜啼到明。美人獨在空房宿。〔旦〕秋英收拾到房裏睡了罷。〔小旦〕呀。小姐。你今夜約宋秀才來相會。怎麼又這等假意兒起來。〔旦〕雖是約他。知道他來也不來。等他做甚麼。〔小旦〕小姐。他爲你廢寢忘餐。恨不能插

翅相從。豈有約了他不來的道理。〔旦〕既如此。便等他一等。只是不知甚麼時節了。〔小旦〕小姐。你聽那譙樓上。更鼓想還未曾起哩。

〔羅江怨〕風和玉漏遲。柔情漫支篝燈入夜水沈微。芙蓉帳冷月痕低也。小閣輕寒。門掩黃昏際。心如柳絮飛。心如柳絮飛。飄颻無定時。咄書空浪作鴛鴦字。

〔前腔〕〔小旦〕轆轤聲漸稀。鞦韆影移。多情渾似隔天涯。淒風輕軟透羅幃也。小姐。你十一二朱樓。有個人同倚。三生定有期。三生定有期。我一心還自疑。〔旦〕

秋英。你卻疑着甚麼。〔小旦〕怕相拋之子歌江汜。〔旦〕秋英。你這個又多疑了。你聽那譙樓上。已是二鼓了。你去看他來。

〔香遍滿〕他潛蹤祕跡。似狐冰聽澈心更疑。怕小犬迎人花下吠。你將伊須護持。休教他嘆路歧。〔小旦〕這個到不須小姐分付。只是一件。〔旦〕是甚麼。〔小旦作遲介〕奈一時多戰栗。按不住心搖曳。〔旦〕好姐姐。便與我去一去。〔小旦應下旦〕

〔前腔〕紅樓凝思。把薰籠徹夜還自倚。宿鳥迎風驚乍起。見重重簾幙垂。盈盈

望眼迷。看花陰月漸低。無奈心迢遞。怎麼這時候還不見來。多是不來了。〔小旦上〕

〔好姐姐〕可憐仙源路迷。芳草徧王孫何處。只聽得江城吹角。疎鐘下翠微。〔旦〕

來了不曾。〔小旦〕那裏見他。小姐。你空儻佇。碧雲望斷人千里。多管是喬才脫賺伊。

〔前腔〕〔旦〕教人潛潛淚垂。藍橋水滔滔西逝。咳。秋英。我也不恨他。〔小旦〕小姐。你恨

着那一個。〔旦〕只恨我無媒自許。今朝悔已遲。〔小旦〕小姐去睡了罷。〔旦〕渾忘寐。重

簷風馬催愁起。影徹孤幃思轉迷。

〔尾聲〕落花可惜隨流水。只索向夢中相會。〔內作雞鳴介小旦〕呀。又早雞鳴了。〔旦起

嘆介〕愁聽寒窗唱曉雞。

慊慊欹枕擁寒衾。

香冷燈殘夢不成。

自是武陵消息斷。

落花流水兩無情。

第十七齣 訴怨

〔外佩劍上〕五陵年少意翩翩。十載雄心未着鞭。笑殺驕驄終伏櫪。不知解紵是何年。荆欵飛一向

客遊在外。許久不與宋生廝會。且喜昨已抵家。他在城西招提寺讀書。不免去訪他。一回少敘離情。有何不可。迤邐行來。早已出了這關門也呵。

〔北新水令〕一生輕俠。嘆無知。感書生締交深契。想途窮空掩泣。歲晏誰憐予。看日已平西。日已平西。望禪關在楓林深處。說話之間。不覺已到招提寺。此是他書齋門首。待我叫一聲。宋兄在麼。〔生〕

〔南潘妃曲〕新愁舊恨。應千縷。寂寞空齋裏。〔外〕開門。開門。〔生〕試問相過是誰。〔開門介〕慢啓蓬門。疾忙窺視。呀。原來是荆兄。久不會了。自別後賦離居。今日足音。何幸君來至。〔作進坐生嘆介外〕宋兄。入門休問榮枯事。觀着容顏便得知。我與你故人久別。今日相逢。正當驩然道故。握手相傾。纔是今日裏呵。

〔北步蟾宮〕爲甚的悶淹淹。蹙損雙眉。咄咄書空無語。踟躕。敢怨着暗裏投珠。拋將鼓瑟。待學吹竽。料鵬搏終須奮飛。把豹隱暫爾卑棲。俺與你年少雄心。休得要愁老居諸。〔生〕荆兄。這是小弟平日的心事。不知近日又有一件煩惱。正是不如意事常八

九。可與人言無二三。〔外〕宋兄。俺與你名雖友生。情同骨肉。你有甚事。何不就對俺講。倘若事有可圖。自當竭力。〔生作沈吟介〕噯。不說罷了。〔外作起身介〕宋兄。俺平生惟稱足下知己。今日猶且避嫌。是俺素行不孚於人。強扳人做知己。是俺見差了。〔生〕這是小弟心事。實難於啓齒。〔外〕噯。大丈夫一言契合。頸可刎。心可剖。有甚難說的心事。〔生〕荆兄。你既這等知愛。小弟便說與你聽。一定不妨了。

〔南江兒水〕記那日曾遊戲。向禪堂小院西。無心邂逅東鄰女。一時相見還相避。他把香羅驀地潛遺墜。我偶向迴廊拾取。使我白璧完歸。因此把幽情私締。〔外〕原來如此。那女娘是誰家宅眷。你既拾了他手帕。他一定不知去了。怎麼又還得他。〔生〕這女娘就是東鄰季相國之女。清吳小姐。他因與侍女秋英。到此燒香。小弟偶爾相遇。其時小姐將所佩春蕪。一時遺落。小弟拾了他的。料他必來相尋。次日在門首閒步。他果然使秋英到來。小弟一時意興。竟還了他春蕪。又將幾句言語挑動。那小姐公然就着秋英來謝我。自此時時通問。因而有情。前日小姐又將春蕪贈我。以爲日後婚姻之約。正所謂英雄氣短。兒女情深。言之殊自愧恥。〔外〕可知

道哩。

〔雁兒落帶陣陣羸〕可知你恰相逢意慘淒。抱孤憤長噓氣。卻元來自纏綿兒女情。頓教人摧折了英雄志。我勸伊行不用苦尋思。宋兄。你適才所說。既有個秋英。兩下通問。怎不仗青鸞傳素書。打疊下屠龍計。想鶯儔自可期。笑你癡迷。怎生的空追憶還思。宋兄。非是俺自誇。若使俺有這機會呵。直待要詠天桃誦標梅。

〔南僥僥令〕〔生〕佳期空有待。離恨轉難舒。我懊恨奸徒生惡計。致使隔參商。在兩下裏。隔參商兩下裏。〔外〕奸徒是誰。生甚麼惡計。〔生〕那奸徒就是這鄰居的登徒履。

他前日往季相國園亭。窺視小姐。正遇秋英。搶白了一場。因而懷恨。料我兩下必相往來。每夜使個棍徒王小四。帶人巡邏。兩人情意雖深。無計可施。不相聞問。又已月餘了。小弟正爲此縈懷。適值荆兄到來。所以鬱鬱不樂。〔外怒介〕元來這厮輒敢如此無狀。有何難處。俺就替你刺殺這厮。

〔北收江南〕呀。聽伊言。怒氣滿胸臆。料麼何足計。自許生平俠骨並要離。〔按劍介〕還將匕首自輕攜。登徒履。登徒履。任伊家妄爲。任伊家妄爲。只教你蕭牆

禍起在須臾。

〔南金谷園〕〔生〕謝君家十年故知。論交情金蘭可期。更爲我報讎雪恥。效啣結。敢忘伊。效啣結。敢忘伊。〔外〕宋兄。小弟昔年曾遇劍仙。相傳劍術。一向不曾試用。今日當爲

兄用之。

〔北瓊林宴帶太平令〕把吳鉤悄悄自提。把吳鉤悄悄自提。他禍臨頭怎能知。恰待要香餌垂綸。特地施到頭來魚難餌。俺這裏謝酬知。還存高誼。他那裏痛噬臍。不勝追悔。縱是那八陣圖。怎施靈異。六出計。漫誇奇詭。俺呵。到如今一諾敢辭也。只爲雄心未除。呀。方顯得俺負氣爲奇。俺就別了你去。你須在此候我者。〔下生〕你看他。〔南尾聲〕雄風奕奕爭馳去。但願把深仇報取。且自向衡門顛望伊。

青龍共白虎同行。

吉凶事全然未保。

第十八齣 報仇

〔丑上〕本待將心托明月。誰知明月照溝渠。我王小四想那登徒大夫。不自揣量。強要去拐那季小

姐。那小姐他自有宋玉這等一個斯文人物。那裏看得你上眼。日逐千方百計。設謀造意。不知又是甚麼悔氣星進命。尋着我這等一個極不欺心的人去做事。前日接了他銀子。走去巡邏。果然那宋玉二更時分來。被我趕走了。如今只是一件。我騙他說季府極熟。他竟信了我這句話。每日只顧要我尋秋英。通問消息。我想起來。那裏認得甚麼秋英春英。不免將計就計。假寫一封書。只說小姐因宋玉失約。心下氣悶。如今到思量登徒大夫。特叫秋英傳遞這封書與我寄來。約他今夜來相見。他必然大喜。又有銀子與我。如今書已寫在此。天色將晚。不免去走一遭。正是由他好似鬼。喫了老娘洗脚水。〔笑下淨上〕有約不來過夜半。閒敲棋子落燈花。我登徒子爲那季小姐。用了多少心機。費了多少錢財。尋得王小四。設下這計較。弄得那宋玉上天無路。入地無門。才出得這口氣。只是季小姐還不得到手。前日王小四又道他在季府最熟。這幾日每日叫他去尋問那秋英一個消息。他說今日來回報。怎麼天色已晚。還不見來。〔丑假作忙上〕忙將小姐信。報與老爺知。〔見介丑〕今日得一天大的喜信。報老爺知道。〔淨〕說來。說來。〔丑〕小子今日正在季府門首。只見那秋英裏面走得出來。東看西望。被我走到他身邊去。他把四下裏看一看。見沒人。就在袖兒裏面取出這封書來。

說小姐寄與登徒相公的。我小姐因宋玉負心。切齒痛恨。聞得登徒大夫思想我小姐。如今要與他來往。特寄這書與他。小姐今夜親自來相會。我得了這消息。飛報與老爺知道。只不知書上甚麼話頭。〔淨作驚喜念書介〕賤妾李清吳瑞蕭拜。怎麼這書起手就差了。婦人寫書。只有端肅。那有甚麼瑞蕭。〔丑〕瑞蕭。敢是小姐的名字。〔淨〕上面有了李清吳是名字。怎麼又是個名字。〔丑〕或者是小姐的別號。你且讀下去看。〔淨又念介〕上登徒相公辱愛下。奴家聞君錯愛。日夜相思。今夜月白風清。過君書齋。與君一睡。呵呵。〔作疑介〕每嘗聞得那季小姐精於翰墨。這封書。恰像個白了寫的。〔丑〕你不曉得。那小姐慌張得緊。以此寫來不精細。〔淨〕說得有理。〔丑〕老爺今夜小姐來。把這所在。收拾精緻些。〔淨〕你看我這里。

〔泣顏回〕〔淨〕金屋遍奢華。列瓊筵滿引流霞。博山龍麝。把銀瓶遍插名花。非是我驕矜自誇。喜今宵一刻千金價。儻仙姬肯渡塵凡。又何須更覓胡麻。王四兄。我嫖了些小娘兒。睡了些私窠子。拐了些良家婦女。那有季小姐這樣標致的。宋玉這個酸丁。怎麼配得他過。〔丑〕正是。除是老爺這等人物才相稱。老爺。你今夜

〔前腔〕堪誇似錦上更添花。咳。宋玉宋玉。須知彩鳳怎肯隨鴉。笑狂生低下也。空勞受盡波查。〔淨〕王四兄。月色漸漸下去了。怎麼還不見來。〔丑〕閒庭月斜。想金蓮款款凌波弱。〔淨〕有理。那三寸三分的小脚兒。怎麼走得快。聽高樓玉漏沈沈。啓重門望眼巴巴。〔丑〕老爺。我到門前去看看。倘若小姐來時。就好迎接他。〔淨〕說得是。說得是。〔先下丑作探望介外帶劍上介丑遇外介外〕

啞。你這斷是誰。〔丑跪介〕

〔撲燈蛾〕英雄息怒。嗔聽我將言稟。我是前街王小四。一生賤號千斤也。〔外〕啞。誰問你號。只問你在此做甚麼。〔丑〕奉登徒使令。着我在花下候佳人。誰知我遭逢凶釁。望爺爺饒恕我殘生。〔外〕如今登徒子在那里。〔丑〕他在書房中等候。〔外〕想你這干人呵。

〔前腔〕胸中奸計生。笑裏戈矛隱。恣肆猖狂甚。惱得人怒髮上指也。冲冲氣憤。須知劍下不容情。休再想饒伊身命。還追省。應教斬草要除根。你看那邊有人來了。〔丑回顧淨刺殺丑介〕正是善惡到頭終有報。只爭來早與來遲。〔淨上遇外介淨〕你是甚麼人。

這等夜半更深。在此何幹。〔外〕你是何人。來問我。〔淨〕這斷想瞎了眼。我登徒老爺都不認得。〔外〕元來你就是登徒履。我正要見你。〔外〕拔劍介淨作慌跑下外追上擲劍刺淨足淨倒外下丑扮夫
人上介〔淨〕夫人不好了。一個人把我一隻脚斫壞了。〔丑〕呀。果然。又還好
哩。他若把那話兒割了。叫我弄些甚麼。我如今扶你去睡了罷。〔淨〕夫人。扶便扶我進去。只是還要
你等等季小姐。〔丑〕呸。買乾魚兒放生。死活也不知。快進去。快進去。

第十九齣 悲秋

〔喜遷鶯〕〔生上〕書幃夢冷。正悠悠離思。蕭蕭孤影。愁鬢三千。歲華重九。那堪
漫眼風塵。肝膽自憐白首。功名誰借青雲。淒涼處。清霜落月。斷角殘砧。枕簟驚寒
已暮秋。心愁難付與東流。年來意氣俱消盡。不分書空獨倚樓。小生宋玉。記得春時寓居招提寺。不
覺又經秋暮。你看草木搖落。風景變衰。撫景興懷。感時增嘆。想我功名未遂。歲月推移。正是四時遞
來而卒歲。陰陽不可與儷偕。好生愁寂人也。

〔雁魚錦〕悲思少年空浪游。抱雄奇把歲月成拖逗。又早是風雨黃花候。嘆新

愁舊恨。鎖鎖眉頭。好教人撫景夷猶。離憂痛寡儔。怎如那南歸雁陣。幾度衝寒去。當不過蟋蟀哀吟。清宵伴客愁。咳。想起俺當年在屈師門下時節。又是一番清夢。俺屈師徒以修能矯節。遂爲奸邪所陷。今日追想起來。令人不勝扼腕。

〔二犯漁家傲〕休休濁世誰收。痛英靈渺渺。強半成烏有。想遭時未偶。問靈均此際還知否。望湘水落日乍浮。見江樹寒烏亂投。弔叢祠半荒丘。儻佇久。竟忠魂何處悠悠。我待把椒漿敬投。只落得向雕梁。對月影。懷清範。怎能穀駕桂棹。聽波聲。逐遠游。一時感愴。不覺憂端蝟集。想起前時春蕪一事。那季小姐厚恩。不知何日能酬。我宋玉旣不能爲師門報怨於當年。又不能爲佳人酬恩於今日。人生恩怨兩字。也不能修。空有堂堂七尺之軀。思之豈不愧恥。

〔二犯漁家燈〕風流燕侶鶯儔。怎知道姻親到底成虛謬。靜掩蓬門。慵臨草閣。撥盡寒灰。羞對衾裯。香羅在手。想畫欄十二。應鎖遠山眉秀。他那里相思盡日。霑鴛袖。俺這裏極目經時望翠樓。我想這事。都是登徒履這廝呵。

〔喜漁燈犯〕無端抵死把孽冤相搆。只指望掣文鴛暗藏機噐。又誰知做江空水寒。月明不餌空下鉤。感得十年故友存交誼。笑殺我尙居人後。教我怎不含羞。到如今書生分薄多懨懨。須有日淑女情深定好逑。

〔錦纏道犯〕更迴首。嘆謀生渾如拙鳩。蹤跡漫沈浮。怕朱顏一去。甚計遲留。向泥途空淹敝裘。傍螢窗怕聽殘漏。夙願定須酬。正是康莊有日還追驥。肯使白石終宵獨飯牛。

落葉蕭疎鎖掩門。

閒庭小徑長苔痕。

傷心最是黃昏後。

風雨寒砧處處村。

第二十齣 訛病

〔意難忘前〕〔旦病妝上〕情思轉闌珊。更粉消珠淚。翠鎖眉山。〔小旦〕殘燈風幕冷。淡月曉窗寒。〔菩薩蠻〕〔旦〕蛩聲泣露驚秋枕。羅幃淚溼鴛鴦錦。病起楚天涼。殘更與恨長。〔小旦〕秋英。淒風翻翠幌。雨後燈花暗。畢竟不成眠。鴉啼金井寒。小姐。你今日身子想覺好些了。〔旦〕秋英。

我從前日被他哄了這一場。心下十分氣憤。早知他是這樣負義的人。我悔把這真情待他。到如今事又不成。倘或外人知道。反惹一番笑語。以此仔細思量。感成這場病症。豈不自悔。〔小旦〕小姐。秋英正要說這樁異事。前日那晚。原來宋秀才來到這裡。不意被登徒履這狗才知覺。他四面使人巡邏。縱使他好分要見小姐。叫他一人如何抵當。又聞得數夜前。前街殺死一個甚麼王小四。登徒大夫又被人斫傷了脚。想多分是那宋秀才做出來的了。〔旦〕原來這樣。到我錯埋怨了他。秋英。我今日身子略覺好些。你扶我到窗前少坐片時。〔小旦〕正是。常言道久睡傷神。況今日天氣晴爽得好。我扶小姐去略坐一時。〔旦〕呀。秋英。你看我病中光景好可憐。

〔小桃紅〕佩蘭香褪。淚竹痕鮮。一握輕綃緩也。他錦字空柔翰。我玉匣閉哀絃。〔小旦〕小姐。人生恩愛。自有定分。況你病中。不宜空費神思。〔旦〕縱教我不尋思。怎禁得夢兒中。話兒裏。情兒戀也。想鼓盡雲和人更遠。愁緒相牽。似帶酒淹淹。

〔意難忘後〕〔老旦上〕秋雲外。曉風前。聽砧杵催寒。〔作望二旦喜介〕好了。女孩兒起得了。喜重簾深處。並倚香肩。〔作進介小旦〕小姐。老夫人來看小姐了。〔旦見介老旦〕孩兒。

你今日身子好些了麼。夜來曾睡得着麼。〔旦〕孩兒今日身子略覺好些。滴纔叫秋英扶在窗前少坐。卻喜得母親來看孩兒。〔老旦〕咳孩兒。不知我爲你好不憂心。我見你

〔下山虎〕妍華消盡。膏沐摧殘。怕二豎成災患。頓使膏肓病纏。〔小旦〕若說小姐的病。不止膏肓。還中了心病哩。〔老旦〕我曉得了。多管是卜鳳無期。孤鸞恨牽。簾捲西風人倚闌。消瘦成慵懶。想無限傷心不忍言。看羅袂啼痕遍。你把閒愁暫寬。孩兒且不要說你自要寬解病懷。也須索要慰我衰殘值暮年。想我與你說了這一會話。你身子一定困倦了。我且去。停一會再來看你。秋英。你依舊好好伏事小姐睡了。〔小旦〕曉得。〔老旦〕正是秋容祇助佳人怨。春思翻教阿母疑。〔下小旦〕小姐。你看夫人適才說的這些話。雖是勸解小姐。那曾有一句道得你心事着的。

〔蠻牌令〕你扃繡戶。掩香奩。鴛枕剩。鳳幃閒。多少悲涼無處訴。空贏得淚闌干。嘆無端多情引惹。撥不盡萬種情牽。夫人。你要小姐的病好呵。要除他風流業冤。定須是喜孜孜美滿追歡。

〔尾聲〕〔旦〕是寒城烟柳斜陽晚。聽一派秋聲哀雁。都只是助人愁嘆。

〔旦〕爲甚的三秋抱怨。

祇因着一晌留情。

〔小旦〕憔悴你朱顏綠鬢。

冷落他白日黃昏。

第二十一齣 忤奸

〔三臺令〕〔淨〕登徒履跛形丑扮家童扶上。悠悠怨憤難平。使我終朝痛心。暗裏自思尋。直須害卻狂生。〔丑〕老爺今日脚痛好些麼。〔淨〕咦小廝今日一發疼得緊。我想起來我的脚

痛到還有好的日子。想那王小四的喫飯家火割了去。怎麼好。〔丑〕老爺若說起那王小四。不要說

殺。就剛也不多。〔淨〕怎麼說。〔丑〕老爺你還不懂哩。他當初只指望要馬扁你的錢財上手。他那里

認得甚麼季府裏。那些說話都是胡說。你還要想他。〔淨〕噫。是了呢。他騙了我。依你說。該殺的。我老

爺又騙了那一個。該斫傷這隻腿。〔丑〕老爺你要捉拿宋玉。姦季小姐。難道到是好人。〔作譁笑介〕

到不好說。〔淨〕不妨。你就說。〔丑〕依小的說起來。老爺也該與他同請行的。〔淨〕到多謝你的盛情

了。這是閒話。且放過一邊。我仔細想起來。這樁事多分是宋玉那廝造下的計較。連日着人緝訪那

行刺的人。再沒消息。昨日又聽得唐景這兩個老頭兒把他薦在楚王那裏。作高唐神女賦。明日早朝。召見殿庭。我想倘然楚王用了他。他日逐使起嘴臉來。我一發弄得決撒了。如今我有個處置。今早門上傳報進來說。那兩個老頭兒今日來望我。不免在茶話中間。把宋玉說他些不好。常言道解鈴須用繫鈴人。當初是他兩個說他進去。如今依先要這兩個說他出來。不怕他不依我說。〔丑〕咳老爺。我看你近來怎麼這等懵懂得緊。他們都是一路的人。爲甚麼聽你說。況你平日做人。又有些兒歪僻。那一個是喜你的。我到勸你不如罷了。〔淨〕這等怎麼處。咳。我好恨。

〔繡帶兒〕追思起不覺令人恨轉增。一時難按心兵。我又不曾咸腓胡行。爲甚的滅趾遭屯。〔丑〕老爺。你還說不胡行。須省。這恢恢天網難自泯。善惡事到頭終應。

〔淨〕噯。這小廝可惡。我正心焦。你又來惱着我麼。〔丑〕老爺。不須心焦。若是肯依我說。時時是快活的。從今把前非痛懲。方免得這無端外來憂憤。〔淨怒介〕你不要在這里惱我。你自請出去門外立着。〔丑應下〕

〔前腔〕〔外末帶從人上〕招尋乘休沐。聯鑣市井。一似求羊往來三徑。〔雜稟介〕稟

老爺。此間已是登徒老爺門首了。〔外末〕通報。〔雜介見介外末〕大夫。小弟們連日朝政匆匆。有失問候。尊恙可好些麼。〔淨〕多蒙二位大夫枉顧。只怕不濟事了。想微軀殘喘難存。感同官不棄垂情。〔外末〕大夫說那里話。聽稟。吾曹交誼金石盟。只是媿藥餌未將芹敬。但願取沈疴頓醒。料蒼天應不把股肱摧殞。〔淨〕今日多承二位大夫來看我。慢慢談一談去。〔外末〕願領尊教。〔淨〕小弟因賤足病後。又有一月不進朝裏了。不知主上近日用人何如。〔外末〕大夫還不知道。前日主上要作高唐神女二賦。詔選詞臣。因此我兩人遍訪國中。近得一個才子。昨已奏知主上。明日早朝。就召見了。〔淨〕大夫。我這國中。自屈大夫亡後。只有二位是才子。又有那個是有才學的。〔外末〕大夫。你這里鄰居的宋玉秀才。難道不是個才子。〔淨〕這等說來。敢是你們到把他薦了。〔外末〕正是。〔淨〕咳。二位這就見差了。主上特托你兩人求賢。合當尋個有名頭的纔是。那宋玉不過是個黃口豎子。他是什麼才子。

〔紅衫兒〕那鰕生豈得稱才俊。落魄風塵。他本是溝中瘠。難爲席上珍。咳。主上。你空費着買駿黃金。〔指外末介〕怎知他把駑駘來鞅引。二位還去說不要用他。也省

得玷污了我們。若教他位列簪纓。可不羞殺縉紳。

〔前腔〕〔外末〕他翩翩三楚聲華振。姿貌超羣。心負雲霄志。名高月旦評。〔淨〕

他既是這等好。何不自去掙個官做。到要靠別人做事。〔外末〕十年間。屈首衡門。似南山

修成豹文。今日裏特薦明庭。方顯得處囊錐露穎。囊錐露穎。〔淨〕大夫這等說。你們

決意要用他了。〔外末〕要用他。〔淨〕噫。如今不難。我與你兩個賭了。你說要用他。我偏不用他。

〔外末〕你怎麼就不用得他。〔淨〕

〔連枝賺〕我稽首彤庭。面叩君王奏此情。拚兵他相凌併。他只難量。一旦圖微倖。偏教你事到臨頭成畫餅。〔末〕噯大夫。你休爭競。爲何抵死來相憎。〔外〕他好一

似鬼蜮含沙妄射人。〔淨〕怎麼就罵我。那些個言辭異。激得人怒起難容忍。〔外末

笑介淨〕你笑那一個。〔外末〕我笑伊讒佞。笑伊讒佞。〔淨怒介〕阿也。我是朝中上大夫。你

兩個還在我下位。怎麼就把言語來傷我。

〔紅芍藥〕出言語直恁欺人。想着我寵冠臣鄰。我屈指朝中半從順。怪伊行敢

相矛盾。〔外末〕我祇將忠義存。向權門怎生卑遜。況復是同袍合簪。又何妨語言廝挺。〔外〕景大夫。不要與他纏。我們且去着。正是常將冷眼觀螃蟹。〔末〕看你橫行到幾時。〔下

淨〕你看這兩個老賊。也不別我。竟自去了。我好惱。我好惱。小廝在那里。〔丑上〕聽得叫小廝。慌忙門外立。未審有何因。入門看臉色。〔淨作怒聲又叫介丑〕想是那話兒不照了。〔見介〕老爺叫小的做甚麼。要我去請唐爺景爺轉來。〔淨〕還要說他。事到做不成。忍得他一場好氣。〔丑〕老爺。我原勸你不要。定不肯聽我說。如今何如。是我高麼。〔淨〕看起來真個是你有些見識。我如今一不做二不休。〔丑〕老爺。你卻待怎麼。

〔尾聲〕〔淨〕我來朝定把封章進。要除卻我胸頭惡忿。〔丑〕只怕君王也未必聽。

〔淨〕可奈同寅太不仁。

〔丑〕須教明日奏楓宸。

〔淨〕平生不作皺眉事。

〔丑〕世上應無切齒人。

第二十二齣 獻賦

〔點絳脣〕〔末扮黃門上〕仙仗初開。晨光漸啟。祥雲裏。殿影參差。玉陛千官至。下
官楚國黃門是也。主上昔游高唐。因感神女之異。曾命文武諸曹。博訪雄才之士。著賦以紀其盛。昨
日唐景二大夫。曾舉秀士一人。名爲宋玉。雄奇博洽。逸世超羣。主上大喜。今日召對殿庭。天色漸明。
已是早朝時候。主上升殿。只得在此伺候。道猶未了。秀士早到。

〔前腔〕〔生巾服上〕日上罌罌。風傳警蹕。金門啟。五色雲車。躋躋趨金紫。〔末〕天
顏咫尺。奏事者不得近前。如有文表。就此三舞蹈執笏披宣。〔生〕郢中下臣宋玉謹叩首陛下。臣本
草茅賤士。叨荷聖恩。待詔殿庭。願大王千歲千歲千歲。〔末〕主上傳旨。寡人昔游雲夢之臺。望高
唐之觀。晡夕之後。精神恍惚。若有所喜。紛紛擾擾。未知何意。目色髣髴。乍若有記。見一婦人。狀甚奇
異。寐而夢之。寤不自識。罔兮不樂。悵爾失志。聞卿奇才。幸開我胸臆。一一賦之。孤將親覽。〔生〕臣宋
玉謹以高唐之景先賦。奏聞陛下。

〔降黃龍〕緬憶高唐。望朝雲縹緲。暮雨微茫。巫山互折。見巫山互折。步巉巖層
累。下臨滄溟。驚惶洪波搖蕩。忽見鼉鼉乘浪。似迢遙乘槎海畔。把碣石相望。

〔前腔〕重岡獨立芒芒。虎谷風悲。鶴巢雲障。千巖積翠。問仙游遺躅。羨門高曠。清賞依稀筍籟。萬壑松聲傳響。乍驚心憑高望遠。頓生惆悵。〔末〕主上有旨。卿賦高唐景物。摹寫殆盡。恍然在目。卿當再以神女姿貌爲孤賦之。孤將鑒賞。〔生〕臣宋玉再聞陛下。

〔前腔〕雲翔翠蓋幢幢。繡服輕盈。珮環飄颺。更修蛾豔質。遐想一天嬌樣。歡暢。褰幃偷御。待把情緣相向。恨須臾遷延悵別。又增淒愴。臣更有藹藹之言奏聞。自知

冒瀆天聽。望陛下赦臣萬死。

〔前腔〕君王聖壽無疆。宵旰惟勤。武修文講。念苞桑遺訓。千載自當懲創。博訪遺賢逸士。待取巖廊弼亮。鎮金湯千秋永固。伯圖雄長。〔末〕奉聖旨。宋玉詞華穎利。

思致幽閒。更兼頌不忘規。孤不勝嘉悅。即日除授上大夫之職。撤殿前鹵簿之半。送歸私第。叩闕謝

恩。〔生〕千歲千歲。〔末〕宋大夫。你

〔袞遍〕文章豹霧藏。文章豹霧藏。羽翼鵬搏上。烏帽宮袍喜氣如春盎。不負螢窗十年相傍。渾一似趁龍門。逐桃花浪。〔生〕

〔前腔〕風塵久自傷，風塵久自傷。雨露誰承望，自分淒其敝跡居顏巷。一旦遭逢天恩浩蕩，從今去忝臣鄰，慚無狀。〔二旦扮宮人持節隨衆吹打上〕

〔尾聲〕天街一派笙歌響，綺羅嬌豔簇紅妝。看取歡聲載道傍。

第二十三齣 巧詆

〔天下樂〕〔小生扮襄王上〕清瑣詞臣自異才，揮毫終日侍蓬萊。讒言無那多紛擾，載鬼車中莫浪猜。寡人前日因宋玉賦高唐一事，見他才高倚馬，文擅雕龍，體貌閒麗，微詞悅入。寡人心下不勝喜悅，遂拜爲上大夫之職。昨日聞得國中士民多有不譽，未知何故。且待登徒大夫到來，問他一番。

〔粉蝶兒〕〔淨拄杖上〕槃跚難挨，羞殺我職居槐宰。我登徒履被宋玉那斷，佔了這許多便宜。心下十分氣恨不過，前日意欲央浼唐景兩人去楚王跟前謗他一場，不意那兩人又是護着他的。如今國人都不要獎譽他，乘此機會，不免進見楚王，倘然問及，就把這些言語添些作料，誹謗他一場。楚王一定聽信，豈不是將計就機，來到宮門，且自進入。〔見介小生〕寡人正有一言欲問大夫。

〔淨〕不知有何聖諭。〔小生〕自寡人拜宋玉爲大夫之後，那國中士民也無甚議論麼。〔淨〕主公不問臣，臣不敢亂言。主公今日既問及下臣，臣方敢實告。臣自先朝以來，受前王培植之恩，主公寵綏之惠，每思奮不顧身，報效萬一。豈知主公近日聽信唐勒景差言語，竟將國中一個上大夫之位，輕輕把與那鰥生做了。近日來那民心多有不服，議論多有不平。主公還當三思。〔小生〕那士民他的意思怎麼不平。〔淨〕待臣奏上。

〔八聲甘州〕君王聽告，他道那書生穢行，怎佐清朝。〔小生〕寡人只愛他才學。〔淨〕縱區區一技，料他每只抵鉛刀。你垂清空自動三接，他遺臭難教冠百寮。聽喧囂，定不是讒口嗷嗷。

〔前腔〕〔小生〕他在詞曹，獨擅名高，更翩翩弱冠，俊偉丰標，喜鳳毛飛彩，怪紛紛鼻吻爭交。身依玉陛充僚佐，才彥金華壓俊髦。〔淨〕主公雖是這等稱美他，臣想起來，不是唐景二大夫這樣沒眼睛的人，料他一世也不得番身。〔小生〕大夫不是這等說，他是英豪。

肯終教困老蓬茅。〔淨背介〕聽主公說的話，都是偏護着他的，怎麼是好。

〔前腔〕我心焦。他語話蹊蹺。算將來無計傾奪伊曹。有計了。〔轉身介〕主公。你只知其一。不知其二。你但曉得宋玉好人才。好學識。你還不知他的手段哩。〔小生〕他有何不好處。〔淨〕

那東鄰有女。終日裏去目挑心招。〔小生〕大夫。這是閨門曖昧之事。你怎麼曉得。我知道了。

多敢是那宋玉居你上位。你心下有些不平麼。〔淨〕臣怎敢有此心。臣只願夔龍濟濟集鳳沼。怎敢做鳩鳥栖栖妬鵲巢。臣還有一句話。芻蕘更須防宮禁游遨。

〔前腔〕〔小生〕他一朝爵位崇高。妬嫉叢生。頓成讒巧。大夫。若說那東鄰一事。這是佳人才子。論鍾情千古難遭。他鹽梅自是商家佐。豈向花柳寧甘濮上嘲。思着似無端尺水頓起波濤。登徒大夫。你說的話。寡人已知道了。寡人還要細訪。你且請回罷。

〔淨〕君王不用太猜疑。

莫信狂生擅滑稽。

〔小生〕混濁不分鱧共鯉。

水清方見兩般魚。

第二十四齣 秋閨

〔祝英臺近〕〔旦上〕玉笙寒。雞塞遠。歲月已偷換。〔小旦〕曉睡初醒。捲幔淒風

亂〔合〕試看寂寞鴛衾。蕭條珊枕。愁對洞房深院。〔羅敷令〕〔旦〕轆轤金井梧桐晚。幾樹驚秋。畫雨和愁。百尺蝦鬚上玉鉤。〔小旦〕瓊窗望斷雙蛾皺。回首邊頭。欲寄鱗游。九曲寒波不泝流。〔旦〕秋英。你看我日來愁病多端。不曾有個舒展眉頭的時節。如今又是暮秋天氣。好生傷感人也。〔小旦〕正是小姐。你這幾日精神意緒。比往時大不同了。你是千金之軀。況老夫人只靠你一人。還該消遣些才是。不要這等苦苦的煩惱。

〔祝英臺〕你看玉容消。金鏡冷。鬼病日慄慄。膏沐倦施。繡線慵拈。盡日畫簾羞捲。庭院看霜林無火常燃。暮靄非風自展。向瑤階乘閒緩步。共伊消遣。〔旦做下

階倦介〕

〔前腔〕慵倦步難移。心易懶。生怕倚闌干。秋英。我思量那時節呵。徑草蒙茸。苑柳參差。到如今又見井梧飄亂。〔小旦〕呀小姐。我到忘了。聽得外面說那宋秀才。獻甚麼高唐賦與襄

王。襄王喜他。竟與他官做了。〔旦〕有這等事。你不說。我也還不知道。乖蹇。他那裏宦海沈淪。我這裏愁城遙遠。淚雙懸。淒迷心折。夢遙魂斷。

〔前腔〕〔小旦〕休怨。你惜風情。儂月思。顛顛也徒然。小姐。我說個比方你聽。不要說世上的人有離合悲歡。就是那守寡姮娥。斟酌天寒。一任廣寒無伴。小姐。你不要怪我說。你無端空懷着彩鳳文鴛。他料不想孤鸞哀雁。笑伊家空自翠鈿欹墜。帶羅消滅。〔旦〕秋英。你說那里話。你還不知我的心事哩。

〔前腔〕堪嘆。訴衷情。追往事。哽咽不能言。只指望做連理同芳。比翼交歡。誰料做斷猿啣怨。〔小旦〕小姐。你不要癡迷。富易交。貴易妻。這是人情之常。那宋秀才一定忘記你了。〔旦〕休言。他雖是無意留連。我寧自有心縈戀。最堪憐。西樓夢冷。角聲淒斷。〔小旦〕

這個不難。他前日是窮秀才。老夫人一定不肯與他。如今做了官。就把小姐與他。也不辱沒了我家門風。我就向老夫人跟前去說。〔旦〕雖然如此。我與你如何開口。且待另日。再作計較。我與你且進去罷。

〔旦〕秋來景物倍傷心。

悵望佳期淚滿襟。

〔小旦〕但願應時還得見。

須知勝是岳陽金。

第二十五齣 解嘲

〔掛真兒〕〔小生帶內監上〕萋菲由來成貝錦。頓教人盡日沈吟。朝罷深宮。人間宴處。且自向伊詢問。畫虎畫龍難畫骨。知人知面不知心。寡人向日因愛宋玉才華。遂拜他爲上大夫之職。昨日聞得登徒大夫說他體貌閒麗。口多微詞。又性好色。願王勿與出入後宮。寡人想起來。那士無賢不肖。入朝見嫉。宋玉才名頗盛。寡人寵愛方深。那登徒子一時媚嫉。此亦人情。今日退朝無事。不免召宋大夫到便殿中。問他一番。免我猶夷。辨他心迹。有何不可。內侍傳旨。宣宋大夫進便殿。〔衆傳旨介〕

〔西地錦〕〔生冠帶上〕日落禁林清影。風搖內苑秋聲。暫歸休沐有餘情。又赴九重恩命。〔進見介〕主公。臣宋玉見。〔小生〕大夫少禮。大夫。昨日有一人訴卿於寡人。今日特召大夫前來。面質其事。〔生〕臣啓主公。不知訴臣者何人。所訴者何事。〔小生〕訴卿者卽登徒大夫也。寡人心下未有所決。

〔白練序〕因此狐疑處。把此事應須辨假真。道你多洵美。那更巧言便佞。狂生

辱薦紳。況醉月迷花不事君。他還對寡人說。須詳審。願隄防。莫使往來宮闈。

〔醉太平〕〔生〕蒙問。把前言乍省。似妖狐射影。市虎驚心。縱微臣落拓。豈肯自甘無行。〔小生〕大夫。你既不好色。頗亦有說否。〔生〕那東鄰佳人。三載浪窺臣。尙兀自未成心允。那登徒子之妻。貌如嫫姆。無鹽。登徒子悅之。使有五子。王熟察之。誰爲好色。望君王垂憫。把中山匣底。竟成畫餅。

〔白練序〕〔小生〕令人怒感生。他奸謀恣行。恨鴟梟惡吻。把鳳雛喧憎。况你才名振楚城。更簪紱新承寵渥深。寡人知道了。他要相凌併。故把這脣鎗舌劍。陷你在錦陣花營。叫宮門傳旨。登徒子妬賢嫉能。欺君罔上。徒念彼老臣。姑免究治。着革了職。冠帶閒住。〔衆傳旨介小生〕請問大夫年庚幾何。曾娶妻否。〔生〕臣年逾弱冠。尙未婚娶。〔小生〕那東家之子還在否。〔生〕大王聽啓。

〔醉太平〕那娉婷。鍾情特甚。誓共姜節操。敬俟朱陳。〔小生〕大夫一向也知他起居否。〔生〕而今憂憤。鎖深閨。自憐孤另。〔小生〕大夫可也念他麼。〔生〕傷情。空勞魂夢。

逐行雲。誰念取枕餘衾剩。從前追省。一聲河滿。雙淚珠傾。〔小生〕大夫。此是甚麼人

家女子。〔生〕就是季相國之女。名爲清吳。〔小生〕原來是季相國之女。那季相國呵。

〔宜春令〕從先世號老臣。痛乘箕聽鈞天帝庭。想蕭條蘭玉。班衣冷落。踟躕影。試看那金屋嬌姿。須配取玉堂才俊。〔合〕歡慶。管教你便諧秦晉。

〔簇御林〕〔生〕分離去。歲月更。悵經時。別恨增。似分飛落雁。惟孤影。把三生自擬無憑准。今日笑顏生。君恩似海。成就百年姻。〔小生〕大夫。此事不難。寡人明日親爲大

夫主婚。卽遣景大夫。往彼作伐便了。〔生〕多謝聖恩。

〔生〕浩蕩天恩敢自忘。

小臣何以報君王。

〔小生〕不須玉筯愁千縷。

會見銀河度七襄。

第二十六齣 反目

〔霜天曉角〕〔丑上〕終朝氣憤。難遣心頭恨。幾度暗中思忖。冤家怎得離身。自

家登徒履的妻子便是。可恨我那老公。本等好好一個人。只因看上了那季小姐。朝也教我送下飯。

暮也教我送茶果。只指望拐得他上手。馬扁他一手錢財。誰知那小姐到與那宋玉好了。又去顧了近處光棍。要捉拿宋玉。不知被一個甚麼人。竟把一隻腳來砍傷了。前日又到楚王前要去排陷他。又被他使個暗箭。到把我老公官爵削了。如今想將起來。我終不成只隨着這蹺老叫化子。意思要改嫁一個。只是一時難說。早上思量得個計策。叫他出來。尋個頭由。鬧他娘幾場。假意要死要活。他纔我不過。也只得隨順我。那時逼他寫了休書。別嫁一個。倘或好似他。卻不是下半世快活。〔叫介〕老官在那裏。來與你說話。

〔前腔〕〔淨拄拐上〕命途困窘。殘疾誰憐憫。天網恢恢。眞可信。須知禍福由人。〔見

介丑作怒介淨〕奶奶。我正在那裏脚疼。你又叫我做甚麼。〔丑〕你說脚疼。我還心癢哩。〔淨〕奶奶。

你怎麼心癢。〔丑〕怎麼心癢。想我當時嫁你。指望魚水同歡。圖你一生受用。誰知你這敗子。貪花戀色。不顧家園。今日趁得十兩。也去尋小娘兒。明日括得五兩。也去尋私窠子。近日甚麼來頭。又去思量這東鄰季小姐。叫我與他往來。三日一小送。五日一大送。拱去與他。不匡那小姐自與宋玉一心一意。拱去的東西。轉手就拿與宋玉受享了。前日又被甚麼人哄騙。說季小姐來與你睡。等到三更。

半夜不知被個甚麼人。把一隻脚竟自斫傷了。及至到楚王面前。要誹謗宋玉。指望出口氣。又被他使個暗箭。楚王到把你官爵革了。閒住在家。如今官又沒得做。銀子又沒得用。〔諱哭介〕看別個婦人嫁老公。終朝羅綺。每日珍羞。好不快活。我如今這等苦惱。看了他們怎不心癢。〔淨〕奶奶。我登徒履也要做好漢的。難道到要這等。只是你我命該如此。常言道嫁雞逐雞飛。也說不得了。〔丑〕呸。虧你不羞這醜臉。甚麼嫁雞逐雞飛。我原是個鳳皇。到嫁了你這個逐瘟頭。如今思量起來。我真過不得日子。沒奈何我到要問你討個長短。〔淨〕奶奶罷麼。我有甚長短。與你過得一日。是兩個半日。〔丑〕我這等個聰明伶俐的人。跟着你這貧子過活。好苦。我如今只有兩條門路。〔淨〕那兩條。〔丑〕你問我那兩條麼。刀上一條。索上一條。與你說了。〔淨〕奶奶。這個成不得。你若死了。你家告起人命。我到去喫官司。〔丑〕不要。如今我到有個商量。〔淨〕甚麼商量。〔丑〕你如今寫下一紙休書。說登徒履不能養育妻子。情願憑伊改嫁。誓不反悔。你到只當出脫了我。〔淨〕咳。奶奶。你如今要嫁。也只由你了。只是我好恨。〔丑〕你敢恨着我。〔淨〕我怎敢恨奶奶。

〔一盃花〕我恨只恨他們忒狠。到如今教我毀體殘形。拐棒終朝不離身。顛連

困苦誰來問。看田園盡傾。囊橐又貧。奶奶好了。我有計了。〔丑〕你若計。我依舊隨你。〔淨〕與你向卑田院裏。做乞食沿門。〔丑〕啐。若要叫化了。我也不消嫁了。〔淨〕我這等個躑子。不去叫化。有些甚麼做得。

〔前腔〕〔丑〕你平日裏心高氣硬。笑伊家今日無計謀生。你日常間拱的甚麼張員外。李舍人。何不去與他們求乞些。也好過活。何不搖尾乞憐向朱門。將來也可資身命。

〔淨〕咳奶奶。若是好手好脚的人。還有人用得着。如今走在人前。先自厭人了。還有那個來採着我。

〔丑〕我心中自評。教人怒增。只是別嫁個去罷。不是我忘恩負義。也只是各自尋門。

〔丑〕笑你平生心太欺。逢人只要落便宜。

〔淨〕如今禍到臨頭日。追悔從前也是遲。

第二十七齣 賜婚

〔似娘兒〕〔末扮景差引衆上〕啣命出彤庭。爲二姓契合朱陳。佳人才子由來稱。赤

繩繫足。朱樓合盞。不須白雪窺臣。〔衆〕稟老爺已到季府門首了。〔末〕快通報。〔衆介雜上〕
荒徑頻年無客到。衡門今日爲誰敲。〔見介衆〕景老爺要見你夫人。〔雜〕夫人有請。

〔海棠春〕〔老旦上〕門檐雀網生。車馬誰相問。〔相見介末〕夫人請上。下官有一拜。〔對拜

介〕當年閨壺重賢媛。相國家聲舊所傳。〔老旦〕寂寞自甘居陋巷。喧闐何意駐高軒。請問大人。今日枉顧。不知有何見諭。〔衆〕夫人尙不知道。我主上近因夫人鄰居宋玉秀才。獻高唐神女二賦。主上不勝喜悅。竟拜爲上大夫之職。昨日召至便殿議事。因問他婚姻一事。那宋大夫年方弱冠。尙未成婚。主上聞知宅上小姐。雖自破瓜之年。未遂摠梅之願。今日特遣下官造府求親。伏乞慨允。〔老旦〕寒門屢受國厚恩。但恨夫君不祿。未能圖報涓埃。今小女葑菲之姿。又承聖眷。但恐宋大夫翩翻新貴。未必肯顧蓬茅。〔末〕夫人休得謙遜。

〔瑣窗郎〕伊家奕世簪纓。在先朝號老臣。才郎琰琬。淑女娉婷。喜百年姻眷。更九重恩命。〔合〕論蒹葭倚玉。總是三生定。親執伐。奉君命。

〔前腔〕〔老旦〕嘆孀居獨守蓬門。荷明君特賜婚。感皇恩浩蕩。天使殷勤。不必

玄黃稠疊。把紅絲爲聘。〔合〕論蒹葭倚玉。總是三生定。蒙執伐。謹依命。

〔末〕天語恭承出鳳樓。

管教織女會牽牛。

〔老旦〕婚姻自是前生定。

不是天緣莫強求。

第二十八齣 尋真

〔外道妝上〕回看世事轉無憑。十載沈酣夢始醒。欲訪仙緣何處路。寒山半出白雲層。自家荆欵飛是也。想俺四海論交。半生任俠。擊劍喜攻長短。讀書獨愛縱橫。報仇雪恥。曾從知己酬恩。問舍求田。不解時流生計。賭命聊憑一擲。視若鴻毛。學敵寧止萬人。心存虎視。到如今清流難俟。白首無成。回想塵緣。恍如夢幻。先年曾記得那劍仙對俺說。他年若肯相從。可到終南尋訪。昨日已別了俺故人宋兄。棄了家業。竟往山中學道。你看行了數程。只見松楸遠近。但聞嘯虎啼猿。墳塚高低。惟有臥麟夢鶴。雲迷野徑。風撼長林。天色又早將晚也。

〔北〕犯江兒水。斜陽西墜。昏慘慘斜陽西墜。向仙源尋真侶。任龍蛇擾攘。拚鹿豕依棲。脫紅塵如敝屣。白髮早成絲。青山學息機。沈瀆餐饑。辟荔爲衣。伴盧

敖向三山投杖履。塵凡夢稀。從今把塵凡夢稀。玄蹤心契。直待要玄蹤心契。俏
芒鞋踏烟霞入翠微。一路行來。仔細想那世人。都爲這一個情字。陷了多少英雄好漢。卽如俺那
宋兄。祇爲着季清吳一人。不知費了多少心機。受了多少幽怨。若不是俺荆飲飛報復於前。楚王成
全於後。那宋兄寧免終身抱恨。如今縱是才郎女貌。百年相守。想起來那光景也只有有限了也。

〔前腔〕風流佳麗。想他每風流佳麗。只道美恩情能到底。便人巢金屋。醉倚瓊
卮。到頭來一夢裏。白日疾如馳。揮戈總是癡。怎如俺紫府神棲。丹竈塵飛。駕蒼
螭聽雲瑤仙吹起。滄桑事非。任從他滄桑事非。劫灰陳迹。那管他劫灰陳迹。把
百年間好光陰。只抵一局棋。
〔北清江引〕山圖赤斧堪爲侶。笙鶴冷風起。世外御鴻濛。日下飛鳧鳥。望蓬萊
幾千重。只咫尺。

第二十九齣 團圓

〔夜行船〕〔生上〕兩袖天香歸路晚。啓屏山烟裊龍涎。才子風流。佳人月貌。荷

君恩喜諧姻眷。下官前日荷蒙聖恩。賜婚季府。數日前遣聘去了。擬定今日黃道吉日成親。又蒙

主上撤殿前儀仗鼓吹。賜我迎親。適才辭謝主上回家。天色已晚。已曾分付當值的排設酒筵。不知完備未曾當值的那里。〔雜上〕十二朱樓月正圓。清蛾皓齒列璠筵。畫堂今夜人如玉。疑是壺中

一洞天。稟老爺酒席俱已齊備了。〔生〕既如此。分付執事人等都在府門伺候。一面喚賓相承應。

〔雜應介〕

〔小重山〕〔老旦上〕佳婿乘龍歸禁苑。仙姬跨鳳下瑤天。〔旦上〕鈿車翠幌擁鳴

鸞。〔小旦上〕風光好。喜共結良緣。〔雜〕稟老爺。季老夫人送夫人到門了。〔生接介丑扮掌禮

隨意喝生旦拜介〕

〔山花子〕玉堂學士聲華遠。更看金屋嬋娟。度春風歡娛百年。星河鵲駕高懸。

〔合〕問相逢三生有緣。璠樓繡幄列管絃。蘭堂桂室排綺筵。孔雀屏開。絲幙

紅牽。

〔前腔〕〔生〕想禪宮乍覩春風面。料今生恩愛徒然。覩春燕青衫泪沾。九重綸

綉恩偏〔合前〕

〔前腔〕〔旦〕追思往事多悲怨。儘拚拆散雙鴛。喜今宵缺月再圓。鳳簫吹徹雙仙〔合前〕

〔前腔〕〔小旦〕佳人玉貌真堪羨。更才郎藻思河懸。似名花連枝合歡。兩行繡被花牋〔合前〕

〔紅繡鞋〕〔衆〕洞房笑語喧闐。喧闐。一輪月上中天。中天。清光今夜爲人圓。從此去。錦堂歡。祈百歲。結良緣。祈百歲。結良緣。

〔尾聲〕人生如露還如電。且共時人樂少年。抵多少悲歡都只在斷簡殘編。

尊前有酒喜如澗。暫爾高歌玩物情。

白雪舊知成寡和。清商聊且度新聲。

春蕪記終

琴

心

目錄

- | | |
|------|------|
| 第一齣 | 家門始終 |
| 第二齣 | 相如倦游 |
| 第三齣 | 文君新寡 |
| 第四齣 | 設館都亭 |
| 第五齣 | 王孫作釀 |
| 第六齣 | 孤紅窺宴 |
| 第七齣 | 挑動琴心 |
| 第八齣 | 私通侍者 |
| 第九齣 | 臨流守約 |
| 第十齣 | 夜亡成都 |
| 第十一齣 | 臨邛夜追 |

第十二齣 相偕抵舍

第十三齣 漢宮春曉

第十四齣 家徒四壁

第十五齣 杜門謝客

第十六齣 當墟市中

第十七齣 勉撥房貲

第十八齣 歸途遇寇

第十九齣 得意薦揚

第二十齣 誓志題橋

第二十一齣 陽關送別

第二十二齣 給管求文

第二十三齣 空閨永嘆

第二十四齣 持節錦行

第二十五齣 奸臣誤國

第二十六齣 牛酒交歡

第二十七齣 金閨榮返

第二十八齣 招安絕域

第二十九齣 花朝舉觴

第三十齣 唐蒙設陷

第三十一齣 文君信誑

第三十二齣 相如受紿

第三十三齣 空門遇使

第三十四齣 青囊阻嫁

第三十五齣 獄中哀泣

第三十六齣 廷尉仰窻

第三十七齣 茂陵春色

第三十八齣 卓老覓女

第三十九齣 長門望月

第四十齣 吟寄白頭

第四十一齣 賞金買賦

第四十二齣 錦江曉發

第四十三齣 片帆追送

第四十四齣 魚水重諧

琴心記

明孫梅錫箸

第一齣 家門始終

漢武帝前席求賢。

卓王孫杜門辱婿。

倦相如終遂題橋。

另文君不孤絨句。

〔月下笛〕〔末上〕屈指少年。無端過了幾番寒食。流光可惜。白駒馳。錦梭擲。頻教燕子留春住。儘力留他不得。但黯然春去。落紅成陣。暮雲凝碧。無那新愁積。把才子文章。美人顏色。全憑翠管。巧將一段春織。風流寫入宮商調。勸取騷場浪客。願休辭潦倒。看俯仰古今陳迹。今日是滿座風流才子。四方儒雅先生。喜聽錦囊佳句。願聞白雪新聲。所演的乃是相如琴心記。聽道家門始終。

〔滿庭芳〕蜀郡相如。臨邛卓氏。風流兩愛琴聲。當筵挑動。私約去都亭。可奈家徒壁立。勉當壚滌器營生。一旦題橋奮志。詞賦動朝廷。時來君寵渥。持旌奉

使太守郊迎從此王孫獻食諂奉文君不道姻緣寧貼白頭吟尙自伶仃感長門千金一賦重洽舊時情。

第二齣 相如倦遊

〔高陽臺引〕〔生上〕鵬困圖南。雖傷逐北。命乖時蹇難說。一點羈心。功名兩字

消滅。願言守志蓬蒿裏。奈秋風漸凋華髮。但淒然臨瑟羨竽。背燈彈鋏。〔鷓鴣天〕

有志能令氣不羣。無緣空自積殷勤。縱橫已廢魚腸劍。涉獵難消烏篆文。愁白日。靚青雲。長安何處是明君。虛將兩淚滄江上。葉落蕭蕭不可聞。下官司馬長卿。蜀郡成都人氏。父母愛之。字曰犬子。有懷蘭相如之爲人。故自更名相如。久矣椿萱雙逝。傷哉琴瑟孤盟。曩歲以貲求郎。得爲武騎常侍。聊欲攄蘊藉於當年。陳經濟於世主。爭奈景廟好談黃老。擯薄名儒。一時詞賦賢才。多歸梁國。遂謝病西遊。與諸生同事。雖幸蒙知遇之隆。尙未逞逸羣之志。不意孝王捐館。賓客解散。挾綃者懷珠自悲。曳裾者褰裳濡足。良可嘆也。思欲退歸田園。徒苦蕩析家業。江湖不能遂其志。廊廟弗克展其才。命也何尤。幸有相知王吉。筮仕臨邛。昨日修書來邀。不免暫過一回。再作區處。正是雲淡水平烟樹簇。

鴈飛汾上不宜秋。已曾分付青囊。收拾行李。想已完備。青囊何在。〔丑上〕翠篋乘黃卷。青囊伴綠琴。蕭然何處去。千里覓同心。相公行李已備。就請起程。〔生〕青囊你曉得此行呵。心中有多少不平之氣。那一件所感之事。有觸之景。不關上愁來。〔丑〕相公怎見得。〔生〕你不知道。

〔高陽臺序〕命壓孤身。愁深雙淚。英雄到底埋沒。有用文章。番成無限悲切。酸咽。空教幾度秋風也。向蕭條夢裏分說。這早晚塵途。怎如他朝臣待漏。玉珂金闕。

〔丑〕相公。這功名事怪你不得。

〔前腔〕堪噎。紫閣垂紳。朱門授簡。當時已慚裾曳。何況飄蓬。轉眼又成胡越。愁殺。那更路渺雙親也。論姻緣未諧。閱閱。把一生合受團圓。變爲殘缺。〔生〕青囊。你看這景色呵。

〔前腔〕銷骨。短劍無銜。孤琴罷響。荒村野店黃葉。一點征鴻。愁共遠天俱絕。心裂。貂裘已破黃金盡。這凍魂仗誰醫熱。怕從今無限淒涼。恨深啼鴂。

〔前腔〕〔丑〕相公。休怯。你病入凋梧。貧依衰草。一時計窮途拙。且自藏珍。張儀尙

存餘舌。須達終還有箇與我提攜起。成就了無心事業。那時節雲翼飛騰。身名雙絕。

相公天色已暮。古道無人。快請趨行前去。

〔尾〕〔合〕臨邛遠在孤雲末。天邊歸鳥隨雲疾。人去雲空和鳥沒。

故人書寄北風遙。

千里心旌望去軺。

今日夕陽衰柳畔。

一鞭秋色馬蕭蕭。

第二齣 文君新寡

〔梨花兒〕〔淨扮女婢上〕春蘭喫苦常叫天。夏蓮不見男兒面。秋菊心酸知幾遍。

嗟。冬梅較我還輕賤。自家卓府中使女山茶便是。因老相公著我每在後花園中輪班打掃。

只得在此伺候。如何同伴的不見到來。呀。話猶未了。來得恰好。玉蘭姐已至。〔丑上〕

〔前腔〕梅香似我天下難。春心一發無由散。從入朱門愁不換。嗟。知心常似天涯遠。〔淨見譚介丑〕閒事休纏。今日秋風颯颯。必有殘葉堆階。怕老相公到來遊翫。不如乘此打掃。

一回何如。〔淨〕玉蘭姐言之有理。我和你到碧梧亭一帶掃去來。〔掃介〕

〔清江引〕碧梧亭下殘枝滿。擁雪羅裙短。行過木樨軒。重到芙蓉館。向池頭戲鴛鴦。愁無伴。玉蘭姐。這壁廂打掃已完。再到丁香亭去來。你看幽香雲澹。空翠烟霏。好生景致也。

〔丑〕是好景致。如今待我掃。

〔前腔〕水晶簾額丁香館。挽處游絲斷。輕靄碧林重。斜日蒼苔滿。過欄杆。怕風來。吹頭亂。山茶姐。我和你打掃已完了。倘那女娘公子到來。你卻奉承那一個。〔淨〕我喜那似娘兒

鬪百花。只見滿宮花。滿路花。一庭花。後庭花。錦上花。雨中花。一枝花。一叢花。金錢花。木蘭花。蝶戀花。

解語花。花開多少懷春女。難道山茶不惜春。〔丑〕好好。你春興發作了。〔淨〕休取笑。你卻奉承那一

箇。〔丑〕我喜那醉公子惜餘春。只見錦堂春。漢宮春。月宮春。鳳樓春。玉樓春。武陵春。絳都春。沁園春。

寒垣春。燕臺春。上林春。春來多少貪花漢。難道玉蘭不是花。〔淨〕好好。我的春興發作。你的花心也

動了。〔內作鴉鳴介丑淨驚介〕呀。不好了。去了罷。怕老相公到此。惹出閒事來。老天。老天。莫使鴉鳴

鵲噪。早成鳳友鸞交。〔下〕

〔西地錦〕〔旦上〕舞鸞袞翠減。啼珠鳳蠟紅殘。畫屏空自遠湘山。人共楚天俱

遠。香肌縮處損纖腰。欲減羅衣寒未消。風觸珠簾自無賴。葉喧涼吹漸蕭條。奴家卓氏。小字文君。同胞弟妹。只有卓勝文姬。自身叨長。毓秀閨房。初憑爹爹諾。竇太后之姪。竇圭爲妻。不幸芳年十七。未字而寡。冰蘖之操。雖執之甚堅。奈萱親既逝。空闈無聊。春鶯秋燕。甚難爲情。隨身侍女雖衆。僅足以供使令。只有孤紅小妮子。從幼伴奴習些針黹。讀些典籍。悶來閒話。頗似知音。今日爹爹在後園賞桂。邀我同遊。不免喚他把鏡兒來。恐怕髮亂了也。孤紅何在。〔貼上〕惜春常怕花開早。厭漏偏愁月上遲。咬碎羅衫人不識。風情惟有絳唇知。小姐。孤紅萬福。〔旦〕孤紅免禮。〔貼〕小姐。你爲何這幾月玉減香消。花慵月懶。敢有甚麼心事來。〔旦〕女孩兒家那有心事。〔貼〕小姐。那婚姻大數也。夫婦大倫也。大數固不偶。大倫容可廢乎。況鳳管未逢蕭史。藍橋不識裴航。旣無一夜之恩。安有百年之義。竇郎無緣。一旦捐館。小姐芳姿絕世。妙韻可人。當有名賢爲配。國士成雙。烏得拘拘小節。遂缺陷半生。〔旦〕孤紅言之差矣。忠臣不易主。烈女不更夫。此古聖之言也。豈有未嫁易節。以身殉欲者乎。若老相公知道。就要罪你了。今後決不可如此。我纔喚你。要取鏡兒。可到繡奩中。帶取一枝花朶來。〔貼應介〕照花前後鏡。花面交相映。莫作鏡中花。霧隔頭難並。〔暫下取鏡上〕能照千鬢髮。難諳一片

心。小姐鏡兒在此。〔旦照介〕

〔二郎神〕雲鬟亂。苦愁容。對菱花獨看。恨倦倚纖腰。春未半。使秋光先到。黃花瘦入朱顏。竟何事。鈿蟬零落遍。鳳釵橫。一朝分散。鏡兒羨甚麼團圓。怪人間到有孤單。孤紅。你看我呵。綠鬢易銷春思淺。青絲難掠晚妝殘。真好苦也。〔貼〕小姐。你臉如芙蓉。眉如

遠山。肌膚柔滑如脂。這等芳容。難道終身孤另。

〔前腔〕幽閒。春山橫黛。秋波蘸眼。那映水芙蓉凝嫩臉。奈淚珠拋盡。青絲一味蕭閒怨。結髮今鬆愁鬢寬。知甚日赤繩重綰。鏡兒少一箇畫眉郎官。使清光瘦減。嬋娟。小姐。可憐你月思盡淹秋水下。風情卻老鬢雲間。待何日揚眉對月。櫛髮乘風。〔旦〕孤紅。我忽然身子不快。不去後園遊翫了。〔貼〕既不去呵。那琴是小姐所好的。何不以此自娛。〔旦〕不要。

〔集賢賓〕鍾郎已死虞舜遠。知音寡矣羞彈。〔貼〕琴既不用。看書如何。〔旦〕不要。識字番令愁莫展。怎看得書中題怨。〔貼〕繡牀上完些女紅如何。〔旦〕也不要。蓮花竝榦。怎繡得心中絲斷。〔貼〕小姐。俱不好呵。待奴家吹簫一曲如何。〔旦〕也不要。秦樓畔。聲裂處。鳳

來人散。〔貼〕小姐俱見差了那琴兒。

〔前腔〕朝飛雉縵聲固遠。須知九嶷幽恨堪憐。書中意呵。不是淫詞和浪簡。終未可午窗拋倦。女紅呵。休認做閒拈針線。看眼底鸞迴鳳轉。那簫呵也何妨。銀橋畔。明月夜玉人教遍。〔淨副淨上〕靜臨蘭檻卸頭時。鈿葉菱花錦帶垂。欲勸主娘花下去。膽瓶先贈木

犀枝。小姐。老相公在西園賞桂。等候多時。又著我們來請。望乞就移蓮步。〔旦〕我身子不快。不去。〔貼〕小姐。嬌體雖可惜。父命不可違。孤紅與你久滯深閨。也帶挈耍一耍。〔旦〕既如此。勉強走一遭。

〔貓兒墜〕綺花似剪。錦步獨承蓮。裊娜腰肢悶不前。蕭蕭梧葉角門邊。〔合〕走遍。直待要歷盡林亭。轉過鞦韆。〔淨副淨〕小姐。快些請罷。

〔前腔〕西園又晚。銀月忽籠煙。絳燭光生碧樹間。花梢珠斗又爛熳。〔合前〕
〔尾〕此行共入天香院。看河漢粼粼碧淺。好一似隨著嫦娥到廣寒。

絳綃風動怯身寒。

行到花間待月看。

漫掩朱扉合金鎖。

不容人倚玉欄杆。

第四齣 設館都亭

〔一翦梅〕〔小生上〕故人寥落寄窮途。音問常孤。魂夢常孤。便鴻曾附數行書。知在成都。知在神都。昔日金蘭誼。今朝雲水遙。如何千里別。能使一心焦。下官王吉。表字祥甫。今爲臨邛縣令。追念故人司馬相如。宦遊不遂。曾作書往邀。如何久無消息。昨夢可喜。想是今朝到也。不免喚吏去問亭長。可曾打掃都亭未。司吏何在。〔副末上〕得諳三尺法。勝讀五車書。告老爺。有何鈞旨。〔小生〕差你到都亭中去問亭長。可曾打掃完備。待司馬相公到時。請在亭中暫歇。就來通報。〔副末〕理會得。相期楊柳天邊客。分付梅花驛裏人。〔下小生〕叫皂隸。著直當老人。整備果酒。都亭伺候。〔衆應介小生〕渭北江東人未見。暮雲春樹獨依依。〔下〕

〔風檢才〕〔淨上〕皂羅袍著來又破。烏紗帽帶來偏大。說起接官心也苦。鎮日間受饑餓。如此卑官不思做。自家都亭長便是。到任不多時。只見上司來往。年紀又大。常例又無。不知受了許多辛苦。前日大爺分付。教我打掃都亭。有鄉里來到。不免伺候一回。呀。一箇提控又

來。畢竟也爲他了。

〔前腔〕〔末上〕要當該非干小可。守房科其實難過。容易二年沒事務。到後來落一箇大使倉官雜職做。恰纔遵大老爺之命。來到都亭。且喜亭長在此。與他作揖。〔見介末〕大老爺差我來問都亭。可曾打掃完備了。〔淨〕提控。你自請看呀。那牌頭也來了。

〔前腔〕〔小丑上〕氣轟轟承牌似火。脚騰騰拿人似虎。事出官差豈是我。孔雀毛不多大。也到令人膽驚破。自家皂隸頭張虎勢便是。大老爺差我來喚直當老人買辦。各處尋他不見。來到都亭前。只都亭長提控在那裏。不免問他一聲。〔見介〕亭長提控。可見申明亭王八老人。〔淨〕那遠來滿頭灰的不是他。

〔前腔〕〔小淨上〕破頭巾枯桑葉補。爛鬚絲綿紗索做。鄉下奔來筋裸裸。媳婦兒極親我。常放公公殺些三火。〔衆〕怎麼喫你殺了火。〔小淨〕難道公公會爬灰。煨媳婦不著的。

〔衆〕卻原來你到是一箇火頭。〔小淨〕休取笑。牌頭。你尋我做甚。〔小丑〕大老爺著你整備果酒。在此等鄉里到來。〔小淨〕這箇有。〔小丑〕也看我與外郎相公在此。你兩人請我一請。〔淨小淨〕就到

酒肆中去〔合〕

〔前腔〕買鋪陳好歹賺箇。齋廩給左右沒數。喫得些兒無罪過。上小樓兩傍坐。逢酒須吞不論大。

偷得官身。

刻些公帳。

大家一醉。

不許留剩。

第五齣 王孫作醪

〔二江風〕〔生丑上〕喜停車已入仙郎縣。政治民安堵。滿城中聲遍。絃歌教化如

東魯。田野草萊除。田野草萊除。公門鳥雀虛。不三年成了彈琴治。〔淨上〕方纔說

大老爺鄉里要到。你看遠遠來的莫不是他。我且問那相隨的人。便知分曉。〔問丑介〕你家相公可

是大老爺鄉里。〔丑〕正是。你問他怎的。〔淨驚介〕亭長跪見。〔生〕請起。〔淨〕請相公在亭中少坐。王

老爺就來了。〔生〕曉得了。煩你通報一聲。〔淨〕通報通報。疾忙來到。〔下〕

〔生查子〕〔小生衆上〕官況托冰壺。友誼敦芳醕。數載夢中孤。今日樽前聚。〔衆報

介見介生久別丰儀常念一雙鳧鳥〔小生〕自違顏範每懷四海交情〔生〕祥甫民人社稷已伸仕學之功忠信明察不愧臨民之本聖門三善施以一心可敬可嘉〔小生〕長卿學貫天人暫繫冲霄之翼術兼文武聊羈軼駕之才富貴逼人功名在邇至如小弟薄劣何足爲長者道哉特治水酒一杯與兄洗塵左右將酒過來〔遞酒介〕

〔惜奴嬌〕特進醍醐忝當年舊雨今洗塵塗愁城內願破許多辛苦從來淪落世途君須屈指樽前遍數飛鳧喜能到海雲邊握手舊人相訴

〔鬪寶蟾〕〔生〕追思鮑叔夷吾總交情似水久要如故看乾坤今古有幾人爲伍幸遇當歌豪氣逸橫劍俠心孤且傾壺君須念入秦張祿投朱季布〔小生〕久不奉晤須索痛飲就求一令行酒〔生〕是如此不敢辭〔行令介〕

〔生查子〕〔外上〕身老愛才華座上皆珠履〔末上〕相約駕香車芳草迷遊處卓老先生拜揖〔外〕程先生拜揖適承走使相期同往都亭以拜嘉客柬帖已備就請同行何如

〔末〕領命〔外〕飄飄飛蓋欲訪花行過都亭駕小車〔末〕日暮水聲山色裏書橋烟樹接平沙〔衆〕

告相公。此間已是都亭了。〔外〕進去通報。〔淨接東報介生對小生云〕素不相識。避之如何。〔小生〕二公皆邑中好客之士。相見何妨。請進來。〔衆請見介外末對生云〕久欲登龍。幸茲攀鳳。〔生〕自慚薄劣。何幸光臨。〔外末對小生〕父母大人。久隔鳴琴之教。〔小生〕卓程二公。常懷挾彈之期。〔小生〕討茶介推坐介外末。老漢不敢輕瀆。瞻仰貴鄉里高風。明日聊治一杯奉敘。不知大人心中何如。〔小生〕敬當領命。〔生〕不勞了。

〔錦衣香〕愧陋儒。承枉顧。奈中途餐風露。客病難依。朋情獨負。相招豈敢漫支吾。試看野鶴。始信山懼。〔小生〕長卿。念諸公治具。爲英賢盍簪圖聚。莫使人旁午。殷勤申慕。早求車馬。同行共赴。

〔漿水令〕〔外末〕顧鄙夫樛材遲暮。仰貴客山斗規模。思扳寵澤。賁茅廬。敢僭邀羽從鸞車。如蒙拒。羞蓬戶。林泉無計光生路。惟求晤。惟求晤。高風美度。父母

大人。相傾蓋。相傾蓋。借吹噓。〔小生〕領命。〔外末〕學生就此拜別。早是馬嘶歸路黑。不妨香袖半籠鞭。〔下小生〕學生亦就此暫別。望吾兄息駕此亭。早晚自當躬候。〔生〕既托相知。不勞掛念。

且有大政。就請回車。〔小生〕領命。叫左右分付本亭人役。好生服侍司馬相公。〔衆應介小生〕杯酒追歡心更赤。故人相見眼逾青。〔下〕

〔尾〕〔生〕綠蘼蕪。來路阻。日落空亭聽鷓鴣。此夜臨邛獨睡初。〔下丑〕都亭長。恰

纔的甚麼人。〔淨〕他是本縣富人。常要奉承官府。想是那卓王孫有女在家。要認你相公做女婿哩。〔丑〕難道。〔淨〕委實有箇女兒新寡。小字文君。工容言德無有不備。方纔你挑這一張琴。他也曉得絃上音的。果若配合。卻好夫妻。〔丑〕我沒有老婆。怎生是好。〔淨〕吓。這樣人家。豈沒有箇使女。若得到他家。正是主人喫肉剩。也有骨頭呀。〔丑〕啐。〔生內叫介丑〕來了。

客館相依賴故人。

新知何事遠招賓。

一枝且寄鷓鴣月。

數盞還辭麩米春。

第六齣 孤紅窺宴

〔薄倖〕〔旦上〕楚館雲空。秦樓月小。問玉簫清絕。何方聲杳。翠幃孤夢。碧窗驚曉。〔貼上〕愁無了。奈眼底花殘蝶懶。知甚日春風重到。〔旦〕容如露井桃。命似風

絮花落絮飄揚。共逐東流去。〔貼〕絮好不成綿。花開難結子。誰與問東君。畢竟春誰主。〔旦〕孤紅。你每常時動不離身。今早如何喚你不見。〔貼〕不瞞小姐說。聞老相公大開東閣。廣設玳筵。往召都亭貴客。奴家偷覷一回。那席面好生擺得富貴齊整也。你聽我道來。只見

〔羅裾怨〕鸞笙雜鳳簫。紅牙板敲。羽衣戍削。旋六么。鶯聲宛轉。遶梁嬌也。溼透弓鞋。人傍金盤草。喫的湯品呵。猩脣鳳髓調。猩脣鳳髓調。駝峯絲脰攪。更鱗脯和龍腦。不識那人有何福分。享得我家如此款待也。〔旦〕孤紅。那人有福沒福。與你甚麼相干。要遊玩呵。到不如隨我。

〔前腔〕閒遊十二橋。同攀翠條。看花趕蝶。芳樹梢。紅鸞小扇。恣逍遙也。捲起湘簾。喚醒金籠鳥。相呼玳瑁貓。相呼玳瑁貓。蓬鬆金鳳翹。大家捉餵蜻蜓飽。〔貼背云〕小姐不知。我心中要見的。

〔香遍滿〕彩銷紅袖。不若皂錦袍。共鬪西園草。怎似我將花故與東君拗。覷風流樣子。勝伴俏媼嫵。便心情不恁麼。偏餓眼看來飽。〔旦扯貼介〕丫頭。你春心動了。決

不可如此。我對你說。你如今呵。

〔前腔〕目前雖另。到底有佳招。不似奴空老。見洞口桃花也被他偷笑。恨綺羅香減。眼底春事消。這翠眉封恨。約略知多少。孤紅秋色澄清。趁此光景。去耍則箇。你先去開了角門。待我後來。〔貼應介〕先將金鎖撤。報道玉人來。〔下旦〕恰纔聞孤紅之言。不覺爲彼所動。未免靠晚些兒。悄自堂前窺那貴客怎生人物也。天呵。

有女正懷春

更爾悲秋色

試聽寒蛩聲

獨自眠不得

第七齣 挑動春心

〔小重山〕〔生上〕半畝桐陰秋未衰。淡煙籠雨過。溼空階。阿誰驚起鹿羣開。〔丑

上〕忙報取。邀酒使重來。告相公。卓家又差人在此邀飲。〔生〕你去回報他相公。身子不快。

不來了。就到書房中。抱取綠綺琴過來。試彈一曲。以消旅懷。則箇。〔丑應介〕青鳥不傳雲外信。陽春偏入指中音。〔下生〕天呵。你看這客館蕭條。秋容慘淡。好生悶人也。陰廊畫雜苔花老。廢壁雲深薜

荔寒。〔丑攜琴上〕拍托勾剔。打抹挑泛。小人不知。相公彈慣。告相公。琴在此。〔生〕青囊。我在此撫琴。你去烹一壺茶來。今後卓家人至。可決意回報他。〔丑〕相公。你不去飲酒。計亦左矣。小人聞知他家。有箇小姐。喚名文君。容羞閉月。才擅知音。近日新寡。未曾許配。想是欲招相公爲婿。故此擺下會親酒。〔生〕咄。豈有此理。他是敬我人才。二來王老爹分上。故此相邀。不許胡說。〔丑〕相公。你若不去。待我替喫了。先領他一箇梅香來做老婆。相公又省得去嫖。大家用一用。卻不是兩得其便。〔生〕咄。胡說。快烹茶來。〔丑〕喏。你看我相公外貌雖恭。中心實喜。且潛躲在此。聽他怎麼說。〔生〕這廝所言。倘或有之。就喚王祥甫作伐。有何不可。〔丑偷上〕相公。不消王老爹作伐。聞知小姐好音。若飲酒之時。將機就機。把琴去挑動他。那時或者天作良緣。勾引他逃別處去。也到省出茶禮錢。〔生〕教你烹茶。到來閒話。好打。你去門外伺候。王老爹到時。卽來通報。〔丑應下生〕琴呵。委實是挑動得他。強似央人做媒。莫作嘲風弄月。須知戲鳳調凰。廿載相攜未就。今宵賴爾成雙。

〔駐雲飛〕幸履仙階。一曲冰絃事早諧。了卻烟花債。全仗絲桐在。喙。魘地好音來。調成歡愛。密意深情。願爾多才解。休使雙飛鳳足歪。休使雙飛鳳足歪。

〔西地錦〕〔小生上〕自愧牛刀未解。堪憐鵲操能哀。〔生〕呀。王兄來了。多因滿目雲山隘。悶時獨上琴臺。〔小生〕卓氏待兄久矣。如何不屑一顧。〔生〕委實有恙。非敢固辭。〔小生〕

安有不赴之理。他爲吾兄虛席以待。一座不敢嘗食。因此小弟自來相邀。車馬人從。門外久候。吾兄屈駕枉顧。小弟交誼有光。〔生〕既如此。只得領命。〔小生〕仗劍追游。攜琴訪客。高懷旣展。風月不孤。就命青囊。抱此綠綺。過諸歡宴何如。〔生〕青囊。你抱琴隨來。〔丑應〕只因將進酒。從此罷催茶。〔下〕

〔小重山〕〔外上〕仙客如何阻上台。空教階日轉。半侵苔。〔末上〕前驅擁簪亦虛哉。橫榻處。今夕待誰來。卓老先生拜揖。〔外〕程先生拜揖。老夫代公治具。往召相如。奈何邀之者數四。辭之者再三。適間王父母來。見他不在。只得自往迎之。想是故人。決不忍拒。一定偕來。〔末〕日將旣矣。恐不來了。

〔西地錦〕〔生小生丑衆上〕白馬遙嘶青蓋。朱扉迥映蒼槐。多應賢主勞相待。喜看入座風來。〔衆報介外末見介生〕相如白面。繆承青眼。幸念採薪之憂。少原方命之罪。〔外末〕

無能山野。久慕高風。已幸識荆。又承光賁。〔小生〕諸公景行惟賢。足占美主。〔外末〕父母交游投分。雅稱嘉賓。〔外〕將酒過來。〔遞介〕

〔駐雲飛〕〔合〕涼滿瑤臺。舉目南山入座佳。碧樹凝清靄。丹桂飄香界。爽氣又西來。遠峯橫黛。秋水長天。都映軒窗外。金盞須傾一百杯。彩袖須翻幾十迴。〔玉交枝〕〔生〕碧雲天外。雁飛時黃花已開。蒼山幾點家何在。空憐落日荒臺。暮蟬聲咽多感懷。臨風搔首寬羅帶。〔合〕應暫羈悲秋賦才。且圖盡看花酒債。〔前腔〕〔小生〕垂楊渚外。喜芙蓉貼水乍開。衝波白鷺能無賴。蓼花汀上飛來。天邊紅樹葉似裁。參差遠帶青林外。〔合前〕

〔前腔〕〔外末〕盈空仙籟。聽松風輕飄露臺。鶴鳴江上音何快。相隨玉笛飛來。金風白苧紫鳳釵。清涼同住神仙界。〔合前〕

〔前腔〕〔生衆〕新涼堪愛。月華生清光滿懷。樽前玉樹浮光彩。水沈香遠蓬萊。徘徊醉踏花滿階。夜深秉燭春如海。〔合前外〕司馬先生。請令行酒。〔生〕但求豪飲。照席行。

去〔衆〕領命。〔生〕道逢麴車口流涎。〔小生〕長鯨一氣吸百川。〔外〕白眼仰望無青天。〔末〕長安市上酒家眠。〔生〕好好正是醉鄉深處便爲家了。〔旦上〕玉佩傳情遠。仙香出袖微。寄言江上客。從此覓神妃。奴家聞爹爹相邀貴客。不免到堂前偷覷一回。多少是好。呀。你看他清標應物。如春月之濯柳。英氣逼人。似野鶴之出羣。高才幸遇。雅況難通。怎得臨身。使奴默覲。〔生〕小子更衣就來。〔暫下旦〕你看他下席更衣。是天使然也。不免將聲低咳。使他感意凝眸。〔咳介〕生驚撞見介。呀。這是一陣仙風。〔外〕司馬先生出神那裏去了。〔生〕偶想一句墳典。〔旦〕呀。不好了。爹爹知道。事必敗矣。且潛躲一廂聽着。〔下介〕小生〕長卿你旅況不佳。高情難愜。乞展錦囊。聊揮焦尾。一者見江湖之妙手。二者延賓主之清歡。幸諒素交。勿嫌不揣。〔生〕學生已醉。彈不得了。要與卓老先生借取書齋。暫時少憩。酒醒之後。請教何如。〔外〕就請到栖鳳齋中。我們移席在碧華臺伺候。〔生〕多謝多謝。〔衆行介外〕先生。此間已是小齋。請進則箇。〔生別介衆〕喜見清風吹玉楊。醉看華月上仙臺。〔下生〕青囊帶進琴來麼。〔丑〕琴在齋中了。相公。這牆外樹影參差。峯巒秀拔。想是他家花園了。怎得小姐出來。〔生〕咄。又來花嘴。快出去。〔丑〕喏。明知不是伴。豈敢又相隨。〔下生〕小生本非真醉。只因

席上聞聲。想是文君咳嗽。欲待眼角留情。又恐衆人窺見。思欲將琴挑動。又怕識者猜疑。只得佯醉。借榻書齋。少待更深人靜。那時仗一曲瑤琴。吹到他耳朵裏去。若是委實有情。難道不打動他。我且閒佇一回。再作區處。呀。這是誰人題詠在粉垣上。可奈花陰遮了。不免細看他出來。呀。到是一篇漁父詞。〔旦上〕朦朧淡月雲來去。人間沒箇安排處。滿庭重疊綠苔斑。空留影弔連枝樹。奴因偷覷令客。怕爲爹爹所知。只得潛聽一廂。如今聞他借榻西齋。攜進琴去。未必無心於我。且行到西園牆外。聽那琴中彈出什麼來。〔貼內云〕小姐那裏。〔旦〕呀。不好了。且去哄他睡著。纔好安心出來。正是淡月疎煙凝竹處。有情無奈亂鴉啼。〔下生〕天呵。景致雖好。只是這時分怎捱得過。

〔玉胞肚〕殘砧瀟灑。更寒蟲啾唧暗階。想輕羅扇撲流螢。使烏紗帽側西齋。愁看駭鵲。三飛繞樹去還來。莫似銀河有路開。小姐。你若是不來呵。

〔前腔〕將人廝害。好良宵辜負不才。單枕畔翠被寒生。小屏中碧簾秋來。蕭條宋玉。雲空月暗楚陽臺。枉對燈檠手托腮。你若是在來呵。

〔前腔〕眞憐病客。女娘行風情滿懷。臉上霞暖透酥胸。鬢邊花春滿金釵。沈香

亭畔。朦朧忽轉鳳頭鞋。碧玉欄前獨步來。老天你不要做歹了。

〔前腔〕放些寬債。把月輪雲中暫埋。三通鼓禁手毋敲。五更雞閉口休開。池邊宿鳥悠悠直夢曉光來。月落烏啼慢慢捱。〔丑內云〕相公夜深了。睡一睡罷。〔生〕且去發

付他。再出來伺候。未爲遲也。

美人來不來。

今夕爲何夕。

第八齣 私通侍者

〔霜天曉角〕〔旦上〕珊瑚鉤蕩。悞觸冰絃响。驀地偷開錦帳。琴心遠遍檀郎。銀

潢耿耿霜稜稜。可憐線斷風簷箏。齋中有人睡未起。羅裙窄地潛蹤行。奴因貴客丰儀。春心飄動。聞知借榻西齋。欲到那廂潛聽。又被孤紅驚喚。一時春思難降。恰纔脫得身來。如何悄無聲响。莫是那生睡著了也。細聽則箇。

〔下山虎〕〔生〕河橫玉樹。月轉迴廊。猛見花陰去。心中自忙。小姐。或者你正來時。我又睡著。還愁你雲度空陰。又恐那天回曉光。展眼驚心不可當。〔旦〕呀。可怪。蒼苔

路溼。溼透弓鞋。腰肢瘦損。不禁延佇。且倚著花梢。再聽則箇。〔生〕且住。你看宿鳥微驚。庭枝低亞。莫是多嬌在那廂了。樂意相親傍。花生暗香。咫尺天台。隔短牆。如今待取琴來。對西園下。試彈一曲如何。牆高不掩相思路。紙帳燈昏曲意來。〔下旦〕呀。你聽隔牆人聲。想是那生了。不免踏著鞋尖。聳聽則箇。〔生攜琴上〕一樹花中連理夢。七絃絲內五陵人。琴呵。數年相隨。全在今夜一更。玉成好事。不免橫膝而彈。〔整介〕呀。爲何第五絃鬆了。再整一整纔好。〔旦〕呀。已有整琴之聲。聽他所彈何曲。

〔前腔〕低頭獨立。不語情傷。漫捲香羅袖。閒拈翠璫。先生。未聽你指上高山。難示我心中遠況。兩下風流正未降。天呵。只怕孤紅睡醒。來尋著我。怕我春心蕩。邀歸洞房。那時節。番與梅花做主張。〔生〕古怪。爲何第三絃又斷了。再整則箇。〔整介貼上〕娟娟明月鑿空帷。花下尋人步款移。行到畫欄幽絕處。冷香吹入縷金衣。我家小姐向人前。一味冰霜。及至沒人去處。便生下許多風月。早上道我偷看堂中貴客。十分埋冤。如何口是心非。藏奸賣巧。背了孤紅。竊窺文士。這箇也罷了。如今蝶戀花紅。鶯尋柳綠。金闈空掩。錦帳寂然。想是潛出西園去了。我

且悄悄地藏身。追尋蹤跡。看他怎生模樣。呀。你聽那壁廂弄琴在栖鳳齋中。呀。你看這壁廂潛身在太湖石畔。多應弄出好事來也。細聽則箇小姐。你被孤紅偷著眼。可容野雉謾藏頭。〔聽介丑上〕好事多磨障。還資一路人。相公背我彈琴。必有所爲。怕他弄出事來。不免潛去追蹤則箇呀。你看你看。要尋老底板。便脫醜青囊。不免仔細聽著。〔聽介生〕琴已整完。試向西園彈一曲鳳求凰。以自寓如何。〔彈介〕

〔戀牌令〕鳳兮倦家鄉往。〔旦〕鳳兮鳳兮歸故鄉。他自比了。〔生〕欲尋件遠求凰。〔旦〕遨

遊四海求其凰。是乏配的了。〔生〕奈無所相將爲聘。豈今夕造斯堂。〔旦〕時未遇兮無

所將。何期今夕兮升斯堂。說我家召他。〔生〕喜絲蘿偷縈筵上。有嬋娟明豔閨房。〔旦〕

有豔女兮在閨房。說著奴家了。〔生〕室空邇人遐異方。渺難從。毒我衷腸。〔旦〕室邇人

遐毒我腸。說我難得相近。〔生〕鴛鴦呵。也有接雙頸交文吭。成好事共翱翔。偏我不能似

他。〔旦〕何緣交頸爲鴛鴦。相頤頤兮共翱翔。他言及至此。不覺我有相從之志。〔生〕天呵。怎能勾

顛鸞倒鳳。一地裏兩情忘。〔旦〕得托字尾永爲妃。交情通體心和諧。若成伉儷。定有恩私。〔生〕

嘆知音從來絕響。有誰能中夜相亡。〔旦〕中夜相從更有誰。我也願隨你。只是閨門緊急。孤紅無賴。如何是好。〔生〕奮雙翼共起高翔。勿相孤使余悲傷。〔旦〕雙翼俱起番高飛。無感我思使余悲。良可嘆也。〔作長嘆介〕翩翻情意三迴指。委曲叮嚀一再行。按下身心渾不得。喃喃兀自念書生。〔生〕事有古怪。你聽牆外低吟。其聲清婉。莫是小姐果在那廂。待我手扳庭樹。跳過高牆。正是盡情傳綠綺。拚死爲紅顏。〔跳介丑〕呀。相公。不要性急。倘是別人。怎生是好。〔生〕咄。不要管我。〔丑〕既是這等。待小人過去打探一迴。纔好做事。〔生〕這廝每事有見。只得用你過去。〔丑〕相公擡我一擡。〔生〕我就擡你。切要仔細著。〔擡介丑跌介末上〕開門開門。王老爹醉了。逃下碧華臺。差我來請司馬相公同回。〔生〕呀。不好了。怎生區處。〔丑〕相公不妨得。你自出去。小人有理會在此。〔生〕也罷也罷。若見小姐之時。多將美言打動。不可露出自家窮困的話兒。〔丑〕這箇不勞分付。〔末又敲門介生〕來了來了。

〔尾〕將成好事多魔障。天上人間祇隔牆。冤家。你便略慢些兒做甚謊。〔下旦〕那廂琴聲已罷。無路相從。芳魂飛動。如之奈何。〔貼偷上云〕你看小姐呵。瞥地見時猶可可。卻來閒處

暗思量。不免叫破他。與之寬慰一番。〔旦〕不免推進房去。再尋計策。正是好事若成真好事。相思無路苦相思。〔行介貼〕小姐不勞掛心。奴家有計在此。〔旦驚背云〕呀。不好了。〔丑跳介〕梅香姐。妙計在此。〔旦貼背云〕呀。又不好了。〔貼〕小姐。想是那生了。你且住在這壁廂。待我去問他。咄。你爲何黑夜入人家。〔丑〕卻不道非奸卽盜。〔貼〕啐。我道甚麼人。到是一箇油嘴囚根。不好了。賊在此。〔丑扯貼介〕梅香姐。不要忙。我不是賊。我是司馬相公的使者。差我跳過牆來。與你小姐討一箇慈悲善心。〔貼〕啐。虧你相公這樣窮酸嘴臉。求甚麼慈悲善心。〔丑〕梅香姐。沒奈何。若小姐肯結幽盟。潛謀脫計。月下藍橋不遠。就中富貴難量。〔貼〕又不打你。誰要招這許多閒話。〔丑〕打不打是箇和奸。〔貼〕啐。快走出去。明夜這時分。我自與小姐偷從都亭一帶遊耍。你不要又來胡纏。〔丑〕一定在那邊伺候。〔貼〕且住。你家主是那裏人。〔丑〕是成都人。〔貼〕還未回家麼。〔丑〕一待小姐相會。後日就回。〔內叫介〕青囊。〔丑〕呀。不好了。只得過去。〔扯貼渾嘴介跳介〕未嘗鍋內肉。光落嘴邊肥。〔下貼〕小姐。你往常時動輒瞞我。如今說不得了。也罷。你不要藏羞。且去睡著。左右孤紅與你成此好事。〔旦背云〕我有甚麼瞞你不得。

〔桃李爭放〕有何他事情慌，賴伊今夜包藏。〔貼〕小姐，你還硬嘴，待我從頭說來。你起初時呵。

〔亭前柳〕帶笑滅銀缸，那步出蘭房。我悄悄裏隨著，見你喜尋新學士，偷避小梅香。〔旦〕我自家遊翫，有甚麼尋學士。〔貼〕是誰聽琴，口裏說著許多話。一聲琴韻切，細端詳，許

多話兒，我也不言了。誰要與去鳳翱翔。〔旦背云〕天呵，秋老愁多如昨日，夜長人去是今宵。

〔前腔〕羞臉好難藏，遠況倩誰降。〔轉拜貼介〕孤紅姐，沒奈何，可憐我蕭條，頻惜玉，冷淡獨憐香。〔貼笑介〕小姐，當初是你管我，如今是我管你了也罷。且進去，隔牆人去遠，事休忙。終是我與你成雙。

只爲七絃琴。

弄出相思調。

落得夢魂中。

猶怕丫鬟叫。

第九齣 臨流守約

〔破陣子〕〔生上〕著意栽花未盛，關心待月難明。溼煙着霧全迷景，薄雨含雲

半阻晴。佳期望未成。雲自無心水自閒。今朝何事忽相關。祇因雲水溪邊意。同在孤亭客夢間。自家在卓家弄琴之後。精神恍惚。如醉如癡。昨夜青囊說此事十分可成。但不知文君心上如何。侍者畫計如何。道途通塞。家中謹急如何。好生掛牽人。也不免喚青囊出來。再與他商議。則個青囊何在。
〔丑應上〕慣作偷花使。甘爲引鳳人。〔見介生〕青囊。我問你。昨夜所云。委實真的麼。〔丑〕這個怎敢胡說。只愁他出門時。女人家道路生疎。被人識破了。待到晚些。小人潛躲在卓家近處。等他出來時。即便遠遠招呼。纔保他無事。〔生〕說得有理。你進去與我收拾行裝。一待到時。即同走成都。卻不是好。決不可使左右人識破。那時王老爹就知道了。〔丑〕理會得。〔生〕且住。我對你說。

〔傾盃序〕把重門仔細扃。但取琴書整。再不要管寓房中事。也莫顧水凍花瓶。火冷香爐。紙破幃屏。剛求會得嫦娥月。穩度牽來織女星。你呵須遵命。把機關自省。休直與外人猜破暗中情。〔丑〕一心專督。小人就去收拾。博得意轉心回。便是主歡僕喜。

〔下末上〕讀律無如我。詳刑不讓人。將來新典吏。已往舊農民。自家臨邛縣吏。因正堂老爺差送請帖與鄉里先生。此間就是。竟入則箇。〔見介〕小人是王老爺差送請帖吏。因老爺縣中有事。失來相

陪。靠晚治酒在明遠樓奉敘。昨晚卓程諸公俱已相邀奉陪。不久就來了。望相公早臨。〔生〕夜來中酒。身子不快。決不勞了。明早自來面叩。〔末應介〕但願不來喫酒。免得驢前馬後。〔下生〕王祥甫。你好生不知趣。差人若再來逼我呵。

〔前腔〕偌大冤家自此生。送我懨煎病。那人來時。倘不遇我。斷送了綽約腰肢。美滿姻緣。妥貼恩情。二更酒醉愁難醒。滿枕春寒恨怎生。天呵。使王兄不來召我。真僥倖。與嬋娟相趁。那一座臨邛縣。恍如那青天移下五雲城。青囊完備未曾。〔丑上〕先將行李安排了。漫把歸途取次行。告相公。琴書俱已收拾了。〔生〕王老爹在此邀飲。如何是好。〔丑〕待小人去再覆一聲便了。只是天色已晚。該去守候小姐。相公只在臨流去處潛等纔是。〔生〕曉得曉得。你須在意者。〔丑〕這箇不勞分付。全憑三寸舌。牽惹一枝花。〔下生〕待我鎖上書齋。閒步一回則箇。

〔玉芙蓉〕雲深客鎖亭。露下蟲鳴井。小姐這時呵。想青鸞共侶。早已飛騰。只怕金鈴小犬驚疑影。玉樹嬌鸚苦喚名。魂難定。與寒波廝競衡。一味愁援羅帶遠溪。

行。小姐。你正是花枝明月多嬌態。積下三般可恨人。〔下丑上〕人靜更深花落處。好天良夜鳳來時。恰纔辭過了老爺。來候卓小姐。如何杳無消息。天。你也可憐見我家相公。

〔前腔〕郵亭冷似冰。客路飄如梗。望觀音出世。普救殘生。呀。你看這後園晚景。一溝水月流難定。幾樹煙花暗不明。我且守守罷。潛心等。望朱門寂靜。眼見得依依螢火砌邊生。這裏不見。還到前門去。正是驚心怕膽成何事。受惱擔煩著甚來。〔下生〕癡心脈脈嫌更短。望眼迢迢怯路長。有約不來。好生悶人也。

〔前腔〕相思債已成。間阻人難竝。奈人間天上。咫尺蓬瀛。金閨尙隔千重錦。玉洞猶遮萬樹春。陽臺境。與神妃寂靜。怎能勾。巫山雲起片時成。如今不免再候上去。望盡白雲。渾落窠。卻嫌明月更糲糊。〔下丑上〕望得眼睛穿。急得肝腸斷。自家到前門去。不見小姐。還到後門去。只怕相公呵。

〔前腔〕磨穿鞋底疼。咬得牙根冷。罵我道。這囚根掇賺。哄得伶仃。梅香姐。你須念三分好事三分命。一半姻緣一半情。〔內笛聲介〕呀。誰高興。向梧桐樹底。悠悠吹

笛到天明。〔內作人聲介〕呀。不好了。怕有人從園中出。待我潛躲一邊。天今夜一場好事。止怪得

北里笙吹秋後月。

西園人語夜來風。

第十齣 夜亡成都

〔鵲橋仙〕〔旦上〕漫捲珠簾。暗離香閣。羅袂寒生落葉。欲隨行雨過巫山。又恐

怕巫山雲疊。

睡鴨爐中香篆冷。翔鸞屏上畫江寒。蓬山萬里春應別。只恐乘風拂袖難。奴家昨夜

聽琴心動。一時爲孤紅所知。不覺惶愧無已。幸他憐念。相許週全。如何漏下二鼓。他兀自杳無佳意。好生悶人也。未免乘此月下。禱告上蒼。一求孤紅休另。二求爹爹脫空。三求早會那人。便諧歡慶。天與月呵。好聽着奴家道來。

〔孝順歌〕嫦娥伴應念妾。從來美事天作合。今夜呵。願奇計脫金蟬。幽情付黃蝶。佳期暗泐。與弄琴人一時歡接。事得早完。何辭多拜。不惜泥染羅裙。跪寫心重疊。呀。簪兒墜。雲鬢鬪。這也不論了。但令鵲橋人早和貼。天呵。這等時候。怎得孤紅出來。響

鐵簷前風力軟。小樓西角月華沈。〔貼上〕百尺蝦鬚懶上鉤。妝成不語自含羞。情多意澀燈花暗。欲

別深閨一段愁。俺小姐心欲潛奔。孤紅已願相隨。不免哄他一哄。看伊怎生模樣。呀。小姐不好了。事已敗矣。〔旦驚介〕怎麼說。〔貼〕恰纔捲下包兒。正出凝香閣。被飛霞撞見。竟到老相公跟前。首我。牽誘小姐爲非。若老相公信著。盤究起來呵。小姐只恐怕

〔前腔〕蛛絲網苦罨蝶。魚封早被狐狸劫。鶯鶯未褪翎。虎豹已張鬣。思量起來。我便把菱花碎跌。一問朱顏爲何流血。眞箇錦片前程。難寫偷花押。如今卻怎麼好。〔旦〕孤紅姐。教我計無所出。只圖自盡罷了。〔貼〕且住。我若救得你。何以相酬。〔旦〕沒奈何。你若

有計出門。我就把你。〔貼〕把我做甚。〔旦〕把你做夫人大。〔貼〕你做甚麼。〔旦〕我便爲侍妾。願求早行程。見冤業。〔貼背笑云〕女孩兒家未出閨門。又會分大小了。也罷。我做大時。你須盡爲小之禮。

〔鎖南枝〕湘裙幅仔細摺。盤龍髻縮花替插。立綻鳳頭鞋。凋殘杏花頰。鴛鴦被早鋪疊。立傍象牙牀。守家法。〔旦背云〕若是這等丫頭大了。嫁人何用。也罷。我且哄他出門。變卦不遲。姐姐。一定從你。〔貼〕你既從我。我先從你。如今悄悄地潛行。我自計在此。〔扶行介〕

〔前腔〕〔合〕雕欄畔兩口囁咳嗽吞聲將指指並拽短衫行時分手來搭。〔貼〕這是在中門了。待把匙鑰偷開。朱門啓金鎖掣。猶怕鑰匙聲響鳴鐵。小姐且住。我有包兒。在牡丹亭下。待取同行。〔旦笑云〕原來起初話兒都是掉謊。只是如今身上生寒。如何是好。〔貼〕包內自有衣服。待出門時與你穿。〔內作人聲介〕旦驚介〕姐姐不好了。

〔憶多嬌〕重辛苦我也休訴說。只是四下人聲奴心怯。〔貼〕這是管園人巡警。不要打從那裏去。竟自矮牆中跨出就罷。待我扶了你。〔合〕扳著花枝將身拽。呀。一聲樹拉。一聲樹拉。不覺心驚膽懾。〔貼〕小姐。後園已出。不可如此妝束。我偷一套冠服。是老相公燕居之衣。好到幽僻去處換著。有人相遇。只道男子行動。快換去來。〔旦同下介〕能教月色穿林過。瞞得花香拂袖來。

〔前腔〕〔丑〕心內怯。氣未接。做事不成渾沒法。奔走東西空望切。自家守候小姐多時。如何杳無音問。天呵。脚蹤空躡。脚蹤空躡。燕吐空勞內熱。這裏不見。還到後門去。小姐。你不可永夜閒階臥桂影。卻忘新約在心頭。〔下〕

〔前腔〕〔旦貼上〕袍錦褪。紗帽壓。香羅襪束腰一捻。粉底靴兒根頭邊。〔貼〕小姐。你

看我青衣小帽。像也不像。〔旦〕怎生不像。只見兩肩窩狹。兩肩窩狹。似一箇官人侍妾。

〔貼〕我聞都亭去此三里餘。遠在南關外。自家道路生疎。不免竟自南行則箇。老相公。東君。東君。覺也未曾。有花飛去。早已難尋。〔下〕

〔前腔〕〔生上〕人影寂。更漏徹。懊恨風前心更裂。月色梅花兩愁絕。情事難說。情事難說。只恐番成惡業。小生伺候文君。只愁路人知覺。未免捱將上去。體探何如。正是風沉

蕙香空嫋嫋。月將花意竟沈沈。〔下旦貼上〕行行重行行。好事成不成。今夜一輪月。隨人明不明。

〔丑上渾介〕梅香姐。明不明。大家照照。等得我好苦。〔貼〕啐。你好風顛了。喚我梅香。〔丑〕你若不是

梅香。定變一隻羴羊。〔貼〕怎麼變著羴羊。〔丑〕滿身臊氣。〔貼〕啐。你自前走。〔丑〕不要撇我。待我隨

了你。相公就在前面。〔各行介生上〕呀。你看遠來的。如何有女子態度。莫是小姐與那丫鬟做這般

喬妝束。我且看一箇仔細下手。正是情慌禁不住。行近恐難真。〔旦〕孤紅。我走不動了。〔貼〕小姐。來

路已多。料應相去不遠。趨行幾步。恐怕後邊有人追來。〔生應介〕有小生在此。那箇敢追。〔旦貼驚

介丑〕咄。你是甚麼人。〔打生介生〕咄。青囊是我。〔丑〕呀。相公失膽了。此間就是小姐。〔貼〕那箇青童是誰。〔丑〕他是官人的性命。娘子的冤家。他把小人捉空。小人叫他乖乖。〔貼打丑介〕啐。窮酸家主。不中我意。誰希罕你來。〔生跪介〕今夜感小姐一言難盡。謝梅香四拜非多。只是小姐花月姿容。卻不耐風霜辛苦。則怕有人追著。此非久居之地。不如直走成都。纔保無事。不知小姐意下如何。望梅香姐攬掇一聲。〔貼〕我與小姐行不動了。要你馱去。〔生〕教我一箇怎馱兩人。教青囊替了罷。〔貼〕不去。不去。〔丑〕待我來。待我來。正是和尚偷婦人。樂駝。樂駝。〔貼打渾介〕小姐。事出無奈。勉強請前行。

〔鬪黑麻〕〔生〕止賴得一聲瑤琴譜牒。便上了數行月書婚帖。〔丑〕誰似我奮雄鬣。欲渡無梁。做了濟川舟楫。〔合〕從今意愜。從今意愜。路多甘遠涉。碾破關山半輪秋月。

〔前腔〕〔旦〕爲隔葉黃鸝偷遷山峽。把帶雨梨花羞飛下榻。〔貼〕誰似我冒家法。脫卻龍潭。來尋鳳穴。〔合前內云〕趕上去。〔衆驚介生〕不好了。棄了行李。快走。快走。我扶了

小姐青囊扶了梅香姐。〔貼〕不要。雖是倉忙之際。不可失了禮。我扶了小姐。你兩人自行。〔生丑〕這箇不去。〔奪扶行介〕

〔尾〕追來逸騎何躩蹶。這箇冤家難對答。偷情的下場頭地行須捷。〔下〕

第十一齣 臨邛夜追

〔末上〕重門不鎖金蟬計。千里空尋彩鳳巢。自家卓府中院子便是。只因小姐文君帶了孤紅。黑夜潛逃。老相公差俺輩分路追他。俺想起來。有心去了。必無處尋覓。分明是前日弄琴的天殺。哄了他去。呀。且住。爲何有包兒在此。莫是小姐遺下的。我且將此回報。圖免受責。小姐。小姐。我贈你四句歪詩。

只有私奔勢甚難。

一重山似萬重山。

眠時不敢輕安席。

夢裏常愁未出關。

第十二齣 相偕抵舍

〔少年游〕〔生旦貼丑上〕煙花命運。風流業債。今日事初諧。正馬青山。孤帆綠水。

相送到天台。〔生〕萬里秋風萬里身。〔旦〕含羞相對意中人。〔貼〕歸來欲識行藏處。〔丑〕滿地蓬

蒿滿座塵。告相公。家中已到。容小人先去打掃。〔生〕正是。你先去。〔丑〕到家打掃介。天呵。我家這等淒涼。小姐不打緊。那箇誇嘴丫頭。怎生住得。打掃已完。且去燒茶則箇。他家但喫洗塵酒。我家只有接風茶。〔下生〕小姐。此間已是敝廬。請進去。〔貼作悔狀趨。不行介。旦扯貼云。〕且進去。再作區處。

〔同進介。生揖旦介〕小姐。辱你見愛。棄家相隨。勉受目前貧困。漸圖日後榮華。〔旦〕說那裏話。〔生〕青囊。小姐行得勞頓了。快烹茶來。〔丑攜茶上。生遞旦介〕小姐。

〔急板令〕念狂鯁困窮不才。勿生嗟埋冤此來。看時回運泰。終有日馬奮天衢。鳳起蓬萊。飛騰青漢。穩步金階。〔合〕權消受破壁青苔。殘葉戶小茅齋。〔旦〕長卿。

妾身既已屬君。何論貧苦。

〔前腔〕愧此身無能女釵。今屬你多能秀才。這也是時該命該。願守春風錦片。花開肯怨秋光。苦霧雲埋。〔合前貼〕青囊過來。我對你說。

〔前腔〕你好把空頭盡埋。往常間花言頓乖。〔推丑介〕你且去。天呵。追思可哀。早知

今日呵。你就賭盡黃金。著我難猜。罷罷。只得好歹守他。正是船到江心。事到頭來。〔合前丑〕孤紅姐。不要惱。你小姐呵。也雖是

〔前腔〕掌中珠今日破胎。我相公呵。也自有席上珍。青年久懷。倘賣與皇家。你自有紅錦爲纏。白玉爲釵。我呵。也不是今日行酒青衣。汲水芒鞋。〔合前旦〕長卿。我且散步一回。看你家行逕何如。呀。這東南上朱蕤畫棟。峻宇雕牆的。是那一家。〔生〕卑人不好說。這是相如祖基。曩歲以貲求郎。已屬之他人了。〔旦笑介〕既如此。你名利兩失。將何倚賴。〔生〕惜哉。畫虎不成。屠龍空誦。其實好羞慚也。

〔人月圓〕徒感慨。業蕩家聲壞。頷下珠空雲自邁。堂前燕去春何在。〔丑〕相公。目今消乏。與他理會些濟急也好。〔生〕咄。肯把心胸豪氣敗。〔合〕須寬待。終有日門閥鼎耀。富貴重來。〔旦〕長卿。奴亦甘於淡薄。只願你名成身顯。不孤今日相從之意。正是

〔前腔〕有志客。必取文章價。翔鸞翥鳳人終愛。黃金白璧時終在。〔貼〕小姐。倘或他名利不就。只恐塵土雲霄成感慨。〔旦〕豈不聞下機金印。伏跨登壇。〔合前生〕小姐。路上

風霜了。請進安歌一回則箇。

去時孤另返時雙。

隨分安眠對小窗。

今夜相逢真是夢。

對君歡笑別銀缸。

第十三齣 漢宮春曉

〔菊花新〕〔貼扮宮人上〕未央前殿月輪低。簾外春寒報曉雞。起著繡羅衣。一盞綠荷燈細。正殿雲開露冕旒。下方珠翠壓鰲頭。天雞唱罷南山曉。春色先歸十二樓。奴家乃是漢宮

中美人。皇上聖神文武。非婦人之所敢知。帝后淑善溫良。豈妾等可能稱頌。只是自家選入宮去。常叨侍從。每得乘驂。賴二人之恩休。擅六宮之寵幸。玉食錦衣。不愧沈魚落鴈。珠璫翠珮。無慚閉月羞花。寶鏡簪香。喜見曉星之歷歷。銅溝棄粉。閒看春水之溶溶。開遍海棠。先報長公主夜來消息。踏殘芳草。只愁病王孫日後思量。繡罷碧紗牕下。偷添一線紅絲。閒來白玉橋邊。打起數聲黃鳥。聽銅壺初下。借新月鉤簾。鳳額繡旌風乍約。望燭龍未舒。染白雲爲幌。獸鑲朱戶。露將晞。舞青霓。歌白雪。青瑣闥中供奉。調專子夜之奇音。持象板。捧鸞笙。碧桃花下朝天。樂奏咸池之大雅。身穿石竹羅衣。悶

顰蜚織鬪草。頭戴山花寶髻。開揄阿錫藏鈎。雙雙對立鴛鴦殿。數隊掌案仙官。可是爭妍負寵。兩兩相偎翡翠樓。幾班弄咄神女。更無妬愛憎憐。春滿梨花夜月。長門空揜恨。秋高砧杵曉風。幽閣別含愁。誰言天上逍遙。且看斗牛七夕。冷浸一盤冰藕。試問人間快活。休云鸞鶴千秋。寒徹九清霜籟。望姑蘇臺烏夜啼。問西施何方去也。亦自興悲。盼阿房宮麋鹿走。念弄玉不可歸歟。能無致感。此一人之樂。萬人之憂。前人之轍。後人之鑒也。今日山河一統。民物咸熙。深宮無事。行樂有餘。更喜新册聖后。乃是大長公主之女。阿嬌陳氏。帝未卽位。一見心喜。許以金屋相貯。今正后宫。寵幸莫先。昨上駕臨宮內。至今未出。不免伺立開門。隨班朝見。呀。爲何同伴的不見到來。你看這宮中景色呵。露井銀牀凍不收。深宮花暗曉鶯愁。殘紅滿地無人掃。一半隨風落御溝。〔旦上〕開行複閣路高低。新入深宮處處迷。不怪內人嚴鎖鑰。園東常得到園西。〔相見介貼〕長宮貴人。我和你春眠乍醒。曉妝初罷。同入仙班。往朝聖駕何如。〔旦〕如此領命。〔行介丑淨扮宮監上〕

〔前腔〕九重殿闕五雲飛。柳外春星逐箭移。爲問禁鶯啼。傳報六宮來未。〔開門

介〕呀。貴人來了。聖上有旨。令六宮參見的都入坤順門伺候。〔旦貼〕東君似惜花枝嫩。故意風藏

別殿頭。〔下丑淨〕我和你閒立在此。大家打毬如何。〔淨〕這箇使得。〔打介〕

〔憶鶯兒〕〔旦貼上〕香染衣。露染裾。謁罷君王歸院遲。宣政門前日乍移。春光正宜。春心頗娛。翠翹金鳳新妝洗。恣遊嬉。鳴鳩乳燕先在碧牕西。〔丑淨〕貴人已出。

我和你戲他一戲來。〔潛上介〕

〔前腔〕花又飛。鳥又啼。花落鳥啼思欲迷。如鳥如花真可悲。香迴翠車。風掀翠裾。春心欲禁憑誰主。〔扯旦貼介〕惜芳菲。可容蝴蝶偷過畫橋西。貴人。貴人。你長顰

知有恨。貪耍不成妝。心中無限事。試說與何妨。〔旦貼〕啐。冰心本付梧桐月。肯與疎星點落暉。〔下丑淨〕啐。一場春興無聊賴。打起鴛鴦不放眼。〔下旦貼上〕

〔前腔〕草滿蹊。水滿陂。惱得楊花壓路飛。無限傷春春自知。鶯花滿堤。煙霞滿衣。春愁漫逐游絲去。畫闌低。珠簾高掛。惟有燕雛飛。今日在宮無事。不免到第六院中。

相尋五姨七姨同耍則箇。五姨七姨有麼。〔內應〕來了。〔丑淨扮姨上〕嬾結芙蓉帶。愁鬆翡翠裙。曉

來香閣坐。常恐又斜曛。〔見介〕貴人。當此春光。正欲相邀共鼓。來得恰好了也。侍兒。快烹龍團來。

〔旦〕茶到不勞。我和你隨喜耍將去。五姨。這朵花兒開得好也。〔丑〕這是紅躑躅。〔旦〕是好牡丹花。勅賜一棵紅躑躅。謝恩未了。奏花開。〔貼〕這箇紅耳霜毛的是甚麼。〔淨〕這是玉兔。聖上前日打獵。取將回來的。〔貼〕是好白兔。天子不教人射殺。玉鞭遮到馬蹄前。〔丑〕長宮貴人。你常立案傍。身近起居。一日用下許多紙。〔旦〕只因聖上常在后宮。每日請來金鳳紙。殿頭無事不多書。〔淨〕二姨。這頭門怎麼常閉了。〔貼〕這是魚藻宮。〔淨〕是魚藻宮。魚藻宮中鎖翠娥。君王近處不曾過。〔旦〕今日大家行樂。不要負此佳景。就把漢宮春曉爲題。聯詩一首。不成者就罰金釵一股。〔衆〕如此。昭容請。〔旦〕不虛遜了。日照仙人掌上霞。〔衆〕好好。正切今上故事。〔貼〕朝回金屋駐香車。〔衆〕又切娘娘故事。如今是我們了。日暮漢宮傳蠟燭。倒澆一朵合歡花。〔旦貼〕不好。不好。意又粗俗。題又迂遠。罰金釵二股。〔丑淨〕願輸二釵。求兩位聯成。〔旦貼〕銀瓶先汲甘泉水。欲噴宮前幾樹花。〔丑淨〕妙作妙作。再請遊去。

〔石榴花〕〔旦〕蓬萊深處。花底聚羣妃。叢綠鬢。坐圍棋。楸枰忽見花陰碎。過沈香亭外遊嬉。愛嬌鶯亂啼。帶春聲飛入昭陽裏。〔合〕笑回身紫燕朱樓。漫凝眸。

粉蝶金堤。

〔前腔〕〔貼〕香爐烟氣常繞繡屏飛。吹玉管奏新詞。金花箋上獨題詩。刺桐邊
孰掩朱扉。怪美人睡時。抱琴來無興調纖指。〔合〕湘裙短佇立金階。鳳鞋小學
步丹梯。

〔泣顏回〕〔丑〕行轉綠楊枝。欲攀處忽自躊躇。君王昔日曾於此。玉輦經時立。
瓊軒自思。到如今春別千門裏。〔合〕且瓊漿待月亭東。試金丸打鴨池西。

〔前腔〕〔淨〕何處鳳笙吹。和鸞車隱隱聲馳。胭脂滿徑等閒間。又送春歸。謾傷
情片時。怪桃花欲謝偏無主。〔合〕休戀著紫陌遊深。只恐怕玉殿宣遲。〔內云〕

娘娘有旨。聖上在太液池賜宴。著六宮美人同領君恩。

〔尾〕〔合〕轉向花陰行路迷。忙到瑤池日又西。定有承恩獨賜衣。

人間天上得春風。獨有深宮春最濃。

十二時中花與月。管絃催處不曾空。

第十四齣 家徒四壁

〔賀聖朝〕〔貼上〕愁看芳草迷魂。新妝一日何曾。能消幾箇悶黃昏。把離恨支撐。愁重不禁秋色老。體輕空被主人憐。奴家記得聖人有云。三思而行。再斯可矣。當初隨小姐與長卿同來。本圖他有箇榮華日子。誰想到不彌月。那窮酸鬼口食不週。把小姐的衣飾都費盡了。他兀居甕牖。尙對殘編。如何救得饑也。早遣青囊出村借米。至今未歸。破甑生塵。空囊垂罄。我且乘小姐臥時。到門外拾些枯柴。挑些苦菜。煮碗湯與他充餓。天呵。這四壁淒涼。孤琴冷淡。好不羞死了文章魁首。仕女班頭。〔拾柴介〕

〔花心動〕落葉荒村。攪西風去來飄滾。葉呵。今日歸根。何日逢春。相沾雨露深恩。只怕花開鐵樹渾無準。空令我役損愁魂。做一場南柯虛夢。將心勾引。不免將柴堆下去。挑菜兒。〔挑介〕

〔好姐姐〕土泥輕沾指痕。傷心處盈盈嬌嫩。菜呵。我就是你。偏諳苦味。同生一處根。如今將伊喫呵。只爲饑難忍。無方設計堪輸蓋。借此聊生學獻芹。料得此時。小姐也

應起身。我且進去煮湯則箇。正是時挑野菜和根煮。旋斫生柴帶葉燒。〔下〕

〔前腔〕〔旦上〕黯然思量斷魂。都忘了他時鉛粉。雖遭苦運。甘爲薄命人。今何恨。巖巖瘦骨空擔病。裊裊微肢渾損神。景色蕭蕭道路難。佳人流淚上花班。愁來自拔金釵股。劃出瞿塘十二灘。奴家一時背父。千里從夫。豈料居徒四壁。食減三餐。終日相推。莫能存活。思量自悔。左右一身當災。教孤紅鬪甚。也受這股苦楚。也罷也罷。長卿雖則貧困。決不久居人下。我且隱忍過去。再作區處。幸得諳些女紅。且去繡完一幅裙襖。將來易些柴米用度則箇。〔繡介〕

〔前腔〕可憐鴛鴦浪紋。愁緒亂暗縈方寸。花空開連理。誰知沒下根。魂難倩。纔添綵線絲重亂。認得金針眼又昏。呀。我好餓了。不免喚孤紅討早膳喫。〔喚介貼上〕錦帳添香睡。銀羹信手調。如今番寂寞。青菜汚紅綃。小姐喚我。必爲早膳。待取湯去。聊與充饑。小姐。一碗清湯在此。請些則箇。〔旦〕呀。好苦。如何早膳也無。這碗清湯。教我如何喫得下。〔貼〕小姐。不瞞你說。青囊借米未回。故薦此湯充饑。雖不是烹龍宰鳳。也強如齧雪吞氈。倘一日苦盡甘來。這箇中滋味也該曉得些。就請略沾唇。權當些些充腹。〔旦〕便喫他也不能飽。恰纔繡得裙襖在此。你去易些薪

米來。〔貼〕好苦也。當初刺鳳描龍手。今做尋柴換米人。呀。你看那窮酸的。又來要早膳喫了。

〔寶鼎兒〕〔生上〕可怪進退雙難。抵羊觸藩偏困。相如不自度德量力。私挾文君至此。

可奈貧不自給。對面成羞。他雖無怨尤之心。以我大丈夫處此。寧不愧死無地。自昨至今。尙無粒食。早遣青囊借米。想是已回。聞小姐起身。不免喚他同喫早膳。小姐。〔旦〕呀。來得恰好。就請用些。〔生喫介〕呀。怎生是碗苦菜湯。小姐。相如罪當萬死。〔哭介〕

〔雁來紅〕你齋湯可惱情。比糟糠更苦吞。〔旦〕糟糠之妻。我也甘做。只是你讀書呵。太羹難把鹽梅進。空受酸辛運。〔貼〕先生。這滋味你道如何。小姐呵。不是擔饑忍餓人。你

呵。空懸甑。蕭條起塵。苦把分羹爲合盃。〔生〕孤紅事已至此。不須嘲笑。呀。青囊回了。快

取米來。〔丑上〕上山擒虎易。開口告人難。淚眼拋來溼。喉嚨叫得乾。有皮剛剩骨。無膽只留肝。不說

心中苦。先疼眼下酸。〔生〕咄。我要米用。怎生在此胡說。〔丑〕相公。一言難盡。小人到沈小二家借米。

那妻子道我家自用也不勾。那裏有得借人。小人苦苦求他。反被一場羞辱。因此含淚而歸。胡謔幾句。不意相公聽見了。〔生〕有這等事。教我有何面目。不如投井而死罷。〔投介丑叫介旦貼救介旦〕

長卿。你大丈夫一至此哉。當時第居臨邛。或從昆弟假貸。猶足爲生。何至自苦如此。〔生〕相如雖則貧困。怎肯仰給於人。〔旦〕可惜你讀書的。不識古人遇難時。

〔前腔〕不記得過昭關倦伍員。不記得過函關苦晉文。不記得霸王曾向吳門困。不記得李廣郵亭悶。不記得尼父皇皇病在陳。〔貼〕你還要顧名義。不肯去空啣恨。將聲謾吞。守寒枝棲不穩。〔生〕小姐。我就去呵。

〔園林好〕不慮著他人見。只怕你父親廝近。倘伊知覺。中起風波。恰不是驀地裏悲歡難論。須臾鳳折鸞分。須臾鳳折鸞分。〔丑折生云〕相公。這等淒涼四壁。又圖甚合宅

團圓。你看這

〔沈醉東風〕攪人魂風酸雨昏。斷人腸病容愁鬢。偏苦著冷秋天鴈迷孤陣。怎能勾笑口相親。教他兩人實住不得。愁鬆布裙。悶壓破茵。怎奈得此際淒涼時運。

〔旦〕你慮我父親呵。若去而免禍。正是死中求活。

〔川撥棹〕他若念天親。有此意分。管和你夫妻原廝近。他若宿忿未消。有傍人和

勸解紛。長卿。我真心將來勸君。非是大限來時各自分。青囊。你明日就去買船。到臨邛
再作區處。

〔紅繡鞋〕〔合〕須道骨肉私恩情親。看來不是外人。須信明朝早泛蜀江雲。投
他郡。背孤村。將來事且休論。〔生〕青囊。米又借不回家。好生饑餓。我還有鸛鷄裘一領。你去

陽昌家典下一壺酒來。我與小姐解悶。〔脫介〕

〔尾〕重裘脫卻身無分。追歡且解今宵悶。〔貼丑〕只恐醒來背不溫。

第十五齣 杜門謝客

〔卜算子〕〔外上〕醜事莫輕題。賤女淫奔去。骨肉總分離。生死休完聚。冷面皮博
得憂煩少。熱心腸招攬是非多。自家卓王孫。一時錯見。誤召相如。私挑賤女夜奔。嘔氣追尋成病。自
不肖去後。不曾計較侍女。不免喚這些丫頭出來。問一端的。嬌羞尋芳那裏。〔丑淨上〕嬌羞殺。人
尋芳尋出事。試聽相公聲。決無好意思。告相公。有何鈞旨。〔外〕咄。小賤人。你且跪著。一一招那不肖
去的根由。何人哄誘。若說不明。定用重責。〔丑〕小姐在時。輪班伏侍。那日起事之時。不在嬌羞番上。

〔外〕尋芳怎麼說。〔淨〕雖則丫鬟直日。委未知情。〔外〕還要遮掩。〔打介淨〕容尋芳細稟。〔外〕你從實說來。

〔解三醒〕〔淨〕記當時堂中設席。是孤紅報與他知。〔外〕報甚麼。〔淨〕他說道都亭貴客將至矣。那時小姐就心動了。托言鬪草出香屏。〔外〕你怎不隨他去。〔淨〕教奴細調鸚鵡語。他到進房時。月上花梢影已西。只聽得進門來。啞啞啞如覓侶。相偷話錦香叢來。不許人知。〔外〕後來怎麼。〔淨〕那日去時。嬌羞直日了。〔丑〕老相公息怒。容嬌羞告稟。

〔前腔〕他那日呵。照遍菱花梳掠懶。半揭珠簾挑繡遲。向蒼苔屢。弓鞋底。老相公。不好說得。分明是燕啣春去欲潛飛。臨到月上些兒。偷香低拜姮娥語。禱告之後。兩下偎肩相去時。嬌羞也不知道。只見夜分之際。倒換熏籠。忽怪銀牀冷落。錦被虛鋪。纔曉得重

門啟。驚忙叫孤紅不見。自此方知。〔外〕這事不消說。是孤紅了。你們也不得無罪。且去整他衣飾過來。到堂前聽候。不許羈遲。〔丑淨應介外〕叫左右。由他親貴人來。只說相公有疾。不勞進見。

〔衆應介外〕不是志同泄柳避。敢言疾爲孺悲辭。〔下〕

〔卜算子〕〔末上〕閒事莫相關。祇爲招閒氣。事若到頭來。抵死難推去。自家程鄭當初好意。偕卓老治酒。往招相如。謂此人天馬在廐。所以香秣聊陳。那知他社燕尋巢。番惹得落花成片。久不往晤。深懷愧赧。早承王父母相期。不免同拜。以贖罪愆。道尤未了。王父母已至。

〔金雞叫〕〔小生衆上〕可怪狂鯁事。相累慚顏無地。下官王吉。曩念相如。作書圖聚。詎謂風情既暢。碩德遂涼。文君之行。千載一笑。向來政事羈身。未及卓家請罪。早約程君同往。不免造門一見。呀。程君來了。相見則個。〔見介小生〕早間相約。望卽偕行。〔末〕領命。請大人同行。滿牀錦繡留冤帳。一樹鉛華生禍苗。〔下副淨上〕管門惟白鶴。封鎖只青苔。自家卓府院子。因相公杜門不接賓客。只得守候在此。相公你好癡。賊出關門。屁出掩臀。當防不防。癡老獬豸。〔下〕

〔前腔〕〔小生末衆上〕帶笑推朱戶。來勸主人休怒。〔衆〕告老爺。卓府已到了。〔小生〕通報。〔衆敲門介內云〕敲門是誰。〔衆〕大老爺。同程相公來拜。〔內〕老相公有疾。見客不便。著小人候

謝。〔小生〕程先生。想是卓老見罪。托此爲辭。學生先返。望公曲求一見。尙容異日同荆請。〔末〕領命。〔小生別介〕明知鼓琴者。故作探薪憂。〔下末〕掌門的一定與我通報。只說故人求見。強起何妨。

〔內應介外〕慚迎驚寢客。先得叩門心。恰纔小廝進報。程君苦欲相見。必爲不肖的事。拒他也罷。又沒處告此宿忿。只得相見。訴此心曲。左右開門。請程相公相見。〔衆應介末外見介末〕老先生。一向違教。有何尊恙。〔外〕請坐請坐。不須提起。

〔一封書〕言之怒越隨。這場羞不可追。〔末〕老先生息怒。〔外〕當日事怎知。他把洗塵樽做了合盃杯。我只道借書齋呵。染得文章新翰墨。那知他錯賦風流舊楚詞。這七絃絲。身自隨。到是鸞膠暗續時。〔末〕還是學生之罪。因此踵門。我則道

〔前腔〕蛟龍有困時。向鹽池憐視之。那知他岐山鳳引雌。向丹丘挾翅飛。當初若學生治具。也有弱息在家。只恐怕眼底藍橋他意遠。屏上巫山錯夢馳。這畜生委實無理也罷。老先生。他有顯貴之時。或者駕龍車。掣鳳旗。可道風流女婿歸。〔外〕休得嘲笑。還恨自家淫賤丫頭。

〔前腔〕吾生值命奇。再羞言掌上珠。當初教他嫁人。不肯從。心奸貌似癡。由你豪門貴戚。只說守冰霜莫浪題。到如今呵。傾倒傳家三世業。違棄過庭廿載規。我只是棄

絕了他。任奔馳。遠羈栖。花落花開總不知。〔末〕適間王父母也來請罪。因使者見拒。只得去了。他也多拜上。

〔前腔〕狂生事已非。望仁人念少垂。也看令愛分上。親生骨肉兒。到頭來莫苦追。相如阿。雖則是強把他根求竝蒂。老先生。你不可把令愛輕忍奇葩當別枝。倘有還鄉之日。恕兒愚。望親慈。轉把幽盟作好期。坐久勞神。就此告別。〔外〕深承寬慰。足叙雅情。相見主公。爲生致謝。〔末〕無端半日烹茶話。都爲三杯怨酒來。〔下外〕嬌羞尋芳那裏。〔丑淨上〕物在人何在。春歸燕未歸。可憐明鏡黑。花片積羅衣。告相公。衣飾在此。〔外〕嬌羞點首飾。尋芳點衣服。不許亂了。仔細點來。〔淨〕待我先點首飾。

〔十五郎〕這是鵲金釵相配俱齊。這是穩犀簪雕鳳螭。這是碧琳冠子迴風髻。這是青玉珮。赤玳篔。這是鏤珊瑚寶釧雙龍制。這是盞葉玲瓏翠鬘兒。這是昆明珠。夜光珥。首飾點完了。〔丑〕如今衣服是我點。

〔前腔〕這是雜纖羅霧縠垂電。這是織芙蓉彩色衣。這是新裁齊紈蜀錦青霞縷。

這是金錯鞋。繡成襦。這是帖畫鴛鴦一幅。鮫綃袂。這是雞舌香熏。白和裙。這是金華縞。紫輪被。衣服點完了。〔外〕你們且去看守。待二小姐適人。並此贈嫁。〔丑淨〕小姐回來。怎生是好。〔外〕咄。他是薄福的人。我已杜絕了他。誰要你說。快去跟隨二小姐。不要做鴛鴦。雙出。廐馬一空。那時一發悶死我也。天呵。年老身閒無外事。誰腔此恨上心頭。〔下丑淨〕老相公。老相公。再莫去請人罷。

終朝宰鳳烹龍。

到去遺珠泣玉。

不若慳吝之徒。

自家喫些酒肉。

第十六齣 當墟市中

〔三臺令〕〔旦上〕釀成三月春濃。人倚臨邛肆中。〔貼〕不語怨東風。怎憔悴。一朶芳叢。〔醉太平〕〔旦〕恩深怨深。愁臨病臨。向來蕭索難禁。〔貼〕悔聽牆外琴。〔旦〕芳菲懶尋。年華易侵。到今休說知音。〔貼〕空孤隨鳳心。〔旦〕孤紅。我你因見長卿貧困。勸歸臨邛。本意與昆弟假貸。猶足爲生。豈意人情惡薄。竟孤所望。幸賴奴家乳母張老媪見憐。將些家財助我儻舍。奴家只得自

身當墟。喪名虧恥。也不論了。只是相如自著犢皮褌。滌器於市。類保庸雜作。何羞如之。且喜今日晴和。當有市飲者過此。他與青囊負薪未歸。你何不去喚一聲。〔貼〕待我去。待我去。婦道順夫子。縫衣幕酒漿。如何今日裏。陪笑情人嘗。好不羞殺了酒坊神也。〔下〕

〔水紅花〕〔淨副淨上〕曉來齊跨五花驄。控雕弓芳堤打哄。珊瑚鞭子袖微籠。過新豐妖姬目送。笑指銀瓶蘭甕。共取醉春風。滿拚取沈酒麴波中也囉。〔淨〕

黃鶯飛上綠楊枝。正是間關春晝時。〔副淨〕滿地榆錢收不盡。大家留取醉金卮。〔淨〕老兄。你好撒漫也。榆葉都當了錢使。〔副淨〕榆葉當不得錢使。那滾地楊花怎喫我當了錦褥眠。〔淨〕雖則楊花心性。你也睡不穩些。〔副淨〕不打緊。會使口穿錢。那怕攔街睡。〔淨〕休取笑。前面有美姬當墟。同去沾飲一壺何如。〔副淨〕使得使得。就請就請。〔做撞見旦介副淨〕老哥。你看他家酒淡。那婦人眼裏都是水。〔淨〕啐。你不曉得。這是絕妙的婦人。豈不聞眉偃春山。眼橫秋水。〔副淨〕卻元來店眼若好。噴水也甜。〔進譚介旦怒叫貼介生上〕丈夫淪落竟何言。犢鼻含羞只自冤。〔貼丑上〕他日乘鸞歸去後。空餘酒肆在人間。〔生〕呀。已有酒客在此。孤紅青囊。你去整點與他喫。〔貼丑〕好羞好羞。〔各

做介且當壇生雜作介淨 今日之樂。花酒兼全。滿拚沈醉。盡興而歸。〔副淨〕不惟樓下金龜可換。還有店中紅粉堪憐。人生那裏不使錢。賺錢折本也俱不論。〔淨〕待我先唱隻曲兒打動他。

〔排歌〕柳葉初濃。桃花正紅。畫橋流水村東。如花人面乍相逢。春色迷魂暗裏通。〔合〕風光豔。天氣融。戲看飛燕掠芳叢。歌三疊。酒數鍾。頓教餘量十分充。〔副

淨

〕如今是我唱。店娘子將酒來。〔貼遞介淨介貼〕啐。〔下〕

〔前腔〕〔副淨〕十二秦樓。三千漢宮。何如野店嬌紅。當杯入手莫匆匆。仔細看花花萬重。〔合〕眉間俏。眼裏紅。涉江何用采芙蓉。春情蕩。耍興濃。不妨潦倒杏花中。〔淨〕我和你把小梅香爲題。聯詩一首。可怪他家小老婆。搖搖擺擺腳來那。〔副淨走下淨貼

介〕梅香姐。不知你洞口萋萋草。可似區區嘴上多。〔丑怒打介又淨且介生怒打介末上〕纔出青

山外。重過金市東。自家程鄭。踏春過此。如何前面酒徒喧嚷。叫左右打他過去。〔衆應問介〕呀。到是

卓家小姐開店在此。待我報與相公知道。〔丑〕且不要。〔淨副淨驚介〕呀。不好了。去了罷。誰知窠子人家。現出拿魂太歲。〔下生旦驚介〕不好了。事敗矣。〔下衆報末介末驚介〕有這等事。快請司馬相

公出來。〔衆請介內云〕青囊。你去多拜上相公。事出無奈。沒顏相見。改日面叩。千萬勿與卓家知道。
〔丑應答末介末〕既如此。我去罷。教相公寬心。大丈夫不可如此。天呵。誰想英雄漢及此地位。不得
不去再勸卓老速來看戲。正是區區陌路猶心痛。何況他家骨肉爲。〔下生旦貼上旦〕長卿。長卿。你
好羞死人也。今日出乖露醜。遺笑程君。奈何。〔生〕小姐。且不要埋怨了。

〔北醋葫蘆〕隨你有調羹手功也。必圖那鹽梅足。休道是啖黃齋便羞比天厨
祿。須知他丈夫得意居金屋。也出自商巖版築。不見那漢齊王乞食淮陰曲。
〔旦〕他日固有亨泰之時。但今朝污辱如此。怎生忍耐得過。

〔么〕我只道是金鼎銀爐錦繡鎚。受用盡千鍾美粟。誰承望杏花村卻把那青
旗蠹。枉恨殺倚市人兒紅粉辱。這些酒徒無賴。欲待罵絕了他。又恐怕生涯斷續。只

索向甕頭春底埋頭哭。〔貼〕小姐。一日辛苦多了。請去安歇罷。〔旦〕墟邊人似月圓時。皓腕空

凝雙雪姿。〔貼〕落得人間千載後。身名俱污說雄雌。〔下生〕青囊。今日之事。實我不才。你好生收拾
進去。明日早些張肆。〔丑〕怕有卓家人來。如何是好。〔生〕這也說不得了。

退難縮後進難前。

俯則羞人仰愧天。

若怕主娘埋怨你。

便須佯醉脚根眠。

第十七齣 勉撥房貲

〔普賢歌〕〔外上〕平生不作皺眉人。懊恨冤家累老親。今日聲自吞。今日羞自忍。只爲骨肉之情忘氣分。自家因不肖之女。憤憤成疾。奈何又歸臨邛當壚賣酒。辱及萬千。本意杜門不納。又被親朋苦勸。只得撥還他往昔備嫁之物。並錢百萬。家童百人。使之善歸成都。不致目前遺笑。早間分付掌家的。如何不來回覆。〔小外上〕人似西門豹。身管北門鑰。可爲趙孟老。我是孟公綽。啓告相公。撥與小姐的衣飾人財。俱已完備。〔外〕喚那領頭的過來。〔小外應介丑淨上〕

〔梨花兒〕我在家中喫飯喫方穩。如何又要出家門。你看我男子燒湯女傅粉。

嗟。臨邛市上不折本。老相公有何鈞旨。〔外〕你去對那不肖的說。當初背父淫奔。圖受千般

富貴。如今隨夫出醜。空憐四壁蕭條。小肆當壚。窮坊滌器。豈大人家女子所爲。我本意不分一錢。又爲骨肉兩字。勉依親友。強給人財。自今歸去。早圖生理。不許再無廉恥。滅絕家風。若要重見父親。除

帶了鳳冠霞帔。白日回來。纔許進門。〔下丑淨〕官差不自由。只得去。只得去。

〔前腔〕他們坐得好安穩。我們行得好酸辛。趁早去。趁早去。把他那店上東西喫一頓。茅廝裏面窠出快活糞。天有不測風雲。人有旦夕禍福。小姐昨日眼淚汪汪。今朝手

頭碌碌。〔下〕

〔剔銀燈〕〔貼上〕春來苦愁容瘦損。與小姐一味氳成悶。只爲賣些酒呵。惹他淚蝶紛成陣。博不得許多錢呵。被他們羞得倒褪。又難去赤臉認真。只得把餘恨自吞。相如窮酸的。你當初著青囊牽誘之時。只說許多受用。如今教我呵。

〔前腔〕舊時事重還喚醒。罵冤家幾遍愁難盡。你風流惹下淒涼運。把那甜語花言。心口全然不應。今日到此清溪之下。採芹爲羹。教我不勝回首。只見嫩芹芽波上滾。和一片沈沈水雲。呀。不好了。你看遠遠來的。好似府內院子。和小姐手下梅香。擡著甚麼東西來

也。我且藏在綠楊樹下。假以採芹爲由。覷他過去。〔小外末丑淨上〕溪邊說有胡麻飯。行盡桃源不見人。我每走遍市中。再尋小姐不見。你看水邊一箇妮子。不免問他一聲。小娘子。你曉得卓小姐酒

壚何在。〔貼〕不曉得。〔丑〕且住。恰像孤紅嘴臉。待我去喚他。孤紅。〔貼〕我是八黑。不是孤紅。〔衆〕你若不認呵。莫怪我每說來。

〔前腔〕你本是伶俐閨房老倩。如何哄小姐呵。驀地裏陰諧秦晉。牽合以來。到今又與秋相近。你呵鎮日間醉鄉勞頓。快起來罷。你引咱相見一人。我報你春來萬分。〔貼〕事已至此。走不脫了。只索見罷。呀。到是列位哥哥姐姐。〔衆〕孤紅。你不要驚惶。這些東西。都是老相公付與小姐的。只是你一向隨他。有何受用。〔貼〕消受不起。你聽我說。

〔前腔〕儘圖他花柳叢中解悶。不喫飯清泉消困。我與小姐呵。濃妝日日增金粉。〔低云〕羞只見賓客填門。相公親爲薦鼎。倒不盡囊頭佳醞。〔衆〕這等事忙。你何暇至此。〔貼〕爲小姐咬得菜根。因此上自來採芹。〔衆〕休得誇稱肆中樂事。快率我們去見小姐。還有一件。老相公只要你回來。伏侍二小姐。重牽一箇好姐夫。〔貼〕啐。又來了。又來了。

莫道當壚不妙。

今日送來錢鈔。

人人學得文君。

箇箇倚門賣俏。

第十八齣 歸途遇寇

〔縷縷金〕〔末上〕人似虎。馬如龍。馳驅山阪。下疾如風。膂力真驍勇。天生奇種。來的莫問好英雄。金銀且留用。自家臨邛道中有名響馬是也。慣一嘯聚山谷。出沒溪洞。的派祖是九江王布。從堂叔是五斗賊魯。喝下馬的話兒是傅家之美訓。奪將去的勾當乃教子之良謀。三枝飛箭。忽刺刺去鳥驚開。一道烟塵。黑湫湫寒雲閃過。芒碭山好風水。俺要住他一箇月。烏江路沒盡頭。至今不學八千人。正是吞舟之魚跳梁。不若毒蛇當道。蔽海之蝦跋扈。爭如白虎臨頭。天生一箇好資質。豈可今生不做賊。閒話休題。那遠來的想有金銀在車。不免隱在鹿園中。待他過來。即便斷路。在咱山下過。怎敢不低頭。〔下〕

〔前腔〕〔生旦丑貼衆上〕筋力倦。路途窮。相馳千里外。嘆離蹤。流水潺潺送。半經雲隴。〔末上〕來的莫問好英雄。金銀且留用。咄。下車來。〔生〕可憐貧儒行路。絕無東西。

〔末〕胡說。先殺那婦人。怕你不將與我。〔生〕大王息怒。但饒性命。聽取財物。〔末〕將過來。〔生遞哭介末〕誰知無本生涯。做箇有錢勾當。〔下衆哭介丑〕相公。且喜山童等一車未至。請略寬心。〔旦〕

內中柔軟的都去了。縱使後車無恙也。濟得許多事。〔丑〕小姐前路昏黑。恐怕又有強梁。不如進覓人家。暫住一宵。明日行罷。〔生旦〕言之有理。〔行介〕

〔前腔〕嗟命薄。嘆時窮。誰知中路裏。遇奸兇。猛把刀鋒動。幾成長痛。吁吁兩氣恨無從。頓覺餘愁重。〔下〕

第十九齣 得意薦揚

〔菊花新〕〔小外上〕漢家天子重英豪。驚見文章思俊髦。始信讀書高。萬里帝星偏照。江山千里頭俱白。骨肉十年眼尙青。追念舊人渾不見。故園回首最關情。自家楊得意。蜀人也。

見爲狗監事上。只因聖躬好獵。常得侍奉天顏。早間從過長楊。因檢閱梁王書籍。得子虛賦。深加激賞。自以不得與此人同時爲恨。得意因言。故人司馬相如所獻。上爲驚起。卽詔遣成都召之。此來必有好處。未免喚家僮楊名。隨往一遭。楊名那裏。〔末應上〕欲覓鱗鴻路。先辭虎豹圈。告公公。楊名見。〔小外〕急趨人夫到成都去。〔末〕不知有何事情。〔小外〕我兒。正要問你。可曉得司馬相公向來消息如何。〔末〕公公。他自往年回家。幸遇王吉相公臨邛作令。聞其顛沛。作書邀之。那時有富人卓王

孫者聞其才名。治酒相召。不意有女好音。相如故以琴心挑動。遂至一宵歡慶。四壁潛依。夫婦窮坊出醜。王孫掩戶遮羞。後來雖蒙救濟。近復被寇蕭條。看他蹤跡如此。只怕憂愁日積。生死難憑。〔小外驚介〕有這等事。倘若不幸呵。一負朝廷重望。二負故人相薦。三負生平志氣也罷。且到成都。再作區處。

〔賞宮花〕雲深去輶。故鄉千里遙。黃葉迷征路。寒雁下空濠。〔合〕長卿。你苦得過呵。受盡山林泉石趣。重登廊廟賦詞高。〔末〕告老公。落霞殘照。程途易晚。請趲行罷。

〔前腔〕星隨使輶。皇都回首遙。苜蓿迴關路。荒蕪遍城濠。長卿。只怕你預填溝壑呵。

〔合〕淚向山陽笛裏盡。魂從宿草露中招。〔衆〕告公公。前面是皇華驛了。〔小外〕進去安歇。

天子虛前席。

親臣下九重。

試聽雷雨動。

草莽蟄潛龍。

第二十齣 誓志題橋

〔虞美人〕〔生上〕秋來底怪添憔悴。病壓清霜候。寒蟬唧唧樹颼颼。愁聽夢中哀雁度南樓。相如自與文君當壚。幸遇王孫悔悟。不料中途狼狽。至今搯腕生愁。文君抱病。積日多矣。奈何越加沈重。聞有嚴君平賣卜。卦兆通神。不免到昇仙橋一問。以決狐疑。再過醫士王草頭家。求些妙藥。得文君早早身痊。不免叫青囊隨去。青囊那裏。〔丑應上介生〕隨我去問卜討藥。教孤紅在小姐跟前用心伏侍。〔丑應內應介生〕明醫兼暗卜。生死就分明。〔下外扮賣卜人上〕

〔上春花〕天人術業仙人口。問窮通暫將機剖。〔笑介〕人間空指泛靈槎。道我

卜窮星斗。休問成都賣卜人。隱居不仕是嚴遵。揚雄昔亦來從學。卻怪違時後事新。自家嚴君平。乃

上羅天真降世。因痛下民茲蠹。仗卜以示玄機。你看文昌星司馬相如遠臨。多爲其妻卓氏之故。且

待到來。當以定數示之。〔生丑上〕路遙行處急。天遠問時遲。青囊前面是君平肆了。進見則箇。〔見

介生〕嚴先生草率進拜。實有所求。〔外〕有何見諭。〔生〕賤內有恙。敢煩一卜。以示吉凶。〔外〕領命。

〔卜介〕司馬先生數起於一。厄於三。通於五。三五會於八。陽外而陰中。剛強而柔弱。自君卜之。深合

貞悔之理。不惟夫人病妥。先生之運亦亨矣。可慶可慶。〔生〕倘有此日。報貶非輕。小小謝儀。幸先揮

頓。〔外〕不消了。不消了。〔辭介〕生強介淨扮王草頭挑船上。

〔前腔〕庸人度量庸醫手。問靈丹全然不究。〔笑介〕父親傳下草頭方。學得殺

人如溜。〔生外做見介〕王先生。父親心法。怎麼相傳。〔淨〕他道胡亂人家病發。一味用些刻罰。外感

認做內傷。虛損謂之勞發。不問神聖工巧。莫辨望聞問切。作些聰明哄他。撞得着時便活。只怕一帖

蹺蹊。背了藥箱便豁。所以小子急時。常叫藥師菩薩。〔生〕休取笑。學生房下有疾。要求幾服藥。〔淨〕

說病源來。〔生〕胸膈飽滿。心腹疼痛。飲食不進。咳嗽身熱。〔淨〕這箇不打緊。待我簇這幾帖藥去。一

喫就好。〔簇介〕

〔瑣窗郎〕看將來病起憂愁。這般症非一頭。胸膈飽滿。是鬱結所致。當用陳皮枳實。

心腹疼痛。是有積血。當喫糖酒二甌。咳嗽身熱。飲食少進。該用麥冬錢半。五分枳枸。若到

煎時。切記三片生姜。一碗水煎久。先生若喫好之時。你呵須重謝大開手。〔生〕只怕你

是箇劫藥。〔淨怒介〕若是劫掠。我是賊郎中了。不做這等事。不做這等事。〔生〕休取笑。休取笑。這藥

金請收下。〔淨推介外勸受介生別介〕問醫圖勿藥。求卜願通神。〔外淨〕藥醫不死病。卜度有緣人。

〔下生〕青囊。我行得勞頓了。且在昇仙橋坐一坐去。〔坐介丑〕相公。無人在此。有一言奉稟。〔生〕有話便說。〔丑〕小人聞知。幽鳥不飛。難遷喬木。潛龍久蟄。終困鹽池。鴛儔翠館。何如鷺序朱門。寶鳳青樓。不若玉堂金馬。如今小姐厥疾不瘳。尙爾賴扶藥石。可奈相公跣足視地。安圖穩步雲霄。自謂美玉待沽。還有連城日也。豈念遺珠自泣。終無合浦時乎。倘幸妝臺病起。急須鞍馬登程。欲圖偕老西施。早決興吳之計。保護虞姬。重盟霸楚之謀。休得懨懨風月。擔悞一天雷雨。淒淒花草。胡遮萬里春光。失此不爲之所。他年悔亦晚矣。不識相公之志。寒灰可復燃耶。〔生驚起揖丑介〕青囊。你忠言相勸。我怎不從。一待小姐病痊。決向前程進取。若今生不乘駟馬高車。誓不過此橋。我且題柱爲盟。借取筆硯來。〔丑借介生題介〕

〔奈子花〕天應念淪落狂鯁。奮青雲穩取封侯。河橋望裏錦袍歸畫。駕仙騶山川增秀。〔合〕輻輳願英聲一時騰茂。

〔前腔〕〔丑〕喜題柱刻畫銀鈎。願東人早占鰲頭。相公。你對此橋呵。秦王鞭石奇功立就。勿淹留鵠河填守。〔合前〕

〔前腔〕〔生〕青囊男兒漢壯氣吞牛。丈夫志豈困荒丘。我此去呵。定逢黃石圮橋功。就恁驚看拿雲雙手。〔合前丑〕相公。雖則這等說。還怕你放小姐不下。

〔前腔〕尾生志終溺狂流。向藍橋只戀鸞儔。好不誤了生平志氣。待小人也拜這橋幾拜。只願我相公呵。從橋誓畢有如此口。果若得意回來。看蒼頭馬前歡走。〔合前丑〕相公。或者小姐病中煩躁。就請回罷。〔生〕青囊小姐一好。我就到京去了。〔丑〕只怕枕頭上恩情重大。明日又忘了。

不爲妻友激。

多被僕夫言。

他日風雲會。

看過駟馬軒。

第二十一齣 陽關送別

〔卜算子〕〔旦上〕怕捲繡羅幃。轉展長吁氣。〔生上〕莫把新愁怨落暉。鏡裏人憔悴。〔旦〕池塘淺蘸煙蕪。簾幙門垂風絮。〔生〕拋卻鬪草工夫。冷落踏青心緒。〔旦〕只因病損愁多。

落得花飛春去。〔生〕可憐繡閣生苔。常對月華籠砌。〔旦〕長卿。奴家臥病日久。醫藥難痊。不識何方

可堪調治。聞你昨日問卜。未審吉凶何似。乞從實道來。〔生〕我去問卜。乃是嚴君平先生。一占就得美數。不惟卿病可。抑帶區區福至。前程萬里。指日騰騫。若此數獲符。纔報你的恩義。只怕好事難憑。徒生妄想。〔旦〕只願有此一日。不負患難相從。〔生〕呀。孤紅攜藥來了。〔貼〕遮淚搏輕扇。含愁揭繡幃。可憐香閣伴。烏髮病中稀。小姐藥在此。〔旦〕好苦。喫不下。〔貼〕小姐。沒奈何勉強求生。好聽奴家奉勸。

〔黃鶯兒〕你應恨夜亡時。到如今重悔之。慊慊病欲擔憂死。你還把嬌身自持。窮愁自支。寬心守待他榮貴。你若病體不保。他得意之時。又自有春風桃李效雄雌。交鸞舞鳳誰憶舊棲枝。〔旦〕孤紅。事到如此。爲甚求生。不如死罷休。〔丑跑上〕告相公。不知朝裏怎生差一箇使臣到來。〔旦貼驚下〕

〔玩仙燈〕〔小外上〕迢遞下彤墀。爲文星遠來招取。老監揚得意。恭承王命。特至成都。欽召相如。且喜到他門首。不免逕入。〔生見介小外〕聖旨已到。跪聽宣讀。皇帝札曰。咨爾相如。聖人蒞世。必資臣工。不學恥問。無以翼不逮也。今朕獲居臣民之上。以承宗廟之祀。欲肆力墳典。以軼皇王。

故轍。朕不敏是用惕惕。近閱梁孝王籍。得子虛賦。讀之茫然。自以爲不及。深恨不得與卿同時。旣聞揚得意進言。知卿所作。特詔卿偕來入朝。朕將親試焉。毋以不明。棄而不往。亟欲陳於篇之周之密之重之閉之興。以啓朕躬。烏慮念之。其亟來毋怠。欽哉。望闕謝恩。〔生謝介拜外介〕楊兄。豈意蓬窗衰腐。邊燭龍光。〔小外〕賢弟。本是暘谷飛雛。始朝天日。〔生〕只是山妻有疾。不忍出門。如何是好。〔外〕長卿差矣。君命召不俟駕而行。遲且不可。豈應不去。惡有細君之恩。大於人君之命乎。就請東裝。不可濡滯。老漢略轉家中一看。竟到昇仙橋拱候了。〔生〕請坐洗塵。〔外〕不勞了。願求早奮青雲步。莫得癡迷錦帳叢。〔下生〕小姐。快些出來。〔旦貼上〕不怪呼聲急。惟嫌出戶遲。長卿。詔書爲何到此。〔生〕向遊梁王門下。曾作子虛賦獻之。幸爲今上所知。特遣楊兄召我。此去必受榮華。只是捨卿不下。〔旦〕長卿。奴家病根。實在憂困中來。你若果有好處。我也甘心就死。只是早回。實奴深望。〔生〕一定就回。〔旦〕孤紅。你去治一杯酒來。我與長卿送別。一面收拾行裝。不可遲了。〔貼應介〕今朝始信文章好。莫道丫鬟不識人。〔下旦〕長卿。你去興匆匆。我離愁疊疊。想當初到不如不隨你呵。那曉得

〔步步嬌〕花惜分香雲別雨。一旦縈愁緒。無限別離悲。苦淡酸辛許多滋味。十分空結竝頭歡。半生忽灑相思淚。長卿我百種艱辛。無多廝守。時遭寡鵠。命犯孤辰。如之奈何。〔生〕小姐龍虎難逢。鴛鴦易散。今日之別。豈是下懷。

〔園林好〕爲君命相應便馳。把妻恩霎時割去。總幸得文章知遇。〔合〕偏憐著故人違。偏憐著故園非。

〔前腔〕〔旦〕淒涼處新恨有餘。斷腸時舊愁無際。須臾頃頓迷煙樹。〔合〕相看處斷雲飛。相看處斷鴻低。

〔江兒水〕〔生〕悵與幽閨遠。愁將客館依。知心的何處人兒去。奈天涯風景今遭際。怎知道鷓鴣成行隊。害得鴛鴦折配。〔合〕把翠館青樓。翻蔽了斷雲孤寺。〔前腔〕〔旦〕忽自鬆蟬鬢。須臾鎖黛眉。盼知心咫尺成千里。長卿你此去呵。短琴孤劍荒村裏。頻將好夢安排睡。須念鴛鴦衾恩意。只怕到了京畿。別見紅樓思娶。〔生〕小姐何出此言。

〔五供養〕既承相契。錯受知音。當壚苦依。便教新貴顯。怎把舊盟違。我一上青雲。便問錦江魚水。肯因春好看。悞了月明時。〔合〕管取榮還福雙至。〔旦〕長卿。你

回來不見我呵。〔哭介〕好向荒坵蒿里。葉落蕭蕭。西風勁時。相尋寒骨處。奠酒一

陳辭。哀聲啼處。也使芳魂知遇。不孤飛雉遠。早慰鶴羣思。〔生〕小姐休提。〔合〕管取

榮還舉案與眉齊。〔丑上〕早是出門常見月。可憐分袂又經秋。告相公。天色將暮。前路難行。楊公

公又著人相請。〔生〕回報他就來了。〔丑應介〕小姐。只此告別。〔旦〕且住。孤紅快些出來。〔貼〕澆

酒入愁腸。化作相思淚。日暮下西樓。人遠心重醉。小姐。行裝一束。別酒一樽在此。〔旦〕取過來。〔遞

介〕長卿。你就去了。

〔玉交枝〕愁多難語。暗傷情。惟牽去衣。我這殷勤盡付眉尖處。悶把一杯頻注。

苦杯行。猶在纖手低。魂飄已出纖雲際。〔合〕嘆今宵魂夢怎依。嘆他年榮辱怎

知。〔貼〕我也奉相公一杯。

〔前腔〕真心休廢。念相從。幾成禍危。記都亭月下徘徊處。四壁歸來。秋去。賣花

聲在金市西。醉鄉開在紅塵地。你呵。再休題瑤琴自隨。再休題青囊自隨。〔丑〕
相公去了罷。〔生〕來了。來了。〔別介〕

〔川撥棹〕〔合〕拋紅袖。上翠車。向津橋。穿林樹。看此去彩鳳朝飛。看此去紅日朝輝。盡道相如衣錦歸。〔生〕馬嘶殘。雨春蕪溼。人立朱門翠袖長。〔下旦〕孤紅。他已遠去了。好

苦也。昨日相知今又非。昨夜成雙今不知。誰知命運當奇。忽看成咫尺天涯。孤紅。只怕他風情滿壯思。我幽倩損瘦肢。

〔尾〕從今莫說團圓處。願鱗鴻早傳書去。莫使路遠人迷。

蕭蕭疋馬出關門。

四野荒煙遶亂村。

莫道征人看不見。

一鞭殘照易黃昏。

第二十一齣 給管求文

〔北點絳脣〕〔末上〕獨掌朝班。每依仙輦。把珠簾捲。細拂龍牀。謹退向丹墀站。

自家漢朝一箇中常侍也。官居禁苑。職理詞章。貴出列侯之上。權齊卿相之間。不說在下清高。朝廷

富貴。只看今日皇上出獵。這鑾輿整肅。鹵簿端嚴。那裏說得盡。但見似靄龍香。曲引昭儀過。複闕。如雷象輦。大開閶闔下平門。雙鳳花袍來廣漢。都看仙仗迴旋。交螭團扇聽駒駘。盡訝神儀閃爍。前馳道。後護駕。莫非鐵甲之將軍。左紀言。右編事。悉屬金章之太史。輦過長楊。細雨忽來清蹕。駕臨雲夢。清風預爲祛塵。表林麓而廓草萊。虞旌遞引。剪荆棘而夷蕪穢。晉鼓喧推。奉轡馳驅。暗有追輪造父。弭旌護從。潛迴轉御。織阿。沈弓綠。燒火紅。雲旗白。林谷爲之變遷。猛車厲。迅乘出。羽騎馳。雷電爲之交作。江河陸而大山。櫓。曾無得脫之蜚廉。干將戟而烏嗥弓。豈有偷奔之解廌。前開一面。除非可軼遺風。預設三驅。或者能逃野馬。但見上殺歸田。咸謂割鮮輪染。不道東津講武。相從大狩威施。姪楚誇齊。休足論。渭川漆澤近郊圻。君王豈是荒遊日。本爲邊疆習鼓鞞。呀。聖駕未出。奏事官早到。

〔劉潑帽〕〔生小外上〕五雲縹緲龍光閃。入皇都帝闕遙瞻。天威咫尺將身斂。拜舞謁丹墀。祇應受重瞳鑒。〔生〕昔日西秦今又來。咸陽依舊殿門開。〔外〕須知聖帝非常主。不

學秦王坑俊才。〔生〕楊兄。路途迢遞。飽歷風霜。不在話下。你看雲霄咫尺。帝闕森嚴。何等王氣也。呵。

〔外〕長卿。風雲易失。雨露難逢。你在孝景之時。淪落不偶。今日忽逢天上傳宣。又是一番模樣了。此

是午門外廂。仔細進見則箇。

〔前腔〕〔合〕九重日射黃金殿。仰天王不勝驚膽。玉爐香霧空中染。〔拜闕介〕忽

見彩霞端。萬雉迴團扇。〔末〕伏謁的是何官。〔外〕臣狗監楊得意。奉詔往召相如。今來伏謁。

〔末〕既如此。吾當轉達。身掛紫袍垂氣象。口傳天語出絲綸。〔下內云〕聖上有旨。朕即欲往獵。聞相

如已至。急宣進謁。〔生行介〕

〔六么令〕忙趨急斂。上金階謹拂朝衫。雲邊側耳聽傳宣。天語近。拜應前。鰕生

何幸膺高薦。兢兢心一小。默默口三緘。〔下末上〕出入金階誰結襪。高低丹陛自傳臚。適宣召的

官員。暫且在此間候。一回則箇。呀。楊內相。那官好生端整也。〔外〕此人文章冠絕天下。豈惟都雅。近

獵時名。〔末〕原來皇上爲愛文章如此。人生豈可不讀書哉。〔外〕便是。

〔前腔〕〔合〕這回有感。論文章必顯兒男。誰人得似起幽潛。方奮翮。正圖南。無

窮恩露從今染。〔內云〕聖上有旨。適見相如。甚慰朕想。許尙書給筆札。中常侍送入東閣。朕獵還

即欲觀文。毋悞。欽此。〔末〕奉聖旨。〔生上〕

〔劉潑帽〕天顏有喜文詞豔。坐絲綸此地非慚。我不枉將書那日窮研遍。十載破青氈。一旦朝金殿。〔小生扮尙書給筆札上〕

〔前腔〕親持彩筆文光煥。更幾重蜀紙湘縑。行看頃刻雲煙遍。須信讀書男。終久芳名炫。〔對生云〕先生請收下。下官告辭。管城子即日抒詞。楮先生行當黻藻。〔下外〕長卿。聖上

有何說話。〔生〕皇上一見就問。子虛賦卿所作乎。相相對是臣所作。此諸侯之事不足觀。請爲天子游獵賦以進。上爲大悅。因命入東閣成文。〔外〕好好。不負所舉。此文一成。富貴無限。賢弟。只望你著意呈進。〔生〕何勞掛念。

〔出隊子〕賦才無玷。賦才無玷。定有奇花上筆尖。風雲月露讓誰擔。不學雕冰文字險。〔合〕奏達雲霄。必定喜添。〔外〕中常侍。我這兄弟文章呵。

〔前腔〕鬼神驚戰。鬼神驚戰。萬斛珠璣信手拈。翔風直是玉樓仙。一瀉江河驚倒撼。〔合〕真箇是才擅京西。望切斗南。〔外〕老夫本欲奉陪。恐駕出有妨。就此暫別。請問操觚

客。何如捧轡人。〔下末〕先生。請到東閣去。〔生〕常侍請。〔末〕先生。此間已是東閣了。

〔前腔〕〔合〕紫薇花爛，紫薇花爛，幾樹芭蕉映碧檐。玉鈎初下午時簾，金鑰門開鶯數點。一笑掀髯，文思頓酣。〔末〕左右看茶。

〔前腔〕〔合〕茶煙書卷，茶煙書卷，金鴨香銷冷玉函。庭前白鶴忽乘軒，几上青雲隨筆轉。眞箇是玉堂學士，翰苑神仙。〔末〕學生告辭。〔生〕天使大人有勞了。〔末〕送人遊

閨苑。復自入天門。〔下生〕未卜風雲事，先沾雨露恩。〔下〕

第二十三齣 空閨永歎

〔破陣子〕〔旦上〕一自才郎別去，新愁和淚俱增。〔貼上〕疎簾常掛淒涼月，破

壁空懸慘淡燈。〔合〕誰憐悵別情。〔旦〕手撚花枝意似癡。一春常是憶人時。如何說得憑闌

處。風裊垂楊千萬絲。孤紅長卿一去經旬，更無音問。好生悶縈懷也。〔貼〕小姐山川脩阻，魚雁難憑。

請寬心保重則箇。〔旦〕孤紅。我這病體雖痊，可奈落紅點地。新月鉤空，幽景離懷，共成愁絕。不免庭

下閒步一回。你去煎些茶來遣興。〔貼應介〕莫道月團心內苦，暫將雷莢口中甜。〔下丑淨巡更上〕

月子雖明光未圓。幾家憂悶幾家歡。好像高燈臺點火，偏弗照。則我夾被牽綿苦則單。〔下旦〕呀，你

聽牆外行歌。好生慘人也。

〔四朝元〕黃昏初靜。歌從月下聞。道幾家歡樂。同對清景。也有人呵異鄉拋獨影。漫支頤自省。漫支頤自省。怎得團圓。此夜雙清。只怕薄絮絲空。繡衾香冷。虛受纏綿病。嗟。真自悔長生。靈藥雖偷。碧海心空另。今日呵。寒雲枉自行。暗雨徒相競。與誰廝倩。朝朝暮暮。陽臺之逕。〔貼攜茶上〕磧底松聲初罷響。水邊雲氣乍移來。小姐。茶

在此。〔旦〕孤紅。把水沈香燒一炷來。〔貼〕積火終須煖。寒灰亦自燃。〔下丑淨巡更上〕荷葉團團秋裏衰。亮月團團雲裏埋。鏡子團團奴房裏照。梅子團團心裏歪。〔旦〕長卿。

〔前腔〕佳期無定。思君夢不成。奈露侵雙襪。月弔孤影。使愁人驚怨冷。把吳歛再審。把吳歛再審。他道敗葉秋殘。皓魄陰生。青鏡塵空。梅花子另。虛卻團團景。嗟。君在五雲城。妾在空閨。獨立依金井。似朱闌繫玉瓶。素纖牽翠縷。水聲不定。涓涓滴滴。夜長更永。夜長更永。〔貼攜香上〕芳蘭漫蒸愁。焚液靈廚雖香苦。嚙臍。小姐。熏

爐在此。〔旦〕孤紅。乘此月明之下。去取吳綾一幅。和那翦尺來與我。要做一兜肚。寄與長卿。見我千

絲萬緒。常繫心頭也。〔貼〕秋來只恐君心冷。寄取吳吞一縷綿。〔下丑淨上〕瞿塘峽口冷煙消。白帝城頭月子高。欲寄征夫書一紙。成都門外不通潮。〔下旦〕呀。你聽竹枝詞越越驚人。好生悽愴也。

〔前腔〕瞿塘煙冷。是傷懷第一層。況那些碧雲輕瑣。綠窗初靜。掛城頭孤月明。欲緘書遠贈。欲緘書遠贈。他又道江上無潮。難通紙上多情。這萬里橋高。盼不見五陵人迥。咳。空留下淚滴冰綃冷。喏。說甚麼貌娉婷。儘受著半路蹊蹺。和那箇九死慚煎病。天。我這命窮。雖然是限五行。長卿你夫婦也應同一命。這些八字呵。誰人擺定。分分兩兩。較來偏稱。較來偏稱。〔貼上〕抽思拔慮憐針線。割肚牽腸是剪刀。小姐。

吳綾翦尺。綵線金針。俱在此了。〔旦〕你且留下。好去鋪著牀兒。我欲托此良宵。夢寐一見相如也。

〔貼〕鴛鴦枕上華胥國。鸞鳳衾中宋玉臺。〔下丑淨上〕夫戍蕭關妾在吳。西風吹妾妾憂夫。一行書信千行淚。寒到君邊衣到無。〔下旦〕呀。好生怪。此行歌使人重有所感。〔縫介〕

〔前腔〕淒聲相應。分明夫戍紫塞城。妾便是悲秋楚國。望雲秦嶺。說不盡淒涼景。更西風釀冷。更西風釀冷。攪渾了血點模糊。淚滴飄零。閃不過雨暗雲愁。空

消受月華燈影。更一箇半年愁病。嗟。這離恨怎支撐。苦則苦。我這裏信難通。怕則怕他那裏心難定。枉教我肥瘦兒胸中遙自忖。寬和澀刀上空相應。這衣帶呵。願與我將他拘定。長長短短。使伊追省。使伊追省。〔貼上〕寂寞繡屏香一炷。綠窗風雨。夢來時。告小姐。牀已鋪完。月陰將雨。請進去安歇。明日做完罷。〔旦〕與我好生收拾進去。

〔尾〕初心看月消殘病。不道滿耳悲歌感興。酩子裏長吁付短檠。

破雲遮月忽朦朧。

欲夢還愁夢不通。

夢後欲知前夢處。

一牀衾枕半牀空。

第二十四齣 持節錦行

〔生查子〕〔生上〕雄文對日裁。到闕瞻天拜。〔丑上〕奏罷五雲開。望絕彤芝蓋。

〔生〕歲去愁終改。春還命自來。〔丑〕何須問丞相。東閣幾時開。〔生〕青囊不意我淪落不偶。竟謝文章之力。得蒙皇上寵召。命入東閣。遂夢黃衣老。命我作大人賦獻之。因以神仙之事感上。早間奏過。命在金馬門待詔。倘賜披閱。必有好處。你就回家報與小姐知道。呀。遠來的敢是楊公公麼。

〔前腔〕〔小外上〕金堤繞碧苔。玉樹紛青靄。十里錦風來。隱隱穿仙界。老漢昨日侍從出獵。不知長卿進賦如何。不免去聽些消息。呀。長卿已先在此。皇上見賦否。〔生〕賦已獻過。令相如待詔此間。〔末持冠服金段上〕

〔前腔〕皇恩海樣該。帝眷天來大。捧旨下瑤階。齊聽綸音賚。聖上有旨。適見相如之賦。使朕意欲凌雲。深以相見爲晚。然非得意所薦。朕安知之。茲拜相如爲著作郎。賜錦四疋。楊得意賜金十斤。以彰進賢之美。欽此。謝恩。先生請易冠服。〔生易介〕

〔駐雲飛〕自顧微骸。寵被君王特召來。媿此疎愚在。敢望郎官拜。嗟。本謂自沈埋。牛衣甘耐。肯信如今。一旦腰橫帶。得上黃金市馬臺。得上黃金市馬臺。〔末〕楊內相。這賜金請收下。〔外受拜介〕

〔前腔〕爲舉賢才。數笏黃金賜滿懷。報國微誠在。謝友推恩大。嗟。珍捧下瑤階。光生天外。始信文高無限恩波貸。〔合〕願祝皇家日進才。願祝皇家日進才。

〔內云〕聖上有旨。着相如有事咨問。〔外別生介〕老夫在門外奉候。且到五龍樓。待看單鳳下。〔下〕

生伏闕介內云〕聖上問著作郎司馬相如。朕卽位以來。遂遣唐蒙往賓夜郎邛僂。不過使其來享也。今違朕旨。略通具制。糜費兵革。巴蜀吏民無不嗟怨。問卿何以治之。更問邛笮之君。多欲請爲內附。卿以何策處置。可條對詳答。不得輕議悞事。〔生〕臣奏陛下。

〔駐馬聽〕虜貴懷來。豈可無謀作禍胎。唐蒙不能體陛下之意。致使良民怨望。財用虛供。撫輯無才。爲今之計。正宜曉諭巴蜀吏民。招服夜邛諸國。擒取唐蒙。罪告天下。邛笮之君長。旣欲請爲臣妾。亦宜曲爲容納。不可拒絕。以孤外夷歸附之誠。當今四海盡爲家。何妨萬國齊瞻戴。莫負忠懷。從款塞。一一梯山航海。

〔滴溜子〕〔旦貼持符節上〕君恩到。君恩到紫羅城外。兵權到。兵權到玉門關外。看他征南功大。親持此節歸。收功絕塞。賜宴金門。共叨恩拜。聖旨到來。就此拜著作

郎司馬相如爲中郎將。領兵三千。建節往使。用馳四乘之傳。卽日辭朝。檄諭巴蜀民。以鑒朕意。招安西南夷。以入王廷。就取唐蒙治罪。歸報之日。另行陞賞。毋得生事。以負朕托。欽此。謝恩。〔生受節介

旦貼〕執節承恩重。還宮進步輕。〔下生〕王事不敢久稽。就此起程。

〔駐馬聽〕頓首三台。敢露丹心。幸帝諾。慚愧孫吳將略。衛霍功勳。賈董文才。皇風自此掃氛埃。何辭苦楚。行荒塞。看奏凱回來。謳歌滿路。遙拜九天恩賚。〔外

上〕忽聞蒼龍蟄。俄動野鷗眠。適聞長卿出使。特來餞送。來的敢是他。〔見介外〕賢弟恭喜。特奉水

酒奉餞。〔內云〕聖上有旨。急召楊得意入朝。欲問虎圈中事。〔外〕來了來了。賢弟。不得表情。勿怪勿

怪。朋情雖所急。君召莫容遲。〔下生〕青囊何在。〔丑上〕纔在宮牆看流水。俄從車馬出都門。相公有

何鈞旨。〔生〕我出使事體。你知道麼。〔丑〕小人纔聽虎賁衛點兵三千。相從中郎將出使。因此知

道。〔生〕叫左右取盃甲過來。〔衆應上〕晨韜史氏之筆。暮握使臣之斧。始知學劍學書。不愧能文能

武。告老爺盃甲在此。〔生換介〕就此起程。

〔水底魚〕耀日戈開。森森劍戟排。紅旗一派。遙從畫角來。遙從畫角來。

〔前腔〕〔衆〕玉塞門開。黃雲覆地埋。夷酋早拜。天教飛將來。天教飛將來。

天子重三推。

將軍儼若雷。

填填旗鼓出。

人在黑雲隈。

第二十五齣 奸臣誤國

〔連珠令〕〔淨扮唐蒙率衆上〕身作藩臣衣紫緋。貔貅百萬久征西。多因腹內無忠膽。故使身肥國不肥。大節何須問。奸謀且自藏。試看忠國者。千古浪傳芳。自家武功將漢使唐蒙。雖名通夷。實圖自利。上不管朝廷。下不念百姓。卽今夜巧纜服。取貨如山。只有罽中未去。所進難量。今日便欲登程。不識巴蜀吏卒轉漕奉幣的可會完備麼。〔內〕俱已完備。〔淨〕如此就行。

〔清江引〕隋何陸賈非眞使。服虜誰能事。言到橫行時。談及招安處。〔合〕上天山。勒漢功。神威至。

〔前腔〕〔衆〕雲開瀚海天兵至。馬上橫戈刺。飛箭石頭搖。神劍韜中覩。〔合〕凱歌回。奏君王。蒙恩賜。

此去併山河。

功名史上多。

只愁金鵠印。

無福奈君何。

第二十六齣 牛酒交歡

〔夜行船〕〔末上〕承乏一方爲保障。應不愧漢吏循良。五馬高車。二千石俸。猶自見人俯仰。下官蜀郡太守是也。聞知中郎將司馬相如。馳傳巴蜀。所到之處。無不郊迎。下官爵非卑下。分之所在。不敢有違。昨探消息。知是今日臨境。以此出郊迎候。如何臨邛令不見到來。〔衆〕王知縣來了。

〔前腔〕〔小生上〕新築沙堤行宰相。喜今朝鳳翥龍驤。燕友逢春。鶯朋出谷。此際歡生遐壤。自家臨邛令王吉。向與相如分手。彼落天涯。生叨久任。近聞帝眷。詔拜郎官。持節使經縣界。只得候見一回。聞府尊大人在此。不免進去相見。〔衆〕臨邛縣知縣見。〔末〕賢令請起。天使將至。館舍完備未曾。〔小生〕告大人。天使乃知縣故人。凡事必不深較。〔末〕賢令。汝言謬矣。雖云故人。今承君命。乃天使也。敢不敬奉。一定要遠接。你須負弩前行。〔小生〕領命。〔末〕這鼓吹喧騰。車塵雜沓。想是使車已至。須要進接。不可違慢。〔小生〕是。

〔前腔〕〔生上〕馳驛擁旄爲大將。急王程帶月披霜。水泛僊槎。星隨使節。萬里獨專虎帳。〔衆〕稟將軍。臨邛縣已到了。〔生〕叫左右傳示迎接官知道。將軍有令。本郡太守不必郊

迎縣令不勞負矢俱到驛中相見。〔衆應介〕都亭長接老爺。〔生〕起去。著府縣官參見。〔末跪介生〕請起。〔末〕不敢。〔生〕一定請起。〔小生進跪介生亦跪介〕王祥甫。豈有故人不貴。而貴中郎將者乎。一定請起。就與郡守公同坐一坐。還有心曲之言奉告。〔末〕天使大人。學生暫辭出外。恐與王縣令別有話講。〔生〕既如此。先請。〔末辭暫下生哭介〕祥甫。你知道麼。我憶當初。

〔刮鼓令犯〕承寵召到此方。正秋風落葉黃。這都亭中呵。也會寓宿牀頭孤劍響。恰纔經行之所。也曾寄跡花邊綠酒香。誰知今日重來。衣錦復還鄉。亭前風月看更揚。壚頭芳草到偏長。〔合〕風雲會不可量。從來奇遇信天將。英雄志到底償。空將窮達笑炎涼。〔小生〕吾兄榮華至此。也是積學使然。須信道。

〔前腔〕文共武卷與藏。到時來自有方。蓬華從來生宰相。這草昧何能困霸王。昔日今朝事實不同。誰道忽生光。塵中傳舍棲驢驕。人間酒肆寄仙郎。〔合〕真堪羨孰敢方。頓教旌旆爛生光。情懷展笑語芳。誰言國士信無雙。〔生〕王兄。還有一言

奉告。〔小生〕有何見諭。〔生〕言之可羞。不得不爲知己道。

〔前腔〕當日事謝女娘。肯相從作夜亡。弟又困窮無似。他一心願淒涼。儘恁顛連不廝放。害盡嬌羞病幾場。小弟只爲功名心急。割捨他病軀入京。生死勢難量。欲待回家一看。又因王事在身。如何是好。空懸望眼愁斷腸。未知何日始還鄉。專望吾兄呵。相憐念賜慨慷。週全汝嫂舊糟糠。異日歸來。當圖報一拜堂。泰山高義爲君揚。〔小生〕這箇不勞分付。小弟就差人奉候。長卿。我與你呵。

〔前腔〕膠漆愛舊誼長。喜今朝掛錦裳。說著尊嫂之事。委實可慶。我不是冰人當受賞。眞箇是月下婚書暗有光。當初旣忝其始。如今敢不厚其終。心事願相將。泥金敢憚奔走忙。看飛騎到華堂。管使尊嫂呵。〔合〕愁眉翠喜色黃。鳳樓簾捲試新妝。金閨啟錦席張。欲看金印笑迎忙。〔生〕王兄。向來官況如何。〔小生復寒溫介〕

〔憶多嬌〕〔外上〕司馬郎。怨未降。淫女當時惱夜亡。肯信今朝大有光。頗自羞惶。猶恐前愆未忘。老漢卓王孫。惡女文君。偷奔司馬。雖曾少濟。未盡週全。豈意一旦高貴。令人自抱羞慚。如今建節都亭。萬方瞻仰。眞箇好男子也。只恨當時。何不明嫁與他。旣不見日前揚醜。又不

見目下乖違。一著之差。滿盤俱廢。我今特備牛酒。以圖交歡。此間已是駐節所在。聞府尊大人伺候在此。不免央他轉致。以求一見。府尊大人有請。〔末上〕呀。卓老先生。〔外〕公祖大人。老夫欲見小婿。求公祖轉致一聲。〔末〕這箇使得。〔進見介〕告天使大人。尊岳丈求見。〔生〕請起。〔作驚背低唱介〕

〔滴溜子〕吾何有。吾何有。泰山岳丈。何曾去。何曾去。坦腹東牀。是了。這是卓老趨炎了。酒壚中緣何情狀。如今呵。都亭建節時。有許多佳況。罷罷。君子無絕人已甚。況親連瓜葛。也曾受惠。舊日綈袍猶存念想。公祖大人。此老雖係親情。只是待生過當。今日不接。乃爲薄倖了。可著他進來。〔末應介生〕王祥甫。還是我配他女兒不是。〔小生〕天作之合。與兄何干。〔外進介〕老夫卓王孫。特來獻賀。〔生〕岳丈請上。小生有一拜。〔外〕不敢。〔末小生勸介〕

〔和佛兒〕〔生拜介〕謝得當初醉錦堂。笙歌沐寵光。到後來呵。酒壚忍恥。垂賜濟空囊。思欲踵門拜謝。又恐峻門防。〔外〕不敢。〔生〕因此上直待成名兩鬢霜。直待成名兩鬢霜。老先生。如今令愛好去看他了。〔外〕一送天使登程。就去請回。專待榮歸。拜納門下。向來有

失看待。老夫罪甚。因此特奉牛酒爲歡。公祖父母二大人。

〔前腔〕都因老漢沒緣當。風流不識俊才郎。因此之故。特來荆請。塵驛拜仙裝。於湯與有光。〔合〕須信道籬鷗何曾識鳳凰。籬鷗何曾識鳳凰。〔末小生〕老先生。若請

令愛。府縣添差人夫防護。不知幾時遣人。〔外〕明日遂行了。〔生〕公祖先生。朝廷此使。一欲檄諭巴蜀吏民。以唐蒙略通生事。非由上意。一欲往招邛笮冉駹。使皆內附。那一紙榜文。好生廣示。相如就此拜辭。〔末〕知府不敢動問。暫屈使軺。今晚都亭少憩如何。〔生〕王程有限。斷然不敢。喚左右起程。列位請回罷。〔衆〕一定送至郊外。〔小生負弩前行介〕

〔雙聲子〕仙鷗動。仙鷗動。旗半捲。鼓全響。都亭遠。都亭遠。樹欲暝。月初上。穿林莽。穿林莽。渡海航。渡海航。看歸途。列炬去。驛焚香。〔生〕衆官去罷。

〔尾〕山崗陟峻川。滉漾車馬無愁客。路長不怪寒星漸渺茫。〔下末小生對外云〕令

堦雖則快快。老先生白當老成。不可掛念。〔外〕老夫豈敢。〔下小外上〕報報。小人是京中探子。來報王老爺高陞了御史大夫。〔末〕可喜可喜。叫左右賞賜探子。送王老爺進察院。〔小生辭介末行

跪介

窄狹無如仕宦途。

朝來低首暮高呼。

誰人肯把功名棄。

軒冕泥塗稱丈夫。

第二十七齣 金閨榮返

〔臨江仙〕〔旦上〕江空樹遠彤雲渺。倚闌望也心焦。夫君何事去迢迢。芳緘無

使達。雙淚付鮫綃。〔如夢令〕曾共錦幃閒哄。一曲舞鸞歌鳳。常記別伊時。和淚出門相送。如夢。如

夢。窗外梅花風動。奴家自別長卿。時光易失。風月難消。綠窗淒冷。撫錦帳而魂消。秦嶺迢遙。望碧雲而目斷。迴腸一日九煎。倒枕終宵千遍。昨夜寒燈吐蕊。好夢牽情。想有佳音來到。且喚孤紅出來。教他尋問消息一回。多少是好。孤紅那裏。〔貼上〕

〔前腔〕熏爐撥盡寒煙渺。可憐翠被香消。倚闌聞得喚聲嬌。要知心腹事。多半

憶風騷。小姐叫孤紅。不知有何話說。〔旦〕孤紅。你知我心中事麼。〔貼〕小姐有事。說與孤紅知道。

〔旦〕長卿遠別。愁緒縈牽。握手無期。懷心日切。〔貼〕小姐。目下想有人回。不須愁損。〔末小外上〕路

遠行來急。官差恨去遲。自家臨邛縣差來皂隸。迎接司馬夫人。訪得此間是他門首。敲門則箇。〔旦〕
呀。孤紅。聽敲門聲。

〔紅衲襖〕莫不是近鄰家沾濁醪。〔貼〕小姐未嘗乞假。不是。〔旦〕莫不是遊春侶邀歡笑。

〔貼〕小姐又無女伴。不是。〔旦〕莫不是踏青人誤作桃源到。莫不是捕魚翁錯認酒家
敲。〔貼〕小姐不是奴家取笑說。如今不在臨邛店了。不是不是。待我再聽。〔合〕聽一聲驚魂易

飄。忖一回愁心亂攪。雖不是相府侯門。我這冷落深閨也。怎許詩人帶月敲。

〔旦〕孤紅。問一端的。纔可開門。〔貼〕敲門是誰。〔末小外〕我是臨邛縣差來皂隸。〔旦〕呀。事有古怪。

孤紅且不要開。你再去問他。莫不是

〔前腔〕王相公爲故人。千里寄書勞。莫不是馬相公有平安兩字佳音到。莫不是
遇鷹鷂禍事從天到。莫不是報泥金且喜在今朝。因甚來此。〔貼應問介末小外〕正是。你

老爺奉朝命出使。近經本府。相見卓老相公。教他來請夫人。因此府縣添差人船。在此迎接。〔旦〕有

這等事。〔合〕聽一聲悶懷忽消。問一回愁眉頓掃。須信道虎略龍韜終不能困

英雄也。豈是區區兒女曹。孤紅着他在外安歇。再問他。卓家人幾時到來。〔貼〕呀。道猶未了。喜紅姐早到。〔淨上〕離家無十日。做夢有千遭。自家老相公差我迎接小姐。訪道此間是他門首。果然不差。〔見介〕呀。小姐。小姐。夫人。夫人。喜紅磕頭。〔旦〕你爲何到此。〔淨〕容喜紅告稟。你家相公近日做官。經過臨邛縣。那箇不羨他。

〔前腔〕那戴的是紫金冠。更有貂蟬耀。穿的是赭紅袍。坐的是五山轎。龍旗虎帳。卻向馬前繞。錦旃羅傘。又早車上飄。我老相公呵。爲見了驛亭中新婿。嬌就把那酒壚中舊恨消。因此上命咱千里來邀也。乞早登程上紫霄。〔旦〕我不去。既有今日鍾情。何必當初寡愛。〔貼〕小姐。炎涼世態。都是自家中起。一定該去。想不比舊時了。〔旦〕孤紅。你不知我呵。

〔前腔〕雖則是見爹行到。增著俺閒煩惱。雖則是會親人。反被他稱笑。〔貼〕笑甚麼來。〔旦〕他道這畫屏後。靜悠悠。會聽琴的夫人到。他道這酒肆中。假惺惺。會哄人的小姐喬。又說道。這當初離洞房。一雙腳。這當初跨牆頭。一捻腰。只管唧

唧噥噥那些箇女伴彈脣也。羞殺桃花滿面嬌。〔淨〕小姐。如今老相公另造一院。分付家僮禁說前愆。但稱新喜。你急須榮返。不可兀自猜量。〔貼〕待孤紅怎麼。〔淨〕把一副玉磨賞你。〔貼〕要他何幹。〔淨〕這個上好撮頭。〔貼〕啐。休取笑。〔旦〕孤紅。你著到來人役。俱至南關伺候。打點行裝。就起程罷。〔貼應衆下〕副淨上。開門。開門。〔貼〕是誰。〔副淨〕本縣聞夫人歸家。特差人舟防送。併送盤費在此。〔旦〕收了盤費。人到南關等候。〔副淨下〕丑上。頭禿面偏扮。身短脚到長。誰知窮嘴臉。一半惡心腸。自家沈小二妻。聞得司馬夫人回家。特來相送。你聽他家中喧嚷。想是便起程了。不免進去。呀。夫人。夫人。恭喜。恭喜。聞知回府。特備些薄禮相送。〔旦〕娘子尊姓。實未相聞。今日先施。誠爲過當。〔丑〕拙夫沈小二便是。〔貼〕卻原來。禮到不勞。見賜米糧數升何如。〔丑〕惶恐。惶恐。大姐。你家裏做官。無米也。八千晒了。不用罪我罷。夫人既不受餽。願送登舟。〔旦〕沈娘子。既承相送。就請前行。〔丑〕夫人請。〔旦〕孤紅。這條路兒。我與你當初呵。

〔大趂鼓〕相隨月下逃。明時錦袖。暗裏青綃。更尋春酒市。羞歸棹。重憐遭寇病。蕭蕭。〔合〕肯信如今。歡過畫橋。

〔前腔〕〔貼〕小姐。須知福分高。喜春風猶到。花蕊還嬌。看芙蓉城裏度鸞簫。錦江兀自上春潮。〔合〕萬里昇仙。如駕鵲橋。

〔前腔〕〔丑淨〕從今福正饒。看鳳冠歸舍。虎帳還朝。使佳人才子共逍遙。重經此路不爲勞。〔合〕共御香車。同過翠橋。〔末外衆上〕稟夫人。各處人夫俱在此請問。下那一座船。〔旦〕我在卓家船上。你們防送便了。沈娘子。請回罷。有勞了。〔丑〕夫人。路途保重。

相送仙娥上寶舟。

今朝離別不須憂。

一帆風送長江鷁。

知入雲霞最上頭。

第二十八齣 招安絕域

〔水底魚兒〕〔生領兵上〕仗節開關。長風萬里閒。堂堂朝使。此去壓諸蠻。此去壓諸蠻。叫左右。喚本地官員過來。〔衆應介外小生上〕只因天使大。顯得地官卑。韃爲太守越雋太守

見。〔生〕聖上所諭之事。一則檄諭父老。二則譴取唐蒙。三則略定西夷。今日已到長城地面。俱不用隨我出邊。即便開張榜文。羈取唐蒙。歸卽施行。違者重究。〔外小生應介生〕開關去。

〔前腔〕不斬樓蘭。烏號豈用彎。輸情招虜。帝旨馬前傳。帝旨馬前傳。〔下〕

〔前腔〕〔丑淨上〕毳幙腥膻。隨咱驀地眠。長驅打獵。打到玉關前。打到玉關前。吾乃丐侏冉駝二大王。近聞夜丐夔中與漢朝通。多得賞賜。俱爲內附。向遣通事奏知。也要歸順。他若不容。我便殺將去。呀。那遠來的是中國人麼。

〔前腔〕〔生衆上〕萬里關山。垂鞭看凱還。玉階金闕。遙拜賀龍顏。遙拜賀龍顏。喚

通事過來。〔小生〕慣行異域。隨何力。會聽禽言公治長。〔生〕去通與丐侏冉駝二酋長知道。漢皇帝

因你欲求內附。特差天使到此。你若容置郡縣。當歲賞金帛。倘或不從。大兵壓境來了。〔小生打話

介丑淨羅拜介生〕既除邊關。關益斥道。叫左右。取賞錦幣千端。黃金萬兩。卽其所屬之地。列爲郡

縣罷了。〔衆應付金帛介丑淨覆拜唱前曲下生〕大事已定。到牂牁郡去。待取唐蒙到來。請旨定奪。

左右。起程前去。

〔前腔〕斥道除關。華夷共一天。不須三箭。瀚海靜波瀾。瀚海靜波瀾。

第二十九齣 花朝舉觴

〔步蟾宮〕〔外上〕門闌多喜春重到。更兼蔗境逍遙。不妨綠酒醉花朝。人共青山老。養子不教父之過。不如養女身受富。不肖空憐作馬牛。富貴猶能耀門戶。我卓干孫。家資富足。身體康強。一子二女。所不足者非財也。向因長女文君。不問而嫁相如。深以爲恨。豈知近日得官。經過臨邛。自家只得獻牛酒以交歡。喜得文君已回。相如不日還家。我的面皮何等榮耀。前已另造一院。欲分與他一應財帛。俱與男等。趁此花朝吉日。特備喜筵。送女歸院。早上已曾分付庖丁。不知可曾完備麼。庖丁何在。〔淨上〕小子是庖丁。茶湯樣樣精。饅頭如石塊。索粉似麻繩。豬肺將糖蘸。肝腸用醋烹。一逢霜雪下。肴饌冷如冰。〔外〕咄。這樣庖丁。要他何用。〔淨〕告相公。這是打發小人家的。若到府中。自有手段。〔外〕怎見得。〔淨〕鎗戳還魂鹿。刀剗牽命羊。剗魚先用藥。捉狗乃燒湯。鵝掌拖黃拌。雞毫帶糞管。要知辣手段。一味用生姜。〔外〕不好。打出去。〔衆打介〕不好了。稟相公。他口內都含肉。腰間盡帶椒。作裙包鴨腿。兜肚塞胡桃。兩肋皆藏藕。空臀又夾糕。原來頭上髮。一半是豬毛。〔外〕有這等事。快不要他。〔淨〕饒了這次。小心伏侍。〔外〕也罷。湯水要像模樣。〔淨應〕湯水要像模樣。一味濃鹽赤醬。〔下外叫〕春英請大小姐。秋芳請二小姐。鶴駕請大叔。都到茂椿堂飲宴。不得稽遲。

〔前腔〕〔旦上〕陌頭柳色驚看早。正晚妝樓上無聊。〔貼上〕忽聽牕外語相邀。

應赴花間召。〔旦〕孤紅奴家自前日回來。卽蒙爹爹款待。改造別院。與我居住。今日又設喜筵。定應

送我入院。但不知長卿歸信。心上掛牽。聞爹爹堂上多時。不免向前趨拜。〔貼〕待我先行。〔旦〕怎麼

到是你先行。〔貼〕若不是孤紅帶挈你。那有今日。恰不是我先行。去喫第一席。〔旦〕這丫頭又來取

笑。呀。妹子兄弟也來了。

〔前腔〕〔小旦上〕春藏步帳花開早。喜雲鬟翠驪香綃。姐姐萬福。〔旦〕妹子免禮。〔丑上〕

讀書未得換青袍。卻被傍人笑。〔旦〕笑你甚麼來。〔丑〕他笑我考不上的老童生。呀。大姐姐。

你爲何這幾日越越瘦了。想是憶著姐夫之故。我勸你。今日爹爹設宴。把那肥豬肉多喫幾塊。也好

補一補。〔旦〕咄。油嘴毛頭。爹爹在堂上。快去相見。〔丑應介〕小旦〕爹爹萬福。〔外〕大孩兒免禮。你

是夫人了。〔旦〕爹爹在上。孩兒與妹同胞。豈敢以小貴自尊。〔外〕孩兒有理。我言之謬矣。〔丑〕爹爹。

孩兒閉眼。〔外〕咄。怎麼閉眼。〔丑〕一隻釘釘在裏頭。拔不出哩。〔外〕畜生。你妬我愛姐姐。你怎不學

他丈夫做官。〔丑低云〕這也容易。我也揀著人隨了。做得官時。也是一箇後進夫人。〔外〕大孩兒。我

與你另造一院。俱已完備。今日是箇吉日。又喜花朝。特備酒席送你。〔旦〕多謝爹爹。〔外〕孩兒。今日韶華。更覺倍增。畫橋東風裏。燕子歸來尋舊壘。餘寒猶峭。紅日薄侵綠綺。〔旦〕嫩草方抽碧玉茵。媚柳輕拂黃金縷。鶯轉上林。魚遊春水。幾曲闌干遍倚。又是一番新桃李。〔衆〕佳人應怪歸遲。梅妝淚洗。〔旦貼〕鳳簫聲絕沈孤鴈。望斷清波無雙鯉。雲山萬重。寸心千里。〔外〕看酒過來。

〔梁州序〕雕軒花嫩。瓊林鶯小。正是東君未老。隔簾柔影。翻飛社燕尋巢。忽見酸風逃去。小雨偷來。惹得芳菲惱。錦堂春透也。管絃嘈。看酒暈桃花滿面嬌。
〔合〕紅袖舞。玉樽倒。向良辰美景同歡笑。眞樂事勝蓬島。

〔前腔〕〔旦〕綠窗飛絮。瑤階芳草。點綴春光空好。梨花夢冷。虛將粉蝶痕消。你看翠綃封淚。羅袖分香。新恨憑誰告。秦關何處是碧雲遶。嬾向花間聽鳳簫。
〔貼〕小姐。老相公在上。不必感懷。〔合前〕

〔前腔〕〔小旦貼〕惜風光。簾幙春宵。惹風花池塘春曉。看雙飛舊燕。認巢歸繞。怪得落花芳砌。綠樹蒼雲。不見仙郎到。海棠知未放且藏嬌。〔貼〕留取風枝杜宇

巢〔合前〕

〔前腔〕〔衆〕畫樓前翠管風飄。朱簾外綠楊煙渺。漸黃昏人靜。碧山歸鳥。不怪華燈礙月。飛袖妨花。笑引金樽倒。去年人面也舊。丰標只恐風流減楚腰。〔合前

外〕孤紅過來。我賞你一盃酒。〔貼〕謝老相公。〔外〕好生伏侍小姐。老爹回時再賞你。叫左右與我擡下金珠錦繡五十杠。胡椒餚蠟八百斛。點差家僮侍女二百人。送小姐歸院。〔衆應提燈行介〕

〔節節高〕〔合〕紗籠燭影搖。度赤欄橋。仙香遞引金童導。行芳沼。過碧桃。經雲嶠。瓊樓玉宇人難到。王孫富貴人間少。〔合〕看取堂前錦衣歸。共拜一封丹鳳詔。〔衆〕告相公夫人。院中已到了。

〔前腔〕朱門映水遙。笑聲高。雲鬟綽約天人妙。風光好。簾影搖。歌聲杳。花臺柳榭東風巧。流蘇帳暖春雞報。〔合前〕

〔尾〕人歸別院笙歌鬧。看天明曙色漸高。明日開筵莫憚勞。〔外〕孩兒。此是內室。你進去整頓。點檢物件仔細。

錦步承行踏落花。

親恩珍重惜嬌娃。

侍兒羣笑拳珠箔。

共指紅樓是主家。

第二十齣 唐蒙設陷

〔探春令〕〔淨上〕怒從心起怎饒人。爲冤家難忍。思量欲把深讐報。恨不得冤業盡。下官唐蒙。向爲夜邛諸域未安。朝廷命我招討。其實存心不忠。借托通幣。夤緣爲奸。不意爲朝

廷所知。特遣司馬相如領節密計擒我。今已爲郡縣羈縻在此。思量計無所出。左右身名俱廢。這仇不可不報。有二計在此。不免喚手下善謀的梅盛林過來。與他商議。梅盛林那裏。〔丑上〕既能善謀。

又能善斷。由你鐵漢。也做兩段。恩主有何鈞旨。〔淨〕你曉得我今日爲何受難。〔丑〕這箇都是司馬

相如。〔淨〕著手著手。過來。有事與你計較。一要差人到卓家去。以司馬遷下蠶室之事。假云相如受刑。以此驚動文君。那父親極勢利的。就要改嫁他了。這箇誰去得。〔丑〕小人去。〔淨〕一面差人入京。

多使金銀。揚言相如在西夷壞事。朝廷知道。必來拿他。這是何人去。〔丑〕徐孝去。他有親兄做內

官。一去就定當。〔淨〕這箇好。還有一件。要到相如那裏。哄他妻子病故。教因私廢公。這是誰去。〔丑〕

陳奉去〔淨〕我兒你好中得我意。幹得事成。把一半家私分你。天呵。

〔泣顏回〕弄假要成真。到臨邛管嫁文君。攪亂他朝廷心變。酪子裏氣喪三軍。使鸞離鳳分。霎時間打破他煙花陣。竟未知一朝生死。說甚麼萬里功勳。

〔前腔〕〔丑〕休說寶和銀。把家私唾手平分。但能消除君怨。這便是圖報君恩。

〔淨〕不要漏了消息。〔丑〕這箇不勞嚇付。我機深意深。看前行萬事都無損。他那裏禍不單行。俺這裏福自雙生。

舌上生飛劍。

心中起毒蛇。

慣能傷性命。

極會敗人家。

第三十一齣 文君信誑

〔祝英臺〕〔旦上〕盼長天秋欲暮。哀鴈寥寥度。〔貼上〕絕塞雲空。書斷關山路。

〔合〕怎當得玉笛飛聲。碧梧零露。是晚庭移步。〔旦〕合歡未已。離愁繼。相見無多會。

面難。〔貼〕只有春山消瘦劇。近來添得淚痕斑。〔旦〕孤紅自從歸家。雖蒙爹爹款待。只是想著長卿。

無限煩惱。聞他對爹爹說。不日就回。如何杳無音問。教人倚闥而望。好生愁悶也。你隨我到爹行前去。央他遣人打探一回消息。多少是好。〔貼〕這箇使得。小姐請行。呀。老相公已來了。

〔謁金門〕〔外〕人家須養女。今日悔生兒。閱閱增輝人助喜。風流美婿。仙旌指

日回輿。自家兩日不見女兒。欲去看他一回。呀。女兒到與孤紅在此。〔見介〕女兒連日好麼。〔旦〕爹

爹如此慈愛。有何他憂。只是丈夫無信。欲求大人訪問一回。〔外〕我正有此意。叫卓然過來。〔末上〕

卓然卓然。就到眼前。相公有何鈞旨。〔外〕你到都亭中去。訪問司馬老爺邊方消息。速來回報。〔末〕

要知邊上信。須聽驛中言。〔下外與旦敘寒溫介〕

〔唐多令〕〔丑上〕機事關心不苦。忙到賺人頭路。在下梅盛林。承恩主唐蒙之命。來哄

文君。因此妝一箇抄化軍士。到他門首。未免高叫一聲。有人問及。我就將機就機回他。老爹奶奶。可

憐梅盛林。抄化些錢財。〔末上〕咄。這抄化的不許在此喧嚷。〔丑〕院公。可憐流落軍士。〔末〕且住。你

是那裏來的。〔丑〕我隨司馬老爺往夜耶。因他罪犯朝廷。下了蠶室。故此獨自逃回。〔末〕怎麼

下了蠶室。〔丑〕便是割去了那話兒。〔末〕咄。老爺不日就回。你到胡說。還不走。〔丑〕還不走。還不走。

文君聽見難開口。總然有日放回來。要緊東西全沒有。〔下末報介〕相公小姐不好了。〔外旦驚介〕怎麼說。〔末〕小人纔出門。撞見了一箇抄化軍士。他說道司馬老爺往邊。爲因得罪朝廷。下了蠶室。故得逃回。以此小人進報。〔外旦〕快去喚他轉來。〔末應下外〕孩兒不要驚。待我自去問王大尹。〔旦〕全賴爹爹。〔外〕我就去了。〔下旦貼弔場哭介〕孤紅。我夜夢不祥。不意有此信來。倘有這事。教我怎生下落。天呵好苦也。去年今日別君時。忍淚含羞一送之。不道關河烽火隔。等閒燒斷合歡枝。長卿。長卿。不料你生平際遇。一至此乎。

〔新水令〕嗟哉夫子。亶通儒。嗟哉夫子。亶通儒。有雄才劍橫奇技。又多能綜衆書。慕前賢易相如。嗟落魄無侶。空游倦鳳凰羽。

〔步步嬌〕〔貼〕梁國去曾成子虛賦。畢了駟馬高車志。追思舊好初。孔美雍容仰彼憐予。傳綠綺。兩心娛。怨知情卻爲知音起。

〔折桂令〕〔旦〕因此上謝冰絃永托爲妃。藉清樽不恥當壚。肯知道命也難扶。生年淺促。薄福自苦。竟撇我放不下。中庭影孤。哭難招長夜魂阻。枉使淒惻。願你

在患苦須知。若這九原可從呵。我也願成一箇夫婦每生死同墟。

〔江兒水〕〔貼〕枉笑著風流主好事非。恨書生窮遇終不濟。負卻彈琴當日意。

拋閃得人也沒由去。驀地思量心碎。小姐。怎知他綠綺雙調。今做了青鸞孤處。〔內

云〕

孤紅姐。卓然在此回覆。沒處尋那抄化的軍士。〔旦〕這軍士果然不見了。沒處討一箇的信了。

如何放得下。

〔雁兒落〕空步著鬱萋萋亂草枯。虛聽著哀嚶嚶斷鴻度。哭聲兒吞不吐。痛魂也馳難赴。邊上將軍。你那裏果也不果。是卓文夫。先惹得淚痕多。天呵。我這裏秋天暮。他那裏長夜徂。肯信道兩下裏成牽顧。孤也麼孤。今夜裏瑣窗前啞啞啼夜鳥。

〔僥僥令〕〔貼〕相公舊情空記取。專房寵幸到今非。雖欲歸來重事你。只怕你到春歸人不歸。春歸人不歸。小姐。還有一慮。相公總然遇難。青囊爲何不回。〔旦〕便是。

〔收江南〕總然是馬相如犯罪呵。今此信付糊塗。難道是青囊不得上征途。歸

來說與信音乎。偏累我睜睜眼枯。偏累我睜睜眼枯。孤紅。只恐怕青囊擔病死無辜。〔貼〕小姐不必過哀。

〔園林好〕且躊躇。眞言未知。漫追思。人言有虛。且待老相公回來。便知分曉。但願得逃軍傳誤。纔免得兩心孤。纔免得兩心孤。〔旦〕倘爹爹回來。又沒有眞信呵。

〔沽美酒〕望天涯難覓夫。怨軍士閃人孤。轉眼風波當地多。今生命復孤。爹爹呵。是一箇狠心徒。是一箇狠心徒。誰念親故。禽獸有同羣之顧。草木有連枝之素。他呵。清波中泛起泥污。打奴罵奴。呀。枉捱着幾年虛度。

〔尾〕悠悠咽咽魂難措。迢迢遠遠音不赴。死死生生誰與顧。〔貼〕小姐。下蠶室何等罪刑。〔旦〕你不曉得。言之可羞。呀。爹爹來了。〔外上〕不聞天外信。難慰閣中情。女兒。方纔問王大尹。他尙不知。你不要愁煩。且到妹處散悶一回。〔旦〕謝爹爹。孩兒身子不快。不去了。〔外〕明知心腹事。兩下不開言。〔下旦〕孤紅。你知爹爹之意麼。〔貼〕不曉得。〔旦〕也罷。我也不去說破他。

獨有春風惡劣。

慣把嬌枝吹折。

一發將花揉碎。

問他怎生輕別。

第三十二齣 相如受緹

〔罵玉郎〕〔生上〕月裏嫦娥水上仙。隔了蟾宮影。洛浦煙。人間天上久無緣。漫勞牽去。沈沈動別經年。問何事不還。問何事不還。只因路阻關山。待何時始旋。待何時始旋。說一句夢裏心言。得與你片時相見也。勝如今日也。勝如今日也。邊城萬里。獨受風煙。自熬煎。到如今欲回難轉。真箇是到頭來不由人便。仗節邊城。自拊髀。勅書何事望來稀。朝中怕有奸雄在。不使書生衣錦歸。叨蒙皇上重委。招安西域。擒取唐蒙。事雖定奪。但上表請旨。未見勅諭。淹留日久。事有可疑。況兼思憶文君。朝夕憂懼。未免先發青囊回家。一待旨到。卽馳臨邛便還。卻不是好。青囊那裏。〔丑上〕身在牂牁心在蜀。不知何日始歸家。告老爹。有何鈞旨。〔生〕取硯筆來寫書。差你回去。〔丑〕筆硯在此。〔生〕相如再拜小姐妝次前。

〔前腔〕憶昔輕分九月天。獨自經溪峽。上瀨船。奔流一夜過千山。水潺湲。悶沈沈回首頻看。放不下你望眼欲酸。你望眼欲酸。放不下你病體多般。總君王見

憐。總君王見憐，博得箇淺職微官。奈其間又多牽絆。青囊你去多拜上。自都亭駐節。自都亭駐節。你親前囑付。曾有心言。到今年多應是歡喜家還。休道是薄情人恩多成怨。青囊過來。還有心言對你講。〔側耳低言介末上〕一身都是膽。滿口盡胡柴。自身陳奉便是。承恩主唐蒙之命。來哄相如此間。是他轅門。假妝一箇賣箭的。撞進去。自有話兒動他。軍士們。要買好箭麼。〔衆〕咄。不許喧嚷。〔末〕不打緊。你門老爺是我鄉里。〔生〕左右。甚麼人喧嚷。拿進來。〔衆拿介生〕你是何人。敢來喧嚷。〔末〕爺爺。小的是臨邛人。賣箭的。〔生〕既是臨邛。家住那裏。〔末〕將軍聽稟。

〔歸朝歡〕西郊外。西郊外。九塢樹前。〔生〕爲何到此。〔末〕聞得將軍鎮此邊。敢來望。敢來望。貴眼一看。〔生〕這箭呵。我軍中也用得。你可認得卓王孫家麼。〔末〕小人認得。家近柏臺書院。〔生〕他家沒有事麼。〔末〕小人不敢說。〔生〕便說何妨。〔末〕聽他家小姐今受塞。〔生〕驚介。怎麼受塞。〔末〕一朝春謝花零片。〔生〕曉得小姐是那一個。〔末〕想是將軍舊有緣。〔生哭介〕我妻。你若死了呵。教我

〔前腔〕何心去。何心去做箇好官。衣錦教誰帶笑看。終須去。終須去。撫著你棺。哭得眼昏腸斷。天呵。怨當初爲甚輕分散。早知長別無由見。且自相捱過一年。

〔末〕將軍不必悲啼。卻是小人有罪了。就此拜辭。〔生〕也罷。我箭亦不用了。賞你一兩銀子去。〔末

拜介〕多謝將軍。此言真是箭。直使透肝腸。〔下小外上〕在朝無直士。專闖失忠臣。自家親承聖旨。

來責相如。此間是他衙門。竟入則箇。聖上有旨。跪聽宣讀。皇帝詔曰。朕因夜邛諸國。爲唐蒙生事。因遣司馬相如往彼招安。豈故違朕諭。多得西域金錢。致令諸國怨望。甚爲誤旨。著彼處有司。即使檻車解京。沒其在官行資。不許稍經本處。欽此。〔生〕天使大人。相如有何負國。朝廷這等待我。〔小外〕將軍不必怨悵。你功高望重。不久自明。

〔前腔〕雖則是。雖則是。朝廷廢賢。你功名著在邊。應有日。應有日。君王自憐。你勳名左則全。不見人生運命多遷變。世途成敗無須怨。畢竟天心與保全。〔生〕

若像今日。做那官有何用。

〔前腔〕誰還願。誰還願。鶴行豸冠。待漏趨朝萬國天。誰還願。誰還願。虎符豹冠。

倚劍橫衝萬里煙。如今呵。沈沈宦海迷難轉。拘拘利鎖將人縶。戰馬嘶風自可憐。〔外〕學生告辭了。從今六月霜飛處。何日三年雨到時。〔下生哭介〕青囊你悄悄逃回。訪問小姐之信。若他不死。不要說這椿事。倘然死了。到墳上拜哭一回。若相如有生還之日。這窮骨頭左右和你葬一處。〔丑哭〕相公。小人去了。放心不下。怎生是好。〔生〕我兒。你不要啼哭。被人知道。連你也帶住了。不如趁早去罷。〔丑〕好苦也。眼看惟恐去。魂斷欲相隨。到晚孤亭宿。哀哀哭向誰。〔下末〕可恨柔奸誤人國。更將陰險害忠臣。自家牂牁太守。聞朝廷有旨。著下官拿下相如。此必唐蒙設陷。然事出朝廷。豈敢有違。且去進見。〔衆〕牂牁太守見。〔生〕取小帽來。〔末〕進見介。〔生〕郡守公。小生被譖。送入檻車。此古來常事。就將過來。〔末〕豈敢。〔生〕郡守大人。我只怨當初讀書做甚麼。

〔大聖樂犯〕讀詩書。番上高竿。弄筆如鎗光未寒。奈餘鋒倒向胸中竄。今日呵。逢書蠹。遇刀瘢。說甚鱗甲逢時見。空使鬚髯繫獄看。自從離家以來。江雲斷。海氣連。山妻生死見無緣。誰承望圓扉內。犴狴間。英雄翻做福堂仙。〔末〕將軍。朝廷自有

公道。

〔前腔〕混蓬蒿必辨芝蘭。翥鳳終須勝集鷁。陰雲自有晴天見。看主聖釋臣賢。將軍呵。天將大任行當念。野鶴遭籠暫受愆。還多慰。幸勉旃。到頭休說下場言。他日功名白竹帛。鐫終看千古姓名傳。將軍還請到敝衙去。

長烟落日孤城閉。

淡月清霜怨角來。

寄語孤臣勿回首。

故鄉千里獨登臺。

第二十三齣 空門遇使

〔謁金門〕〔外上〕蟾宮開未穩。空爾住天孫。薄福牛郎身已殞。憑教別箭重穿

孔雀金屏。老病無端惜暮年。可堪餘恨日芊芊。如今也有開懷日。不復都亭拜馬前。自家悔識相如。

他往使之時。只得獻牛酒以交歡。誰道這廝輕薄。將言見詆。那時因他高貴。所以勉強低顏。豈料邊

疆債事。今爲朝廷所執。不覺出我嘔氣。見有田太尉鼓盆。欲思續絃。昨日官媒來說。已曾許下文君。

今日行禮。明日成親。觀其勢力又大。閱閱又稱。不怕女兒不從。何患相如有說。正是暗裏來暗裏去。

既無定親茶。莫做吾家塔。來過此間。未免喚文君出來。只說相如已死。我勸你改嫁罷。看他怎麼說。

文君何在。〔旦貼上〕

〔菊花新〕從知邊信日銷魂。病身嬌怯懶開門。忽聽爹行聲喚緊。除非巢燕早歸春。錦字書封了。銀河鴈去遲。只愁關路隔。不得到遼西。〔旦〕孤紅。我自聞凶信之後。不覺病體懨懨。爹爹在堂相喚。莫是得他真信回了。相見則箇。〔外〕孩兒。相如已死了。見有田太尉失配。你嫁與他罷。〔旦哭〕爹爹差矣。相如訃音。有何可據。出此異言。斷不敢從。〔外〕咄。淫賤東西。竇圭初死之時。你言與此何異。〔貼〕老相公。當初不得爲貞女。如今必欲爲烈婦。豈可復失身於人哉。〔外〕咄。討棍來。凡事是你牽誘。先把你打上一頓。看他嫁也不嫁。〔旦〕爹爹息怒。不須打得。任憑何日成親便了。〔外〕好好。我兒。你出此言。方爲孝順。我去與你打點妝奩。相看乘龍客。相諧引鳳人。〔下貼怒介〕小姐。你方纔此言。敢是忘了相如了。〔旦哭介〕孤紅。你不曉得。我見他要打你。故將此言哄他。如今事已迫矣。快取剪刀來。待將頭髮剪下。就與你逃入山去便了。〔貼〕小姐既然如此。待我取剪刀來。我也說不得了。〔旦哭剪介〕

〔香羅帶〕追思結髮人。愁空鬢雲。剪刀颼颼颼寒怎聞。髮兒長長短短人空

誚也。誰念我卓文君。苦從今翦去除怨根。鐵總憑你削下頭來也。翦不斷我心
中鏡裏人。〔貼哭介〕好苦我也翦下來。

〔前腔〕髮兒空隨繡閣人。經今幾春。如何一旦香竟分。寒蟬兩翼痛銷魂也。這
菱花鏡暗昏昏。剪刀你就是心腸鐵打也難聞。當時縮出盤龍也。今日飄爲陌
上塵。〔旦〕孤紅我和你竟到峨眉山中。小巫山廟裏去罷。〔貼〕小姐。此去不多路。出城數里便是。打

從後門幽徑中去好。相如當初爲你離香閣。今日因君過碧山。落得鳳頭鞋子綻。空留香迹在人間。

〔下小尼上〕霧捲黃羅帳。雲凋白玉冠。野煙溪洞冷。林月石橋寒。自家尼姑通性。在小巫山廟裏出。

家。釋名比丘尼是也。教未入於中國。法已播於南方。一心清淨。兩手皈依。風月襟懷。煙霞態度。曇鉢

清泉。散處作爲甘露。山齋餘飯。設時用變天花。菩提樹下談玄。忘補朝陽之衲。貝葉經邊入定。搜空

透笋之衣。廬嶽高僧。一別知經數臘。茅山道士。望來已隔三還。花心中迸出百和香。下山門人人爭

嗅。頭頂上現出九光火。開佛殿箇箇忙參。淨掃松關。林外馬來蹀躞。皆吾比比之儔。閒開竹徑。嚴端

錫下逍遙。盡是如此之輩。小行者年無二八。到起賊心。太師行壽有三千。偏多妄想。珠幢遠立蒼苔。

綽約風吹羅漢。寶磬頻生石塔。透迤路遠金剛。既謂鎖骨菩薩化身。正要靈威昭應。登菩提念。捨身如來轉世。偏能慈悲普救。起度筏心。尼姑色相如此。正是楊枝一滴。非消渴。亟作山河大地春。你看那來的婦人。舉止行動。好似大人家出來的。且待他到來。必有話說。不免將山門掃淨。再作理會。

〔旦貼上〕

〔前腔〕行尋野廟門。松杉遶雲。忽逢暮雨輕灑塵。感奴一念叩靈神也。今受難爲何因。巫山之神。襄王寂寞今幾春。你翠幄空圍也。露泣花愁不奈人。風流今古

惜年華。虛發瞿塘口上花。雲雨自從分散後。人間無復到仙家。孤紅。此間想是巫神廟。看空山寂寂。古木森森。好生悲感。未免逕進參神。暫圖安歇則箇。呀。尼姑少禮。〔尼〕娘子請坐。徒弟看茶來。〔丑

上〕黃藕濃雲冠。青煙絳節籠。品流巫峽外。命籍紫微中。師父茶在此。〔尼〕那位娘子爲何不坐。想是名分所在。〔旦〕尼姑。遠來相投。一言難盡。

〔三仙橋〕堪憐兒夫薄運。爲朝廷遇囚。因親改嫁。苦逼諸秦晉。尼姑事出無奈。爲此剪香雲。忙逃奔。願棄人間進佛門。只得來投你。苦死不見丈夫身。生不得

與親人近。我看你這裏景致呵。像一箇望夫山沈沈眼昏。似一箇逍遙谷又帶著九
疑峯恨。〔尼〕娘子真箇可憐。那位姐姐也翦下了髮兒。莫是官人的次妻。〔旦〕尼姑。你不知道。兩淚
流來兩樣分。非似哭丈夫的親情分。〔尼〕這等說起來。想是隨從娘子的。爲主母而然。一發
難得。〔旦貼〕我們二人。今日特來拜你爲師父。〔尼〕你要做我的徒弟。只怕受不得許多淡薄。你聽
我說。我這裏呵。

〔前腔〕只好著麻衣坐穩。不似你羅衣寬褪。只好喫黃齋當齋。不似你珍羞廝
混。我這裏是山林靜。那更虎狼羣也。又不似你鴛鴦成陣。要誦些佛識與經文。
打參時牢閉門。又不似你施朱傅粉。便上了西方成南無這般清困。你休棄了
在家的繁華錯認了出家的清淨。娘子。請到裏面去坐一坐。再作理會。〔旦貼〕欲棄鉛華來
過此。〔尼〕不妨清淨入空門。〔下丑上〕哭到東時哭到西。無過死別共生離。茫茫走遍關山路。愁聽
寒猿索莫啼。自家在牂牁郡。別了相公入獄。又到臨邛縣。訪得小姐入山。因此追來這裏。是箇古廟。
不免問聲。有人麼。〔尼貼上〕聽取敲門者。多應問路人。小娘子旣爲徒弟。當給使令。外廂有人。你可

去回他。〔貼〕師父。我從來不知規矩。今日師父暫去回了。自此之後。俱是奴家。〔尼〕你在伽藍後聽著。客官何來。〔丑〕我是問信的。纔有兩個婦人經過。尼姑可曾見他。〔尼〕不會見。〔丑哭介〕好苦。教我那裏尋他。〔尼〕客官。你尋他做甚。〔丑〕尼姑。你不知道。

〔鶯啼序〕我東人受謗遇災。迤。一時氣喪邊軍。更虛言謬傳家信。道夫人葬埋紅粉。〔貼〕事有古怪。聽那人聲氣。多似青囊。待我上前些。再聽他道來。〔丑〕因此上差我回來。那知他被逼潛逃。向深山削髮爲尼。與一箇知心同奔。若這裏不見。教我何處追尋。望前難進。斷人魂。夕陽時分。未免再趕上去。〔貼跑上〕青囊。青囊。且住。且住。〔丑〕呀。小姐在那裏。〔貼〕小姐在此。〔尼〕待我請他出來。〔旦上〕青囊。你爲何到此。〔丑〕相公特差我來看小姐。〔旦〕且住。你停了氣息。說與我別來緣故。〔丑〕小姐聽稟。

〔前腔〕他去京師得遇聖主恩。到臨邛曾拜王孫。囑付了小姐恩親。到邊方廣安諸郡。那曉得唐蒙這廝。恨相公拿了。反譖相公受賂。朝廷將他下獄。把忠良誤作奸邪。使鶴羣被籠遭困。這箇也罷了。他又傳虛信。〔旦〕怎麼虛信。〔丑〕道娘行病死。亂人方寸。

因此教我逃回。一看下落。不意撞見了張老娘。說道小姐爲相公逼嫁。逃入峨眉山去了。以此特地追尋。〔旦〕相公受刑。不是下蠶室麼。〔丑〕那有這話。〔貼〕小姐好了。雖然蠟燭猶餘淚。幸得春蠶尙有絲。〔旦〕孤紅兩邊遭難。雖不至死。只是命運乖張。如何有出跡之日。

〔琥珀貓兒墜〕呼天不應。獨遭這時運。長卿。我今做了霜花忽飄隕。教伊又落在枯纏井。〔合〕偏悶。聽不得此夜山中。落葉成陣。〔丑〕小姐與孤紅住在此。待我去見

你老相公。看他怎生回我。尼姑出來。你與我款待小姐在此。待與老爹說了。重重謝你。〔尼〕說那裏話。我是出家人。天上人間。方便第一。〔丑〕小姐青囊去了。明日再來回報。空手入寶山。拾得連城玉。

〔下尼〕夫人請進去。到裏面安歇。

〔前腔〕我與你空門暫隱。且將六根淨。莫恨塵緣猶未盡。黃梁有夢還堪信。〔合〕權進。休得去枉賺相思。自取勞頓。〔合〕畫眉不盡。且去接殷勤。把臂論心到夕曛。莫教異日聞芳訊。回首空山一片雲。

難從父命入荆扉。

喜見家奴萬里歸。

今夜相思知較可

笑隨孤夢隔江飛

第三十四齣 青囊阻嫁

〔北端正好〕〔丑上〕兩脚受奔波。一味擔饑餓。恨滿充腸胃。氣滿塞胸脯。奈全家拆得伶仃苦。歎傍人見我誰知我。自家尋著小姐。要見卓老兒。此間將近。如何有鼓吹之聲。莫是田太尉那廝。思量娶親了。待去訪一的實。纔可撞進。正是待彼張聲處。爲吾下手時。〔下淨上〕會做媒人罵兩頭。一千三百再加甌。只愁反被兩頭罵。喝去呼來勝似牛。自家官媒便是。近日與田太尉卓小姐做一頭親事。昨日行禮。今日過門。因此特來迎候。你看掌禮也到了。〔副淨上〕爛破頭巾紙褶多。夫妻行禮喝興拜。落得問龍并撒帳。偷些喜果獻家婆。〔淨〕獻家婆。到是我喫多。〔副淨〕月老老休取笑。你看那新人不肯出門。莫是二婚娘子到要妝俏。〔淨〕不是妝俏。還是裏面洗澡。〔副淨〕若是洗澡。這盆浴湯我要。〔淨〕你要他做什麼。〔副淨〕晚老婆的尿。好澆飯喫。而況洗澡水。這滋味說不盡。〔淨〕閒話休題。他家裏人來了。大家上前去問他。怎麼不開門。

〔前腔〕〔丑上〕肚裏毒蛇窠。臉上鋼刀剝。將了掂彪棒。發起大干戈。惱人腸迸

出咆哮虎頭頂上將長江水來救火。恰纔去訪張老娘。果是今日成親。不免到他門首。打那
斷一番。〔淨副淨〕大哥。借問一聲。你家裏怎不開門。〔丑〕怎不開門。打你囚根。〔打介淨〕不要打。
〔丑〕你是何人。〔淨〕我是官媒。〔丑〕你是官媒。打做一堆。〔又打介〕掌禮過來。你姓甚麼。〔副淨〕我
是張待詔。〔丑〕你是張待詔。打得你做狗叫。〔又打介末上〕自家卓老相公。因小姐逃出。差我對月
老說另改一箇日子。如何門外許多喧嚷。〔看介淨副淨〕大哥救我一救。〔末〕打的是誰。〔丑〕打的
是誰。賞你一箇搥槌。你是卓家人麼。你老賊嫁了我家夫人去。有何言語答我老爺。都要隨我到官
司去。做一箇了斷。〔衆〕大哥。委實我們不是了。情願跪你一跪罷。〔丑〕跪了。聽我說。〔打淨介〕媒人
這賊。你

〔前腔〕不在月中來。怎向冰間過。截了藍橋水。激起楚江波。強姮娥到去聯河
鼓。〔打介〕待把你這頭來砍腰下斧。〔打副淨介〕掌禮這賊。

〔前腔〕你不識五倫尊。怎信三從大。便掌成雙禮。去唱合歡歌。你這般莽撞喫
不成撒帳果。只怕你惡姻緣到頭來纏得苦。〔打介〕卓家的狗囚。你那老賊呵。

〔北滾繡球〕也到是一個鬼魔。也到是一箇賊奴。閃些兒點污了婚姻簿。猛可的硬心腸。扯斷絲蘿。郎不郎。秀不秀。文不文。武不武。到去與油煤糊猴的人做夫婦。那裏管傷倫敗俗也。犯了蕭何。要使你乞憐學做亡家狗。忍氣甘爲縮頸鵝。始罷干戈。你們且去。老爹回來。自有分曉。

可怪王孫太不仁。

如何反去怨媒人。

空教掌禮遭凌辱。

回報田家別娶親。

第二十五齣 獄中哀泣

〔喜遷鶯〕〔生上〕窮愁難訴。奈地遠天高。物在人故。獄底思君。他鄉念婦。都成影隻形孤。一點赤心虛負。九曲黃泉漫阻。徒自苦。對霜天清角。永夜長呼。文章憎命欲如何。始信天階有網羅。羞殺榮華歸畫錦。酒痕番少。淚痕多。小生囚拘三年。辛苦萬狀。不知文君死葬何處。青囊身泊何方。舉目無依。空懷悲切。幸有獄官憐念。少弛枷鈕。常得呻吟風雨之際。悲歌霜霰之時。今日天陰慘淡。鬼哭神號。不勝酸鼻生餘恨。一度思量一度愁。

〔雁魚錦〕追傷。自昔如夢鄉。記青年束髮多惆悵。從小有慕藺生高尚。相如改號名揚。向青雲萬里。每自軒昂。屠龍豪氣長。羨胸中堆錦繡。筆底千層浪。看玉貌甚都。謾叨稱美望。圖王彈劍游梁。一時際會也。須道風雲壯。高文共獎。那其間名壓鄒枚上。兔園笑吟登賦場。煙霞句就臺榭光。玉堂翰墨垂芳。閃些箇君王捐館悲亡。分披難禁這兩廂。這些時奔走中飄零。琴劍悲司馬。那些時歡娛處。歌舞樓臺憶孝王。徬徨利鎖名韁。嘆從來倦遊滋味誰能狀。四海空囊。縮著客騎古道秋風。訪舊他方。相逢氣爽。都亭期謁。更足美情佳況。只爲那王孫座上朱絃響。又惹出丹穴雙飛兩鳳皇。玉樓瓊閣。琴心飄蕩。月明風細。相引起高唐。奈家貧運衰。依然新愁和淚長。生受酒壚蒙恥。臨邛店笑迎商。煙花主張。教我受盡淒涼。又早是多情雅量。憐岳丈。與我帶卻金珠歸故鄉。逢歡賞。賴子虛金門薦。揚美譽既流芳。天書遠召。拜節中郎。悶來屈指呵。辜負了錦心繡腸。羞殺了鸞衾鳳帳。今日裏嘆行藏。正是燈前半夜生平事。和雨都來惱客。

腸〔淨扮獄官上〕呀呀。這是誰人啼哭。鬧獄老爺來了。呀。原來是司馬先生。請到本房裏去。聞知新廷尉老爺王吉。是你鄉里。他到時必有好處。〔生〕此信真的麼。〔淨〕這箇那有假。〔生〕如此且喜。多謝。〔並下〕

第三十六齣 廷尉伸冤

〔稱人心〕〔小生上〕陰雲蔽久。青天乍得舒眸。忠臣恨三年未酬。幸賴一封朝奏。君王肯首。一霎時春回枯樹。驀地裏光生敝帚。友道君恩不易全。誰能披日撥雲煙。今朝信有回天力。不負交情二十年。下官大廷尉王吉。當時與契兄司馬相如。都亭一別。本謂收功絕域。衣錦榮還。那知唐蒙行譖。反害他下吏三年。無人一白。小生叨居此任。只得冒死以聞。幸皇上聖明。旨下廷尉議了來說。小生直以相如爲唐蒙所譖。情所當恕。唐蒙傾陷忠良。法宜重究。覆本去了。如何不見聖旨倒下。呀。前面來的想是玉音了。

〔海棠春〕〔小外上〕可嘆久要人。臨難憐朋舊。旨下廷尉王吉。前議司馬相如之罪。皆唐蒙造言。乃復其官爵。唐蒙卽日磔誅市朝。以彰國家大典。欽此。〔見介小生〕叫左右。獄中去請司馬老

爺出來請他換了冠服相見。〔衆應下小生〕叫左右錦衣衛獄中快取唐蒙來。〔衆應下〕

〔前腔〕〔生上〕肯信轍中魚斗水重蒙救。相如自分九死一生。誰料王祥甫奏明朝廷。拔

我冤獄。友誼至此。蔑以加矣。今來喚我。不免向前趨謝。呀。楊兄也在此。〔相見哭拜介小生〕長卿本

意九死爲期。不意陽和忽布。且喜又復官爵。還令文園。〔小外〕唐蒙這賊也去獄中拿了。〔生〕且喜

且喜。天呵。不覺孤忠感泣。待我望闕一拜。

〔瑣窗郎〕想當年蒙恥拘囚。諒微骸棄不收。一時遭困。覆轍翻舟。圓扉啼怨。血沾襟袖。〔合〕感一時雲開霧散。春還又逢聖主。遇良友。

〔前腔〕〔小生〕自都亭款接綢繆。別離後羨貴游。誰知機伏。塞馬生愁。虛排忠義。受冤讒口。〔合前生〕王楊二兄。你不知小弟另有一種憂思。

〔前腔〕悔當初欲覓封侯。忍輕拆鸞鳳儔。堪憐別後。竟掩荒丘。至今魂夢。斷煙衰柳。〔小生小外〕這到不曉得。〔合〕恨今朝前程美滿。誰能又人再聚。花重茂。

〔前腔〕〔小外〕長卿嘆人生聚散雲浮。纔生喜忽變憂。春風一夜。霜露三秋。不須

成惋且共消愁。〔合〕看他年前程美滿誰能又。人再聚。花重茂。〔小外〕此信必是唐蒙生造。不可聽他。〔衆押淨上〕犯人唐蒙一名取出。〔小生〕綁去西角頭斬了。〔淨〕爺爺。小的當死。請問何罪。〔小生〕還要胡說。你壞了邊方大事。又去傾害忠良。事干大典。法難輕恕。綁去罷了。〔衆押下小生小外〕長卿。請到貴衙門去。明日小弟二個同來奉賀。〔作別介〕

人生悲喜苦難憑。

今日相知不負盟。

萬事到頭終有報。

天心人意自分明。

第二十七齣 茂陵春色

〔掛真兒〕〔小旦上〕紅杏枝頭春已到。看雙蝶花外飄飄。隔葉黃鸝。映階碧草。抵死將人情攪。有女懷春人不知。知心惟有素羅衣。腰間常帶宜男草。袖裏時藏贈客珠。香脈脈。思

依依。流蘇帳裏怕聞雞。玉郎那得常爲伴。心事空憐阿母疑。自家茂陵園東鄰女是也。年紀破瓜。芳姿傾國。幽情含玉。慧性宜人。喜見風花性度。悶來無事顰眉。愁耽針黹工夫。懶罷不勝回首。楊柳垂條。比不得許多絲緒。藕花落瓣。顯不盡些子蓮心。隔芭蕉獨立斜陽。自憐默默緣何事。倚闌干細看

新月竊嘆盈盈獨受孤。時與梧桐影閃過鄰東。盼不見操琴學士。每聽子規聲啼過柳外。喚不醒挾彈郎君。池塘夜雨。燒殘絳燭空悲。簾幙東風。敲斷玉釵虛嘆。正是綠遍芳郊。果擲桑間。無處覓紅深遠陌。詩題葉上有誰知。知心既少。薄倖偏多。野合無緣。幽期莫遂。近有西鄰茂陵園中。有一箇郎官在內讀書。其人丰姿都雅。骨格清奇。每聽他長呼聲罷。使調一曲瑤琴。短步時停。忽就數行飛草。風流難遇。歲月易遷。每向東牆偷覷。那人略不關心。正是相見無言。還有恨。幾回拚卻。又思量。好生掛牽人也。未免乘他閒暇。再去送情。得他回心。是奴適意。〔登梯介〕

〔懶畫眉〕雲梯三疊鳳鞋高。斜捲春衫荳蔻梢。你看他遠遠步出西齋來了。烏紗帽側過芭蕉。我欲賣弄一箇風前俏。故把青梅作彈拋。〔拋介〕

〔前腔〕〔生上〕孤眠常自背天桃。只爲病酒慊慊犯五癆。這的是何來飛燕掠梅梢。呀。卻原來露出如花貌。儘一箇風前月下妖。雖然如此。不必看他。彼有流酸之

心。我無止渴之意。自家讀些書史便了。〔取書介〕這是三墳。我也怕看他。這是孫子十三篇。我也不看你。都喫你誤了我。這是軒岐之書也到好。我這病中學些服食。則有生理。〔背讀介小旦〕他已見

我了。爲何假賣風情。待咳嗽一聲。將我心去換他轉來。〔咳嗽介〕

〔前腔〕丁香欲吐暗芳飄。又早似茉莉風吹幾陣高。〔嘆介〕我嘆一聲呵。分明搯賣海棠嬌。薄情的故把春光眼底成消耗。害得我一點香涎嚥不消。〔生背云〕他咳嗽之

聲。鍾情於我。雖則是色授魂消。心愉目送。只是自家妻子尙不知生死下落。那有好心腸看他。

〔前腔〕謾思當日鳳琴調。番惹得紛紛淚暗拋。茂陵女。你杏花牆外任妖嬈。我舊枝未得春風信。肯學那浪蝶偷棲風露梢。〔小旦〕虧心薄倖交。何事隔藍橋。〔生〕藍橋

雖咫尺。無意渡春潮。東鄰女。我雖感你之情。你不知我有心事來。我自有

〔桂枝香〕秦樓鳳渺。楚山雲杳。茫茫煙樹迷人。盼斷故園春老。你新巢空壘。呢喃空好。于飛難效。謝多嬌。好入梨花去。休思畫棟巢。〔小旦〕你好薄情也。負我

〔前腔〕一時魂遠。千回心倒。空慚薄命紅顏。不遇多才年少。把心香浪燒。把心香浪燒。恨前緣不到。使我嬌姿空老。任妝喬。不能錦帳勾春睡。虛使銀缸和淚挑。〔生轉對小旦云〕東鄰女。非是小生薄倖。有事關心。無緣作合。下牆去罷。怕有人來。不當穩便也。

〔下小旦〕好生薄倖人。

祆廟雲深水滿橋。

楚陽臺下雨空勞。

今宵坐向月明裏。

腸斷高樓碧玉簫。

第二十八齣 卓老覓女

〔外上〕黃梅落雨晴何在。蛛網牽絲心自知。老夫前日聞知相如受罪。一時難忍。逼嫁文君。可奈此子不從父命。眷戀夫情。夜拉丫鬟。逃奔雙出。尋覓多方。杳無蹤跡。我思相如之信。又恐難真。倘若回來。將何抵當。只得把他住院暫時封鎖。一面打聽相如消息。一面細訪女兒下落。再作區處。正是冷熱竈中燒火。難猜滿肚炎涼。只有老夫腹內。甜酸苦辣都嘗。〔下〕

第二十九齣 長門望月

〔憶秦娥〕〔小旦上〕愁難竟。長門望月偏孤另。〔淨女婢上〕偏孤另。愁人怨魄。淒淒

相並。〔小旦〕初入承明日。深深報未央。長門七八載。無復見君王。寒風入骨清。獨臥愁空房。躑躅步

庭下。幽懷空感傷。平日所愛惜。自待卻非常。色美反成棄。命薄何可量。君恩實疎遠。妾意徒徬徨。家

豈無骨肉。偏親老北堂。此身無羽翼。何計出高牆。性命誠所重。棄割憐自戕。悠悠長門月。清宵每斷腸。詞賦若可買。千金不吝償。妾身陳后是也。當時爲皇上寵幸。貯我金屋。何等榮貴。後因子夫奪寵。貶妾長門。色未就衰。寵已先弛。追思往昔。無限興悲。只恐殘花易敗。缺月常孤。泣雨愁風。生不如死。

〔淨〕告娘娘知道。禍福無常。憂喜難定。聖上一日心悔。娘娘即便榮還。何苦悲悽。自傷玉貌。且請保重。則個。〔小旦〕你看這深宮景色。好生慘人也。

〔山坡羊〕露灑灑黃金階冷。月明明珍珠簾靜。葉蕭蕭南宮雁聲。蟲唧唧永巷和愁聽。數暗螢。雙雙縱復橫。碧雲掩鏡憐無影。青鳥沈書漫有情。〔合〕君心。淒涼玉井冰。君恩。蕭疎曉殿星。〔淨〕娘娘真箇好苦也。你看

〔前腔〕杵悠悠金砧衣冷。漏沈沈銀牀風靜。水潺潺銅溝怨聲。煙漠漠絡緯驚霜聽。盼遠螢。天河參已橫。南枝去鵲留空影。深院孤鸞鎖別情。〔合前〕

〔前腔〕〔小旦〕柳依依芙蓉池冷。草萋萋梧桐園靜。亂紛紛昭陽笑聲。悶悄悄獨傍朱門聽。嬾撲螢。闌干身半橫。銀缸火暗三秋影。玉笛霜飄永夜情。〔合前〕

〔前腔〕〔淨〕霧昏昏鴛衾香冷。曉冥冥羊車音靜。思沈沈寒鴉數聲。鷄喔喔忽向朦朧聽。一點螢。金塘猶自橫。舞衣香斷臨風影。團扇秋深對月情。〔合前淨〕娘娘。天色已曙。一夜好生消受了。請去安歇罷。〔小旦〕老宮媪。君王心背。百計難回。必待何人。可以轉諷。〔淨〕告娘娘。聖上所好者詞賦。前日狗監揚得意云。有成都人司馬相如。皇上所愛。若能求得此人作賦諷諫。或者有回天之力。〔小旦〕果有高才美賦。何惜千金一買。就着揚得意即便與我資金往叩。務要周全。〔淨〕領懿旨。奴婢就去。

眞成薄命久尋思。

不覺今宵淚似絲。

但得黃金買詞賦。

昭陽重見月明時。

第四十齣 吟寄白頭

〔小重山〕〔丑上〕淚咽無言祇自傷。不勝心腹事。步郎當。可憐天外薄情郎。深負了。栖栖孤雁行。九疑易隔無情面。海水難量薄倖心。今日悔思前日事。錯教人聽斷絃琴。自家

因小姐差往都亭。訪問相公消息。始知官爵已復。不應又戀了茂陵女子。要娶爲妾。把小姐一片眞

心盡付東流。本身又爲無人擔汲薪水。不得工夫上京。好生煩惱。若他果然薄倖。我也不去隨他了。你看這山門黃葉。掃卻還堆。好生慘人也。我且閒坐一回。且待孤紅出來。與他商議一番。纔去見小姐。呀。說猶未盡。孤紅姐已出來了。

〔香柳娘〕〔貼上〕望天涯路長。望天涯路長。茫茫煙浪。如何魚也難游上。盼青霄渺茫。盼青霄渺茫。空著雁排行。誰傳這愁況。向神前合掌。向神前合掌。勤燒暗香。消除業障。妾因小姐同入山中。三年以來。望斷京師消息。今早教青囊打聽。至晚不回。以此小姐著奴家到山門首望他。未免參了神明乃去。〔參介見介〕呀。青囊爲何不來回覆小姐。反在此間閒耍。呀。且住。你爲何拋下淚來。我猜著你了。〔丑〕你猜著甚麼。

〔前腔〕〔貼〕豈東君受禍殃。豈東君受禍殃。遭罹法網。〔丑〕不是。〔貼〕山廚莫少齋和釀。你空擔餓腸。你空擔餓腸。〔丑〕不是。〔貼〕我猜著了。莫是念家鄉。偏生業緣想。〔丑〕不是。〔貼背云〕事有古怪。這腌臢醜狀。這腌臢醜狀。除非發狂。癡心妄想。〔丑〕

孤紅姐。我的苦。就是你的苦。〔貼〕怎麼。

〔前腔〕〔丑〕見夫人慘傷。見夫人慘傷。暗添悒悒。〔貼〕又爲甚麼。〔丑〕玉京人已今天上。〔貼〕這是喜信了。爲何下淚。〔丑〕奈輕迷豔妝。奈輕迷豔妝。桃李正芬芳。春風忽飄蕩。〔貼哭介〕有這等事。他好負心人。教我與小姐怎生下落。〔合〕恨冤債未償。恨冤債未償。銀河漸朗。又生風浪。青囊教我怎去回覆小姐。〔丑〕便是。我若說了。教他何以爲情。呀。小姐亦自出來了。

〔前腔〕〔旦〕爲恩多易傷。爲恩多易傷。肯教情放。修眉懶畫春山樣。枉靈幡繡長。枉靈幡繡長。不得見才郎。空孤佛心賞。呀。我教孤紅看青囊回來。如何在此下淚。不好了。這丫頭豈春情已蕩。豈春情已蕩。東君無主。頓教花放。孤紅。你兩人在此。說甚言語。不要弄出歹事來。若空門怕守。你自出山去罷。〔貼丑背哭介〕小姐。不好對你說。〔旦側聽介〕

〔五更轉〕〔貼丑〕我眉頭蹙心內快。回思各斷腸。你怪我們壞事。卻不知他如今紅被重翻浪。〔旦〕呀。你言及至此。豈長卿有甚惡意來。〔貼〕若欲追問緣由。教我淚珠先放。

〔旦扯貼介〕孤紅。必有緣故。你就說與我知道。〔貼〕孤紅不曉得。還問青囊。〔旦〕青囊。你過來。我問

你〔丑〕小人也不曉得。只聽見人說在京師仍貴顯。多佳況。〔旦〕有何佳況。〔貼丑云〕不要說。〔旦〕咄。怎生不要他說。〔貼背云〕小姐人情淺薄難逆量。〔旦〕難逆量呵。莫是薄情的變著心了。〔丑〕好羞人也。又做出當初弄琴模樣。〔旦哭介〕天呵。有這等事。〔跌倒介〕小姐甦醒。〔旦〕孤紅不意薄情的斷送至此。我今進退無門。如何是好。〔貼〕小姐且不要煩惱。他既辨了冤跡。做了高官。難道就把你的恩情。我每的苦楚忘了。這段姻緣。左則我二人做的。你就寫下一封書。待奴家自去遞與他看。那一箇惜風情的。怎生又好似我們俊小姐。你書中把一言半語打動他。自然回心轉意。〔旦〕天呵。妾意憐青鬢。君心棄白頭。請量東海水。看取淺深愁。書中有何言語。我只以白頭自嘆。與之告絕罷了。孤紅取筆硯來。〔貼〕小姐筆硯在此。須盡情寫下。〔旦哭介〕

〔前腔〕我皚如山雲深。皎如雲月亮。可奈你山雲竟渺茫。空孤雪月難親傍。又似斗酒城中相逢歡賞。今日斗酒歡。祖席間。西溝上。明朝水忽東流往。渺渺雙溝。咫尺東西波漲。〔貼〕小姐。你著意打動他。

〔前腔〕〔旦〕又似東郭樵。西郭響。共了丁木兩廂。隔空山聲似相推讓。猛被執柯

人斷聲柯上。天嫁休啼。娶休想。淒淒悵。安得一心人。相從白首終無恙。男兒欲相知。何用錢刀爲。正是魚尾離筵。嫋嫋風竿孤賞。孤紅書已寫就。我有金釧一隻。與你當作盤費。路上小心。定要討箇實信回來。〔貼丑〕這箇不消分付。就此拜別前去。

〔前腔〕卸袈裟。出道場。前途苦去路長。身隨征雁橫孤嶂。相公。你錦水空流東。北鴛鴦虛蕩。教小姐呵。女蘿枝。空自強。誰親傍。罷罷。小姐。你前生受業今遭障。既出

家在此。還要消遣空門。暫作維摩行相。〔貼〕師父出來。有話煩你。〔尼上〕坐視三千界。冥遊不二城。忽聞竈外哭。猶有未空情。小娘子。叫我爲何。〔貼丑〕我們聞得老爺喜信。要到京中去走一

遭。煩你伴小姐一兩箇月。不時就來迎接。重重相酬。〔尼〕且喜。夫人早暮扶持。俱在我身上。〔貼丑〕

小姐就此去罷。〔別介〕且住。還有一言相勸。莫捲龍鬚席。從他生網絲。〔行介又轉介〕且留琥珀枕。或有夢來時。〔下旦〕尼姑。二人已去。我和你到那佛前。祈禱一回則箇。〔尼〕使得。夫人先行。

〔旦行介〕

〔祝英臺〕叩慈悲。來方丈。都爲負心郎。他步入秦樓。撇下陽臺。偏把舊時人曠。

悽惶。冤家拚卻難丟。欲待忘他又想。〔合〕甚日也保佑夫妻隨唱。〔尼〕夫人休快。拜如來。稱大寶。業果自然忘。你身在青山。目斷瑤京。空把遠愁添上。不如今夜裏呵。繩牀。松濤幾陣。牕前帶卻茶爐聲響。〔合〕我和你共坐一燈煙幌。

一封書去。次寥天。

行盼神都。意惘然。

可惜平生弄琴手。

挑燈來卜擲金錢。

第四十一齣 賚金買賦

〔小外衆持金上〕玉階初賜紫金來。欲覓文園作賦才。莫怪長門掩秋扇。春風重上柏梁臺。自家狗監揚得意。奉陳后之旨。賚金百斤。賜與相如。求賦長門。以悟主上。聞得他養病茂陵園中。不免到彼尋訪。傳宣后旨。則箇正是馬卿作賦日。狗監薦賢時。〔下〕

〔步蟾宮〕〔生上〕朱明又過端陽矣。感時序。景是人非。那堪多病更相思。臥起

新蟬聲裏。一度思家。一惘然。天涯度日更如年。那能一滴金莖露。救取文園渴吻煎。相如別家日久。悶懷難撥。前著青囊訪問文君消息。爭奈杳然。近日東鄰有女。雖自美好。非我思存。況兼舊疾復作。

消渴難堪。當此炎蒸。益難驅遣。呀。你聽門外人聲。莫有佳客過訪。左右看來通報。〔小外上〕大暑去。酷吏清風來。故人左右。此間已是茂陵園。敲門則箇。〔衆介報介見介生〕楊兄久別。何幸光臨。〔小外〕長卿。你高才獨步。紫禁傳芳。陳后久謫長門。奉旨賣金求賦。得卿含宮嚼羽。轉悟天心。則幽谷生春。寒灰重暖。仙家有千歲之感。相知益百倍之光。謹獻匪儀。幸爲留意。〔生〕小弟爲賤內未來。思念成疾。后旨雖不敢違。鄙賦且容緩進。〔小外〕吾弟蜚英騰茂。下筆如神。不須謙讓。就請揮毫。告辭了。〔生〕待茶。〔小外〕不勞了。恐妨彩筆人。急返黃金殿。〔下生長嘆介〕帝后失寵。願以黃金買賦。至如世間夫婦。一旦愛弛。將何以迴恩義。不覺重有所感。左右取筆硯來。閒人不許喧嚷。〔衆應介〕

〔前腔〕〔貼丑上〕封愁緘恨人千里。風花性何處佳期。別來心事且休題。探取新
撩雲雨。〔貼〕行來愁頓劇。香汗溼羅衫。〔丑〕欲探東君意。先藏信一緘。孤紅姐。此間已是茂陵園了。

你且暫住一回。藏下這封書。待我空身進去。只說小姐已死。看他戀了新人。怎生放出薄情話兒。那時你便進遞書。〔貼〕有理。〔丑進見介〕相公磕頭。〔生〕青囊來了。你卻爲何一別四年。教我望穿兩目。百事休題。且說夫人近來。〔丑〕夫人被相公氣死了。〔生〕怎生是我氣死。〔丑〕夫人聞相公官爵

已復娶了茂陵女爲妻。忘了舊情。一時抱忿縊死。〔生哭介〕天呵。這是那一箇造謊。害得好苦。我這四年間。謝柳辭花。悲鸞泣鳳。卻爲甚來。我今左則一死罷了。〔丑〕相公果無此事。不須煩惱。夫人遣孤紅來探相公。〔生〕又調謊了。孤紅在那裏。〔丑〕在門外。孤紅姐進來。〔貼〕無可奈何花落去。似會相識燕歸來。〔見介〕相公恭喜。新夫人在那裏。我要見他一面。只是我小姐薄福。巴不得相公得意。卻又如此。〔生〕孤紅不要罪我。聽我道。

〔綿搭絮〕書生薄命有誰知。從來好事都非。遍數離愁無盡期。害人癡夢想俱迷。小姐不念多情留戀。番將薄倖猜疑。冤恨如天。畢竟時乖和運否。畢竟時乖和運否。〔貼〕難道沒有這話。我則道。

〔前腔〕新人嬌俺姐何如。肯信賭呪推辭。洗得來清沒一絲。好花枝瞞卻開時。你知道小姐爲父親逼嫁。削髮爲尼。自掛風流蘊藉。都付與救苦慈悲。〔胸中扯書投介〕這便是小姐送來的書。可憐那無限心情。全在這封張半紙。〔生哭拾讀介〕呀。到是白頭吟五解。小姐你不惟秀色可餐。這文詞益妙。真箇女相如也。青囊你過來。說一箇明。〔丑〕當初小人

到臨邛。訪問小姐下落。問知有個逃軍。假報說相公下獄。那時卓老輕信。逼嫁勢嚴。爲此小姐與孤紅潛自削髮。竟逃入小巫山廟中。小人一時尋著。不敢輕離。四年無信。近日始知此情。因此著小人同孤紅來奉書告絕。並無他故。〔生〕有甚告絕。指日相敘便了。你便回去。卽請夫人入京。無人伴送。就央尼姑同來。〔丑〕孤紅怎麼不去。〔貼〕我亦要回。只恐去後。怕生別情。姑留看管。小姐問及。就將此意回報。〔丑〕我不去說。只說你到做了茂陵女。戀著相公。不肯回來。〔貼〕啐。〔生〕青囊。你去茶飯。討些盤纏。快快起身。〔丑〕如此告辭。苦盡甘來在此遭。奔波誰念路程遙。歸來飽飯黃昏後。博得孤紅一個么。〔下生〕孤紅。你到裏邊歇息。待我完了長門賦。就出來。有話問你。〔貼〕相公有何要緊。這等匆忙。〔生〕你不知道。皇后退貶長門。上情莫奪。費金求賦。欲還舊寵。今日狗監坐待。不敢有違。〔貼〕卻原來。天下未嘗無對。相公無情。皇上也無情。娘娘薄福。小姐也薄福。君臣同病。夫婦同傷。有這等奇事來。陳娘娘。陳娘娘。你好癡。你好癡。莫把黃金買詞賦。相如自是薄情人。也罷。奴家且進去。看殺薄情人。怎說多情話。〔下生〕真箇今日之事。好生有感。我且作了賦。再作理會。

〔前腔〕夫何一佳人兮。步逍遙以自娛。魂逾不返。貌槁空居。願賜問而自進兮。得尙君之玉音。

何地承君愁。望離宮。只自吁。陰雲翳而四塞兮。天窈窕而晝陰。聽輕雷響象君車。日黃昏而望絕兮。悵獨託於空堂。空盼清宵明月。淒涼寂寞庭除。援雅琴以變調兮。奏愁思之不可長。可憐著流徵聲沈。我思悠悠誰對語。貫歷覽其中操兮。意慨慷而自印。

〔前腔〕徘徊倚袖。涕泗沾衣。無面目之可顯兮。遂頽思而就牀。夢到君傍。可怪雞鳴驚喚予。望天星耿耿朝稀。忽見相躔畢昴。東方曉日輝輝。望中庭之靄靄兮。若季秋之

降霜。夜漫漫其若歲兮。懷鬱鬱其不可再更。不奈偃蹇躊蹰。荒落亭亭嗟獨居。〔貼偷上云〕言語巧儉鸚鵡舌。文章分得鳳皇毛。相公在此作賦。待我悄悄裏聽他做些甚麼來。〔生賦已

作完。不覺動了痰火。且在石牀上養息一回。待與孤紅講話。〔貼〕相公。你作賦完了。〔生〕完了。〔貼〕

講與奴家聽一聽。〔生〕詞賦語長。一時難講。不過怨望而已。〔貼〕難道奴家不知音。就不肯說。也能

我自去了休。〔生〕孤紅姐轉來。我有知音話兒對你說。〔貼〕有甚麼知音話。〔生〕作賦過勞。痰疾忽

動。我要眠息一回。央你暫時扇枕。半晌煎茶。醒時謝你。〔貼〕正當驅使。〔生〕不要驚了我。手弄生綃

白團扇。孤眠全仗北牕風。枝頭莫放黃鶯語。驚□瑤臺夢不通。〔睡介貼打扇介〕瘳病鬼。你教我打

扇呵。分明要

〔皂角兒〕扇底風晚涼作雨。煎茶呵。分明要爐中火夜深求水。只怕你夢兒中上楚

臺熱心已消。到華胥風情走矣。只願你做一個遠南柯蛺蝶飛。夢西園池塘樹。枕

上清虛。〔生睡中驚作抱態介貼〕呀。不好了。這極情的。早應見鬼。魂靈亂飛。不免把扇兒打

醒他。〔打介〕笑微微。借將團扇。打伊驚起。〔生醒抱貼介〕孤紅姐。沒奈何救我一條性命。

〔貼〕啐。〔扭身〕不要胡廝纏。我看你這病兒呵。

〔前腔〕瘦骨頭削尖了嘴。啞喉嚨咳灣了背。小姐來時。你要敍舊情。鳳羽顛飛。又要

與隔牆那人呵。戀新枝。燕巢偷壘。只此兩下。怕你打發不去。恰又要恣風情。勾春興。摘

花心偷香味。你好貪癡。〔生〕便死也不顧了。〔渾介貼〕不要是這等。休扯羅衣。斷了帶圍。

被人知。笑伊村殺。叫做風流鬼。〔生〕也罷。我與你到水亭上去。〔扶行介貼推介〕

〔尾〕喜得荷亭涼似水。把牀上殘書拾去。將與鴛鴦作陣飛。〔下〕

第四十二齣 錦江曉發

〔高陽臺〕〔旦上〕簷鵲頻驚。燈花旋結。夜來好夢關情。寂寂空山。誰憐甲子頻更。〔尼上〕清心試禮伽藍問。知甚日信轉瑤京。〔合〕齋鐘罷。松扉共倚。愁看野雲生。〔旦〕尼姑。我昨夜獨坐幽窗。最喜燈花雙結。今朝閒憑小檻。又看喜鵲羣鳴。若非妄生。定爲佳兆。我與你到山門首閒步一回。或者消息到來。亦未可知。〔尼〕夫人請行。呀。那遠遠來的。不是你家大官。〔旦〕呀。果然是青囊。〔丑淨上〕人逢喜事精神爽。路到平安不覺多。自家奉相公之命。來請夫人。不覺又至山中了。梢水的。你在此。待我進去。〔見介旦〕呀。爲何孤紅不見。〔丑〕怕相公又生別情。只得留身在彼。〔旦笑云〕他不回之意。我已明了。相公見書麼。〔丑〕書已見了。前日之言。都是假的。特差人船在錦江灘上。候請夫人。就央尼姑伴送。望乞早早登程。〔旦〕尼姑放這裏不下。如何是好。〔尼〕夫人要去。敢不奉陪。些小山門。自有徒弟看守。〔旦〕此去錦江灘。有許多路。〔尼〕夫人。一過山灣。就是通津了。〔尼朝內云〕徒弟。你好好看守山門。我送夫人上京。不日就回。〔內應介尼〕夫人請行。相送仙姬共出山。〔旦〕待看飛錫復南還。〔丑〕不復回頭戀空廟。〔淨〕隨潮直上錦江灘。〔梢水的告夫人〕潮已平了。請下船解纜。好風好風。待我扯起篷來。

〔甘州歌〕〔旦〕篷窗漫興。見山高月落。石沒潮升。平堤初漲。多少野鷗飛競。風飄翠袖空中舉。日照新妝水底明。波紋皺。釵影橫。煙花疑在鏡中行。溪蒲綠。津樹青。帆檣如入畫中生。

〔前腔〕〔尼〕禪關望已扁。看白雲縹渺。亂封諸嶺。薜蘿衣薄。儘使峽風吹冷。遙山晚帶楓林翠。別浦寒流石竹青。恆沙渺。彼岸平。從教寶筏濟羣生。慈航度。法海澄。悠然還學渡杯僧。

〔前腔〕〔丑〕桃花浪幾層。看魚吹春漲。鳥下雲屏。清江碧漢。爭覩畫鷁飛騰。飄雪捲蘆花白。獵獵風吹荇帶青。村居遠。驛岸平。雲鳩拖雨過前汀。蘭槳蕩。桂棹輕。芰荷香裏畫船行。

〔前腔〕〔淨〕偏諳水上情。看開篙浪急。捩柁風生。青錢不用。行看箸裏魚烹。長年江上誰憐我。黃帽溪頭別有名。桃葉渡。楊柳汀。儘教沙嘴落帆輕。煙波闊。風日晴。不須千里問歸程。

〔尾〕〔合〕從教仙子多乘興。駕雲騰霧上瑤京。爭羨鵲度銀河牛女星。

半篙春水滑。

一段夕陽愁。

行雲離蜀峽。

飛夢入神州。

第四十三齣 片帆追送

〔外上〕萬事有分定。浮生空用忙。不勝心腹事。今日自羞惶。自家待文君夫婦。其實過當了些。那曉得女兒出外。相如又復官爵。他日相逢。有何面目。訪知文君在小巫山廟中。不免去看他一番。只說父親錯誤。不必記憶。今日特來護送入京。必定回心轉意。迤邐行來。已到廟中。不免敲門則個。〔內云〕是誰。〔外〕我是來看司馬夫人的。〔內云〕今早京中差人來請。連我師父都送去了。〔外〕天呵。再早得一步兒也好。送他不著。好生煩惱。也罷。且回去卽趨人船。追送罷了。正是

自家勢利自家親。

只爲孩兒識好人。

枉使當時情狀惡。

教人都罵卓王孫。

第四十四齣 魚水重諧

〔似娘兒〕〔生上〕巧夕遇新秋，穿針伴悵望西樓。〔貼上〕鵲橋早已安排久，佇

看鳳幄行瞻龍駕，相會牽牛。〔生〕辭家遠客悵秋風，千里寒雲與斷蓬。今夜銀河風浪靜，蟾光

鵲影笑相逢。孤紅。昨日青囊有信附來，說小姐今日進京。你可曾打掃房櫳，整治菓酒。〔貼〕這個不

勞分付。呀，青囊來了。〔丑上〕告相公，夫人到了。〔生貼〕且喜且喜，我須與你出去迎接則箇。

〔前腔〕〔旦上〕景色藹新秋，逢四美反起餘愁。〔尼上〕佳人才子今成偶，舊愁

萬種新愁千緒，一筆都勾。〔生〕呀，夫人拜揖。〔旦背介〕夫人向來恩情拋擲，得罪萬千。且轉

過來，小生拜罪。〔旦又背介〕尼姑，特央你勸，自當酬謝。〔尼〕夫人且與相公相見了，有話到房裏

說。〔旦〕我要新人相見。〔生〕小姐相如若有此事，上天可鑑。〔貼〕小姐，孤紅磕頭。前話果是虛傳，就

請相見罷了。〔旦轉行禮介〕憶昔相離衰柳前。〔旦〕經今倏忽六餘年。〔生〕空門歲月卿何苦，

〔旦〕絕塞風霜我亦憐。〔生〕莫怪浪傳紅葉信。〔旦〕須知愁寄白頭篇。〔合〕願今同指星河誓，常似

中秋月倍圓。〔生〕夫人，今日是七夕良辰，相逢甚異。小生特備果酒，與夫人歡賞，休追往事。且樂新

歡。孤紅取酒來。〔貼〕洗塵兼敝舊，消怨更遮羞。〔下尼〕告老爺夫人，尼姑就此告回。〔生〕尼姑，夫人

在你山中。多多生受了。且住在此間。要幾日。差人送你回去。〔尼〕尼姑一則放山中不下。二則趁此便船。不敢久留。〔生〕叫左右。快將白金百兩。送與尼姑。助修神廟。待我回來。再當酬謝。〔尼謝拜〕但願老爺夫人。生男必做公卿將相。生女必配君宰侯王。福共山川俱積。壽同日月無疆。〔下貼〕相逢不是尋常會。此酒方爲第一杯。相公小姐。果酒在此。〔生〕待我遞小姐一杯。

〔畫眉序〕梧葉始知秋。勸取天孫別來酒。喜西齋風景依然。還又聽琴心。泫露生寒。求鳳侶。見花添瘦。〔合〕常教景色增新也。惟有故人依舊。〔旦〕我也回奉一杯。

〔前腔〕團扇早辭秋。肯信今朝更攜手。看胸前猶繫別時紅豆。嘆龍宮漂泊孤鸞。喜鳳幄歡娛雙宿。〔合前旦〕孤紅青囊過來。今日是牛郎織女相會之期。你二人也看隨我

夫婦。受了許多辛苦。就拜了天地。今夜成親。上下大小一樣團圓。〔生〕再賞你黃金百兩。〔貼背云〕不去配與那尖嘴油頭。〔丑〕儘勾儘勾。〔旦〕不要推辭了。青囊去扯他過來行禮。〔丑扯介貼〕羞人搭搭。怎生下跪。〔拜介〕

〔前腔〕〔貼〕斜月掛清秋。怨指紅鸞強諧偶。若瑤池仙眷錯配兒儔。小姐。都是你做冷欺花。相公。君也忍將煙困柳。〔合前〕

〔前腔〕〔丑〕恩主共千秋。雙捧金壺笑斟酒。願人間天上共效綢繆。賀郎君玉潤冰清。祝小姐枝繁葉茂。〔合前外上〕既作虛心事。甘爲反面人。自家追送女兒來京。此間是

他寓所。不免含羞而入。〔生旦接介外〕賢婿賢婿。久違尊範。每靳老懷。孩兒。一別四年。幸逢雙喜。

〔生旦〕前事休提。且同今樂。〔小生小外上〕錦鴛方得侶。珠履更生春。楊兄。適聞長卿夫人已到。合當往賀。我與你同走一遭。〔見介生〕二兄請坐。妻父也在此。〔小生小外〕恭喜恭喜。呀。嫂嫂拜揖。

〔旦行禮介衆跑上〕聖旨到來。聖旨到來。〔末持詔上〕有緣成眷屬。無價是文章。聖旨已到。跪聽宣讀。皇帝詔曰。咨爾文園令司馬相如。夫褒德錄賢。勸善刑暴。帝王所繇昌也。朕德菲薄。不明於禮義。迨至元光五年。廢后陳氏。安置長門。已墮萬化之原。太始二年。俾卿隱處去位。冒寃失職。元首股肱之義。蔑如也。是何朕毫不德至此哉。前過東掖使門。見卿作賦感朕。使昭然有聞。其復册陳氏爲后。進卿中二千石。妻卓氏貞心不替。厥跡可嘉。封蜀郡夫人。廷尉王吉。狗監楊得意。理辜進賢。法當上

賞。其以三適之賞賞之。青囊爵白戶。孤紅亦給牛酒。卓王孫奸滑賊倫。應藉其家資。卿其祇命。以弼朕德。以丕洪基。毋懈欽哉。望闕謝恩。〔生衆謝介小生〕天使請坐。〔末〕不勞了。九重宣詔罷。一騎望雲回。〔下外〕我無顏相對諸公。暫進裏面歇息一回。諸公請自在。憶昔都亭招宴日。誰知此際喪家時。〔下生〕山妻初到。治一杯水酒。敢留二兄少坐。聊敘故舊之情。〔小生小外〕幸逢喜事。只得領命了。〔生〕左右將酒過來。〔生旦貼丑〕

〔鮑老催〕殷勤斗酒。感仁兄薦拔。頻垂手。相同歡笑。憐朋舊。〔生〕再取酒來。望二兄多飲幾杯。何妨扇底歌。尊前舞。花間漏。開懷共醉黃昏後。〔合〕馬蹄踏碎月明階。金鞭醉拂行人首。〔小生小外〕學生回敬兄嫂一杯。

〔前腔〕英雄困久。雲番雨覆。君知否。榮華富貴。天成就。官爵高。才名茂。鸞鳳偶。人生美願酬八九。〔合前衆〕今日謝天不盡。

〔雙聲子〕難消受。難消受。百年人同福壽。同福壽。古今誰更有。〔合〕君恩厚。君恩厚。難報酬。難報酬。願天長地久。萬歲金甌。

〔前腔〕新聲奏。新聲奏。傳奇應難朽。應難朽。料知音同笑口。〔合前〕

〔尾〕康寧富貴皆輻輳。願子子孫孫稱壽。樂不盡滿堂春晝。

才子文章冠古今。

佳人傾國更知音。

花間每憶相思調。

月下常追隔壁琴。

分散莫嫌清夜怨。

團圓須記白頭吟。

誰人爲寫雲和曲。

落魄孫生萬古心。

玉鏡臺

目錄

第一齣 開場

第二齣 宴會

第三齣 探姑

第四齣 議婚

第五齣 刺繡

第六齣 請婚

第七齣 下鏡

第八齣 成婚

第九齣 石勒起兵

第十齣 王敦失守

第十一齣 慶賞

第十二齣 新亭流涕

第十三齣 聞雞起舞

第十四齣 石勒稱王

第十五齣 詔聘太真

第十六齣 絕裾辭母

第十七齣 赴官

第十八齣 母妻思憶

第十九齣 渡江擊楫

第二十齣 郭璞仙術

第二十一齣 燃犀

第二十二齣 閨思

第二十三齣 石勒報敗

第二十四齣 寄家書

第二十五齣 得書

第二十六齣 王敦反

第二十七齣 召太真

第二十八齣 擊幘

第二十九齣 丹陽兵報

第三十齣 拘溫家屬

第三十一齣 繫獄

第三十二齣 獄吏相戒

第三十三齣 獄中寄書

第三十四齣 拆書見鏡

第三十五齣 敗王含

第三十六齣 擒王敦

第三十七齣 蘇獄

第三十八齣 賞雪

第三十九齣 南北凱旋

第四十齣 完聚

玉鏡臺記

明朱鼎箸

第一齣 開場

〔燕臺春〕〔末上〕時序變遷。滄桑翻覆。乾坤幾見紛更。唐虞世遠。人馳蠅利蝸名。營營虛度浮生。賴扶植綱常。維持名教。中流砥柱。眼底誰能。古今詞傳。紛紛迭出。雕鏤矯揉。蟲技轟轟。更有朱絃囊錦。鶯簧三傳。調古音清。白雪陽春。金聲玉振。恁人聽。憑君看取。雄詞驚四座。壓倒羣英。

〔沁園春〕潤玉佳人。太真才子。下鏡成婚。適五胡作釁。神州陸沈。懷愍北狩。天馬南奔。奉詔勤王。絕裾辭母。夫婦萱堂兩處分。與劉祖同心協力。百戰淨邊塵。不意王敦叛逆。詭將心腹誘強臣。俾丹陽出守。聲罪致討。妻孥陷獄。難屈堅貞。義感說客。持書寄鏡。一怒鯨波盡削平。離鸞合。門迎具慶。天祿永承恩。〔下〕

第二齣 宴會

〔滿庭芳〕〔生扮溫嶠上〕篤志希賢。潛心樂道。十年研究遺編。靈椿早謝。萱草喜芳妍。且慇懃菽水。供子職。膝下承歡。念良姻。乘龍未遂。種玉尙無緣。〔鷓鴣天〕經綸學業冠天人。胸次才猷邁等倫。韜匱久藏和氏璧。潛蛟猶未際風雲。移巨楫。霈甘霖。要將經略濟斯民。庭前愛日情尤重。五綵難教易緝紳。自家姓溫。名嶠。表字太真。世居晉陽。先人諱瞻。拜河東郡守。母崔氏。誥封恭人。慈親內治有方。坤儀合則。清白傳家。不墮韋平世業。詩書庭訓。式追孟母遺芳。正是門無黃金聘。家有白髮親。溫嶠今日正可承歡養志。報效劬勞。豈敢浮慕助名。遺憂風木。但室家未遂。中饋乏人。這也不須愁他。男兒只要苦志燈窗。自有佳人。求爲匹配。正是娶妻莫恨無良媒。書中有女顏如玉。道猶未了。母親早上。〔老旦扮母上〕

〔逍遙樂〕逝景渾如箭。瞬息韶光知幾轉。孤鸞獨對困窮年。芝蘭未茂。華轂無傳。自慚孟母三遷。〔生〕天邊青鳥翩翩。苑上紅芳爛熳。〔合〕撫時對景且開顏。休將往事縈牽。〔見介老旦〕〔浣溪沙〕幾載孤幃守短檠。辛勤教子未成名。顛看奮翮鳴鵬。〔生〕罔

極深恩報未能。孝思鄭重利名輕。何心顧戀塵纓。〔老旦〕孩兒燈火十年勳庸未遂。如之奈何。〔生〕

母親功名外物。何足爲意。佳景難逢。不宜虛度。幸喜母親福壽並臻。須當撫時觴慶。

〔集賢賓〕〔生〕青陽初試寒氣軟。東風簾幙輕翻。柳外啼鶯聲。睨曉看上苑桃腮紅染。韶華滿眼。瑤島上慶雲高現。〔進酒合〕金樽滿。須對此芳辰酬勸。〔老旦〕桑榆欲暮。嗟歲短。暗中跳擲金丸。鏡裏瀟瀟青鬢換。只望你飛騰霄漢。身揚姓顯。庶把我斷機名闡。〔合前〕

〔貓兒墜〕〔生〕堂前母老正可戲斑斕。麟閣浮名屬等閒。人生百行孝爲先。須憐。趁此餘齡。竭力承歡。〔老旦〕男兒立志期高遠。投筆封侯眞可羨。休教戀戀在田園。休謙。趁此青春。快着雲鞭。

〔餘文〕韶光明媚眞堪戀。只恐流年暗裏減。爲須早着看花眼。〔老旦〕孩兒從姑劉夫人。嬌居太原。久疎魚雁。汝宜暫輒講習之功。往彼一探。以慰我內外葭莩之情。〔生〕母親慈命。孩兒即便起程。

〔生〕漫對花前捧碧卮。

〔老旦〕欄杆春日影頻移。

〔生〕一番奔走風塵下。

〔合〕倏忽青陽又暮遲。

第三齣 探姑

〔薄倖〕〔貼扮劉母上〕鬢謝蘭膏容虛鸞鏡。庭除香滿紅芳掩映。杜重門幃空月冷。〔旦扮劉女上〕清晝永。雕欄獨凭。倦柔肢繡絲無力。奉慈幃昏定晨省。〔貼〕九十

春光忽已半。海棠枝上紅簪遍。獨有未亡人。偏驚物候新。〔旦〕香閨人靜悄。清夜聞啼鳥。晨起事濃妝。殷勤問高堂。〔貼〕老身溫氏。夫主劉細官。拜前朝節度。不幸棄世多年。子現叨爲當朝太尉。干城攸寄。祿位崇高。庶不負於先人。可傳芳于後葉。女潤玉。年方及笄。未遂有家。且喜德性幽閒。工容秀麗。大則書數詞章。小則拈針刺繡。靡所不通。〔背〕觀他才貌兼全。爲須覓一快婿。孩兒自從父親喪後。教育你兄妹成人。受了多少辛苦。

〔黃鶯兒〕風雨峭寒凝。困孤幃已半生。清燈獨秉黃昏靜。煢煢寡形。淹淹暮齡。松筠節操寒猶勁。〔合〕強支撐。辛勤教子。聊可繼簪纓。〔旦〕花嶼曉歸青。聽黃鸝似管笙。追隨幸值融和景。萱花遶屏。蘭枝蔭庭。華堂嘉瑞真堪慶。〔合〕對芳晨。

持觴祝誦南極耀長庚。

〔簇御林〕〔老旦〕桑榆暮鶴鬢星。嘆朱顏易變更。人生聚散如飄梗。孩兒只恐怕青春易擲。當知做〔合〕細叮嚀。流光瞬息無逸足。儀刑〔旦〕離襁褓初長成。嘆闈箴未諳經。子儀姆訓須三省。自兢兢勤慎戒荒寧。〔合前〕

〔菊花新〕〔生上〕布帆千里曳東風。山色湖光圖畫中。逆旅次新豐。盼龍門何日逢。自家拜違萱堂。來訪姑氏。不覺已到劉府。怎的無人在此。門上有片雲板。待我敲看。〔丑扮梅

香上生〕煩乞通報。表姪溫太真相探。〔丑報介〕門外有個溫生來見。〔貼〕是表兄溫太真。你且迴避。〔旦下生見介〕〔浣溪沙〕骨肉參商歲幾更。關山渺渺暮雲橫。遐思種種繫愁城。〔貼〕姑嫂當年離別輕。至今衡雁渺無聲。相逢聊可慰衷情。〔生〕小姪奉老母之命。遠來探望。且喜尊姑容顏如舊。五福俱全。可慰吾母惓惓之望。〔貼〕遠勞垂顧。途路風霜。自從別來。常常掛念。不知吾嫂近來安否。何如。

〔好姐姐〕〔生〕自從朱陳締盟。關河渺迢迢。修綆音塵阻絕。雙雁隔雲萍。〔合〕合

欣幸幾年蹤跡潛形影。今日重逢喜氣盈。〔貼〕老身孀居可矜。念孤兒牽名邊境。深閨弱息及笄未施衿。〔合前〕梅香繡房中引出小姐拜見溫兄。〔旦上〕綺窗把繡絲暫停。將母命金鈿重整。忙移蓮步。〔做羞見退介〕羞臉怯趨迎。〔貼〕孩兒內外至親。何須羞避。過來相見。〔見介合〕合欽敬。義屬葭莩。慇懃着悃誠。〔貼〕孩兒溫太真廊廟之才。瑚璉之器。汝當誌之。太真他是當時俊英。況又有閥閱門屏。一朝騰踏。唾手覓公卿。〔合前貼〕賢姪。既蒙光降。暫留賓館。一則可以款敘闊情。二則可以溫習經史。不必阻推。叫書童引去。

〔生〕幾年蹤跡隔衡陽。

〔旦〕不見渾如參與商。

〔生〕今日不知何夕也。

〔貼〕與君共此燭燈光。

第四齣 議婚

〔末扮院子上〕曾是皇家幾世侯。入雲高第照神州。柳遮門戶橫金鎖。花擁笙歌咽畫樓。小人乃是劉太尉府中一個院子。昨日奉老夫人嚴命。叫我灑掃院落。整理圖書。設南洲之榻。開東閣之筵。以

候温公子。若論我相公。累代富貴。真個閨冠。層霄家聲。蓋六合。怎見得。但見千尋甲第。數尺棖題。
飛棟逼丹霞。嵬嶮參碧落。髣髴臨春結綺。參差得月齊雲。遠城波色樓臺湧。滿座山光劍戟搖。桂苑
蘭宮。緯布三辰之秀。金鰲玉宇。聯鍾五岳之英。簾幙捲東風。翔集遷鶯賀燕。軒楹敞南岳。爭看起鳳
騰蛟。四十里紫絲步障。綺陌輝煌。疑是蓬萊園苑。十數枚照乘明珠。夜光燦爛。渾如貝闕龍宮。千斯
箱萬斯倉。斂粟帛如山積。脂爲璧。蠟爲薪。等黃金同土價。日食萬錢難下筯。畫堂內簪履三千。真珠
三斛買歌姬。繡屏前金釵十二。只見桃李滿門牆。真個珠璣列華屋。謾誇富貴繁華。且說書齋景致。
但見雪案溶溶。塵埃絕跡。芸窗湛湛。香霧烟凝。架插金藤。八萬卷積案象風雲。几盈玉牒。三十束連
編形月露。翠幕中收貯錦囊綺籍。何殊天祿石渠。芸閣內珍藏玉軸牙籤。養過同文翰苑。燃青藜以
照夜。明燭奎文。繼日晷而焚膏。光傳太乙。鳳銜揮碧落。筆陣花生五色文。龍壁起雲烟。墨池紋湧三
層浪。看他累朝科甲相仍。賴此書香遠繼。果是鎮家寶藏。豈應獨羨贏金。鋪設已完。公子早上。〔末
下〕

〔風入松〕〔生上〕并州客子憶咸陽。更目斷衡湘。蘋蘩無寄堪惆悵。溫清隔問

音疎曠。晉接喜開東閣。夢魂只在高堂。堂上舞衣悲乍冷。卿雲望望無鴻影。主人傾蓋雖多情。王孫豈敢忘歸省。小生蒙姑母留止賓幄。禮意勤懇。但心繫北堂。不安寢食。不免乘此清閒。遍觀臺榭。博覽羣書。消遣旅懷。則個。

〔解三醒〕我抱經綸久。辭鸚薦。冲霄志暫戢修翰。只因萱室桑榆短。甘養志與承顏。窮經須把分陰惜。論道還當希聖賢。勞黽勉。須學取簞瓢陋巷。暫樂田園。昨見表妹。才貌無雙。觀此窈窕之淑女。堪爲君子之好逑。弱冠未諧中饋。選繡幙紅絲尙未牽。瓊樓美人多婉變。我欲將白璧種藍田。只恐月下書難檢。紅葉題詩誰與傳。空懸念。怎得那吹簫秦女。跨鳳乘鸞。

〔霜天曉角〕〔貼上〕高軒垂聘。下榻忙承應。雜佩慚無相贈。休教彈鋏生嗔。〔見

介〕賢姪。陋室荒村。飲膳涼薄。多慢多慢。〔生〕寒儒重蒙厚款。心甚不安。將欲告辭歸矣。〔貼〕請留數日。老身有一切已事相干。未敢啟齒。〔生〕願聞。〔貼〕自古道男大當婚。女長須嫁。潤玉年已及笄。

要覓一婿。斧柯之任。相屬何如。〔生背呀〕小生正有請婚之意。未敢擅言。今蒙委及。不免乘機而發。

姑母佳婿難得。欲求其人。如嶠比者何如。〔貼背介〕太真初來。吾已注意。只恐孩兒乏德。非配。故此逡巡未發。今觀此言。渠亦有意。賢姪。吾女卜婿。豈敢希汝爲比。倘果得如溫郎。三生幸也。

〔啄木兒〕〔貼〕吾女呵。他有松筠操。冰玉顏。燕婉難逢。甥館閒。仗冰人懋選東牀。使吾女獲配英賢。庶不負侯門鈞眷。吾女果得婿如溫郎呵。正是孟光得遇梁鴻選。好教他舉案齊眉。傲鳳鸞。〔生〕令愛呵。他是瑤池侶。玉籍仙。相府門楣。誰不羨。只恐着蟾闕難登。誰敢把丹桂高扳。〔背介〕此緣若非溫嶠。其他豈佳偶也。鳳卜鸞盟。須自薦女貌。郎才應無忝。不枉了千載奇逢宿世緣。〔背介〕既以受委。暫且承命。姑母溫

嶠此去。卽當慎擇賢才。以充其選。〔貼〕多謝。〔生〕奉命臺前議結親。〔貼〕伐柯執斧總憑君。〔生〕再三不用親囑付。料想也是會中人。〔生下貼弔場〕梅香。叫老院子過來。〔末上〕有福之人人伏事。無福之人伏事人。覆老夫人喏。〔貼〕院子。我已分付溫公子與小姐選婚。你可去結綵樓。開繡幙。若有青年才子如溫生者。方許應選。〔末〕老夫人差矣。門下既有溫郎。天下才子。無出其右。何不就将小姐嫁他。又令擇之他處。正所謂道在邇而求諸遠矣。〔丑〕自古道見鐘不打。又去尋銅。今溫郎青春

年少小姐美貌芳年。天生一對夫妻。老夫人快招他做姐夫。好帶挈梅香哩。〔貼〕你二人之言皆有理。但男女非行媒不知名。非受幣不交親。我於溫郎非無此意。但媒聘未通。難以出言。你且設餌待魚。若有天緣。自當契合。

〔貼〕孔雀屏開燭影紅。

〔末〕會看佳婿近乘龍。

〔丑〕有緣千里能相會。

〔合〕無緣對面不相逢。

第五齣 刺繡

〔花心動〕〔旦上〕日上紗窗對菱花筭總。雙蛾濃畫。輕拂羅衫。低垂簾幙。高堂問寢初罷。〔丑扮梅香上〕傷春兀自無聊賴。侍巾箱勤勞炊爨。守箴規不出閨門之外。〔畫堂春〕〔旦〕東風吹柳日初長。雨餘芳草斜陽。〔丑〕杏花零亂燕泥香。睡損紅妝。〔旦〕寶篆

暗消蘭麝。畫屏縈透瀟湘。〔丑〕曉寒輕透薄羅裳。無限思量。〔旦〕奴家生長閨門。克遵姆訓。繡幙低垂。不管繁華春色。重門深鎖。惟貪針指工夫。昨日溫秀才來看母親。偶爾一見。觀他丰姿秀麗。禮度雍容。真廟廊偉器。誠恐蛟龍得雲雨。終非池中物也。〔丑〕小姐。溫公子有宋玉之才。潘安之貌。小姐

何不告過老夫人。就招他爲姐夫。卻不是好。〔旦〕賤人無恥。女子之嫁也。母命之。老夫人未有此意。怎麼叫我開得口。〔丑〕小姐自家難說。待秋蘭去告老夫人何如。〔旦〕呀。這婚姻事。豈是你小賤人說得的。你好好去安排繡牀。隨我學習女工便了。〔丑〕小姐。你又苦惱我也。〔旦〕賤人。執麻桌治絲繭。都是你分內事。有甚苦惱。〔丑〕小姐。你滿頭珠翠。遍身綺羅。何不自享安逸。務要苦自勞神。〔旦〕豈不聞詩有幽風之規。書有無逸之戒。自古帝后王妃。尙然不費蠶織。何況於我。我今日豈可恃此富貴。而溺於宴安乎。〔丑〕小姐極是。只是秋蘭春心蕩漾。天氣困人。其實當不得這勞苦。〔旦〕賤人不知勞者不久逸。你今日若不辛苦。怎得後日安樂。今後再不許說此話。我若告過老夫人。好牛懲治你這賤人。〔丑〕小姐見憐。秋蘭再不敢了。〔刺繡介旦〕

〔桂枝香〕繡針紉線。輕鋪巧。繡成黼黻文章。和那色絲黃絹。看日遲晝長。日遲晝長。風薰羅幔。稍覺意慵心懶。〔丑〕小姐。你且休息休息。〔旦〕莫偷閒。簷前寸晷難留住。花影俄然上畫欄。〔丑〕紅消翠減。神疲力謫。繡不就鸞鳳雙飛。和那鴛鴦作伴。謾停針暗傷。停針暗傷。惹得我芳心繚亂。〔長吁介〕好苦呵。受人羈絆。轉

憂煎。人生浮世如春夢。何苦營營誤少年。〔旦〕姆儀婉嬾。須當黽勉。賤人你休惹。着飛絮游絲。閒藤野蔓。爲婦人女子呵。惟勤組紉。惟勤組紉。何須扼腕。休辭勞倦。聽吾言。飛花任自隨流水。蘭蕙依然春自妍。〔丑〕娘行懲勸。勲勞何憚。從今收斂春心。再不把紅綃寫怨。任流鶯亂啼。流鶯亂啼。蜂狂蝶戀。何心顧盼。更拳拳抱衾甘受宵征苦。流落黃裳最可憐。

〔旦〕庭院重重春晝深。

〔丑〕隔窗斜日轉花陰。

〔旦〕停針默默嬌無語。

〔合〕徙倚欄杆思不禁。

第六齣 請婚

〔未扮院子上〕金屋深沈貯阿嬌。吹簫奏女彈雲翹。早教翡翠聞王母。不許烏鳶噪鵲橋。受人之托。必當終人之事。老夫人差我結綵樓。選婿發放。要如溫公子這等人才。方許赴選東牀。只怕難得。遠遠望見一人擺將來了。看何如。〔淨扮富翁上〕

〔普賢歌〕田連阡陌氣豪迂。囊裏黃金積有餘。石崇那罕稀。陶朱總不如。彩鳳

求凰吾是侶。人人嘲我守錢奴。豪富冠神都。營營錢樹子。孳孳盜跖徒。孔方結兄弟。金穴乃我居。聚斂鴟夷子。征商賤丈夫。貪婪如劫奪。竊取勝穿窬。但知金玉貴。那曉聖賢書。〔末〕又道人不通古今。馬牛而襟裾。〔淨笑介〕只求倉廩實。誰笑腹空虛。文君如選婿。我是馬相如。〔末笑介〕只怕外相如內不相如。又有一位來了。衣服且是齊整。〔丑扮公子上〕

〔水底魚兒〕陰襲勳資。家聲振九衢。風流豪俠門。盈駟馬車。俺自家貴介本官餘。膏梁環綺襦。世世襲華轂。潭潭府中居。生來靠祖父。身不負犁鋤。肺腑藏白叟。形骸血肉軀。意度頗驕縱。物色何豪腴。侯門選才子。我是千里駒。〔末〕只恐君才非良馬。磨中之黔馿。〔丑笑介〕笑罵從他口。好官我爲之。〔淨丑〕我二人一富一貴。名門大族。聞知府中招婿。特來赴選。〔末〕二位家勢。果是當今第一。只一件。老夫人道。小姐有傾國傾城之貌。不可容易許人。定要考一考。〔淨〕考不難。小子有不醉之量。兼人之餐。人人號我酒囊飯袋。那怕搞。〔丑〕小子更高。日食一萬錢。夜傾三百盞。人人號我鋪啜之徒。隨你搞。〔末〕二位乃飲食之人。食粟而已。非是搞酒飯。要考才。〔淨〕這個一發不打緊。我家貨殖致富。資擬王公。人皆稱我爲多田翁。真是菽粟盈太倉。黃金滿中庫。〔丑〕我家祖父在

任。竭民膏血。捲起地皮。真個位高金多。胡椒八百石。鍾乳三千斤。若要考財。我二人最多。〔末〕又道不義之富貴。於我如浮雲。我說的非是雙財。要單才。〔淨〕腰纏十萬貫。此乃是擔財。〔末〕不是。要你肚裏的才。〔丑〕身居黃金屋。口食千鍾粟。這不是肚裏財。〔末〕二位說來說去。只說金銀。我家不要金銀。只要詩文。〔淨〕杜詩李詩。不如細絲。韓文柳文。不如松文。古人道得好。黃金置身貴。文章不療飢。又道紈褲不餓死。儒冠多誤身。古人說話。那一句不說錢財好。要甚麼文才。〔末〕我太尉是詩禮之家。與別人不同。只要書。不要財。〔丑〕你就說書怎見高。財怎見低。〔末〕書有香。銅有臭。二位乃人間臭物。請退請退。〔淨〕

〔駐雲飛〕我富擬王侯。金谷園中名最優。囊橐多豐厚。喬木吾稱首。嚙。肥馬與輕裘。朱輪輻輳。爭奈路阻藍橋。玉兔空杵臼。自訝明珠惜暗投。〔丑〕畫轂鳴騶。紈褲相仍逞貴游。世祿誇勳舊。冠蓋稱華胄。嚙。聲勢蓋皇州。丰姿魁秀。爭奈夢斷陽臺。雲黯巫山岫。花落無心逐水流。〔末〕繡幕紅樓。好選英賢作好逑。〔淨〕如今做親的只貪財主。〔末〕銅臭非佳耦。〔丑〕如今做親的只貪官家。〔末〕乳臭非良友。嚙。

野鷺豈鸞儔。名珠難售。怎教窈窕佳人。流落庸人婦。正是紅葉無情。出御溝。

〔下淨丑〕親事不成。回去回去。釣罷綸收。此處無魚。別下鉤。種玉難成就。待兔空

株守。嗟。無分探瀛州。空教仰斗。下第歸家。季子顏何厚。難洗今朝一面羞。

〔淨〕侯門有女選郎才。

〔末內應〕俗子無緣莫入來。

〔丑〕夜靜水寒魚不食。

〔合〕滿船空載月明回。

第七齣 下鏡

〔金瓏璫〕〔貼上設繡幙〕門闌增喜慶。鵲橋高駕瓊楹。占鳳卜聽鸞盟。〔旦〕繁花

團繡影。綺羅簇擁金屏。絃管沸。瑞烟凝。〔貼〕手捲真珠上玉鉤。重重步障罩紅樓。青鳥未

傳雲外信。思悠悠。〔旦〕繡幙層層繫綵球。天桃灼灼覆瀛洲。結帨未堪承母命。覺含羞。〔貼〕孩兒前

日委托太真爲汝選配。未見回報。梅香。蘭房錦瑟。花燭綺筵。不知完備了未。〔丑〕伏老夫人。俱已完

備了。〔貼〕

〔鎖南枝〕你看蘭房裏。錦瑟傍。香風瑞烟迴幃帳。結綺候仙郎。三星照羅幌。桃

腮豔蓮炬煌弄玉已乘鳳簫郎早臨降。(旦)開寶匣壓錦妝鴛幃鵲屏總羞向。採藻幼何當結縈心悒悒。我若離了膝下呵。晨昏裏誰奉養。戀戀在萱堂。難教我暫疎曠。

〔生查子〕〔生帶玉鏡上〕淑女選才郎。門閱誰能稱。自薦入東牀。玉鏡聊爲聘。自

家謹承姑命。選擇門楣。我思量起來。以表妹之貌。配溫嶠之才。眞爲天作之合。豈可令他人得之。今去見姑母。竟當自薦。以此鏡爲聘。成就這段佳姻。有何不美。梅香通報。(貼出幕前見生介)所托之事。今竟何如。(生)告姑母。已得人矣。門第才望。不減如小生。(貼)何人。(生)便是溫嶠。(貼笑介)老身久有此意。莫非天也。既如此。就令小女事君。以執箕箒。(淨扮媒婆上生出鏡介)荷蒙不鄙。愧乏白璧黃金。止有玉鏡臺一面。以爲聘禮。(貼)收了。(生拜介)寒門衰陋。鄙人幸蒙不遺葑菲。得與館甥之選。竊恐有玷名門。貽羞淑女。(貼)太眞說那里話。小女蒲柳之姿。得事君子。正謂門闌多喜色。女壻近乘龍。何須過謙。(叫介)孩兒多承太眞不棄。汝身得有所托。過來相見。(旦含羞投扇笑介)我固疑此奴。今果如所卜。(下丑)小姐招得這個好郎君。十分歡喜。莫說小姐歡喜。衆梅香皆歡喜。

〔笑下貼〕

〔香柳娘〕喜門迎席珍。門迎席珍。冰清玉潤。汝二人匹配。可謂相宜。佳人才子堪合。登。汝金玉可親。金玉可親。懷抱濟川才。胸中飽經蘊。〔合〕況渭陽舊姻。渭陽舊姻。世結朱陳。堪諧秦晉。〔生〕我本儉荒鄙人。儉荒鄙人。才非英雋。布韋未及明時。奮。荷高門汲引。高門汲引。甥館迭爲賓。何當此榮進。〔合前〕

〔生〕昔年曾向玉京游。

一飲瓊漿意氣投。

〔貼〕今日得成秦晉約。

〔合〕早教織女會牽牛。

第八齣 成婚

〔傳言玉女〕〔貼上〕寶鼎烟迷。紅雲呈瑞。畫堂前重裊疊翠。牛郎和織女。今夜鵲橋重會。標梅初實。桃夭時值。院子何在。〔末上〕帳前新綰鴛鴦帶。堂上初開玳瑁筵。雲滿

巫山峯十二。門迎珠履客三千。伏老夫人。有何使令。〔貼〕今日與小姐畢姻。筵席安排了未。〔末〕安

排完備了。〔貼〕怎見得。〔末〕〔西江月〕但見翠幄金屏燦爛。寶璫玉珮鏗鏘。珊瑚枕上繡鴛鴦。花底

香風蕩漾。玉瑣平鋪紈袴。青堦鼎沸絲簧。洞房花燭夜。煌。爭看神仙儀仗。〔貼〕有甚麼酒饌。

〔末〕〔臨江曲〕雞距猩唇羅五鼎。紅肥錦縷飛霜。肉臺盆內總膏粱。珍庖調玉脍。仙府飫瓊漿。玉

雞流霞蘭葉翠。烟浮蟻綠鵝黃。蘭陵美品鬱金香。松醪盛玉碗。結盞候仙郎。〔末下貼〕請親母新郎

出來。〔老旦上〕

〔女冠子〕高門垂庇。蓬茅頃刻生輝。〔生上〕風雲未際。鰥生未遇。姻婭承恩。慚

非佳婿。〔老旦〕請新人出拜堂。〔旦上〕妝罷還羞愧。桃腮紅襯蓮步輕移。〔合〕陰陽今

托始。千載奇逢。人生得意。〔夫妻對立介丑揭蓋頭介唱〕三尺紅羅覆綠鬟。蓋頭高揭露朱顏。

嬌羞斂衽低頭立。俊俏才郎偷眼看。囉哩囉哩。囉哩。〔丑喝拜淨〕竊以窈窕佳人。委實蘭房之秀。象賢

庶士。乃爲席上之珍。邇者神相其成。天作之合。一雙兩好。綢繆宜合於瑟琴。二姓百年。燕婉喜諧乎

伉儷。噦噦兮桐岡之鳳。關關焉河上之鳩。于以采藻。于以采蘋。克謹蒸嘗之薦。載弄之璋。載弄之瓦。

早膺莞篋之祥。伏願姑嫜交慶。家室攸宜。螽斯秩秩。麟趾振振。〔拜介〕禮儀已畢。夫婦請飲交杯酒。

〔生〕

〔畫眉序〕繡幙繫紅絲。畫燭行行照羅綺。愧塵凡何幸。獲配仙姝。遶銀屏隊隊。紅妝列華屋。繩繩珠履。〔合〕良緣喜下妝臺鏡。庭前彩鳳來儀。〔旦〕鋪翠壓瓊脂。玉樹交加結連理。慕荆釵德耀。舉案齊眉。愧我非金屋。嬋娟喜得遇象賢公子。〔合前老旦〕下嫁屈王姬。賢助真堪主中饋。見門盈百輛。化洽關雎。幸喜得種玉連城。須及早鳴珂帝里。〔合前貼〕輪御結矜褱。孔雀屏開締佳士。看東牀坦腹。慶洽門楣。產嘉瑞天上麒麟。新物色門牆桃李。〔合前丑〕

〔滴溜子〕郎君是郎君。是燕山桂枝。小姐是小姐。是飛瓊伴侶。雙雙同諧伉儷。匹配總堪奇。如魚似水。管取熊羆早叶夢裏。〔生旦〕

〔太和佛〕帶結同心花共蒂。聯袂酌金卮。瑟琴在御。夫唱婦相隨。偕老百年期。〔合〕齊看取。佳人才子兩相宜。〔貼老旦〕銀海瓊舟浮綠蟻。人人如在瑤池。香生枕簟。今夜花燭共歡娛。他年金榜標名字。〔合〕齊慶取。佳兒佳婦世間稀。〔合〕〔雙勝子〕蘭房裏。蘭房裏。春光好。花容媚。瑤臺上。瑤臺上。笙簧巧。歌聲細。銀缸

爛。銀缸爛。香篆灩。香篆灩。看交盃酬勸。欵醉扶歸。

〔餘文〕山盟海誓。今宵締。美貌芳年正及時。樂事人間能有幾。

〔生〕雙星今夜渡銀河。

〔旦〕喬木枝頭繫女蘿。

〔老〕細看月輪還有意。

〔合〕定教丹桂近姮娥。

第九齣 石勒起兵

〔北點絳脣〕〔淨扮石勒同卒上〕蓋世英雄。風生叱咤真驍勇。番漢雲從。鼙鼓漁陽動。秉握乾符起遠陣。帳前初建九旂旗。丈夫志氣掀天地。鬱鬱安能守一隅。自家姓石名勒。表字季龍。

世爲西番部長。自歸晉后。遷居上黨。經今數世。臣節不虧。近因司馬氏骨肉相殘。紀綱廢弛。九川幅

裂。四海鼎沸。俺自起兵已來。旬月之間。衆至四十餘萬。一鼓已下常山。鉅鹿數郡。并州諸胡羯。盡皆

歸降。如今就要起兵。約同劉耀長驅中原。不免叫出謀主張賓。大將石生與他相議。二臣何在。〔外

扮張賓上〕受圖黃石老。學劍白猿公。〔丑扮石生上〕摧鋒萬人敵。略地兩隅空。〔外丑〕伏將軍。有

何分付。〔淨〕張謀主。你可同石生統領大衆。約會始安王劉耀。攻取洛陽。執了晉帝。中分天下。星夜

就道不可有違。〔外丑〕領鈞旨〔淨〕

〔北雁兒落〕率五丁振旅出幽并。驅千乘闔外承軍令。拂青萍光射斗牛星。敲金鐙聲振空山應。〔外〕陣前兵列着六花形。馬上旌藏着雙燭影。任縱橫虎鬪與龍爭。肆憑陵拓地收藩屏。〔丑〕

〔得勝令〕烈轟轟羯鼓震天鳴。沸騰騰鐵馬追風騁。亂紛紛犀象壯軍聲。密層層旗纛遮天冥。奮武威北伐南征。國破城平。直待要立馬吳山頂。真個是將猛兵勅。入中原遷周鼎。〔丑〕氣崢嶸跨海噉長鯨。喧嚇嚇飛騎過葱嶺。黑黯黯蠻雨暗江汀。白茫茫瘴霧迷山徑。喊一聲日墜天傾。地裂山崩。管取一戰定東京。怕甚麼天府金城。早教晉君臣來繫頸。

〔丑〕挾槊彎弓馬上飛。

〔末〕攻城略地運謀機。

〔淨〕早教大將揮神筆。

〔合〕定見降王走傳車。

第十齣 王敦失守

〔番卜算〕〔淨扮王敦上〕禦侮握兵權。衛國居垣翰。羣胡分道寇中原。朝野皆驚眩。承恩坐鎮洛陽城。奕世勤王國史稱。夜捲牙旗千里雪。朝飛羽騎一河冰。下官都督王敦是也。從兄王衍官爲司徒。王澄官爲司寇。世稱三窟。因國內搔動。朝廷勅俺都督中外諸軍。鎮守中原。昨報劉耀石勒分道南侵。兵勢強盛。河北諸軍。盡皆敗衄。今已渡河。將至城下。天子議欲避兵。未知何如。兵校你可傳令五城諸將士。堅守城池。不可輕忽。〔丑末〕領鈞旨。〔淨〕准備鞍馬。待我巡警一番。〔巡介〕

〔紅繡鞋〕強胡劉石呼延。呼延連兵入寇中原。中原雲雕鐵騎兩紛然。旗蔽日。鼓喧天。傾上郡。破重關。〔末丑〕皇城守禦惟艱。惟艱。移文急召兵援。兵援。將軍且請展愁顏。增樓櫓。固城垣。堅甲冑。整旗旛。〔外扮探卒上〕天殃危社稷。烽火及甘泉。告都督。劉耀石勒攻破宣陽門。天子及六宮妃嬪。盡皆被執。丞相周顛等從數騎突出東門而去。都督作急點起軍兵。去奪御駕。趨快趨快。〔淨〕天那。這等大事。如何支撐。

〔包子令〕膽喪魂驚。心憤亂。心憤亂。裂冠毀冕。困腥羶。困腥羶。乘輿覆轍。遭天

謹思量。臣子有餘愆。有餘愆。〔合〕須戮力轉日回天。轉日回天。〔丑末〕正氣掃地。

山河變。山河變。君讎誓不共戴天。共戴天。裹瘡泣血還百戰。三軍怎敢暫偷安。

〔合前淨〕衆將士。你可各牽輕騎問道。啣枚疾速。激截石勒。劉耀那厮歸路。努力奪回聖駕。六宮后

妃公主。賞以萬金。爵以萬戶。〔末丑傳令介衆〕告都督。衆將士皆膽戰心驚。無人敢去。〔淨〕既如此。

京城已失。敵鋒方銳。不免收拾敗殘軍馬。奔到江東去罷。

漁陽烽火照函關。

玉輦匆匆下北山。

百二山河成破碎。

蒙塵天子幾時還。

第十一齣 慶賞

〔錦堂春〕〔生上〕風暖鶯聲巧。轉雨餘階下苔斑。荼蘼架上紅方綻。正值豔陽

天。〔旦上〕紅杏枝頭春鬧。珠簾曙影斜穿。惜花祇恐花飛片。隔竹怯啼鶯。〔生〕

〔蝶戀花〕無情日月雙丸跳。轉眼韶光。又是清明候。春照水波明已透。芳郊常恐花枝瘦。〔旦〕人世

難逢開口笑。問柳尋花。好景休辜負。鳳瑟鸞笙時合奏。對花正值人年少。〔生〕娘子。你看春滿郊原。

萬花如錦。可備筵席。請岳母母親同到南園翫賞。以敘天倫之樂。多少是好。(旦)筵席俱齊備了。

(生)既如此。請二母出來。(老旦上)

(清平樂)流光似箭。鏡裏容顏換。又報南園春過半。浮世真如夢幻。(貼旦上)翦
翦風生繡幙。微微雨過欄杆。且共看花梓澤。何須去訪桃源。(老旦)春院懨懨睡起

遲。三竿紅日上朱扉。(貼)重門深鎖無人到。惟有呢喃雙燕飛。(老旦)親母孩兒既蒙招贅。老身又

辱駢幃。華居厚膳。何以克當。(貼)骨肉至親。何分彼此。賢婿請我二人出來。有何話說。(生)告岳母

母親。天地爲萬物之逆旅。光陰乃百代之過客。浮生若夢。爲歡幾何。當此和煦天氣。品物咸亨。安排

蔬酌。同到南園賞花觴詠。以樂天年。(貼老旦)佳景難逢。青春不再。既有此舉。甚合兩心。便可攜觴

同往。(行介)此間就是南園了。(合)只見萬種奇葩呈豔麗。十分春色在枝頭。好景物也呵。將酒過

來。(生)

(錦堂月)麗日江山。春風花草。繁華幾經過眼。九十風光。回首又逾強半。嘆浮
生忙裏推遷。憐暮景暗中頻換。(合)金樽滿。聽取花下笙歌。捧觴酬勸。(旦)堪觀。

橋梓陰連。萱花秀毓。交加雨露鮮妍。桂蕊蘭香。韶華佔斷名園。連理樹並蒂交枝。比翼鳥雙棲同綰。〔合前老旦〕凭欄琴瑟調絃。斑斕戲彩。花前擲舞蹁躑。拾翠尋芳。唧盃且自消遣。孩兒休長恁林壑投閒。須早把桑弧射遠。〔合前貼〕開簾九棘森然。三槐掩映。羹牆禮樂相傳。更冰玉生輝。門楣堦館多賢。閒庭畔遲日暄長。塵夢裏餘光影短。〔合前生〕

〔醉翁子〕堪戀國色與天香。綴滿〔摘花與旦插介〕須摘取花枝。滿頭插遍。〔旦〕欣忭。向金谷叢中。對酒高歌同繾綣。〔合〕歌聖善。願壽考無疆。永保團圓。〔老旦〕隄勉。看我兒材器如瑚璉。你須奮翮鵬程。策名金殿。〔貼〕囊贊看時事多艱。怎忍懷寶迷邦袖手看。〔合前貼老旦〕

〔僥僥令〕鳳簫聲漸緩。柘袖舞初闌。〔生旦〕不覺楊柳樓心歌殘。照扇底落東風盡。醉酣。〔貼老旦〕獸爐銷玉篆。綺席徹犀錢。〔生旦〕只見鞦韆影落欄杆晚。飛蓋與游韁尙纜牽。

〔餘文〕歡歌永日猶嫌短。傍花隨柳過前川。偷得浮生半日閒。

人生七十古來稀。

日向花前盡醉歸。

傳語東風共流轉。

暫時相賞莫相違。

第十二齣 新亭流涕

〔末扮院子上〕廟堂無策可平戎。坐使甘泉照夕烽。寶鼎銅駝荆棘裏。龍樓鳳閣黍離中。小人乃王都督手下的便是。前日隨都督鎮守中原。兵敗奔來江左。痛想國家被兵之時。真個好慘傷也呵。只見那蜂蟻成屯。豺狼載道。鳥飛不下。獸挺亡羣。風烈兮日曛。山崩兮水沸。利鏃穿腸。血滿長城之窟。驚沙撲面。屍填巨港之涯。數代表冠。淪於左衽。兩朝豪傑。沒入古丘。曉日空殘壘。搥傷滿目。荆榛。夜月迴頽垣。忍見高卑陵谷。二帝塵蒙。洛邑江山千里暗。百僚鼠竄。咸陽宮殿三月紅。發掘諸皇陵。誰收暴骨。焚燒九太廟。盡化飛灰。失耕隴畝。鞠爲糜鹿之場。無主寢園。遍是莓苔之境。真個世連厄陽九。干戈禍生靈。好苦呵。何時一掃胡塵靜。太平重見漢官儀。今日都督分付整頓筵席於新亭。請王司徒周司徒劉太尉三位老爺飲宴。商榷朝政。筵席已完。都督早上。〔淨扮王敦上〕

〔出隊子〕神京捍禦。推轂承恩。總六師。背城百戰。苦難支。竭力輸忠。心無二。一點丹衷。神人鑒知。九重城闕。迴烟塵。回首中原。嘆陸沈。自願勤王。曾百戰。捐軀空自建。奇勳。王敦捍禦京國。晝夜血戰。出萬死。得一生。奈何孤旅難支。遂致失守。及帝后播遷。急欲遣騎。邀回聖駕。只因士卒破膽。不能用命。以故無成。若論我今日。擁衆來奔新朝。當有不次之待。反聽劉隗刁協之徒。竊弄威柄。將我補天浴日之功。棄而不錄。思之不能無怨也。罷罷。此是國家正當危急之際。不宜自立異同。姑且勉力匡扶。待關河平定。別議之耳。左右的。酒席完備了未。〔末〕完備了。〔淨〕請各位老爺出來。〔末下外扮王導上〕

〔滿庭芳〕國步艱難。憂如天墜。誰爲王家死綏。〔小外扮劉琨上〕戎馬在郊。羽書日夜交馳。〔末扮周顛上〕太阿柄倒持。南冠無奈北風吹。〔合〕堪悲處。舊京何在。人民城郭都非。〔見介外〕列位大人。夷狄亂華。宗國傾覆。吾等食人之食。不能死人之事。寧無愧於心乎。〔小外〕自古道主憂臣辱。主辱臣死。若論二帝受此困頓。吾儕分當捐軀赴難。以全忠節。但恐自喪溝瀆。無益於時。故且忍恥偷生。以圖恢復。列位大人。我與你須當盡心竭力。期復大讎。不可苟

安歲月。坐失事機。〔淨〕只一件。方今劉石盛強。難與爲敵。只宜畫江固守。以保宗社。況江東幅員數千里。借使無失。黃河以南。猶可作龜茲國。何憂之有。將酒過來。〔外〕

〔江頭金桂〕此時何時。敢就盃酒。自羯虜窺覷神器。胡塵四塞迷。頃刻把中原板蕩。冠履倒置。黎民無子遺。只恨我生不逢時。淪胥顛沛。況我備員樞軸。休戚攸關。焦思苦心。當自勵。敢素餐尸位。素餐尸位。須鞠躬盡瘁。是何時。從頭收拾山河舊。天外重將落日揮。〔末〕仰見三辰失位。神京九鼎移。自從虜馬飲江。滄桑遷變。指顧

江山。漫非舊日之景。可傷可傷。攜手憑高睇盼。風景不殊。舉目有江河之異。〔流洎介〕

〔外〕呀。周大人。休得悲傷。我與你當共戮力王室。克復神州。何至作楚囚對泣乎。〔末〕猛然問覩

物興悲。早不覺潛然流涕。列位大人。我自願漆身吞炭。嘗膽臥薪。同心協力。期雪恥。須歃血爲誓。歃血爲誓。〔歃血介〕冰霜堅志。強維持。還將破碎乾坤整。沙漠重迎二聖歸。〔小外〕那日把金甌輕毀。周京遍黍離。回首故都何處。親舍千里。白

雲遙指在天際。〔外〕劉大人。自古爲國者不顧家。今天子安在。敢言親乎。〔小外〕列位大人說得

是只爲王室凌夷，不遑戀桑梓。那日二帝北狩之時呵。追想牛車北去，俛首羌氏。攀轅滿城空淚垂。人生值此大難，何用生爲。恨不得見危授命，見危授命，殺身全義。自思之，還須射卻天狼落。會見漁陽無鼓鞞。〔淨〕想那日王師失利，金湯瓦解。危忍見生靈百萬，肝腦塗地。教我奮身空捍禦，怎當得虜勢滔天。三軍奪氣，直似泰山壓卵。膂力難持，倒戈望風空潰圍。爲今日之計呵。且畫江固守，畫江固守。暫作偏安之計，自遲疑。吾曹縱有擎天手，只恐大廈終非一木支。〔小外末〕都督此計左矣。我晉朝非在上者無道，良由宗室爭權，自相魚肉，遂使犬戎乘隙，毒流中土。今遣民思奮，若能命將出師，遠近豪傑，必望風響應。何故區區作自守虜乎。〔外〕二位大人言之極當。〔小外〕又一件，二帝在北，不宜忽然。須當時復遣問起居，以盡臣子之義。〔小外〕

〔憶多嬌〕國破裂，君難急。青衣之恥，猶未雪。逋臣此恨何時竭。〔合〕壯懷激烈，甘爲嵇侍中血。〔末〕天柱折，地維缺。一江南北乾坤別。遙看朔漠心如噎。〔合前〕〔鬪黑麻〕〔外〕只願江左羣寮，心孚契結。狗國忘家，忠肝似鐵。收疆土，恢帝業。

麟閣圖形。燕然勒碣。〔合〕寸心迫切。衷腸似火熬。聽取江流聲如哽咽。〔淨〕若論我文武才猷。爲時俊傑。兄弟桓桓。世稱三窟。朝廷若能用我。我扶宗社。驅胡羯。再造乾坤。重援覆轍。〔合前外〕劉大人。下官昨日舉保祖士雅爲元帥。足下爲副帥。興兵北伐。銅符已下。刻日請行。〔小外〕既有詔命。下官就與祖公同行便了。

〔淨〕鼎湖龍去洛城崩。

〔末〕擾擾乾坤幾戰爭。

〔外〕獨使至尊憂社稷。

〔小外〕諸君何以答昇平。

第十三齣 聞雞起舞

〔夜游朝〕〔外扮祖逖上〕悵望中原成慨嘆。何忍見生靈塗炭。生世不辰。遭時多難。何日裏掃清帝輦。虜寇日騷動。干戈卒未休。中州王氣盡。江漢水聲愁。泣血瞻河洛。臨危駐石頭。云何舒國難。徹底副君憂。祖逖表字士雅。范陽人也。少負奇才。素有大志。爲長安傾覆。率部曲渡江。上書自陳恢復之策。蒙聖恩擢居元帥。征西大將軍。鎮守雍丘。着劉太尉參贊機務。近因新朝若

遭離亂。物力疲弊。不給兵廩。鎧杖。使我自往召募。卽今內無資糧。外乏救援。單弱如此。大事何由克

濟。曾記古人有一旅中興。三戶創業者。兵家運用之妙。存乎其人。豈衆寡強弱之足計哉。此行但當以忠烈感激將士。使知順逆。庶幾義聲昭彰。理直氣壯。師出有名。大功可就矣。今日銅符已下。命駕有期。已遣人去請劉太尉到此。秉燭夜談。怎的還未來。軍校伺候着。〔小外上〕玉帳承恩叨帝眷。參幃幄出鎮雄藩。兵甲胸中。指揮羽扇。管教青海無傳箭。通籍金鑾爲輔弼。坐籌玉壘寄干城。自家蒙聖恩除爲副帥。領兵北伐。如今往參元帥。以定出師之期。〔見介外〕昨日新亭。有何高論。〔小外〕諸公無非忠義。都督王敦。非惟不能爲國分憂。且有悖逆之語。觀其造意。中蓄不臣。竊恐外難未靖。而蕭牆之禍復起。奈何奈何。〔外〕王敦狼目豺聲。終當叛亂。但智識庸下。吾輩若存。足可以制之。何慮之有。〔小外〕元帥言是。請問雍丘之行何日。〔外〕庶事草創。倉卒難行。如今且往淮陰屯田開治。待兵糧備足。器械精利。然后刻期而發。今夜欲與公講論一宵。咨諏請益。〔小外〕元帥坐籌幃幄。決勝千里。必有成謀。但兵貴神速。師出不意。亦一奇也。〔外〕太尉言之有理。

〔刮鼓令〕分符出漢關。駕元戎據玉鞍。麾鈇鉞。奮鷹揚。亟圖報君恩。一寸丹。以太尉神武謀略。爲之輔佐。劉石不足平矣。匡輔荷英賢。持危賴君神機妙算。我和你此

去呵。管教三箭定天山。獻俘齊奏凱歌還。〔小外〕元帥。你身當虎豹關。把乾坤
早幹旋。奮威武衝鋒冒險。向黃龍繫可汗。下官樛櫟之才。豈足爲元帥副。伴食我應
慚。何幸作西樞翊贊。元帥。爲須取日返虞淵。播遷天子駕重還。〔小外〕夜已二更。神
思困倦。且枕戈少憩片時。〔外〕左右。你去擊柝巡警。我與太尉抵足一宵。〔枕戈睡介丑末同巡更
丑介〕老哥。我和你夜夜巡更。風雨四侵。蚊蚋匝體。肚中又飢餓。妻子又宿自。好苦呵。我和你且唱
個歌兒耍子何如。

〔五更怨〕深更悄。風雨多。腹餓筋疲怎奈何。幾許銷金共鴛枕。雲雨會。那知漏
下有更夫。擊柝歌。〔末〕方纔雨下。如今又有月了。新月掛。曲如鉤。照見窮閭幾處愁。
多少紅樓長夜宴。歡娛甚。獨教辛苦執更籌。恨悠悠。〔雞鳴介丑末〕呀。更籌尙未換。怎
的雞鳴了。〔外醒蹴小外足介〕太尉。午夜未央。巽風未動。卽聞此聲。豈非惡聲耶。可怪可怪。〔小外〕
下官方在朦朧。聞之以覺。此乃乾坤倒置。萬物失序之象也。可嘆可嘆。〔外〕

〔刮鼓令〕荒雞午夜傳。忽驚回客夢殘。爲只爲乾坤顛躓。蹇蹇孤臣睡。怎安我

終夕思茫然。攬衣起。徬徨待旦。〔舞介〕欲待要仗劍斬樓蘭。燕然勒石紀功還。

〔小外〕邊烽晝夜傳。苦遭逢國步艱。怎能穀輿圖清晏。漢官儀何日看。王都督。

這等奸佞之徒呵。空自戴蟬冠。叨竊君恩。當知愧赧。此行瀝洒爲誓。若不稽顙。至呼

韓玉關。此去不生還。〔外〕太尉。淮漢乃洛陽咽喉。欲得中原。必先取河北。公當速將一旅之師。

先去按視地形。便宜行事。下官隨當繼發。〔小外〕領命卽行。元帥。世方多故。如欲戡亂經邦。非賢才

不可。下官有妹夫溫嶠。故河東郡守溫瞻之子也。文武兼資。管蕭之亞。敢薦爲幕賓。何如。〔外〕既有

良弼。明日卽當保舉爲總兵司馬。賚詔徵聘。

〔外〕枕戈不寐覺淒涼。

〔小外〕中夜聞雞起欲狂。

〔外〕欲使呼韓來稽顙。

〔合〕須教諸葛起南陽。

第十四齣 石勒稱王

〔西地錦〕〔淨扮石勒上〕一旅奮揚邊地。千載開創洪基。英雄自合居天位。功德

可配唐虞。黻冕端居九五尊。應天御世關乾坤。九金神鼎初歸我。五玉諸侯盡在門。寡人自收中州

之後。王師到處。無不歸降。近從羣臣之請。立居天王之位。國號大趙。建都洛陽。昨聞劉曜竊據關陝。亦自稱王。如此僭妄。誠匹夫之勇。井底之蛙耳。俟彼數年。吾當問其鼎矣。又聞司馬容卽位建康。內有周顛王導輔弼之臣。外有祖逖劉琨熊虎之將。此亦勍敵。不可蔑視。不免召謀主張賓。勇將石生石虎。定議則個。〔外扮張賓上〕

〔前腔〕決勝廟謨雄斷。料敵方寸神機。〔丑扮石虎石生同上〕倚天長劍泣蛟螭。那

怕金壘湯池。我王萬歲。〔淨〕右侯。我昨披輿地圖。四海如此其廣。何時可一天下乎。〔外〕告大王。

順德者昌。逆德者亡。欲一天下。當順民心。古之王者。在德之厚薄。不在地之大小。〔淨〕卿言極是。我如今欲破劉曜。計將安出。〔外〕

〔東甌令〕大王聽告。晉家魚肉爰失其鹿。天下英雄相競逐。劉曜呵。雖然掩襲倖先得。未必民心服。吾王威武華夷屬。一怒皆懾伏。〔淨〕劉曜兵強地險。恐未易破。〔外〕

劉曜耽嗜麩藥。綱紀廢弛。雖據關中。濟得甚事。他是個公孫木偶。修邊幅。大王視彼真

如几上肉。若令大衆臨函谷。勢應如破竹。管教他輿櫬口銜玉。稽顙作臣僕。

〔淨〕劉曜若擒江東用何術以破之。〔外〕江東帶甲百萬。江漢爲池。君臣輯睦。恐未易破。江東雖小。承正朔。終作三分爲鼎足。況兼天塹限南北。盤基恐難覆。大王若要圖之。只須迭出三軍。蠶食吳和蜀。〔淨〕軍師智勇勝頗。牧廟算皇猷常啓沃。我推赤心置人腹。遣將自推轂。石生石虎。你須努力收疆服。酬功賚天祿。石生石虎。你二人武勇高天下。今日在我跟前。把行陣的本事。各逞一番。以觀汝二人將略何如。〔末〕告大王。戰以克敵爲功。凡用兵布陣。須要自度權衡。敵爲火陣。我爲水陣。以水制火。彼必敗矣。敵爲地陣。我爲天陣。以天臨地。我必勝矣。生地則出魚麗之陣。死地則出雲鳥之陣。衢地則用八卦之陣。圍地則用六花之陣。增竈減竈。方略不同。囊沙量沙。動靜莫測。孫子曰。兵未戰而妙算勝者。得算多也。將通於九變之利者。知用兵也。〔淨〕好智略。石生說。〔丑〕告大王。兵以敢死爲勇。凡用將對敵。必須先作勇氣。則寡可勝衆。弱可制強。七縱七擒。能破貔貅百萬。八戰八克。那怕虎賁三千。蜀劍閣只消空拳打開。函谷關擬把靴尖踢倒。挾太山而超海。只作尋常。舉九鼎而拔山。豈足爲異。擒了司馬劉曜回來。方顯功業。英雄蓋世。〔淨〕好勇略。你二人果然勇足以當鋒。智足以取勝。滅晉除劉。易如反掌。右侯。我就拜你爲

軍師石生石虎爲大將。一同提兵前去。先定關陝。後取江東。務要協力同心。建功立業。不可有違。
〔衆〕領旨。

〔金錢花〕披堅執銳離營。離營。貔貅彪虎雲從。雲從。管教一戰陝城空。擒劉曜。
定關中。〔合〕傳露布。返元戎。返元戎。〔衆〕喧天鞞鼓聲雄。聲雄。師行誰敢當鋒。當
鋒。一枝長戟六鈞弓。摧函谷。定江東。〔合前〕身馳鐵騎臂彤弓。出塞將軍玉帳雄。九姓羌胡
隨制節。六州部落互相攻。〔衆下淨弔場〕大軍啓行。萬機稍暇。不免宣出二姬。玩賞一番。多少是好。
內史請二位夫人出來。〔旦老旦上〕

〔金瓊瓏〕承恩居未央。羅衣染惹天香。攜柘袖。諳宮商。綸音方召幸。忙整金釵
雙鳳凰。趨殿陛侍君王。我王萬歲。〔淨〕二妃。我連日留心軍旅。失了掖庭之樂。今當人閒晝永。
薰風入絃。召你二位出來。翫賞片時。以消炎暑。〔旦老旦〕

〔山花子〕珠簾高捲金鈎控。御爐香噴烟濃。烈炎威不到九重。南薰樂沸絲桐。
〔合遞酒介〕瀉瓊霞光浮碧筒。六宮粉黛擊玉鍾。百寮濟濟待袞龍。萬歲嵩呼。

共祝華封〔淨〕深宮悄似朱明洞。玉壺冰簟生風。見祥雲瑞氣鬱葱。火龍任自騰空。〔合前旦老旦〕妾身幸遇宸恩寵。昭陽殿裏從容。喜羊車時過後宮。御溝何用題紅。〔合前淨〕宵衣旰食身端拱。傾心延攬英雄。念征人衝冒鎗鋒。何時奏捷膚功。〔合前〕

〔舞霓裳〕〔旦老旦〕謾束湘裙舞回風。回風。樂譜新腔喜溢重瞳。重瞳。吾王聖德威聲重。萬國遍朝宗。於變時雍。〔合〕齊看取華夷一統。河清晏。航海梯山盡修貢。〔淨〕曉入瑤臺遇飛瓊。飛瓊。緩步金蓮環珮玲瓏。玲瓏。歌聲響遏行雲迴。明月上簾櫳。沈醉還宮。〔合前旦老旦〕更闌人醉。大王請進椒房。

〔淨〕銅壺銀箭漏聲催。

〔旦〕飛燕昭陽待宴回。

〔老旦〕珠翠兩行齊侍駕。

〔合〕羊車輓入後宮來。

第十五齣 詔聘太真

〔一剪梅〕〔生上〕槐棘陰濃翠滿庭。簾捲風清。爐爇香清。掩書俯几憶平生。刻

鵠初成。畫虎還成。〔浣溪沙〕年少英雄七尺軀。學書學劍欲何如。至今滄海尚遺珠。心驚萱室

時偏短。暗想中原勢已危。避兵何地可安居。俺晉朝自從宗室相殘。五胡分擾。神州陸沈。瑯琊南渡。

溫嶠身雖草莽。志存恢復。爭奈高堂母老。幽室妻單。喜懼交戰于心。出處未致其決。正是欲伸赤手

扶紅日。恐斷青眸望白雲。

〔懶畫眉〕中原戎馬亂縱橫。每見妖星氣不平。平生有志復神京。須教挽卻天潢水。洗淨山河戰血腥。

〔又〕欲揮神劍斬長鯨。擬絕天驕拔漢旌。只因日暮念萱庭。孤雲恐切河陽望。且韜迹辭榮暫隱名。〔外扮使臣齊詔并冠服上〕

〔六么令〕一函綸命。雨露霑濡。日月明。爭看莘野起阿衡。佐聖主寄干城。〔合〕行看四海樂昇平。聖旨已到。新官冠服迎接。〔生穿衣跪介外讀詔介〕皇帝詔曰。朕惟天位惟艱。

必賢才斯可輔理。邦家多難。非俊髦孰與經綸。我祖宗纘禹舊服。奄有華夏。傳世五君。代無失德。茲因骨肉乖離。以致羌胡雲擾。宗社失守。大帝北轅。朕自渡江已來。苦心焦思。不遑寧處。今欲招來天

下豪傑。尅日北征。期於洩忿殲胡。重援瀚轍。前者鎮西大將軍祖逖奏稱。太原温嶠。才兼文武。學貫天人。實有禦侮之才。堪作腹心之將。朕准奏宣麻封爾爲總兵司馬。赴鎮聽調。爾當體朕宵旰求賢之誠。分猷報主。是力勤勞。夙夜匡國救民。倘俾大讎得復。王業中興。朕當分茅錫土。崇德報功。欽哉。持命望闕謝恩。〔山呼介外〕温大人。邊境告急。便可就道。弗可愆期。〔生〕朝廷恩命。不敢有違。卽當辭別母妻。起程便了。

〔外〕羨君談笑出風塵。

〔生〕叨受兵符寵渥新。

〔末〕鵬鷲九霄初奮翮。

〔合〕行看功業畫麒麟。

第十六齣 絕裾辭母

〔謁金門〕〔旦上〕空留戀。指日河橋人遠。漫把鴛鴦輕拆散。從今添個思君怨。

〔生上〕堪嘆青錢入選。名利牽人一線。〔合〕母子夫妻情分淺。兩意難排遣。

〔旦〕相公。君命召。固當不俟駕而行。親年老。豈可使違顏而去。〔生〕夫人。親恩固所當盡。君義亦不可違。老母在堂。專望賢妻小心侍奉。卑人若有寸進。便當整飾而還。不敢久戀上國。〔旦〕朝廷既有

詔聘奴家不敢阻當。不知起程在於何日。〔生〕邊事緊急。就去堂上辭別母親岳母。即便起行。〔老旦上〕

〔臘梅花〕我孩兒應聘赴神京。頃刻天涯形影。〔貼上〕看驂騑方騁。鴟鵬奮迅。

扶搖萬里上雲程。〔生〕母親。子道未能全。王事苦間關。〔老旦〕孩兒窮經須口用。憂國義當先。

〔貼〕賢婿。丈夫四方志。鄉井莫留連。〔旦〕相公。但願功成後。錦衣及早還。〔老旦〕孩兒。朝命既促。登程須早。〔生〕母親。孩兒本欲困守窮閭。供爲子職。只爲羽書逼遣。無可奈何。今日只得促裝前去。母親。岳母。善保尊體。切勿掛懷。

〔園林好〕離膝下。游子違親事遠征。離膝下。脂車啓行。只慮着桑榆暮景。〔合〕

衷曲裏結愁城。〔旦〕君今去。冷落了金釵繡屏。君今去。心懸旆旌。只怨我紅顏

薄命。〔合前老旦〕

〔江兒水〕你仗劍丹心壯。我衰顏兩鬢星。臨行怎禁得離愁耿。兒。你駕着星車。長塗騁。我倚門空覓孤鴻影。孩兒此去呵。你再把長纓奏請。〔合〕早願功成衣錦

歸來重歡慶。〔貼〕賢婿。你立身期遠大。報國任縱橫。濟時早把國鈞秉。賢婿。我孩兒見統兵在河北。見時千萬教他戮力王室。切勿以老身爲念。論事親雖合全孝行。許國尤當據忠盡。〔生悲介〕賢婿。大丈夫當立功異域。何必顧戀鄉閭。豈可藏居鄉井。〔合前旦〕

〔五供養〕叨陪妾媵。中饋饗飧。自合應承。夫。我只愁關山和峻嶺。陟險冒炎蒸。未卜狼烟甚日平。嘆別離在俄頃。執手慇懃問。何日是歸程。〔合〕別淚盈盈。憂心炳炳。〔生〕賢妻啓聽。我須不是浪裏浮萍。肯飄飄流異境。忘卻屢屢情。母親。岳母。非我違顏干利名。只因難拒皇朝的三聘。妻。白髮堂前母。望你代溫清。〔合前末

丑扮軍士執旗上〕

〔不是路〕按劍登程。軍士紛紛郊外迎。兵車整。羽書催趲。不留停。授專征。朝廷欽限休違悞。告請將軍早啓行。小人奉祖元帥嚴命。請司馬老爺赴任。交傳命。道中原豺虎紛岐徑。仗君綏定。〔生老旦〕聞罷傷情。唱徹驪歌不忍聽。〔旦〕心悲哽。牽衣把臂淚如傾。形和影。從今兩地傷孤另。愁浥輕塵向渭城。〔生〕還思省。慈幃遠

隔斑衣冷。旅愁千頃。軍士。你可去河邊等候。待我告別老夫人就來了。〔末丑〕領鈞旨。正是戰
士離家心獨苦。將軍赴鎮勢偏雄。〔下生〕母親有何指教。〔老旦〕孩兒近前來。我分付你。

〔玉交枝〕運籌決勝。料吾兒韜略素精。臨戎敵愾宜奮勇。恩威賞罰須明。功名
及早辭寵榮。高堂風燭渾不定。〔合〕莫教人門閭獨凭。〔生〕萱庭嚴命。孩兒自當
服膺。此行須展平生志。決不敢曠職徒行。此去呵。中原板蕩如已寧。陳情辭祿
還歸省。〔合前旦〕

〔川撥棹〕夫。你囊錐如脫穎。把歸鞭須早整。休要戀着鐘鼎蟬纓。鐘鼎蟬纓。忘
卻我裙釵布荆。君當牢記玉鏡之盟。毋使妾有白頭之嘆。須記取結髮盟。莫教羞白頭

愁破鏡。〔生〕妻。與你糟糠盟訂。念這宋弘敢負情。〔出鏡介〕卑人若忘前情。有如此鏡。便
把這菱花爲證。菱花爲證。偕老深盟誓不更。我生平非薄倖。勸娘行莫掛縈。母

親。岳母。此間就是河邊了。就此告別。〔老旦〕孩兒爲官雖是好事。只是母子之情。一時間舍不得你
就去。你六月棲棲冒暑行。我的心中渾似冰。只怕你留滯邊城。留滯邊城朝

夕使我望眼睜。況我窮年值暮齡。遠游人當自傲。〔生泣拜介〕兒非爲忠名遺孝經。非不念慈親在疚惓。但只願顯親揚名。顯親揚名。我故奉檄違顏。敢受徵。孩兒登舟去罷。〔老旦〕孩兒且慢。你去端的幾時回來。〔生〕母親在堂。豈敢久游。料不久還具慶。別吾慈策步登。〔生下絕裾介老旦泣介〕呀。衣裾斷了。逆子。你這等去得忙。〔旦泣介〕夫。你徑不回頭就去了呵。〔貼〕親母。他也只爲王事要緊。不要怪他。且自耐煩回去罷。

〔餘文〕愁感感。淚盈盈。可憐骨肉兩漂零。江山咫尺分吳越。腸斷關河信杳冥。

〔老旦〕堪憐絕裾便登舟。

〔貼〕王事多艱不自由。

〔旦〕心折此時無一寸。

〔合〕滿腔離恨逐西州。

第十七齣 赴官

〔望遠行〕〔生上〕欽承恩詔。驛騎忙馳驟。〔外扮戴淵上〕碧落初開。殘蟾猶照。忽聽

前林呀。喔雞聲頻報。〔末丑〕盼星繩何日轅門得到。〔見介生〕〔踏沙行〕猘狁侵陵。王師

薄伐。勤王六月征車發。思親回首戀家山。憂君極目瞻天闕。〔外〕金谷榛蕪。乾坤幅裂。塵埃滿目人

情別。風雲入陣寒烟清。收功直擬窮狼穴。〔生〕大人何往。〔外〕下官戴淵亦爲奉詔勤王。〔生〕旣如此。卽當聯旆同行。戴大人。温嶠昨承詔命。卽便戎服登舟。臨歧之際。母親扯住衣服。自家匆促別時。不覺裾絕。今日細思想。此情如何過得。〔外〕温大人。始於事親。終於事君。公義私恩。豈能兼盡。聞尊堂太君年齡未衰。足下畢了王事。回來奉養。未爲晚也。〔生〕大人說得是。如今天色漸明。躡行幾步。〔生〕

〔甘州歌〕我心懷國憤。奉勤王詔命。遠赴轅門。胸中蘊藉。盡是兵甲經綸。披星戴月。馳邊塞。執銳披堅。掃虜塵。〔合〕驅驃騎。驟虎賁。征車日夜不停輪。雲烟渺。岐路分。江潭何處是通津。〔外〕祝融烈火雲。見扶桑旭日。擁出金盆。征衣汗透。空思解慍南薰。關山渺渺。愁遠道。烽火年年報虜塵。〔合〕雙龍逝。五馬奔。長蛇封豕。峭戍羣。囊沙地。聚米屯。風聲鶴唳不堪聞。〔生〕平生許國身。念登舟絕裾。母子輕分。赤心一點。恆自憂國憂民。〔外〕六飛杳杳。歸何處。兆庶紛紛。困虜塵。〔合〕胡風兢國步。屯漢家陵寢。遍荆榛。乾坤沸。玉石焚。荒涼銅雀鎖愁雲。〔末〕

荆樊嘆陸沈。看舳艫燬燼橫。槩誰吟。松杉遠近。何處是天闕神京。〔丑〕指揮白羽驅胡騎。直向黃龍靖虜塵。〔合〕烟郊暮隴日曛。餘烽野燒暗驚魂。丹心壯劍氣橫。何時傳檄定三秦。

〔餘文〕秉旌旄臨戰陣。郵亭此夜暫停驂。報國縱橫七尺身。

〔生〕劉項持兵鹿未窮。

〔外〕路邊戈甲正重重。

〔末〕將軍奮力勤王事。

〔合〕奪取龍驤第一功。

第十八齣 母妻思憶

〔憶秦娥〕〔老旦〕長悲嘆天涯游子音塵斷。倚門慈母。淚痕如線。〔旦上〕春山

懶掃香雲亂。起來謾把珠簾捲。空階墜葉晚。風吹散。〔老旦〕〔玉樓春〕夜來風雨人傷

別。淒淒四壁聞蛩咽。夢破五更心欲折。笛聲吹落梧桐月。〔旦〕碧空杳杳雲山疊。秋波望斷雙魚絕。

美人遙憶隔湘江。一寸柔腸千縷結。〔老旦〕媳婦。自從孩兒去後。雙鬢垂白。百慮成灰。追想前日絕

裾之事。養子也是徒然。〔旦〕婆婆。王事靡盬。不遑將母。丈夫那日也只是急於王事。故有此愆。〔老

旦忘家狗國。理固當然。只是我一時放心不下。旦丈夫功名成就。必然辭祿歸田。婆婆不必掛念。老旦孩兒去後。又是二月。途路風霜。山川阻隔。令人朝夕倚闥懸望。好愁悶也呵。

〔傍妝臺〕愁倚畫欄中。中原極目。遙隔萬山重。嘆胡虜方騷動。怎得個信音通。
兒。你親老家貧。期祿養。早建班生萬里功。〔合〕事親盡孝。事君盡忠。休教虛負學三冬。〔旦〕彩雲天遠。鳳樓空。幾多幽怨。堆積在心胸。愁蹙損雙眉黛。淚溼透兩綃紅。何時細柳休兵甲。早使扶桑得掛弓。〔合前老旦〕

〔下山虎〕去時南陸。忽轉西風。懊恨征車發。離緒一纓兒。你要把乾坤旋轉。致令母子西東。往事空嗟類轉蓬。韶光看瞬息。金井驚飛一葉桐。清夜勞魂夢。愁感倍濃。尺帛何由倩便鴻。〔旦〕夫。你櫛風沐雨。冒鎗衝鋒。汗馬沙場上。白日貫虹。怎能穀天驕授首。早使稱奏膚功。獻捷歸朝萬戶封。竊祿承天寵。夫。只怕你忘卻糟糠嗜鼎鐘。苦我這裏釵折羞雙鳳。縱有膏沐呵。誰適爲容。腸斷巫山十二峯。〔餘文〕堪嗟聚散如春夢。無情流水自溶溶。載不得萬恨千愁到海東。

〔老旦〕入夜西風枕簟秋。

〔旦〕感時傷別思悠悠。

〔老旦〕倚門望斷無消息。

〔合〕一曲欄杆一曲愁。

第十九齣 渡江擊楫

〔夜游朝〕〔外扮祖元帥上〕職掌元戎居台輔。秉金符宸闕恩崇。北門鎖鑰中流

砥柱。擬作皇家霖雨。淮海藩維一老臣。兵符三授荷君恩。指揮軍事回天地。訓練強兵動鬼神。

祖述自鎮守雍丘已來。且喜士卒調和。華夷宣化。後趙鎮戍相繼率部曲來降。第恨大讎未報。中原未復。難共戴天。前者劉太尉舉薦妹夫溫嶠。朝廷下詔徵爲司馬。聞此子文武備足。有牧民禦衆之才。劉越石真能達衆舉親。溫太真可謂不負所舉矣。俺如今要收河北。已遣越石先行。只等司馬來到。拔寨起程。兵校溫爺怎生不見來到。伺候着。〔丑末〕嗜。〔生上〕

〔番卜算〕擁衆挾彤弓。戮力驅胡虜。腰橫長劍氣冲霄。期雪永嘉恥。溫嶠蒙聖恩

除授總兵司馬。督府參軍。這里正是元帥帳下。兵校每通報着。〔相見介外〕劉越石數言足下智勇才略。超今邁古。今幸得拜下風。請教行師之道何如。〔生〕告元帥。行師之道。以節制仁義爲先。攻擊

不足以當節制。節制不足以當仁義。務要先明分數。使兵識將意。將識士情。有不戰。戰必勝矣。〔外〕請教臨陣之法何如。〔生〕兵以能知虛實。識地形爲上。先處戰地而待敵者逸。後處戰地而趨戰者勞。故善戰者。逸能勞之。安能動之。出其所不趨。趨其所不意。攻其所不守。守其所不攻。臨陣之法。無過於此。〔外〕高論高論。俺雍丘南有劉曜。北有石勒。二虜聲勢甚振。將何計以破之。〔生〕劉曜石勒。外雖相親。內實相妬。元帥要除此二豎。須先遣辯士說使乖離。俾自爲攻戰。元帥徐興問罪之師。塞住喉咽。絕其糧運。以收漁人之功。此所謂用夷攻夷之術也。〔外〕足下妙算。正合吾意。就此拔寨渡江便了。〔外〕

〔四邊靜〕〔渡介〕司馬。只因先皇不聽禦戎之論。故有今日。羌氏種落居京城。冠裳累胡族。狼虎入庭除。神州遂沈陸。〔合〕皇庭失鹿。華夷競逐。我和你報主盡忠丹。捐軀誓恢復。〔生〕想我朝之禍呵。內庭蹀血相魚肉。外夷肆狼毒。元帥經略藉雄才。中興可先卜。〔合前外〕金符分闡承推轂。孤臣志彌篤。溫司馬。祖遜今日擊楫爲誓。若不清

〔中〕中原而復濟者。有如此江。與你擊楫渡中流。誓收舊疆服。〔合〕調和玉燭。維持鈞

軸若不復中原。空教竊君祿。〔丑末〕旌帆千里揮艦舳。操戈舞雙纛。奮勇敢爭先。兵機貴神速。〔合前〕告老爺。風順帆速。舟行如飛。瞬息之間。已抵北岸。〔外〕迅利如此。助若有

神。足見佳兆矣。〔生〕軍士暫且上岸屯營。明日議圖進取。〔外〕江陽空闊。謹防斥堠。〔丑末〕領鈞旨。

〔福馬郎〕大帥桓桓嚴部曲。背水屯營。沿江設伏。怎禁得霜征并露宿。〔合〕你看狐兔遍陵谷。桑田滄海盡翻覆。〔丑〕策馬彎弓持利鏃。泣血裏瘡曾無懼。幸喜中原今有頗牧。〔合前外〕已遣劉越石取淮北。今司馬進兵淮西。二將夾攻。以逼中原。

〔外〕決勝今朝共運籌。

〔生〕安危須仗兩分憂。

〔丑〕分明會得將軍意。

〔末〕不斬樓蘭誓不休。

第二十齣 郭璞仙術

〔末扮郭璞上〕羅浮道士誰同流。草衣木食輕王侯。世間甲子管不得。壺裏乾坤只自由。郭璞表字景純。河東安喜人也。幼習經文。書窮堯典舜典。長通卜筮。學究先天後天。參透聖域賢關。洞達天根月窟。師郭公而得青囊。真個五行藏智府。慕長房以諳縮地。果然千里在目前。一粒粟中藏着三千

世界半瓢水裏包涵萬里山河。推禍福。定吉凶。因此識彼。決興亡。測窮達。卽始見終。鬼谷孫臏何足算也。君平左慈吾豈讓焉。賣卜至長安。莫解吾曹祕術。觀光來上國。誰知瓢裏仙丹。正是三醉岳陽人。不識朗吟飛過洞庭湖。徒弟趙戴過來。〔丑〕師父有何分付。〔末〕徒弟。我昨仰觀天文。俯察地理。見七馬負圖。中土合遭板蕩。一龍跨海。江東定見中興。將星芒赤。主大將有災。天鼠鬣明。必強臣內叛。今祖士雅握兵在外。王處重專權於內。天之所兆。其在此二人矣。又知溫太真。明日興兵渡淮。牛渚磯中水族多怪。恐有覆舟之患。我和你齊帶通天犀角。往軍前教他燃照。水族自然畏避。舟楫無虞矣。〔丑〕既如此。就請啟行。〔末〕

〔沽美酒〕我御雲軒下碧虛。採嵩山九節蒲。袖拂青氍。駕羽鳧。朝北海。暮蒼梧。入洞府。畫江爲路。跨玄鶴。籠霄捲霧。設香餌。銅盤釣鱸。開寶鼎。丹爐燒兔。火出龍水中。生虎。〔合〕嘯蓬萊。日月長。滄海任教枯。我的容顏長長如故。〔丑〕俺昨日乘風出九達。又飛身渡五湖。縮地潛形入藥壺。歌白鹿。握丹符。掣金蛇。羣魑奔怖。九龍瓢。甘雨時需。五色石。蒼天可補。看世人殘疾鬼軀。怎學得俺長生衡宇。

〔合前〕

青山雲永裏。

此地是吾家。

一瓢藏宇宙。

三尺斬妖邪。

第二十一齣 燃犀

〔淨丑扮水怪上舞介末扮魚頭使者上〕衆水怪聽吾號令。自家奉水母娘娘嚴命。今後如有過河者。俱要豬羊祭賽。若不祭賽。風浪覆舟。不許有違。〔同下生上〕

〔陽關引〕文命拜中郎。溫省分符節。長驅虎隊出江淮。探狼穴。〔淨丑〕虜竈滿

荒郊。烽火連三月。是何時哀笳聲斷邊塵滅。〔生〕嗚嗚塞笛起征鴻。獵獵旌旗颭曉風。千

里烽烟愁焰黑。兩淮血戰杵漂紅。心悲鼓角丹心壯。影動龍蛇劍氣雄。擬向圍場盡狐兔。元臣重建

貳師功。下官昨承祖元帥嚴命。教我分兵去取淮西。來到此間。就是牛渚磯了。叫兵校驪船等待。就

要過淮。〔丑淨〕告將軍。鱗鱗巨艦。俱已齊備。就請登舟。〔生〕既如此。可傳各哨練兵官部領軍馬上

舟。〔淨丑〕領鈞旨。〔末扮郭璞上〕騰空出蓬島。縮地到江淮。郭璞今日爲溫司馬欲渡牛渚磯。特來

燃犀助他。免致傾覆。這里已是軍前。不免進去相見。〔生〕道者何來。高姓大名。〔末〕河東郭璞。就是小生。〔生〕久仰芳名。未獲荆識。今蒙屈駕下顧。必有良謀見示。〔末〕郭璞從游赤松。久謝塵事。見將軍忠誠體國。特來輔導。此間水族多怪。舟行不穩。帶通天犀角。與將軍燃照水底。可使蛟蜃潛形。風平浪息。舟楫無虞。〔生〕此間果有怪物麼。〔末〕怪物委的是有。將軍如或不信。待小生點起犀角。照與你看。〔燃犀介諸怪上舞介衆〕呀。只見奇形異狀。鬼蜮神妖。赤羽緋袍。素車白馬。往來奔竄於水涯。好怕人。若沒有這位真人救護。險些兒被他害了。〔生〕你也說得是。郭先生。如今船可行了。〔末〕且慢着。待小生書一符投入水中。壓他。待諸怪潛蹤滅跡。方可行舟。〔書符投介衆〕呀。好怪好怪。方纔這些妖魔。見真人這靈符。怎生就不見。〔生〕水怪既平。放舟前去。

〔朝元歌〕揚帆海隅。破浪過牛渚。身似憑虛。漂泊隨波遡。你看隊隊旌旄。層層樓櫓。我待把神州撐住。驅石中流。迎還二龍歸鼎湖。跨海淨狼胥。凌波拯溺輿。
〔合〕三軍飛渡。齊要去奮威耀武。〔淨〕幾載臨戎禦侮。驍雄赳赳武夫。鳴劍志伊吾。鬻雪餐風。沈舟破釜。敢辭金革苦。死馘生俘。長鯨短狐。皆剪屠。塞北望來

蘇諸番空穴居。〔合前丑〕挾取長戈勁弩。憑河捋虎鬚。踴躍志餐胡。旂炫蛟龍闕。如虓虎。須效着鷹揚尙父。千里旌旗。長江一望皆舳艫。你看風順帆輕。溯流西下。好

迅利也呵。看蘭槩似輕鳧。濤平如坦途。〔合前末〕辟穀餐霞吸露。生涯一鉢孟。羽

化住蓬壺。辭卻蟬纓。棲身豹霧。我特御風軒翥。超海燃犀。湖蛟海蠃擲劍誅。

〔生〕先生如今何往。〔末〕我拂袖返天衢。清風吹步虛。〔速下遺簡帖介生〕呀。郭先生怎

麼忽然不見了。〔淨丑〕郭真人騰雲去了。遺下簡帖在此。〔生看介〕元來是西江月一首。此乃仙人

指點之意。〔讀介〕〔西江月〕二帥功聯南服。三夷鋒挫北陲。五原一夜墜南箕。兵甲蕭牆復起。落

幘王臣效義。俘囚烈婦堪悲。樂昌寄遠復完歸。南北旋車重會。細觀此詞。前二句說二帥功聯。三夷

鋒挫者。此必我與越石舅同破張寶石生石虎之驗也。後句不可盡曉。將來必應。留此以爲他日之

驗。軍校。船到岸了未。〔衆〕告老爺。船已傍岸了。〔生〕分付管兵官上岸安營。明日交戰。〔衆〕領鈞旨。

〔生〕牛渚淨妖魔。

〔淨〕清淮異汨羅。

〔丑〕斜陽幸無事。

〔合〕沽酒聽漁歌。

第二十二齣 閨思

〔破齊陣〕〔旦上〕帳冷芙蓉紅減。被寒翡翠青殘。膏沐慵添。鬢雲撩亂。鏡中羞對孤鸞。夫婿天涯音信斷。母氏高堂素顏。苦憂愁有萬千。惻惻綠鬢婦。淒淒守深閨。晝永愁成緒。夜闌心欲灰。憶昔我夫子。下以玉鏡臺。魚水遂歡合。琴瑟相和諧。一旦東征去。玉匣蒙塵埃。顰眉未翦柳。瘦臉慵妝梅。繡戶網蛛絲。洞房生莓苔。兵戈苦擾攘。衡陽無雁來。思君不可見。一日腸九迴。妾欲登崔嵬。我馬咸虺隤。妾欲撥絲桐。離鸞聲悲哀。臨風長太息。覽鏡重徘徊。萱草可忘憂。奈此遲暮催。努力盡婦道。展我藜藿懷。願言太階平。懷抱同君開。奴家嫁與太真。纒方五月。指望與他同事營親。承歡膝下。奈朝廷恩命。辟爲總兵司馬。差往邊方。別時以玉鏡貽我云。願如此鏡。就得團圓。到今數月。並無音信回來。又兼婆婆朝夕掛念。奴家只得自寬自慰。吞聲勸免。正是天長地久有時盡。此恨綿綿無絕期。〔詩〕親操井臼事溫郎。菽水甘心奉北堂。一旦中原烽火急。乘旄擁衆去勤王。

〔四朝元〕勤王應詔。匆匆離故園。見驪駒在道。骨肉分散。執手空留戀。嘆征車

莫挽征車莫挽。那更赤幟高懸。白刃紛然錦纜雲帆。彩鷁如飛箭。那時節呵。教奴怎不肝腸斷。嗟。歲月易推遷。倏爾經年。又是秋之半。蟾宮幾缺圓。良人去不返。天涯海角思念念。空瞻淮漢。（詩）曉妝羞澀怕臨鸞。多病多愁損舊顏。十二碧峯何處所。

傷情無語自凭闌。

凭闌慨嘆無心理鬢鬟。看金鈿花褪。玉鏡塵滿。重門長自掩。

盼薄情人遠。薄情人遠。閃得奴枕冷衾寒。影隻形單。消瘦腰肢。清減芙蓉面。寥寂難消遣。嗟。雲雨兩情慳。只落得減翠銷紅。淚溼青衫遍。君身名利牽。妾心鍾幽怨。苦夫南婦北。朝朝暮暮。空尋魚雁。（詩）別時容易見時難。烟火相違萬里間。一度相思

一惆悵。愁看紅日薄西山。西山日晚慈闈當暮年。奴只得執炊中饋。采藻南澗。勞

瘁曾何憚。願蒼天保佑。蒼天保佑。保佑我姑嫜。鶴算童顏。松柏南山。榆景身康健。庶免奴就憂患。嗟。我這裏意惓惓。夫。只怕你委質於人。怎遂得返哺慈烏願。征夫未解鞍。羈旅身淹宦。雕欄悶倚。淒淒感感。羞看歸燕。（詩）梧桐葉落雁來初。迢

遞無從寄遠衣。遙望戍樓天欲暮。滿城鞞鼓白雲飛。

雲飛楚陝。思君望眼穿。只愁著世

危時亂黎民塗炭。夫。你致力爲藩翰。願三軍奮勇。三軍奮勇。竭節輸忠。敢果爭先。掃淨妖氛。四塞旌旗偃。獻捷黃金殿。嗟。躬捧紫泥頒。剖玉分茅。子貴親榮顯。夫。你忠孝兩週全。恩寵光里閤。夫妻子母。懃懃懇懇。共同歡宴。

〔餘文〕乾坤觸處兵戈滿。藁砧此去幾時還。襟袖啼痕千萬點。

河橋日夜望歸舟。

腸斷秋江欲盡頭。

萬里交河音信斷。

悔教夫婿覓封侯。

第二十三齣 石勒報敗

〔北新水令〕〔淨扮石勒上〕金城萬里笑談塵。屈羣雄威加海內。氏羌咸俯首。典

午復凌夷。奄有寰宇。跨雲龍自稱帝。虎踞中原氣勢雄。關南冀北屬堯封。待看收拾荆揚地。

天下車書遂大同。寡人自稱帝號已來。將勇兵強。華夷懾服。左挈右提。東征西伐。執劉曜於關中。殪

巴氏於湖北。奄有八表。底定四方。惟江南一隅。獨阻聲教。已遣張賓石生興兵渡淮。指日擊斬劉琨

溫嶠。生擒祖逖王敦。徑至石頭城。降了司馬睿。復使青衣行酒。執戟前驅。豈不爲快。昨遣細作。打聽

消息未見回報。如今軍中無以爲樂。況值秋飈。悶懷悒鬱。且召二姬宴飲帳下。聽候捷音。有何不可。正是折衝千里外。談笑一樽中。宣二姬出來。(旦老旦上)

〔前腔〕綺窗斜倚鬢雲欹。對秋空萬般情緒鬱陶傷。漏永憔悴怯歌吹。忽聽綸音。整宮妝趨宸陛。我王萬歲。(淨)二姬免禮。浮光真一瞬。灑氣忽侵顏。混一是何年。吾心尙歉然。

〔旦老旦〕陛下。宇內已澄清。何苦復窮兵。黃花不常好。且把金樽倒。(遞酒介淨)

〔石榴花〕風雲際會建極號稱皇。包六合併遐方。江南餘孽勢猶猖。阻聲教達我王章。兵臨晉疆。縱長江天塹難爲障。管教他脚壁歸降。遍南服接踵梯航。(旦

老旦)吾皇勳業格龍荒。居中土制皇綱。四方風動配陶唐。又何必躡武遐邦。須當揣量。勸我王早返征南鞅。再休勞肝食宵衣。你且向花前擲舞傳觴。(末扮

探子上)健兒關外探軍機。千里程途一日馳。汗馬不辭邊塞遠。轅門急報我王知。告大王。張謀主已被劉琨殺敗了。(淨)怎見得兵敗。喘息定。慢慢說來。(末)

〔北得勝令〕雲黯黯烟塵蔽日昏。鬧嚷嚷狐兔亂啼奔。密層層草木皆圖陣。溢

漫漫膏血沿淮浸。猛闖闖的劉琨。忽律律被他殺敗謀臣。急忙忙止不住星奔夜遁。〔淨〕探子你休得張皇。石將軍有萬夫不當之勇。必然併兵往敵。何懼之有。探子。你再去打聽

來。〔末〕領鈞旨。幾番承詔命。往復向邊郵。〔下旦老旦〕伏陛下。軍情務重。所當留心。且請停盃罷。

〔淨〕邊城小警。何足介懷。你可再整羊羔。重飄舞袖。劇飲一番。

〔泣顏回〕秋色已蒼蒼。忽驚看青鬢摧霜。心懷悒快。嘆威聲尙阻荆揚。論我兵力最強。投鞭可斷長江浪。須知叢爾江南地。應教反掌淪亡。〔旦老旦〕霓裳舞袖對三郎。恩承蝶幸身御椒房。歡歌燕賞。對芳辰謾自淒惶。看韶華靡常。這浮光倏忽堪惆悵。勸吾皇須惜餘陰。且優游莫爲人忙。〔丑扮探卒上〕勇將無謀大敗還。缺

戕破斧棄淮南。降兵十萬夜流血。辜負君王望凱旋。報我皇。石將軍已被溫嶠殺敗。棄河北走了。〔淨〕怎見得兵敗。喘息定。慢慢說來。〔丑〕

〔北鴛鴦煞〕猛將軍誤陷傷門陣。烏合衆紛紛蹈白刃。萬乘元戎皆成煨燼。棄了神州。失守了江淮大郡。若大軍威當不過彈丸遺晉。大王須索要再整牙旗。

重興甲冑。蕩平了江南諸鎮。〔淨〕探子急去報與石將軍。教他暫且回兵。待蓄養兵力。再圖進

取。〔丑〕喏。一函玉勅。君恩重。萬里星馳。使職勞。〔丑下淨〕二姬。猛將謀臣。相繼敗沒。如之奈何。〔旦

老旦〕

兵家勝負。自古無常。只宜養晦待時便了。〔淨〕正是正是。吾已醉矣。扶入寢宮去罷。

〔北胡蘆尾〕萬人敵。反遭了烏江刎。三尺劍。今向豐城困。怎能殺收復潰陷山河。重建了乾旋大運。

〔淨〕帝王歷數未歸吾。

猛士無功謀士疎。

〔二旦〕利鈍莫將榮念慮。

須知一忍是良圖。

第二十四齣 寄家書

〔喜遷鶯〕〔外扮劉琨上〕頻年征討。喜巨猾潛蹤。稍清江表。〔生上〕晦日重開。清平

有調。四野歡聲載道。〔合〕露布馳聞。金闕絲綸。將下層霄。褒崇處。羨纍纍金印。

煌煌丹詔。〔生〕兩河罷戰。萬方清。原上軍回。識舊營。〔外〕立馬望雲。秋塞靜。射雕臨水。晚天晴。〔生〕

尊舅。濕嶠荷蒙福庇。得佐下風。今日略有微功可錄。庶不辜尊舅舉薦之意。〔外〕妹丈。劉琨久在邊

庭有失親炙。今幸二帥並捷。天假相逢。可喜可賀。昨日石勒部下張賓石虎被吾二人連戰殺敗。奔往北方去了。如今且喜軍聲稍震。江淮肅清。論功班爵。妹丈當居其最。(生)此乃祖元帥籌握之功。尊舅分麾之力。於下官何有。如今羌胡既敗。肝膽已喪。須乘勝逐北。擣其巢穴。譬如破竹。數節之後。迎刃而解。殲厥渠魁。迎還二聖。在此一舉。不可失也。(外)妹丈之言。固爲有理。但窮寇莫追。歸師勿掩。況我數戰兵疲。未可輕動。宜且解甲休兵。徐圖後舉。(生)尊舅說得是。

(惜奴嬌)衛國勤勞。藉羣帥雄才武略。剪卻天驕。喜太平有象。頃刻間大明重照。皇風已播。胡塵掃。杳沒個豺狼分擾。(合)念我曹須要報國精忠。克全臣道。(外)英豪志氣凌霄。欲待要柱石皇朝。藩維帝里。齊名周召。我二人呵。若不把傾頽晉社。還重造。空負卻經邦才調。(合前生)尊舅自別家鄉。杳無音信。未知萱親岳母

和妻室安否何如。(外)妹丈。此情此意。你我皆然。但天各一方。心懸兩地。奈何奈何。(生)迢迢水遠。山遙盼。鄉國白雲天。杳昊天罔極。念慈恃劬勞難報。只怕荆妻年少。甘旨未能供調。(合)念我曹還待要報答春暉。克全子道。(外)遼遼目斷魂銷。念母氏餘

齡衰老。慈幃夢遠。怎做得克諧以孝。烽烟隔絕魚鴻渺。誰爲我傳音耗。〔生〕尊舅王師雖得勝。中原未復。一時怎得回家。如今各修書一封。差人馳駟送去。以慰家中懸懸之望。〔外〕妹丈說得是。〔寫書介生〕書已寫完。左右。卽時叫鋪兵遞去。不許稽遲違限。〔末〕領鈞旨。正是征人邊戍久。鄉信到家遲。〔下淨扮報人上〕將星沈渭水。凶問報轅門。小人乃祖元帥帳下旗牌。元帥破敵成功。未及受賞。先已薨逝。特將訃音報與二位將軍知道。這裏正是營前。不免進入去咱。〔見介〕告將軍。祖元帥昨日午時病故了。〔生外驚介〕天那。天不欲使國家恢復中原。何奪吾士雅之速耶。〔悲介外〕

〔江兒水〕聽伊語。教我淚雨飄。哲人萎棄真堪悼。元帥。你勳庸未克遂分茅。遽然跨鶴歸華表。妹丈。我和你聊束生芻攀弔。〔合〕淚灑西風。遙對着忠魂奠告。〔生〕元帥。想你那日渡江。中流擊楫之時呵。他的丹心壯志氣豪。英雄奮擊中流棹。元帥。豈知勳績歸遺草。霎時間天柱峯摧倒。元帥死了不打緊。只恐人之云亡。邦國殄瘁。晉室興亡。渾難料。〔合前〕

百戰沙場不顧身。

關河千里絕腥塵。

方驅胡虜燕雲外。

又見星流渭水濱。

第二十五齣 得書

〔霜天曉角〕〔旦上〕西風荐爽。瀟氣侵羅幌。辜負姮娥獨宿。寥寥此夜偏長。咫尺江山分楚越。故人千里傷離別。寂寞孤燈魂欲消。寸寸愁腸千縷結。兩處相思一樣愁。滿腔離恨壓蘭舟。高堂慈母倚闌望。游子天涯尙滯留。相見誠難別何易。等閒忽把韶光逝。人生會少別時多。幾許愁腸遠莫寄。妾自兒夫去後。勤勞中饋。供調甘旨。萱室姑嫜。子情兩盡。昏而定晨。而省。豈敢憚煩。冬則溫。夏則清。終無懈怠。正是難將寸草心。報答三春暉。奴家雞鳴卽起。盥漱問寢已畢。又當侍膳。如今天氣尙早。且少坐一回。

〔香遍滿〕嘆白頭二母皆當暮齡。晝夜縈牽夢想。每日雞鳴問寢高堂。豈敢憚勞苦。豈敢暫疎曠。怎學得慈烏反哺。報答我母氏姑嫜。丈夫。你爲王事多鞅掌。高堂有母不遑將。我須當代你服勞奉養。每日躬調滋味。侍膳奉霞觴。到不

如荆釵裙布。同歡樂守糟糠。日已向辰。不免鋪設酒餚。請二親早膳。二親有請。〔老旦上〕

〔二剪梅〕游子何時歸故鄉。地隔參商。絃絕宮商。〔老旦〕征人千里向河梁。時

近重陽。目斷衡陽。〔老旦〕媳婦。婢妾滿前。傭奴環列。何苦自執炊爨。親調飲食。雞鳴而起。夜分不

寐。辛勤奉侍。我二人受之何安也。〔貼〕孩兒。你生長榮華。那知烹飪。一旦有家。便能周悉。賢哉賢哉。

我與婆婆時常敬汝之孝。又且惜汝之勞。〔旦〕中饋乃婦人之職。若不親任。誠敬何伸。願二親年老。

只願常爲調膳。乃所甘心。何勞之憚。母親婆婆請膳。〔老旦〕親母。我和你只爲圖着孩兒三牲五鼎。

心中增了許多離緒。到不如田舍翁終身樂業。白頭相守之爲愈也。〔貼〕親母說得是。〔做喫膳介〕

老旦

〔羅帳裏坐〕孩兒。自從玉關去後。撫時感傷。雖有膏粱味。無心宴饗。孩兒。只因你

忘了遺羹。承親母推食的厚賜。〔合〕這恩義總難忘。媳婦。你這般賢慧呵。你的孝行

真堪旌獎。〔貼〕親母。我和你形衰力倦。青鬢染霜。縱有八珍饌。恐難長受生前養。

孝順的兒呵。看你辛勤供菽水。誠敬奉蒸嘗。只願我的劉琨和賢婿二人呵。〔合〕願他

此去調羹廟廊。莫做了伴食的宰相。〔旦〕憶同花前宴賞。玉粒桂漿。到如今盃盤冷落。饗殮久曠。丈夫。你休把我炊屨烹伏雌的恩忘。〔合〕丈夫。你便有食前方丈。須索記舉案齊眉的孟光。〔老旦〕飲膳已畢。且把盃盤收拾過去。取金錢來卜遠人消息。〔卜介〕

〔劉潑帽〕神著祕訣誠無妄。吉凶休咎託青囊。好卦好卦。看此卦真絕唱。〔合〕中正遇乾剛。是龍德方亨之象。〔貼〕我也卜一卦。〔卜介〕好卦好卦。大川利涉宜攸往。大

人利見遇非常。此卦雖好。只恐國家任重。二郎一時不得返家鄉。當重任爲保障。〔合前旦〕奴家也卜一卦。〔卜介〕看此卦呵。五行四兆看無恙。二爻內騰蛇纏足。哥哥與丈夫只恐皆

被滯留邊塞。諒他的進退好似觸藩羝羊。第三爻文書發動。想必就有信息回來。寄萍

跡衡陽雁行。〔合前末扮駙使遞書上〕淮海寄雙魚。星軺日夜趨。善傳天外信。慣達世間書。小人

乃中原駙鋪兵。傳遞家書到劉太尉府中去。這里正是不免進入去。〔見介〕告稟二位太老夫人。劉太尉温司馬二位老爺有書。〔貼老旦〕拿上來。〔梅香接介丑〕差人不知温相公教上覆我麼。有甚

麼人事寄來送我麼。〔末〕這個沒有。〔貼老旦〕謝天地。果有信息回來。可徵卜著之驗。〔貼〕梅香。此乃家報。不比公文。來人當以酒飯相待。〔末〕感謝太老夫人。正是相思千萬里。一字值千金。〔下老貼〕媳婦把家書拆封。讀與我二人聽。〔旦〕這封是丈夫的。〔讀介〕

〔小桃紅〕溫嶠百拜。岳母萱堂。只爲勞王事。遠離故鄉。母子和夫婦。兩地久參商。遠定省絕溫清。把斑斕疎曠也。凝望孤雲欲斷腸。料二母偕妻室。各保安康。封寄陽關啼數行。這封是哥哥的。〔又讀介〕劉琨頓首。書附衡湘。蝸角虛名累天各一方。不能似曾參。終奉養。只落得瞻望陟高岡。喜塞塵雖稍寧。問歸期猶羈鞅也。未審何時脫鎖韁。料慈恃賢賢妹。福履勝常。晝夜思親淚兩行。〔貼〕且喜吾兒若兒。功名皆已成就。不枉母氏教育之恩。今日有書回來。正古人所謂千里如面談。我三人懸懸之望。此可少慰矣。

〔餘文〕萍蹤游子滯遐方。目斷天涯重慘傷。爲見佳音喜欲狂。

〔貼〕萬里交河彤影疎。

〔老旦〕母思游子婦思夫。

〔旦〕金錢卜得平安信。

〔合〕果見鴻傳尺素書。

第二十六齣 王敦反

〔菊花新〕〔淨扮王敦上〕朝廷昏眊縱姦謀。淹棄吾曹如寇讎。積忿起戈矛。要使清流作濁流。羣小專權擯上卿。妨賢病國忿難平。一朝興起晉陽甲。指日還將君側清。王敦世受

晉恩。本不當怨望。但近日主上昏瞶。奸雄竊柄。狗尾續貂。忠良擯斥。不勝一時之忿。舉兵武昌。據石頭以脅制君父。加九錫而妄自尊崇。僭竊如此。無復爲盛德事矣。罷罷。男子不能流芳百世。亦當遺臭萬年。昨已上書罪狀。劉隗刁協。若朝廷自能覺悟。二首朝懸。諸軍夕退。倘執迷如初。吾將稱兵向闕。放太甲。誅四凶。居攝禪祚。任自爲之。軍校請錢軍師出來議事。〔末扮錢鳳上〕

〔前腔〕圖王霸業藉謀猷。晉國江山撚指收。談笑覓封侯。管葛良平是我儔。自家錢鳳是也。蒙主公寵任。言聽計從。戰勝攻取。若論我主威德。宜稱王號。自家累表勸進。再三謙讓不從。如今定要強他受禪便了。〔見介淨〕錢世儀。外事如何。〔末〕伏主公。劉隗刁協兵敗逃亡。晉帝遣百官詣門待罪。主公何不趁此機會。誅其君而弔其民。纂成大統。開基應天。時不可失也。〔淨〕軍

師。自古百足之蟲。至死不僵。今天子雖弱。羽翼尚多。且宜待時而動。不可造次。〔外扮周顛上小外扮戴淵上〕

〔前腔〕無端賊子起邪謀。烈士攢眉把國憂。奮志欲安劉。一劍何能驅沐猴。

〔小外〕下官司寇戴淵是也。〔外〕下官司空周顛是也。吾二人奉旨去見王處仲。此行當以逆順諭之。使知反正。萬一不從。有死而已。可於苟且求活耶。〔小外〕周大人。此賊久懷異志。特畏祖士雅耳。今士雅已亡。彼無所憚。恐非口舌所能濟也。〔外〕軍士通報。〔丑〕老爺。百官在門外。〔淨〕軍師。你且入幕迴避。〔末〕忝與腹心任。堪爲入幕賓。〔下見介外小外長揖介淨〕司空司寇。錢世儀勸我卽位。你二人怎麼說。〔外〕呀。都督差矣。公家世受國恩。盡忠累代。要當世濟其美。克全大節。豈可信賊臣錢鳳之言。突起邪謀。自取族滅。〔淨〕二位。天下乃天下人之天下。非司馬氏一人之天下。昔舜禹受禪。湯武應天。於我有何不可。〔小外〕都督。昔文王三分天下有其二。以服事殷。今都督德非文王。主上又無獨夫之暴。豈可妄爲。事宜三思。〔淨〕庸才不識大體。反把言語來挺撞我。以我今日之勢。興一旅之師。直至晉室。執子嬰於咸陽。殪商辛於牧野。誰能當我。你二人快去製黃袍。作禪詔。庶可轉

禍爲福。〔外〕都督息怒。你且歷數自古篡弑之人。能保首領者有幾。足下平日頗知書史。漫不知警何也。你今日若聽我言。回兵武昌。復修臣節。則晉氏君臣蒙福。足下身家亦安。如或不然。吾二人不過一死。何禍之足懼。但惜足下以垂白之年。懸首白旗。忘奕世之忠。反爲悖逆之鬼耳。〔淨〕胡說。你二人若不上表稱臣。降階舞蹈。就綁到教場去砍了。〔外〕反賊。我恨不斬汝萬段。豈肯從汝反耶。何不速殺我。〔淨怒介〕綁起來。〔卒按使跪外小外〕要殺便殺。何以怒爲。我國之三公。豈可屈膝。〔淨怒唱介〕

〔八聲甘州〕狂言犯上。對我前。輒敢面折強抗。當車奮勇。好一似怒臂螳螂。你逞着如簧辨口。相譏誚。到做舌劍唇鎗。受禍殃。〔合〕憐憫。管教你族滅身亡。〔外〕強臣肆陸梁。忠良士豈肯附逆阿黨。〔淨〕不附我。就把你凌遲碎剮哩。〔外小外同伸頸介〕反賊。任伊寸斬。難教我毀裂冠裳。人生自古誰無死。只要死得其所。吾復何恨。生前仗節全忠義。死後千年姓字香。〔小外悲介外〕大丈夫當慷慨赴義。何用悲爲。〔合〕休悵。舍生取義便死何妨。〔小外〕逆賊。何須較短長。論人生須要扶植綱常。丈夫在世磊

落落氣宇軒昂。逆賊。你休猜做萍梗隨波浪。我是松柏堅真傲雪霜。〔淨〕你死休

要悔。〔小外合〕忠讜。亡身殉國萬死甘當。〔丑末〕書生不自量。對吾主直恁妄誕

猖狂。非吾窘辱。也是你自冒鋒芒。你死何益於世。縱粉身碎骨曾何益。溝瀆沈淪

枉喪亡。〔合〕追想要生全。除是俛首歸降。〔外小外〕逆賊。你雖蘇張更生。不能挽我金石

之志。只求速死。〔淨〕既然不降。綁去砍了罷。〔押介外小外〕丹心懸日月。身命等鴻毛。〔殺下生扮

王導上〕軍士報王司徒請留人。〔卒〕稟司徒。遲了。二位老爺俱已死了。〔生〕罷了罷了。處仲處

仲。我就見你滅門絕戶。〔哭介〕我雖不殺伯仁。伯仁由我而死。冥冥之中。負此良友。〔哭下末扮郭

璞上〕身乘黃鶴歸天上。塵拂清風來世間。都督留人。〔淨〕二賊皆已斬了。〔末悲介〕善人國之至

寶。況天子三公。豈可擅殺。王處仲。你舉動如此。豈能令終。〔淨〕郭景純你休閒說。我視二賊猶狐雛

腐鼠。殺之何害。久聞景純高於易學。試卜吾繼續大運何如。〔末卜介〕卦爻凶險。謀逆難成。〔淨怒

背云〕此人又來求死。事出反掌。何謂難成。我曉得這是晉帝使他來說我。不免再試他看。郭璞。吾

壽幾何。〔末〕明公舉事。禍必不久。若還武昌。壽不可測。〔淨怒介〕此人言語不祥。拏去砍了。〔丑綁

介未脫衣走介丑〕稟爺郭先生不見了。脫下衣服在此〔丑〕快閉了大門。追尋出來。〔丑尋介末旋轉走介丑〕稟爺郭先生法大。能會飛天縮地。怎麼拿得他來。〔淨〕胡說。一人拏不住。怎麼奪天下。定要拏來。〔丑拏介末鑽入瓶介丑〕稟爺鑽入瓶裏去了。〔淨〕胡說。瓶有多大。鑽得進去。分明是你容情賣放。若不拿來。斬你示衆。〔丑伸手入瓶拿介咬住手介丑高叫介淨〕連瓶擊碎。且看走那里去。〔丑擊碎瓶介碎瓶片片罵反賊介丑〕郭真人。再不敢拿你了。不要罵。〔淨〕郭先生。你仙術真高。我特試先生耳。豈敢殺你。請出來與我相見罷。〔末空中應介〕逆賊。你枉殺忠良。欺君罔上。豈能久在人世。我去了。兩袖清風蓬島近。一聲長嘯海天悠。〔丑〕稟爺。郭真人騰雲去了。〔淨〕此事可爲怪誕。我一時無見識。要殺他。殺又殺不得。又被他侮慢一場。若論他善卜我事難成。自古道人情賢於夢卜。又道事在不疑。卜之何益。今日之勢。但以人事決之可也。妖術何足信哉。兵校。昨已宣詔去召溫司馬至帳下聽用。不知到否。你去打聽着。〔丑〕領鈞旨。

圖王雄據石頭城。

屠戮朝臣任縱橫。

妖術誣民何足信。

管教晉社一時傾。

第二十七齣 召太真

〔謁金門〕〔生上〕心耿耿。愁見鋒生內屏。一扎天書傳外境。祇恐稱僞命。〔小外扮劉琨上〕管籥欽承臺省。分闔親操斧柄。逆豎無端窺晉鼎。廟謨須預定。〔生〕黃雲初斷塞塵空。淮漢澄清貢賦通。奮志正期收漢北。忽驚天闕起烟烽。〔小外〕秋風凜凜軍威肅。紫電騰騰劍氣雄。劇虜驍夷皆授首。狂夫犯順敢撓鋒。〔生〕吾二人翦荆拓地。奏績天朝。尊舅榮擢帥府。下官超遷樞密。正欲蕩平北虜。酬報君恩。不意王敦逆命。逼辱帝后。屠戮大臣。卽今有旨召下官回朝。俺想近時天子政令。非由己出。此必逆敦恐我二人併力攻他。故矯此詔。以分其勢。如今尊舅留此經略。下官奔回。以清內難。〔小外〕妹丈。此賊久蓄異謀。知其必有今日。妹丈旣承詔命。不得不行。此去須當委曲濟難。務期綏安宗社。邊隅重任。下官自當竭力應承。〔生〕當今豪傑。惟舅與嶠。二人同心。何憂外侮。今內事嶠請獨任。外事託在尊舅。必要協力同心。共舒國憤。

〔紅衲襖〕當日裏擁貔貅長驅出帝京。今日裏靖狼烟把山河重再整。正待要空漠南還二聖。會明良頌太平。誰知道野糜鹿游陸廷。社鼠城狐棲內省。尊舅。

我和你只恐九仞功成一日傾。〔小外〕我也曾叩明廷泣請纓。我也曾握金符分閫命。欲待要把單于來繫頸。欲待要奏奇勳勒鼎銘。忽驚那股肱臣竊楚柄。向潢池弄甲兵。逆賊你背卻當年歃血盟。〔生〕怎能殼跨天潢翦巨鯨。怎能殼斬荆棘清蹕警。怎做得幃幄謨謀能決勝。攬轡登車天下平。此時朝廷武備衰弱。社稷

危如累卵。我盼皇朝中心如咽哽。嘆國家存亡渾未定。我須卷甲兼行援帝城。

〔小外〕我昔日聽荒雞終夜驚。我昔日宴新亭傷異景。到如今總元戎居藩屏。到如今破幽燕近乘勝。〔哭介〕祖士雅若在。豈使狂賊致此。也只爲五丈原墜將星。致此孛天狼當舍明。遙望楓宸涕雨零。〔丑末〕舟楫儀從皆已完備。請老爺登程。〔生〕就

此拜別。

〔東甌令〕我赴君難傳羽檄。絕塞孤臣憂社稷。我國家凋弊之餘。復值此亂呵。眼看朝市成陵谷。興廢信難測。王司徒帶袖手傍觀。可笑可笑。廟廊無計羞肉食。束手漫無策。〔小外〕妹丈。你承君命遠馳驅。千里灑池須奮翼。此時國勢危疑。天子孤立於上。圍

城天子悲孤注。須勇往去援溺。妹丈你揮戈早著回天力。委曲綏邦國。送君千里。終須一別。方內之事。一以委托妹丈。登舟去了罷。〔生〕此行憑仗朝廷威福。或者就得清平。邊郵任重。尊舅惟盡心乃事。〔灑泣登舟介〕

〔尾聲〕江山咫尺分南北。萬里雲程爭奮翮。只願鉄鉞一麾除叛逆。

〔生〕拜詔旋征車。

〔小外〕揮戈除反側。

〔合〕眼望旌捷旗。

耳聽好消息。

第二十八齣 擊幘

〔勝葫蘆〕〔丑扮內臣上〕職任中官承詔命。頒王爵。錫封榮。玉勅一函。鸞輿千乘。爭看着石頭城。上有龍興。俺自家官居近習。職掌黃門。供掖庭之灑掃。給椒房之使令。銀瑞左貂。黃衣廩食。光耀四星之輝。王爵手握。天憲口銜。班列五侯之貴。供奉與朝參。善伺入主之喜怒。拾遺承顧問。能蔽元后之聰明。宮闈褻近。馳聲色以蠱惑君心。威福自由。恣奸險而中傷善類。朝士拜舞後塵。公卿頤指氣使。果然鼠憑社貴。真個狐藉虎威。好氣勢也呵。小臣今早伏承帝命。遣寶玉璽。

丹符裂畿內十郡。封王都督爲吳王。又賜王姬媵妾。輜車鹵簿。教坊樂器。八寶九鼎。異器奇珍。不知其數。國家數十年積聚。一旦盡需東府。可憐可憐。左右的。如今天色漸明。吳王將次陸殿。朝儀仙仗。俱已完備了未。〔末〕告老公。龍牀龍袞。鳳輦鳳旗。俱已完備了。〔丑〕既完了。請爺爺陸殿。〔末下淨上〕

〔賀聖朝〕踐祚將移九鼎。掃除州郡初清。英雄有志事垂成。一着戎衣大定。

〔丑〕爺爺千歲。〔淨〕黃屋初乘左。蘇從紫微光照海門東。滿朝文武階墀下。萬里山河掌握中。我自戮諸兇已來。朝野畏憚。罔肆陸梁。本欲就移晉室。猶恐人心未服。姑且先假王號。漸圖卽眞。昨日溫太眞已到。我想丹陽咽喉之地。欲令鎮守。無過此人。況太眞乃我交契。決不相負。且待錢軍師出來。與他商議。內使宣溫樞密錢軍師上殿議事。〔生上〕

〔前腔〕屈膝佯從僞命。胸中順逆常明。〔小外上〕蛟龍池上欲飛騰。渭水熊羆方

騁。〔生小外〕我王千歲。〔淨〕二公請升殿。有事計議。丹陽國之重鎮。欲得心腹一人去守。以防不測。二公孰可。〔生背云〕我正欲出守丹陽。以圖國賊。忽有此議。莫非天也。如今不免佯舉錢鳳。彼必憚行。

轉推於我。果得遂此行。大事成矣。主公。世儀精神滿腹。麾下諸臣。無出其右。〔小外〕伏主公。運籌韓
嶠。不如臣。折衝千里。臣不如嶠。臣請留侍左右。太真可令出守。〔淨〕世儀言是。太真不可推辭。即
便領符前去。將酒過來餞行。

〔皂羅袍〕閩外金符傳命。念丹陽喉咽。責任非輕。好施謀略往經營。莫教荆棘
萌歧逕。〔合〕深溝高壘。堅甲利兵。華夷威震。關河肅清。南都拱手傳君令。〔生〕忝
荷方隅威柄。感吾君厚寵。重寄垣屏。〔背介〕此行去就總難憑。逆賊難教我背
主從邪佞。〔合前小外〕太真。你再把師徒爰整。羨君侯才略。遠過良平。好憑一劍
靖滄溟。四方底定無烽警。〔合前生背云〕此行雖出世儀舉薦。只恐面是心非。去后決行讒謗。

如今不免設一巧計。以杜讒賊之口。〔假醉介〕世儀。宿昔曾爲刎頸。荷君家汲引。獲寄
長城。〔把酒介〕擎樽握手與你論平生。世儀。休教忘卻金蘭訂。〔小外〕下官醉了。飲不
得了。〔生〕呀。溫太真行酒。錢世儀何人。乃敢不飲。〔手扳小外帽落介小外怒介〕太真。你好粗率。惟
酒無量不及亂。怎生強得。〔淨〕太真醉了。休要怪他。〔小外〕何足計較。〔背云〕畜生無理。且待他去。

着〔淨〕太真軍務緊急。就此啓行去罷。

〔餘文〕馬離建業敲金鏡。祖帳軍門餞曉行。何日輿圖樂太平。〔淨〕符分半虎鎮

丹陽。〔生〕劍躍雙龍入武昌。〔小外〕前筭籌來平六國。〔合〕鞭梢投處斷長江。〔淨外下生弔場〕叫

左右。速將檄文傳布各處藩鎮。叫他作速興兵。約會於石頭城下。候我軍令。同時進取。又將密書二封。送去王司徒及王彬將軍。叫他整兵。以爲內應。連夜速發。不得有違。〔合〕一朝權在手。搥把令來行。〔下〕

第二十九齣 丹陽兵報

〔末扮將軍上〕文昌新入有光輝。紫界宮牆白粉闌。曉日雞人傳漏箭。春風侍女護朝衣。自家乃吳王殿前將軍是也。今早我王御朝已畢。如今將下便殿議事。着小將鋪設繡墩御宴。相將整頓已完。殿下早上。〔淨上〕

〔生查子〕三傑運良籌。擬變家爲國。〔小外〕虎豹添羽翰。心膂恐難託。〔淨〕招來熊虎將。引作腹心臣。〔小外〕莫信直中直。預防仁不仁。〔淨〕軍師。你爲何出此言。我前日遣太真去

守丹陽。觀他智勇謀略。必能與敵抗衡。爲我作江淮保障。付托可爲得人矣。〔小外〕主公。作事當慎於始。用人須察其心。太真與朝廷甚密。不可深信。且丹陽天下兵衝。今遣此人去守。使英雄得用武之地。正所謂藉寇兵而齎盜糧者也。非惟不爲我用。竊恐反爲我敵矣。〔淨笑介〕太真昨醉。少加聲色。何得便爾相讒。〔小外〕主公錯矣。錢鳳豈爲此小嫌介意。但事關休戚。不得不言。自古道明者觀未然。況已著乎。今日不聽逆耳之諫。只恐突決棟焚。變生不測。悔之晚矣。〔淨〕自古用人不疑。疑人不用。太真素與我厚。決不相負。你不須多慮。〔小外〕事在預防。若待羽翼成后。噬臍無及。〔淨〕不妨。溫嶠果有他意。王含在外。取之如摧枯拉朽耳。何懼之有。〔末上報介〕有事不可不報。無事不可亂道。告殿下。溫樞密到丹陽。號召四方兵衆。移檄遠近諸侯。聲言討主公謀逆之罪。地方一時搔動。如何是很。〔淨〕這厮果然如此忘恩。確如軍師所料。吾今乃爲小賊所欺。可惱。可惱。〔小外〕適問主公固執不信。今竟何如。〔淨〕罷罷。是我得之。是我失之。亦復何恨。

〔雁過沙〕驚塵起。蕭牆干戈。忽擾攘。都緣我自不揣量。卻把在桀虎兕放。溫嶠
這賊子呵。你怎敢忘恩欺罔。背卻我推食推衣恩養。〔小外〕檄書自丹陽。腹心

起禍殃。溫嶠倚仗你做個渭水鷹揚。誰知道反做了揮鋌博浪。今民心未忘晉室。只

恐赤幟一起呵。四方豪傑應如響。霎時間轉弱爲強。〔末丑〕主公只爲不聽軍師之言。

故有此害。看他徒薪金非妄。今日呵。竈突果炎上。軍師妙算世無雙。主公今後只依

軍師之言。何患大事無成。你的龍興帝業堪倚仗。早教登壇爲大將。那乳臭兒怎

敢當。〔淨〕軍師事已至此。計將安出。〔小外〕主公不必多憂。自古弱不可以敵強。寡不可以敵衆。主

公今日之勢。諒非溫嶠所能敵。宜速令王含戒嚴守備。一邊差人拘溫嶠母妻至此爲質。令其作書

招之。何患太真不降。〔淨〕軍師言是。軍校傳與王將軍。叫他謹守城池。密地差一隊軍馬。去太原擒

溫家母妻。不得有違。〔衆〕領鈞旨。

〔淨〕忽傳闌外腹心離。

〔小外〕船到江心補漏遲。

〔卒〕本待將心託明月。

〔合〕誰知明月照溝渠。

第二十齣 拘溫家屬

〔卜算子〕〔老旦上〕邊戍幾經年。四序頻遷變。窮愁堆積在眉端。早夜難消遣。

〔旦上〕藁砧今何在。山上更安山。新愁舊恨兩縈牽。人去何時返。〔老旦〕〔浣溪沙〕玉露凋傷楓葉淒。東征游子未言歸。倚門終日思依依。〔旦〕玉枕夜寒鴛夢斷。金鈿秋盡雁書稀。彩毫空寫斷腸詞。〔老旦〕媳婦。你丈夫當初出去。只道便得回家。誰知久留邊戍。奈我年當衰暮。疾病來侵。怎得個團圓的日子。〔旦〕婆婆。前日丈夫書中說。邊警稍平。料目下便可凱旋歸第。婆婆不必愁煩。〔老旦〕媳婦。只今天氣將寒。邊城久役。狐裘蒙戎。如何是好。〔旦〕奴家累積蠶繅。如今織作征衣。令人送往邊塞。〔織介老旦〕媳婦。你既親執其勞。我當拮据相助。〔旦〕

〔山坡羊〕冷颼颼寒風如箭。夜淒淒寒砧搗練。愁感感把金梭擲拋。啣唧唧促織聲如勸。綴錦紋錯綜緒千萬。攪得奴心如麻亂。夫。未審何時重諧繾綣。〔合〕惓惓織就迴文獻九天。懸懸織就寒衣送玉關。〔老旦〕眼睜睜倚門顚盼。悶懨懨凭欄長嘆。軟怯怯潦倒孤孀。恨綿綿日暮桑榆短。記別時曾與他密縫針線。兒。早期你衣錦榮里開。誰知道利縮名韉。幾見了星移物換。〔合〕堪憐。授征衣爲禦寒。何年戲斑衣到膝前。〔旦〕亂紛紛西飛歸燕。嘹嚦嚦南來征雁。杳茫

茫信阻衡陽。淚汪汪界破殘妝面。一寸心猶如繫着千尺線。柔腸百結牽縈絆。
夫。你今戀着補袞榮華。也索記牽絲的姻眷。〔合〕惓惓織就迴文獻九天。懸
懸織就寒衣送玉關。〔老旦〕思悠悠離情無限。顰蹙愁眉難展。子斃斃姑婦
孤單。擾攘觸處遭兵難。兒成就你黼黻經綸的手段。休忘我教子將機斷。〔鴉
噪介〕呀。烏鴉噪。敢有甚麼凶兆。怯聽鴉聲。當庭噪晚。〔合〕堪憐。授征衣爲禦寒。何
年。戲斑衣到膝前。〔末走上報介〕

〔不是路〕驟馬飛還。奔向堂前咽怎言。神魂斷。肝腸寸寸萬鋒攢。〔倒介旦老旦〕

呀。院子。你怎麼這等慌慌張張。〔末〕夫人。天大的事來了。怎生是好。〔旦老旦〕你緣何教人唬

得心兢戰。莫不是沙場凶信傳。〔末〕不是。王敦叛。〔旦老旦〕王敦作叛。與相公何干。〔末〕

我相公呵。只因不順奸臣願。來拘家眷。來拘家眷。〔旦老旦〕聽罷伊言。魄散魂

飛寸膽寒。何讎怨。將人白地裏摧殘。淚珠漣。從今骨肉擗沙散。身命何由得保

全。〔老旦〕天那。孩兒在家到得安樂。如今做官。反被他連累。〔旦〕怎知有此橫禍。空埋怨。一家不

幸遭天譴。無門逃竄。無門逃竄。〔老旦〕院子賊兵來到那里了。〔末〕須臾就到了。小人再去打探來。老夫人和小夫人快先走罷。正是一心忙似箭。兩脚走如飛。〔末下老旦〕媳婦。賊兵來近。我和你拋家走了罷。正是閉門家裏坐。禍從天上來。〔下淨丑扮兵卒上〕

〔紅繡鞋〕操戈執戟搖旗。搖旗披霜。日夜星馳。星馳猿驚獸挺。肆雄威。承主命到山西。擒溫嶠母和妻。〔淨〕衆兵團住溫家。一個個都綁起來。解去稱賞。不可走了一人。〔丑末〕怎的無人在此了。想是那邊宅子上。〔淨〕那邊是劉太尉的家眷。不要驚動他。溫家母妻。一定走出在外。我和你趕到路上去拏他。〔下旦老旦走上〕

〔香柳娘〕苦奔馳在路岐。苦奔馳在路岐。如醉如癡。一朝禍起蕭牆裏。見紛紛騎追紛紛騎追。城火及魚池。啣冤籲天地。恨奸雄恣肆。奸雄恣肆。擾亂邦畿。乾坤鼎沸。〔下淨丑上〕

〔紅繡鞋〕笑他乳臭嬰兒。嬰兒敢與吾主廝持。廝持撩蛇踐虎。不知機。今日裏別雄雌。遭剝辱受災危。〔下旦老旦上〕

〔香柳娘〕嘆征人遠離。嘆征人遠離。邊城淹滯。誰知平步風波起。顧乾坤四圍。顧乾坤四圍。水隔與塗迷。難尋脫身計。苦疲羸怎支。苦疲羸怎支。窮困誰依。人離業廢。〔旦老旦欲下淨丑攔住介〕不要走。不要走。快來就縛。〔旦老旦驚倒介淨〕都綁起來。〔旦〕

婆婆年老。望乞容恕。〔淨〕那里管你。只是綁去。〔旦老旦〕

〔餘文〕魂欲逝淚交頤。半世生涯頃刻危。繆綫纏身怎脫離。

〔淨〕堪笑書生不見機。

〔丑〕教他闔室受災危。

〔老旦〕從來禍福由人召。

〔旦〕須信人欺天不欺。

第三十一齣 繫獄

〔虞美人〕〔淨上〕奸雄背主心懷二。敢肆螳螂臂。將傾晉社總難支。縱自粉身效報曾何濟。〔小外上〕入幕善謀。底囊多智。幾將羣策屈羣雄。爭奈吾王忽卻經邦計。〔見介淨〕耐耐溫嶠背逆無狀。昨已差人去拿他家屬。怎的還未拿到。〔小外〕門外喧嚷。想必

拿到了。〔末丑押旦老旦上〕

〔訴衷腸〕災殃天降非由己。陷穽難迴避。不能明哲保身。可憐百口爲累。〔丑末〕告殿下。溫嶠家屬拿到了。〔見介〕犯婦。你的孩兒受我爵祿。去守丹陽。如何背義。反順朝廷。起兵犯我。今日拿你兩個。別無話說。只要你寫書招他來降。富貴共享。若是不從。就要你粉身碎骨哩。〔老旦〕告都督。溫嶠昔爲吾子。今爲王臣。去就從違。非由老身張主。〔淨〕這婦人奸詐。還敢說此大話。好打哩。〔小外〕女流之輩。不知事體。主公且從容問他。不須發怒。〔淨〕也是溫母。時事有興廢。爲人當識機。今者晉室欲亡。雖三尺童子皆知。你的孩兒。素稱智略。何獨暗昧如此。況我平日與你孩兒交好。你若不快招他來降。只恐國家敗亡之日。玉石俱焚。那時悔之晚矣。〔老旦〕大人。老身只知順逆。那曉興廢呵。〔淨怒介〕這婆子可惱。怎的叫做順逆。你就說來。〔老旦〕

〔孝順歌〕事君的忠義先。人臣大分敢有愆。龔勝願捐生。蘇卿豈忘漢。我孩兒呵。他的堅貞難轉。果若要使招降。我姑婦寧甘伏劍。〔淨〕今四方貢獻。皆入吾府。將相岳牧。盡出吾門。你孩兒一人。濟得甚事。快叫他來降。以免一家性命。〔老旦〕君子有殺身得以成仁。吾兒今死王事呵。縱然馬革包屍。國史清名無玷。〔淨〕休要誇口。你兩個今日被我拘收在

此不怕你不寫書哩。〔旦〕吾夫子他是當世賢丹心壯節日月懸。伏毒慕樵玄納

肝效弘演。〔淨〕胡說。若不寫書招你丈夫來降。你兩個休想生哩。〔旦〕要殺便殺。今日夫爲忠臣。妻

爲節婦。死亦何恨。我丈夫呵。他竭忠赴難。我願全節忘身。怎肯低頭從叛。〔淨〕這等

說。就拿去砍了。〔旦〕縱然鼎鑊交加。我雖九死無憾。〔淨怒介〕我有移天勢操着

生殺權。這兩個婦人好無禮。無端佞口敢犯顏。左右把二婦人撈起來。要他寫。固執若仍

前。教恁觸刑憲。〔旦老旦〕天那。這苦怎生受得。〔哭介小外〕二位夫人寫了罷。省得受這苦楚。休

得淚漣。要解倒懸。須是早從權變。〔老旦〕錢先生。我二人寧受斧鉞之誅。難從逆命。〔小外〕

夫人。事已至此。不得不從。你今是釜裏之魚。怎禁得百般熬鍊。〔老旦〕自古道。死有輕

於鴻毛。我姑娘二人。只要中心無愧。萬死不辭。我生無愧。死亦安。堂堂此身。肯瓦全。視

死。卻如歸。儉生豈吾願。〔小外〕二位夫人。事關門戶。不可執一。且宜暫時從順。以解目下之危。

〔旦老旦〕我甘自摧殘。怎肯向狗彘屈身。乞憐求免。〔淨怒介〕這賊婦把我比做狗彘。

拿去砍了。〔小外〕跖之犬吠堯。豈堯不仁乎。主公不必計較。二位夫人。你不聽我說。休要悔。〔旦老

且罷了。千死萬死。無過一死。若還苦逼禁遲。早請將頭來斷。〔淨〕果然不從。推出斬了罷。〔丑末押走介小外〕主公。小不忍則亂大謀。今日殺此二婦。不打緊。只恐溫嶠蓄忿。致死來與我戰。反添一勦敵矣。不如且把二婦收監。遣一辨士說他寫書。事或可就。若再堅執。殺之未晚耳。〔淨〕軍師言是。且饒他。收到監裏去。〔末丑〕領鈞旨。〔押下且老旦〕精靈萬古昭鍾阜。一死鴻毛斷不渝。〔下淨〕軍校傳與王彬。教他去獄中勸二婦寫書。書如寫成。就教他賚往丹陽。說溫嶠來降。〔末丑〕領鈞旨。

〔淨〕不施萬丈深潭計。

〔合〕怎得驪龍領下珠。

第三十二齣 獄吏相戒

〔水底魚兒〕〔丑扮刑吏上〕性嗜苞苴。經書目不知。有錢陪笑。無錢翻臉皮。吾乃刑曹司吏。專一欺公作弊。語言當面撮空。行事百般詭秘。上司假托腹心。法律視同兒戲。洗補改換卷宗。出入罪名隨意。有錢死者復生。無錢生者沒世。不管枉事屈情。定要蚤緣使費。鄉民那曉奸謀。任我謀爲擺置。裝成圈套機關。饋贈門迎如市。只求才賄盈囊。那管遍賣田地。〔笑介〕犯人到我房。

中。果然是個悔氣。(內問)你每這等兇狠。只怕身家被累。(丑)不管他上司訪察有名。拚個充軍徒罪。(淨扮獄官上)

〔前腔〕職任卑微。俸資薄又稀。若不貪賄。妻兒喫甚的。我本秋曹司獄。爲官一味貪

酷。胸中惟嗜苞苴。杖頭只打錢穀。酒席專爲抽風。言談盡藏騙局。下監推審犯人。量財以爲直曲。富翁蘇放長枷。窮漢嚴加桎梏。不求清白傳家。只要滿贏金玉。(內問)你每這等貪婪。難掩上司耳目。

〔淨〕不管他繡衣考察官員。拚個兩腿無肉。(見介淨)叫禁子拿監簿來看。新到犯人趙一未有拜見錢。扯下打二十。(末打犯人諱介淨)新到犯人溫氏等二口。聞知家道發跡。要他分例五十兩。昨已設酒送去。請他打抽風。要他二十兩回答。快去催來。(末)他是官家。這一起只得將就些。(淨丑)

王親犯法。與庶民同。怎麼將就得。(淨)重犯有分例的。蘇了枷。張四李八無錢上起枷來與比較。

〔丑〕張四家道富。不要枷他。(淨)怎的不枷。(丑)既富矣。又何加焉。(淨)且饒他。只把李八枷起。

〔丑〕李八家貧。不要枷。(淨)怎的也不枷。(丑)加之以飢饉。要餓死了。(淨)提控還是讀書人。說得有理。一發饒他。(末)南監北監。已安排酒。請老爺暖寒。(淨丑)如此便去。正是三杯和萬事。一醉解

千愁〔下末〕老爺。老官去了。且叫各監主出來商量討錢則個。〔淨扮牢頭上〕含冤昔日罹天網。囹圄于今作福堂。禁子哥。今日賣買如何。〔末〕便是不濟。如今老爺老官要見面錢。又要酒喫。表子陪。一應酒店各色樣銀。都靠在犯人身上。這兩日沒人收監。甚是清淡。如何是好。〔淨〕這有甚難。監中常例。多討些。就設用了。〔末〕怎的要得他的來。〔淨〕我教你。犯人沒錢的。枷紐銕鐐匣牀。不要蘇他。日間不許他喫飯。夜間不許他在牀上睡。飢寒難忍。便是鐵人。也要使錢。怕他不設用。〔末〕這等要惹禍。〔淨〕也看人。若遇刁頭。使用將就。若本分主子。及財主有身家的。怕他怎麼。這等人極好待他。常常買些酒請他。他喫了酒。自然用回答。又常常暗地般唆是非。弄他相打相罵。兩邊過面。酒又有得喫。錢又有得送。又時時誑說。聽得上司與外郎說某犯人虧枉。外郎好生替你方便。有等呆人聽信。將銀子央你去囑托。或打探消息。定不白過。〔末〕自古道。接人錢財。與人消災。哄他銀子。不替人幹事。可不抱怨。〔淨〕衙門人都是撮空趁錢。只要哄得錢財落手。那管他人痛痒。〔末〕這等斷主顧買賣。下次誰人信你。〔淨〕不妨。下次又換個圈套騙他。又有件好買賣。如今監中有許多強盜在此。叫他分頭扳枉各縣財主。他必着人拿銀子來央你除名。不來行移的。報上名字。行牌去拘他到官。

朦朧官府。只說是賊。那里曉得都是平民。自古道。賊口出聖旨。真假皆憑賊說。不怕他不多多拿錢來買求脫白。〔末〕這等狠毒。〔指天介〕只怕上頭的人。不放過你。〔淨〕有甚天理。我當初活打死人。問死罪時。家當不濟。如今做了監主。被我置借大家產。官府提控。與我相交。禁子皂隸。服吾驅使。犯人磕頭拜跪。真個朝朝飲宴。夜夜元宵。妻子在家。享不盡的富貴。如今可惜已老要死了。世人要學我的。快去打個人死。來頂我的缺。叫他一生受用不盡。禁子哥。那兩個婦人。問他討些兒。〔末〕又來惹禍。這是溫樞密的家眷。不當要。〔淨〕我自不怕他。官府知道。不過打幾板。難道再問個死罪。倘送些錢鈔。落得受用。正是

今朝有酒今朝醉。

明日愁來明日當。

第三十三齣 獄中寄書

〔憶秦娥〕〔老旦丑扮梅香扶上〕身勞瘁。神魂失次。渾如醉。渾如醉。衰病餘齡。怎

當驚悸。〔旦〕夫君仗節勤王事。妻孥母子皆遺累。皆遺累。許國純忠。闔門全義。

〔老旦〕我生之初尚無爲。我生之後國運衰。人民塗炭城郭壞。禮義滅亡法度隳。身流落兮天一涯。

腸欲斷兮心欲摧。〔旦〕暗室寥寥風雨淒。長夜迢迢更箭遲。夫與妻兮忽此離。姑與母兮生死安足知。義重命輕兮鴻毛如。誓捐此生兮全綱維。〔老旦〕媳婦我和你被王敦羅織於獄。如今肢體雖完。心膽已喪。殘骸餘喘。與死爲鄰。我當衰暮之齡。死無遺恨。但惜汝美質芳年。罹此大禍。如之奈何。〔旦〕婆婆。臣之死君。妻之死夫。其義一也。古有投崖之烈婦。斷臂之貞妻。妾何懼一死。但婆婆教子成名。不克一受褒封祿養。爲可恨耳。〔老旦〕媳婦。你看囹圄蕭條。寒風刮面。四顧愴惶。形影相弔。好苦呵。

〔月兒高〕體羸心慄。衰容頓顛顛。子母遭凌替。身陷家傾棄。顛沛流離。死無葬身地。反賊我宿稟冰霜厲。縱然九死心無一。苦呵。三木囊頭苦怎支。仰籲蒼穹知不知。〔旦〕夫狗忠義。妾身願隨逝。痛憶姑年暮。復險遭顛躓。及溺胥亡。共作忠良鬼。婆婆。此身甘玉碎。怎把名污青史。天那。天胡不愍遺。闔室顛連控告誰。〔淨扮獄卒上〕貪婪爲活計。桎梏作生涯。二位夫人。各樣常例如何說。〔老旦〕牌頭。我們倉卒被差人拘來。分文不曾帶得。如何是好。〔淨〕夫人差矣。自古道在山靠山。在水靠水。如今司獄老爺。提控老官。

常例風火一般在我處要。難道我替你喫杖子。監主柴水牀席家火秋風看監神福酒席守門等錢。難道不肯出。你若待我好。我也看承你好。你若吝錢。便是官家也要衝撞。〔老旦〕牌頭。一應分例定然不少。待我親戚來日就有。〔丑〕牌頭要錢何用。〔淨〕娘子。你不曉得。錢之爲用。危可使安。死可使活。忿爭非錢不勝。幽滯非錢不拔。你爲有錢不用。在此受苦。〔丑〕這等說。我家錢儘多。早說待我挑一擔來與你。如今沒錢。馬子也沒人掇。〔淨〕娘子。自古道有錢鬼可使。你若有錢。司獄老爺。六房提控。爭替你掇馬子。怕他沒人。〔末扮王彬上〕

〔菊花新〕忠良伏鑽實堪悲。節義雙高世所稀。吾忝與藩維。豈肯從謀不軌。王彬爲處仲所使。至囹圄中勸溫太真令堂寫書。我昨見二婦這等忠烈。一時感激。恨不得助順討逆。豈肯爲其作說客。以誘人於不義乎。如今見二位夫人。且休提寫書之事。處仲若問。只說書已寫寄太真便了。獄卒開門。我要見溫老夫人。〔見介淨下老旦〕大夫何來。〔末〕下官王彬。素與令郎交契。昨見二位夫人。丹貞貫日。不勝忻羨。我願夫人始終如一。不可畏其鈇鉞。少變清操。〔旦老旦〕多承規訓。謹當銘諸肺腑。〔末〕下官奉差。命往見令郎。如有尊簡。敬當附去。〔老旦〕如此卻好。媳婦代筆。

修書一封。央大夫寄去。〔旦寫介老旦〕

〔玉山頽〕衡陽拘繫。嘆惻惻身惟影隨。念一家瓦解冰消。好似斷梗飛絮。大

夫傳與吾兒。教他惟勤王事。切莫把母妻爲意。〔旦〕書已寫完了。〔老旦〕既寫完。拜奉與

大夫。〔拜介合〕尺素傳吾子。〔哭介〕兒呵。只怕今生不得與你相見了。永相違。榮封祿養

恨無期。〔旦出玉鏡介〕大夫。奴家當初賴此鏡與太真成婚。後夫君別去。誓以重逢。不料竟成畫餅。

相煩大夫寄還夫君。俾知我不久爲泉下客矣。菱花遙寄。嘆雙鸞此日仳離。從夫去久

掩清光。料今生會合無計。逆賊。你縱有鼎鑊刀鋸。怎奪我清風高志。〔合〕尺素傳

夫子。永相違。重諾伉儷料無期。〔丑〕使君聽啓。念奴身金屏侍兒。抱衾裯藉寵

專房。到如今漂泊誰倚。俺一家愁無遺類。空使我寸腸割碎。〔合〕尺素傳吾主。永

相違。承恩魚貫料無期。〔末〕聞言酸鼻。勸夫人不須淚垂。夫人。惟天相德。惟德合天。古

今常理。你看湛湛青天。豈肯把哲人遐棄。下官雖在王敦門下。忠君報國之心。未嘗少

間。此行自當與太真定計。裏應外合。勦除國賊。救出二位夫人。暫請耐心少坐。不必愁惱。〔旦老旦〕

如此多感。〔末〕聽我片言寬慰。管教你夫妻子母重會。〔合〕尺素傳賢子。暫相違。回天返照豈無期。

〔老旦〕相見時難別亦難。

〔末〕東風無力百花殘。

〔旦〕春蠶到死絲方盡。

〔丑〕蠟燭成灰淚始乾。

第三十四齣 拆書見鏡

〔高陽臺〕〔生上〕外難初平。蕭牆禍起。堪嗟寶鼎沈溺。百辟顛連。相胥盡罹鋒鏑。但自家腹心幸值君皇寵。須當竭股肱之力。秉忠丹風前勁草。心如金石。國破家何在。扶危命亦輕。欲吞豫讓炭。願結仲由纓。世事風前燭。浮生浪裏萍。滿腔忠孝訣。忍死敢偷生。自家素與逆敦友善。今彼既有虧大節。吾亦與之絕交。昨者用計出守丹陽。建牙集衆。據咽喉之地。以圖恢復。分遣檄書。約會諸鎮。同時大舉。如今不免練習兵衆。戒嚴啟行。多少是好。只一件。自從別卻母妻。頻年在外。竟不知家中音耗如何。正是天涯厭羈旅。家鄉勞夢魂。

〔前腔〕目斷河陽。孤雲縹緲。高堂已添垂白。虎鬪龍爭。征人幾時寧息。嘆當年

絕裾輕分散。頓教人飲恨如愁。妻更憐你塵蒙玉鏡。雲情遼隔左右。門外有報軍情的。着他進來。〔末扮王彬上〕家貧顯孝子。世亂識忠臣。自家昨日往獄中見太真母妻。心如鐵石。大節凜然。彼婦人女子。尙能如是。可笑沈充錢鳳之徒。阿附逆臣。竊不義之富貴。寧無愧於心乎。正是同時英俊顏何厚。未死奸雄骨已寒。今將書鏡往丹陽報與太真知道。這里正是幕府。不免入去。唱。

〔生〕王大人何來。〔末〕下官有一事。報與樞密知道。〔生〕有甚事。〔末〕逆敦怪樞密起兵勤王。差人拘令堂令闖於獄。〔生驚介〕逼令作簡來招樞密降順。二位夫人誓死不從。〔生泣介〕逆敦復遣下官往獄中說之。下官頗知禮義。豈肯自毀綱常。到監惟以大義勸勉二位夫人。特領尊堂翰簡。尊闈玉鏡。來見樞密。書鏡在此。〔生讀書介〕逆敦以吾兒効順勤王。逮捕我二人於獄。逼令作書招汝。思惟吾家忠勳奕世。綱紀三朝。豈肯自墮其素履。陷汝於不義。故寧伏劍而死。餉肉於烏鳶。豈肯負恥而生。屈身於狗彘。汝其奮勵激昂。早赴君父之急。盡心王室。勿以母妻介懷。若皇天有知。庶幾君難可靖。親仇可復。倘心殫力竭。便當慷慨捐身。闔門死義。汝其志之。勿違吾言。吾無恨矣。臨簡悲咽。不知所云。〔生哭介〕王大人。下官只爲竭忠王室。致令舉家繫累。慈親若亡。吾其爲臯魚矣。

〔駐馬聽〕痛憶慈顏。刃剗愁腸。血淚潛。也只爲憂先天下。致令母子分離。骨肉摧殘。苦方圖祿養報親恩。豈防今日翻爲患。大慟號天。大慟號天。昔趙苞母爲賊

虜。痛恨嘔血而亡。我今日呵。趙苞之恨。料應難免。〔末〕樞密不必愁煩。我當以計給逆敦。必

要保全尊眷。請免憂煎。拯溺持危。我當自斡旋。你休得要心勞內顧。戀戀私情。

忘卻忠丹。勸君努力獨身先。縱橫百戰維多難。此時外多強寇。內有叛臣。正危急存亡

之秋也。樞密。你切莫偷安。切莫偷安。將頽漢日。賴君揮轉。〔生〕多蒙指教。下官惟以

王事爲重。亦別無顧慮。但母妻在獄。倘可拯救。望大人哀憐。〔末〕君當奮力于外。我必維持于內。寶

眷若有半點差池。下官任罪。〔生再叩首介末〕大人。休將私意撓公事。好把忠良翊聖朝。〔下生弔

場外扮探卒上〕馬汗踏成泥。朝馳幾萬蹄。雪中行地角。火處宿天倪。報樞密。諸鎮兵皆已會合。只

等樞密號令。進兵攻城。如今逆賊遣王含總兵來伐丹陽。〔生傳令〕速整大衆。前去迎敵。

〔清江引〕邦危主辱王臣蹇。捲甲齊赴援。倚我若長城。怎敢圖身便。披堅執銳

甘百戰。〔丑末〕虎臣一身都是膽。叱咤真梟悍。霜刃氣橫秋。利鏃如飛電。風聲

凜凜山岳撼。風聲凜凜山岳撼。

第三十五齣 敗王含

〔金錢花〕〔丑扮王含帶卒上〕森森戈戟如霜。如霜連衡薄伐丹陽。丹陽驚鴻駭鹿亂奔忙。誅逆豎。取金湯。〔合〕移晉祚。篡君王。自家王含是也。只爲溫嶠背義歸晉。奉主公嚴命。提兵往討。前面塵頭起處。料是溫嶠兵到。軍校每。擂鼓排陣。殺上去。〔生帶卒上〕

〔前腔〕長驅虎豹龍驤。龍驤高牙大纛揮颺。揮颺管教一箭落天狼。剪荆棘。淨封疆。〔合〕通禹服。會明良。〔生〕反賊向前打話。〔丑〕溫嶠。我主公何等相待你。爲何忘恩。如今及早投降。席藁待罪。可保母妻無虞。不然。九族皆死刀下。〔生〕反賊。汝無父無君。曾禽獸不若。我忘家狗國。與日月爭光。不須開口。〔上前交鋒。介丑淨敗下。生〕王含旣敗。乘勝殺奔石頭城。擒了王敦。不可有違。〔衆〕領鈞旨。

由來勳業屬英雄。

一洗鯨波輦路通。

先入賊巢擒首惡。

盡封府庫讓元功。

第二十六齣 擒王敦

〔生查子〕〔淨上〕大運應昌期。名諱登圖識。威德振南天。一鼓收餘燼。虞廷將紹
執中傳。晉氏須臾鼎播遷。非我敢收秦氏鹿。祇因天命屬龍顏。俺自起兵以來。僭竊位號。宰制朝權。
天子不過擁虛位而已。只今萬民推戴於野。百僚勸進於朝。你看禪臺高築。將黃袍加身矣。乾坤重
闔闢。民物再更新。人生際此。豈不稱大丈夫。近日只爲溫嶠這斷背恩。起兵丹陽。此乃纖介之疾。不
足爲意。已令王含率衆往擒。捷音未報。不免召沈充錢鳳二軍師籌議。軍師何在。〔外末上〕

〔前腔〕心懷六出奇。口注懸河論。三顧幸遭逢。坐使收乾運。主公千歲。〔淨〕軍師。昨
日王彬回說。溫嶠聞母妻被繫。心持兩端。逡巡不敢與我挑戰。王含此去。一鼓可擒。〔外末〕主公。自
古道。識時務者呼爲俊傑。溫嶠不知天命。敗亡必矣。何足惜之。〔淨〕正是正是。天氣嚴寒。且與二位
軍師談笑鼎樽。決機幃幄。將酒過來。〔淨〕

〔玉芙蓉〕彤雲蔽太空。玉帳寒威重。念征人櫛風沐雨當鋒。軍師坐籌幃幄。資
韜略。行陣決機賴折衝。〔合〕金甌奉明良會逢。且鋪裯炙炭。談笑酒樽中。〔外〕台

階位望隆。前席承君寵。際風雲攀龍。附鳳登庸。揮鉏擊斃三秦鹿。掉舌鈎連六國從。〔合前末〕當年友赤松。膺聘爲梁棟。論奇勳。伊周伯仲。英雄。謀猷克壯。誇元老。魚水欣逢。學臥龍。〔合前丑〕軍師元臣著匪躬。殿下聖主由天縱。看輿圖相將一統皇封。乾旋坤轉。河清晏。航海梯山萬國通。〔合前卒上報介〕力盡弓惰怯。天亡馬力窮。英雄悲失路。無面見江東。報我王。王含將軍大敗逃亡了。〔淨〕吾兄老婢何足以赴大事。如今我與二位軍師自往督戰便了。再去打聽來。〔卒啞下又卒慌上〕報報報。禍事到不好了。〔淨慌介〕怎麼的。〔卒〕溫樞密統領大隊人馬。長驅而來。司徒老爺。王彬將軍。開門降納。我兵盡皆潰散。不濟事了。二位軍師雖有奇謀。不能賦詩退賊。須索望風逃避。如今也顧不得主公了。各自逃生罷。雙手擘開生死路。一身跳出是非門。〔外末卒逃走介生帶卒撞上〕

〔水底魚兒〕高鳥傷弓。驚飛絕影蹤。長驅乘勝。窮窠一掃空。軍校。綁了反賊。〔綁介〕把反賊上了囚車。解送朝廷處分。妻孥逆黨。盡行誅戮。脅從者監下。死事者紀錄。候旨定奪。凡我行陣。一概論功行賞。速令人報知王司徒。教他放二位夫人出監。待我掃清餘孽。即便凱旋回朝。〔合〕

懋績豐庸。捷書奏九重。天顏有喜。皇恩擬報功。皇恩擬報功。

驃姚立大功。

萬里絕烟烽。

馬放華山下。

車書已大同。

第三十七齣 蘇獄

〔祝英臺〕〔老旦丑扶上〕嘆拘攣囚姜里。長夜渾如歲。〔旦〕缺月沈暉。鏡去人將逝。

〔丑〕怎能殼再覩青天。重逢甘雨。〔合〕雪前恥闔門完聚。〔老旦〕〔搗練子〕心耿耿。

淚潺潺。愁來兩鬢忽成斑。〔旦〕銀箭銅壺宵漏永。羅衣不耐五更寒。〔老旦〕媳婦。我和你久繫獄中。

不能擺脫。前日蒙王大人持書去報孩兒。未知他能除此賊。以解我倒懸之厄否。〔旦〕朋友在難。尚

然相恤。豈有母親妻子而不顧乎。丈夫早晚必有安全之計。婆婆且自寬心。〔老旦〕又一件。我多感

你令堂照戲。不意一旦拋離。辜負厚恩。深爲可恨。〔旦〕至親骨肉。分所當然。但情鍾兩地。天各一方。

母親不能親來一探婆婆。此心不能無歉。〔丑〕老夫人和小姐不必愁煩。倘我老夫人掛念。早晚來

此相探。亦未可知。〔老旦〕萬水千山。怎生得到。〔貼上〕

〔霜天曉角〕登山渡水。去國遙千里。苦憶姻家兒女。心忙豈憚馳驅。花正開時遭雨打。月當明處被雲遮。老身只爲親母女兒。被王敦屈陷於獄。今日不憚千里。特來相探。這里正是司獄。不免進去相見。禁子開門。〔末扮禁子上〕牢門重鎖鑰。不許外人敲。你這婆子好不達時務。你
是何人。來叫禁子。〔貼〕我是劉太尉的母親。要相見溫老夫人。〔末〕原來是劉老夫人。禁子有罪。就
開門。〔報介丑〕我道老夫人一定來。昨夜夢見牙齒相打。〔老旦〕爲何。〔丑〕有肉喫。〔貼進介〕老
旦相抱哭介。〔貼〕親母無罪無辜。罹此大禍。〔老旦〕命塗多舛。不敢怨尤。〔旦〕奴家苦遭折挫。辱及
慈親。〔貼〕女兒雖在縲紲。非其罪也。〔老旦〕親母多承遠顧。甚慰渴懷。但老身衰齡構難。形存心死。
無可以報厚德。〔貼〕義在瓜葛。何說此話。今日之事。有賢婿小兒在外。必能委曲濟難。決無玉石俱
焚之理。不必愁煩。〔旦〕母親言之有理。只是目下難過。〔老旦〕

〔綿搭絮〕久羈囹圄。鎮日鎖雙眉。況我老病疲羸。桎梏晨昏苦怎支。嘆當時課
子詩書。指望你榮歸戚里。光耀着門楣。今日呵。反被你遺累妻孥。身陷俘囚履
禍機。〔旦〕憂心如醉。未語淚先垂。娘。自別尊顏。一日思親十二時。隔溫清冷落

了斑衣。苦背卻姑親慈恃。兩下離披。娘今日裏陷溺淪胥。辜負當年親結褵。〔貼〕

自你身擔狴犴。我倚遍着門閭。恨不得插翅飛來。恤患分憂相護持。逆賊你流毒

善類。是何道理。恨奸雄恣肆狼威。拆散你夫妻子母。骨肉乖違。親母孩兒。你休道

上帝無聞。作善從來天不欺。〔旦〕一從夫去徹夜相思。我和你琴瑟乖張。違

卻當年白首期。你不記當時對泣牛衣。今日裏將奴拋棄。中道與你分離。向

日把玉鏡寄還夫君去了。切恐破鏡難圓。羞對孤鸞獨自飛。〔丑〕流離顛沛。怒似

調饑憔悴了。豔質芳華。多病多愁減帶圍。困纍纍命若懸魚。苦我好似隨風飛

絮浪蕩。遠天涯。苦捱不過幾個黃昏。愁伴蕭蕭鼓角悲。〔淨扮獄官上〕沙場擒逆豎。狂

獄出俘囚。獄官奉王司徒嚴命。道王敦已被誅戮。快請溫家二位夫人出監。禁子快開牢門。〔淨跪

見介〕老夫人。小夫人。一同賀喜了。〔旦老旦〕呀。我有何喜可賀。〔淨〕告夫人。王敦已被溫樞密誅

了。王司徒傳命教請二位夫人出監。聞知劉老夫人來此。一同送至公館安下。少間樞密就回來相

會了。〔貼老旦〕呀。元來王敦這賊子誅了呵。謝天謝地。〔淨〕轎馬俱在門首等了。請三位夫人

就此啟行〔合〕

〔餘文〕經年漂泊身狼狽。陽春忽布網羅除。豈料光生腐草餘。

〔老旦〕干戈擾攘幾年餘。

〔貼〕搔首欣看奏捷書。

〔旦〕善惡到頭終有報。

〔合〕只爭來早與來遲。

第二十八齣 賞雪

〔步步嬌〕〔旦上〕困歷經年方離犴。歲律旋將變。朔風透體寒。路隔崇朝咫尺。行雲斷。萱草欲凋顏。轉向愁中慘。睡覺不知雪。但驚窗外明。漫天飛六出。和月照三更。草木淺深白。郊原上下平。旅懷苦嗟怨。誰與寄邊城。奴家與婆婆久淹縲絏。自分捐生。不料反賊受勳。王司徒將我姑媳釋放。假館僑居。服御飲食。皆出尙方供應。當初在獄。這等貧寒。如今這等豐富。人生遭遇不齊如此。今日大雪紛紛。不免請婆婆母親出來。圍爐賞宴。以慰悶懷。多少是好。二親有請。

〔貼老旦上〕

〔前腔〕久困衡陽堪嗟嘆。何幸得重歡宴。微軀賴苟全。濁轍重回。合浦沈珠返。

翹首盼關山。游子何時見。〔老旦〕長對西風嘆式微。今朝何幸賦歸歟。〔貼〕故園松菊猶存否。

〔旦〕舊日人民果是非。〔老旦〕親母我姑婦二人。久罹困厄。只道喪身草莽。豈料死中得生。〔貼〕親

母。自古道作善降之百祥。作不善降之百殃。今日親母獲福完歸。王敦賈禍誅滅。理勢必然也。〔旦〕

二親且喜危而復安。否中生泰。值此三白之盈庭。可以轉災而爲瑞。宜獻酬樽俎爲慶幸。〔貼〕既如

此。捲起毡幃。傳盃玩賞。〔貼〕〔如夢令〕瓊樹玉塵罩滿。暖閣紅爐裝遍。〔老旦〕困蕊不禁寒。摧折柔

枝無限。〔旦〕腸斷。腸斷。人共楚天俱遠。〔老旦〕

〔梁州序〕碧空鋪絮。彤雲垂幔。玉界瓊洲如練。祥光呈瑞。西疇已兆豐年。自喜

白頭相聚。雪恥重歸。煇茗相酬勸。羊羔傾繡幕。且同歡往事。休將入夢牽。〔合〕

臣績懋。君恩顯。看全家祿養承天眷。盡子職。遂親願。〔貼〕窮冬將逝。洪鈞初轉。

窗外日添宮線。灰飛葭管。新陽漸破嚴寒。自喜分氈來訪。返棹同還。旅食開華

饌。昨聞駟報。知我兒奏功江北。賢培奏功江南。可喜可喜。隴頭逢駟使。羽音傳。會見聯車共

凱旋。〔合前旦〕杜重門。顧影蕭然。褪膏沐香雲。繚亂。嘆羅浮夢遶。楚臺雲散。丈夫。

你雖是功收淮蔡。只恐馬阻藍關。旅泊如天遠。倚欄腸欲斷。對孤鸞。玉鏡何時
得再圓。〔合前丑〕抱寒衾。悄夜忘眠。倚薰籠。離愁無限。苦銀屏冷落。香銷紅怨。且
學那撒鹽歌詠。煮雪烹茶。拚醉聊排遣。灞橋頻望遠。寸心懸。何日征人得解鞍。

〔合前貼〕

〔節節高〕雪花舞玉盤。罩滿瓊簷。乾坤一夜銀妝遍。冰壺湛。玉笋纖。珠宮燦。

〔老旦〕親母。敝裘得荷綿袍戀。窮途何幸逢青眼。〔合〕漸覺樓頭轉。東風往咎。

前愆。盡逐冰澌渙。〔貼〕烹微啓暮天。缺月重完。清光幸喜仍還見。孩兒賢塔如今呵。
役車旋。錦色鮮。榮里閤。〔老旦〕三牲五鼎叨君宴。光生白屋把窮愁換。〔合前〕

〔餘文〕天涯咫尺無由面。別易從來相見難。遙對南關淚暗彈。

〔老旦〕暴虎當年罹鞠誦。

〔貼〕一朝脫悔喜重重。

〔旦〕夜來賸把銀缸照。

〔合〕猶恐相逢是夢中。

第三十九齣 南北凱旋

〔一枝花〕〔生上〕窮林高鳥盡。威德華夷震。干戈今載戢。返我軫。四海澄清。從此無血刃。吾民方解慍。瞻望神京。喜皇極重開元運。五載馳驅戎馬間。擄夷誅叛凱歌

還。投簪早上朝天表。戲彩重承膝下歡。溫嶠外平強寇。內翦賊臣。乘輿反正。班師回朝。昨聞我母妻。岳母皆在公館安下。忠難之餘。急欲相見。正是他鄉千里夢。故國一時心。左右催促夫馬前行。〔末丑〕稟爺。天色將晚。且在句容駟安下。明日回朝。〔行科生〕

〔風馬兒〕戡內亂。獲醜執訊。荷封榮纍纍金印。望天門來朝紫宸。聊展我經綸。蘊解組辭歸作逸民。作逸民。〔淨扮駟官上〕郵亭居要道。星節此停驂。句容駟承接老爺。

〔生進介〕駟承。我鞍馬勞頓。不許閒雜人打攪。來日雞鳴時就要起身。〔淨〕領鈞旨。〔虛下外扮劉

琨上〕戡外亂。新平獵狃。繫呼韓。聊舒宿忿。綏淮夷。皆來獻琛。廓堯封。紓忠悃。羈鳥今歸戀舊林。戀舊林。邊庭百戰壯謀猷。西北強胡一旦收。虜馬不嘶葱嶺外。悲笳聲斷玉

關頭。形容已繪麒麟閣。官職今封定遠侯。持節歸來拜明主。陳情還作故鄉游。劉琨自與祖元帥擊楫渡江已來。不覺五載。今幸削平燕趙諸國。返軫回朝。爭奈久疎定省。歸心箭發。連日奔馳。且喜已

到金陵地面。正是歸促頓忘車馬倦。心忙不解夕陽斜。左右天色已晚。且向旬容駟安歇。駟丞怎生不見。〔丑叫介淨上〕駟車日夜紛來往。駟使奔忙賴脚跟。來了來了。怎得許多人夫轎馬打發。真個好苦呵。〔外〕這駟丞好打。怎生來遲。〔淨〕告爺。駟丞有罪。方纔迎接溫樞密。不知老爺來到。望乞恕罪。〔外〕我的妹丈也來了。不期而會。天使之然。就進去相見。〔見介外〕恭喜妹丈。勦除國賊。迅掃禁庭。返播遷之輿。建中興之業。〔生〕恭喜尊舅。蕩平劇虜。稽顙呼韓。絕北顧之憂。雪永嘉之恥。〔末丑〕二位老爺聯轡凱旋。光榮帝里。世間難得。〔外〕側聞親母與吾妹被逆賊拘繫於獄。其情卻爲何。〔生〕尊舅。一言難盡。

〔一封書〕自那日奉別呵。邊城返戰輪。向丹陽代叛臣。觸狼威怒嗔。駕飛殃及我親。逆賊監母妻子獄。遣說客逼令寫書。招下官降順。母妻誓死不從。姑婦丹貞天垂憫。多承岳母遠來相探。賊平之後。王司徒同請到公館安下了。〔外〕家母也來此。真個是天緣。〔生〕枯木今來復遇春。〔合〕和你覲明君。報親恩。書錦榮歸指白雲。〔外〕自從與妹丈別后。連戰大勝。如今劉石諸番。皆已竄居沙漠去了。當時獨秉鈞。淨妖氛建大勳。喜狼星盡隕。萬里堯

封復鼎新。妹丈和你望闕陳情求解印。三釜還酬報母心。〔合前〕

〔餘文〕今宵旅邸同高枕。明日辭君歸養親。脫卻兜鍪帶葛巾。〔生〕左右。先着幾人

飛馬星夜報與二位太老夫人知道。說劉爺在邊上也同回來了。

〔生〕玉帛朝回望帝鄉。

〔外〕克清大定樂時康。

〔卒〕天涯盡處無征戰。

〔合〕兵氣銷爲日月光。

第四十齣 完聚

〔步步嬌〕〔老旦上〕嘆當時逆旅遭窮困。只道合室摧鋒刃。〔貼〕誰想相逢在此

辰。須知離合皆前定。〔旦〕伉儷喜重諧。不負山盟信。〔老旦〕幾年身世各浮萍。白首相

看泪滿纓。〔貼〕老去不知花有態。愁來惟覺酒多情。〔旦〕花逢逆旅客偏瘁。月向朱門色更明。〔合〕

今日重逢且歡笑。開罇共享太階平。〔老旦〕親母恭喜。大舅亦回。雙台並照。光耀人間。〔貼〕世間盛

事。萃于一門。今日方顯吾二人教子之功。孩兒何不差人路上一接。〔旦〕早已差人去了。牌上說寅

時起馬。想必就到。〔丑末上報介〕烏頭作相回。聯轡拜親幃。聖朝恩浩蕩。草木也光輝。伏太老夫人。

溫爺劉爺回來了〔生外上〕

〔夜行船〕五載身先當白刃。扶社稷救生民。愛日情深。望雲心切。辭祿今從招隱。〔見悲介生〕母親孩兒罪累逆天。致使慈親受禍。萬死不足以贖。岳母荷蒙周恤。賴庇生全。賢妻奉母孝敬。節操堅持。修書寄鏡之情。尤爲可憫。〔外〕母親久別尊顏。寸腸千結。親母吾妹年幼。有缺奉事。賢妹勤儉相夫。克全四德。允宜表揚。〔貼老旦〕二郎雖然受了幾載辛勤。今幸功成名就。耀祖榮親。封妻蔭子。乃人間之大樂也。往事休題也罷。〔旦〕哥哥出將入相。功懸日月。足紹先人之盛。相公離愁萬千。待歸款訴。今既見君。不覺喜心。翻倒半句也無。〔生外〕骨肉重逢。天倫攸敘。須假樽罍。以酬具慶。〔貼老旦〕正當如此。〔生〕

〔排歌〕憶別慈親。今經五年。苦遭王事縈牽。雲橫秦嶺路漫漫。千里思親幾淚漣。〔合〕平國難。奏績還狼胥山上。姓名鐫。今生分宿世緣。夫妻子母兩團圓。〔外〕旅邸雲萍。庭闈暮萱。堪憐兩地心懸。望雲幾上太行巔。今幸承歡拜膝前。〔合前旦〕信斷雙魚。鏡分兩邊。那日被難之時呵。此生自分溺深淵。今日呵。魚水何期再

合歡〔合前生〕夫人自與你別後呵。雲鎖巫陽。霜凋楚關。堪悲鄉夢闌珊。那日接得母親

翰簡。與夫人玉鏡。幾乎痛絕。當時鏡破鳳離鸞。琴瑟于今再整絃。〔合前老旦〕孩兒自

你別後呵。頻倚門闥。雙眸望穿。著龜朝夕頻占。密縫人去抱憂煎。今日榮歸始

解顏。〔合〕你看蟬冠重。錦綬鮮。紅纓白馬壯奇觀。繩祖武啓後賢。蘭蓀桂子競芳

妍。〔貼〕昔日呵。女困俘囚。兒淹外藩。終朝意馬心猿。喜今脫悔璧重還。文命遙臨

新故園。〔合前丑末扮報人上〕金殿九重明日月。泥金一札下雲霄。告爺朝廷有詔旌表。快排香案

迎接。〔下小外扮使臣資詔上〕

〔六么令〕絲綸燦爛。彩鳳親啣飛下九天。陽春頃刻播人間。褒節義表忠賢。

〔合〕闔門堪羨承恩眷。聖旨已到。跪聽宣讀。皇帝詔曰。朕惟世道莫重乎綱常。人倫必先於

忠孝。實風化之攸關。當激勸以勵后。予一人遭家不造。戎馬在郊。二帝蒙塵。兩京失守。近賴皇天悔

禍。羣寮誓心。驅劉石于沙漠。勦王敦于方內。日月生光。寰宇再朗。樞密溫嶠。絕裾激憤。慷慨赴義。其

母崔氏妻劉氏。身居狴犴。而婦姑之大分不渝。太尉劉琨。聞雞起舞。枕戈餐胡。其母溫氏。教淑義方。

而子塔之戎功克奏。此其忠貞節孝。有光於國家者。特封溫嶠始安公。崔氏淑德夫人。劉氏太原郡夫人。劉琨魏國公。溫氏碩德夫人。他若司徒王導之大義滅親。故將祖逖之中流擊楫。周顛戴淵之塞囊孤忠。郭璞王彬之謬謬諱論。或以勞定國。或以勤死事。存者超擢。沒者追恤。王敦首行造逆。國有常刑。羽翼沈充。錢鳳王含等戮止其身。脅從者盡行赦宥。嗚呼。興衰撥亂。係國家氣運之隆。彰善殛惡。實王朝勸懲之典。善惡之報。天道王章。昭昭明矣。尙念之哉。望闕叩謝。〔山呼介生外〕使臣請坐。〔小外〕不須了。正是君臣交慶風雲會。草木均霑雨露恩。〔下生〕

〔催拍〕我昔日呵總元戎。叨登將壇。今日呵措天下如磐石安。喜旋坤轉乾。旋坤轉乾。牛放桃林。馬息華山。名遂功成。進職加官。〔合〕辭帝闕。解組東還。依桑梓樂田園。〔外〕憶當時符分玉關。幸今日鵬搏羽翰。曾浴日補天。浴日補天。尊國攘夷。封土泥丸。錫爵分茅。鳳舞龍攀。〔合前旦〕恨疇昔零落翠鈿。喜今朝鸞膠續絃。看霞帔鳳冠。霞帔鳳冠。雨露沾濡。車馬駢闐。春盎朱門。喜溢眉端。〔合前貼〕老旦念佳兒聯車凱旋。荷明主褒功尙賢。更裕後光前。裕後光前。汗簡垂名。

詩禮相傳。奕葉雲仍。槐棘森然。〔合前貼老旦〕

〔一撮棹〕羨二郎忠孝兩全。〔生外〕龍顏喜動。恩榮慰我慈顏。〔旦〕新渙汗。六龍飛下雲間。〔合〕河清頌。共祝太平年。但願四方風動。閭閻歌聖澤。鼓腹含哺永永樂堯天。

〔餘文〕前朝懋績標詞翰。玉臺鏡記爛雲編。千古名揚四海傳。

永嘉弗兢國衰微

絕裾溫郎倡義旗

淮渡燃犀還擊楫

新亭灑淚復聞雞

枕戈北塞胡塵淨

擊幘南都兔窟夷

玉鏡分開還復合

縱橫遺跡總堪奇

玉鏡臺記終

懷

香

目錄

第一齣 家門始終

第二齣 赴辟登程

第三齣 欽賜異香

第四齣 京邸遇舊

第五齣 司空受掾

第六齣 繡閣懷春

第七齣 青瑣相窺

第八齣 相思露意

第九齣 託婢傳情

第十齣 蘭閨復命

第十一齣 氏羌謀叛

第十二齣 協謀出鎮

第十三齣 受詔安邊

第十四齣 夕陽亭議

第十五齣 春閨寄簡

第十六齣 掾房訂約

第十七齣 赴約驚回

第十八齣 緘書愈疾

第十九齣 醉誤佳期

第二十齣 承明雪宴

第二十一齣 引示池樓

第二十二齣 池樓晤語

第二十三齣 奉詔班師

第二十四齣 謀踰東牆

第二十五齣 佳會贈香

第二十六齣 聞香致疑

第二十七齣 索香看牆

第二十八齣 翰詢香情

第二十九齣 問卜決疑

第三十齣 母女傷懷

第三十一齣 假公薦舉

第三十二齣 受詔參戎

第三十三齣 夜香祈祐

第三十四齣 定策征吳

第三十五齣 誑傳凶信

第三十六齣 征吳得勝

第三十七齣 飛報捷音

第三十八齣 哀中聞喜

第三十九齣 班師議婚

第四十齣 嬖姻封錫

懷香記

明陸采箸

第一齣 家門始終

〔青玉案〕〔末上〕悠悠世事風雲狀。得失何須苦惆悵。綠水青山周四望。名繯利鎖。心猿意馬。因此都拋漾。勸君亦莫思三上。且向歌臺聽寶障。淺淺斟兮低低唱。伯夷清餓。子淵貧夭。總是蓬蒿葬。〔問答照常〕

〔意難忘〕韓壽文章似琳珪。清越星斗輝煌。司空徵作掾。才貌動蘭房。賈午姐。逞紅妝。更風韻芬芳。青瑣中。秋波頻盼。仔細端相。相思夢寐顛狂。憑蜂奴撮合。雲雨高唐。異香生衆議。狐跡顯東牆。司空怒。事乖張。遣贊畫勤王。奏凱回。賊封勅配。依舊成雙。

賈午姐風流絕代。

春英奴撮合多方。

賈司空粉牆覓迹。

韓德真青瑣懷香。

第一齣 赴辟登程

〔逍遙樂〕〔生上〕文林誇腹稿。信詞源三峽倒。功名唾手等鴻毛。徘徊際遇。挫

抑雄豪。冷落風騷。〔鷓鴣天〕肆志三餘力藝文。箕裘克紹襲遺芬。詩書典雅能傳業。禮樂縱橫可

致君。懷道德。立功勳。不愁無地際風雲。臥龍且自吟梁甫。三顧方勤譽日聞。小生姓韓。名壽。字德真。

世居南陽之堵陽。曾祖賢仕魏爲司徒。不幸幼失雙親。夙勤六藝。高才越俗。每舉筆而凌雲。壯氣橫

秋。方乘槎而犯斗。文旣鮮于綴錦。賦尤朗于金聲。枕經藉書。聖賢爲伍。策名脫穎。卿相是期。爲先達

之推。出等夷之秀。過人事業。欲配二而參三。經世謀猷。將襲六以爲七。爭奈青雲路杳。未遂升騰。黃

卷情親。尙專勉勵。要將姓字驚天下。須把功名奏日邊。昨蒙賈司空行文書到本縣。辟取小生去爲

司空掾。吾想男子生。桑弧蓬矢。以射天地四方。幼而學。壯而行。立身揚名。正在今日。況司空與我祖

父通家。必有汲引之意。只得打點前去。已曾分付小廝。收拾行李。想完備了。書童琴童那里。

〔金錢花〕〔淨丑上〕書童生得清標。清標。琴童且又蹊躑。蹊躑。畫堂終日把臀

搖。薰風盛。忒妝喬。家主見也難饒。〔見介〕官人有何使令。〔生〕昨日分付你們收拾行李。曾

完備麼。〔淨丑〕琴劍書箱鋪陳包裹之類。俱完備了。〔生〕既已完備。今日黃道大吉。可即起身去罷。
〔淨丑挑生行李生行介〕

〔甘州歌〕才高年少。荷司空禮幣相招。龍門容接。信是庸流難到。潭潭相府司文籍。耿耿襟期冠俊髦。〔合〕持法律。效管蕭。致身希不負青袍。行囊薄。去興高。觀光上國陟層霄。

〔前腔〕〔淨丑〕纔離故國郊。見繁紅媚綠。村村佳好。流鶯飛燕。趁風日聲弄新嬌。雲山滿目無終盡。囊篋隨身豈憚勞。〔合〕循幽澗。過小橋。酒旗搖漾慰蕭條。苔痕滑。樹蔭饒。危崖飛瀑雜鳴濤。

〔前腔〕〔生〕平生倚馬豪。吐胸中星斗。芒寒光耀。斜封徵辟。匆匆馳騁鳴鑣。琴書跋涉愁千里。頭角崢嶸奮一朝。〔合〕誇瑚璉。鄙斗筲。從來出谷尙遷喬。遘周制。珥漢貂。歷觀形勝赴皇朝。

〔前腔〕〔淨丑〕天涯漸寂寥。看峰嵐凝紫。殘霞縹緲。斜陽西逝。聞空谷聲答歌。

樵牛羊已下山徑靜。鳥鵲爭歸林木擾。〔合〕炊煙起。林影遙。垂楊古渡晚平潮。行蹤倦。旅況憊。馬蹄香逐暮塵消。

〔尾聲〕向神京程杳杳。前村燈火借今宵。明日鞭加款段勞。

一紙徵書起月評。

脩程不恤赴神京。

功名自是男兒事。

此去青雲足下生。

第三齣 欽賜異香

〔菊花新〕〔外上〕調元贊化宰羣工。寅亮承天寵。追蹤周召奏膚功。四海音徽鏘湧。清廟圭璋器。明堂柱石材。赤心存變理。無物不栽培。下官姓賈。名充。字公閻。平陽襄陵人也。先

父達仕魏爲豫州刺史。封陽里亭侯。晚年始生下官。言後當有充閻之慶。故以爲名字。襲爵爲侯。佐

晉受禪。爲開國元勳。累官司空侍中尙書令。封郡公。兼領軍務。清淨以寧民。心勤社稷。勞謙而得土。

譽溢公卿。精識造微。炯若著龜之先見。威名流遠。卓如松柏之後凋。定策興王。允孚人望。寬刑著令。

求奠邦基。惟獻替之日陳。殆弼諧之天授。擢登宰輔。實首中台。廣井邑之提封。增賦租之奠食。誠所

謂一人之下。萬人之上也。夫人郭氏。生男俱歿。止有三女。長名荃姐。爲齊王元妃。次名滂姐。當朝欲議爲皇太子正配。尙未成婚。另居別院。以待冊禮。幼女名午姐。今庚一十六歲。未曾許嫁。喜他才貌無雙。爲芳閨之窈窕。想我門楣有託。慰晚景之蕭條。屆此春光。宜開家宴。分付侍女春英。請夫人小姐出來。〔內應介〕

〔海棠春〕〔老旦上〕簾鉤聲觸和風送。正滿目韶華如擁。〔旦上〕無數曉鶯啼。百

轉醒殘夢。〔貼上〕煖樹紅爭。寒蕪綠動。牽惹芳情種種。〔合〕雲物望中新。淑氣

千門共。〔見介〕〔鷓鴣天〕〔外〕黃閣歸來鳥履輕。〔老旦〕天將五福介康寧。〔旦〕可憐詩禮虛先業。

〔貼〕應託門楣慰暮庚。〔外老旦〕人富貴。景和明。〔旦貼〕花枝灼灼鳥嚶嚶。〔合〕尊前有酒須當醉。

來日陰晴未可評。〔外〕夫人。我和你蒙祖宗餘蔭。賴皇帝洪恩。尊榮之極。人間罕比。雖無子嗣。幸有

女兒。聊將骨肉之情。且樂桑榆之景。〔旦〕大姐已作齊王元妃。二姐將爲皇太子正配。惟孩兒未得

成人。深孤後望。〔貼〕老爺夫人福履永綏。遐齡同享。小姐深閨淑女。雖不締宮壺之緣。君子好逑。終

當爲縉紳之匹。〔外〕言固有理。事皆由天。且賞春光。勿爲俗累。將酒過來。爛醉已擠酬白髮。〔衆〕輕

陰莫自負青春〔貼〕旦遞介〕

〔集賢賓〕侯門樓閣朱翠聳。韶光漸入簾櫳。莫把年華空斷送。整五鼎三牲脩供。萊衣笑踊。怎能穀膝前娛弄。〔合〕承帝寵。保富貴。如磐安鞏。

〔前腔〕〔外老旦〕檐花迎日影映紅。鶯簧巧沸林東。睡鴨蘭煙浮篆湧。願白首和鳴鸞鳳。中心幸孔。喜弱息晨昏承奉。〔合前左右引道小生捧盒上〕

〔琥珀貓兒墜〕恭承綸綍。齎捧出彤宮。逕到元勳甲第中。異香一種產西戎。黃封特旨頒恩。宣表宸衷。〔左右報介外老旦跪介〕

〔前腔〕誠惶誠恐。稽首吸仁風。竊愧何緣受惠隆。異香無價寶相同。開封望天門拜賜。感戴難窮。〔小生放盒在桌介〕此香出于西蕃。一着人身。香氣經月不散。乃無價之寶。上

位爺念老相公功德。特此頒賜。〔外〕下官方慚曠職。忽被殊恩。揣分奚堪。捫心有忝。分付安排茶飯。管待中貴。〔小生〕上命難稽。就此告別。頒恩來紫閣。復命詣丹墀。〔外看香介〕夫人。此香芬芳噴鼻。

馥鬱盈庭。真至寶也。孩兒。你把此香好好收藏。勿得輕用。〔旦〕理會得。

〔簇御林〕〔外〕君恩厚。注意濃。念吾儂。定策功。異香推惠加榮寵。恁韜藏青瑣。當珍重。〔合〕致欽崇。時存愛護。絕品卒難逢。

〔前腔〕〔旦〕君恩及。父意鍾。管天香。在我躬。憐他出自殊方貢。麝蘭馨未許同稱頌。〔合前〕

一種奇香出帝闈。

黃封特用布殊恩。

蘭閨自是多珍重。

不負君親兩意存。

第四齣 京邸遇舊

〔六么令〕〔丑上〕侯門廝養。避干戈鼠竄多方。京畿棲止免乖張。年向暮。體粗康。栖栖猶自悲家喪。悲家喪。世事如春夢。人情似曉雲。朱顏并綠鬢。又見一番新。老身姓鄭。本貫堵陽人氏。乃是先朝韓司徒老爺府中奴婢。只因世代變更。兵荒相繼。流落到京。夫亡無子。止有一女。叫做春英。在賈司空府中爲侍女。蒙小姐看顧。老身常得沾惠。儘好度日。每想故主韓老爺亡後。家業凋零。有一曾孫韓壽。年四歲時。忽遭兵亂。拋他來此。一向未知如何。物是人非。豈勝傷感。

〔一江風〕盼家鄉阻隔同霄壤。忽爾生惆悵。看當今世事紛更總。是塵中幻有女在他行。他行。那知我短長。論防老自缺終身望。

〔六么令〕〔貼上〕劬勞鞠養。昊天恩頃刻難忘。今朝請假出蘭房。離相府。詣萱

堂。〔丑〕我孩兒回來了。〔貼拜介〕莫嫌定省多疏曠。多疏曠。母親我每日想你。不能脫身。

今早裏過小姐。回來探問一番。又與銀十兩。代供甘旨。〔丑〕常蒙小姐看顧。何以克當。孩兒。你在豪門。光陰易過。只是我在此。年老身單。怎生是好。〔悲介〕

〔一江風〕〔貼〕我九迴腸。親老難廝放。邈矣疎音響。喜今朝得覩慈顏。蔗境安無恙。奴恨不兒郎。兒郎承歡沒久長。供甘旨暫時得相偎傍。

〔入賺〕〔生上〕跋涉匆忙。纔到京都覓寓房。〔進見揖介〕推簾求見。自通歷履

道端詳。〔丑〕官人住居何處。姓甚名誰。〔生〕告娘行。堵陽韓壽遙相訪。〔丑〕官人下顧。

有何見諭。〔生〕欲暫借華居貯客囊。〔丑〕寓此貴幹。〔生〕司空相。辟吾爲掾來投向。

特求依仗。

〔前腔〕〔丑〕觀儀容舉止甚相當。可信是南陽故主郎。〔生〕媽媽不要錯認了。〔丑〕

老身鄭氏。原是官人府中奴婢。那時官人方四歲。只因兵荒拋離多年。懷舊豈能忘。〔向貼

介〕孩兒。這位官人。就是平日說的主人孫子。你可過來同我拜見。〔拜介〕官人呵。冒風霜。卒

然失候希矜亮。〔生〕媽媽小娘。何須行這禮。〔丑貼〕得駐節蓬茅倍有光。〔丑〕官人。

我女兒賈府通房。推恩周卹同姻黨。且容來往。官人行李伴當在那里。〔生〕有兩個小

廝。擔些行李。卽到了。

〔掉角兒〕聽伊言衷情甚良。思故舊真誠怏怏。詢行藏雍熙似春。敘寒溫醇和

如釀。〔揖介〕這看承豈能當。實過望。恩誼難量。〔合〕山遙水廣。常縈懷想。今得

聚萍蹤梗跡。頓消悽愴。

〔前腔〕〔丑貼〕羨郎君器宇堂堂。更德性謙虛慨慷。據今朝豹隱山霧。到他年

龍翔雲浪。論人生道行藏。時得喪。隨機俯仰。〔合前〕

〔尾聲〕〔丑〕孩兒。你掃房廊。鋪牀帳。〔貼〕盤餐聊整。勸壺觴。〔生〕還自愧不速。三人

擾老孀。

邂逅邸中人。

情緣故舊親。

久離天作合。

枯木再逢春。

第五齣 司空受掾

〔末上〕人生分貴賤。世事有低昂。我小他鈴束。他尊我伏降。既居堂候職。便屬使令行。傳命趨階下。跟隨走道傍。馬前三步緊。轎後一聲忙。出入雖冠帶。勤勞沒俸糧。有官無事管。喜得不貪贓。自家是賈司空老爺府中堂候官。老爺早朝未回。在此守門。怕有公幹。只得伺候着。

〔寶鼎兒〕〔生上〕徵賢書一下。是處遺逸。忻忻稱慶。欲行道先爲之兆。羨仕途多通捷徑。〔淨丑上〕相府旁求諸俊彥。豪氣文光衝瑩。〔合〕似雲潤星輝。風揚月上。人材隆盛。〔相見介上〕相府招賢禮意勤。〔淨〕英才畢集似雲蒸。〔丑〕爲麟爲鳳王家瑞。〔合〕

唾手功名慰此心。〔生〕二位高姓貴表。仙鄉何處。〔淨〕小子河南陸舞文。〔丑〕小子山東朱弄法。

〔生〕到此貴幹。〔淨丑〕爲賈府辟取而來。請問老兄高姓貴表。仙鄉何處。〔生〕小生堵陽韓壽。亦蒙

賈府辟到。望二位挈帶同進參見。〔末介〕列位何來。〔衆〕吾輩蒙賈相公辟取來此。乞爲通報。末老爺早朝未回。少待一待。〔衆〕承教。〔末〕道猶未了。老爺已到。〔左右引道外上〕

〔阮郎歸〕金鑾漸遠珮環聲。歸來戶尙扃。〔衆跪迎介外拱手介〕諸賢遮道擁車迎。

深慚下士情。列位請起。〔衆應起介外〕隨從人都回罷。堂候官過來。〔末〕稟老爺知道。方纔門外

三個書生。就是老爺文書取來。堵陽韓壽。河南陸舞文。山東朱弄法。〔外〕既是這三人。乃天下名士。

快請進來。當以禮待。〔末請介衆拜見介〕某等久懸山斗之瞻。素乏涓埃之益。豈期庸品。遽值奇逢。

〔外〕常仰聲華。未親意氣。今蒙俯就。便覺生光。堂候官看坐的。〔衆〕既作家臣。難當客禮。〔外〕列位。

今日士林之蘭友。他年王國之楨臣。就坐何妨。〔衆揖坐介生〕某等自愧非才。勉承尊命。荷大造不

遺于小物。俾涓流得委于滄溟。禮出非常。榮生望外。〔外〕韓生。你是我故人之子。丹山彩鳳。注水神

駒。今爲掾史。又是通家。比別的不同。你與我管機密事務。堂候官收拾內掾房與他住。〔末應介外〕

陸朱二生。刀筆之才。變通之智。你與我管各衙門文書。堂候官可收拾外掾房與他住。〔末應介外〕

自今日爲始。各分職掌。〔衆〕領鈞旨。〔外〕臺榭之懷。非一木之枝。太平之功。非一士之略。聽我道。

〔皂羅袍〕竊忝官居台鼎。正身當樞要。心切冰兢。須知大廈衆材成。棟梁獨聳難安定。卑詞厚禮。數求俊英。安民阜物。仰答聖明。從今以後。仗列位贊襄。〔合〕管教世道雍熙盛。

〔前腔〕〔生〕遠被恩波涵泳。幸龍門容接。無任忻榮。敢陳芹陋效葵誠。家臣致主伊周並。〔外〕當今切務。以何爲先。〔生〕務農節用。輕徭減刑。并官省職。儲糧練兵。相公若能行此數事。〔合前〕

〔前腔〕〔淨丑〕某二人呵。蓬戶桑樞末品。忝教承侍坐。誼列隨行。識慚迂陋自知。明敢將刀筆輕馳騁。〔外〕盡二位所長。用心辦事。〔淨丑〕刑名律令。小綸大經。簿書典冊。條分類整。這些都是小節。還仗韓兄總其大綱。〔合前〕

〔前腔〕〔末〕恩相勞謙恭敬。素虛心下士。四海知名。今日天下賢人君子。拔茅彙進感孚情。氣相求也聲相應。指日可見治隆於上。天清地寧。化行於下。民豐物盈。

三位先生分理其事。老爺坐享其成。〔合前〕

乍詣龍門拭目榮。

仰酬洪造竭微忱。

庶明勳翼圖新治。

從此年年頌太平。

第六齣 繡閣懷香

〔薄倖〕〔旦〕霽色含花。煙光蘸柳。看庭臯風景。年年如舊。幽禽巧語。遊蜂輕逗。

〔貼合〕人知否。恁藹藹酣紅戰綠。最惱是空閨獨守。〔生查子〕〔旦〕林外鳥鳴春。聲

急驚人起。花霧潤侵肌。衣怯黃金縷。〔貼〕紫陌動芳塵。車馬多遊侶。莫作婦人身。無任傷春苦。〔叩

頭介〕前日給假回去。蒙小姐厚惠。母親多謝。〔旦〕不消謝得。因你連日去了。懶做針指。今日天色

晴和。可同習些女工。〔貼〕如此甚好。繡綳花樣。牙尺剪刀。都在桌上。請小姐動手。〔旦做介〕

〔羅江怨〕輕綃細且稠。針穿線抽。〔貼〕今日描做甚麼花樣。〔旦〕先描並蒂蓮在洲。

〔貼〕周圍做些水草。〔旦〕青萍綠荇逐波浮也。〔貼〕也做些禽鳥便好看。〔旦〕中綴鴛鴦

交頸雙雙耦。〔貼笑介〕好有趣。上邊空處做甚麼。〔旦〕雲霞覆上頭。上頭見五采輝煌

透。〔貼笑介〕小姐我到忘了。〔旦〕忘了甚麼。〔貼〕前日回家。纔與母親話問。有一個俊俏後生。走進門

來要借下處。他與母親說話。我偷把眼兒一瞧。見他人物生得十分標致。世所罕有。〔旦〕怎見得。〔貼〕我說與你聽。〔西江月〕肌潤無瑕美玉。臉凝有燦輕霞。朱唇皓齒鬢堆鴉。眉聳遠山如畫。十指春葱嫩好。雙眸秋水清賒。身軀扭捏俏冤家。難數風流聲價。〔旦〕不信有這般標致。〔貼〕不止容貌非凡。且是文才出衆。〔旦〕怎見得。〔貼〕我說與你聽。〔西江月〕意思雲蒸波湧。才華斗炫星明。揚鏢藝圃任縱橫。早向名場馳騁。良玉不雕世寶。靈根非種天成。文魔秀士早梯雲。含吐許多風韻。〔旦〕不信有這般抱負。〔貼〕果然才貌兼全。不是春英謊說。〔旦〕這後生家居何處。姓甚名誰。〔貼〕問其來歷。到是我家舊主人。堵陽韓司徒老爺的孫子。名壽。字德真。小姐。他是

〔前腔〕簪纓貴胤。儔青年懋修。〔旦〕既生宦家。又習儒業。乃是個好人了。〔貼〕文光銳氣沖斗牛。人中才貌獨稱優也。〔旦〕可比何等樣人。〔貼〕曹植休誇。不讓潘安右。

〔旦〕若果如此。其人可愛。〔貼〕不只如此。他還有一種可愛處。一發說與小姐知道。溫存性雅柔。雅柔最多趣味。生情竇。〔旦〕不信天地間生出這般十全的好人物來。〔嘆介貼〕韓生自生

得好。小姐。于你甚事。就嗟嘆起來。〔旦〕春英。你那里知道。人同此心。心同此欲。人生百歲。光陰能有

幾何。我爹爹呵。

〔香遍滿〕舊勳元宰。聲名冠九州。三女皆靈秀。我大姐呀。已去作王妃。我二姐呵。太子將婚媾。惟有我呵。正芳齡妙質。無忝爲好逑。〔貼〕小姐是閨苑奇花。椒房貴戚。怕沒佳配。〔旦〕今日呵。奈二星未燦。寂寞了桃天候。〔貼〕小姐。你道那俊俏後生的韓官人。來此何幹。〔旦〕爲何。〔貼笑介旦〕小妮子爲何又笑。〔貼〕不說便罷。若說知了。連小姐也好笑起來。〔旦〕有何緣故。〔貼〕我老爺與他祖父通家。知他名兒。

〔前腔〕茂材多學。移文特聘求。他懷寶乘時售。〔旦〕聘他何用。〔貼〕暫作掾黃扉。試展經綸手。昨日見過老爺了。待他明日進來。我報知小姐。去潛身青瑣。指示親注眸。看文魘風韻。不謊了春英口。〔旦〕如此甚好。待他來時。你千萬報我知道。看他一看。

蘭房寂寞苦傷春。

耽悞工夫繡不真。

燒斷金猊香篆冷。

桃源偏杏問津人。

第七齣 青瑣相窺

〔金瓏璫〕〔外上〕弧南多夜采，祥光方暎二台。〔老旦上〕張綺席，酌金罍。〔旦貼上〕

高堂春晝永，逍遙何必蓬萊。〔合〕當此際，且開懷。〔相見介外〕瑞鍾光岳，應名儒。日上

天衢，手自扶。〔老旦〕八表同風，開壽域。五雲異采，映台符。〔旦貼〕神仙術妙，何嘗學。廊廟功成，永不

磨。〔合〕雖乏斑斕，供老眼。門楣足慰，膝前娛。〔旦〕今日爹爹誕辰，喜與母親偕老。孩兒聊將旨酒，稱

慶。〔外〕夫人，我和你膝下無兒，眼前有女，既臨初度，當樂此心。孩兒若有酒，可斟過來。〔旦遞酒介〕

〔黃鶯兒〕殘雪半含梅，見陰崖凍乍回。夜來南極光生瑞。〔貼〕童顏未衰，龜齡

未頹。椿萱並茂，春常在。〔合〕紫霞盃，年年此日，骨肉笑花臺。

〔前腔〕〔外〕自慨已虺臚，衛王家志未灰。漢庭鳩杖，榮當代。〔老旦〕伉儷永諧。

門楣可俛，滿堂和氣春常在。〔合前生淨丑上〕

〔尾聲〕祝三台，祈千載，遶雲仙樂出蓬萊。疑向蟠桃會裏來。〔末上〕治世尊三壽，高

年見八朝。侯門初度日，賀客不須邀。〔衆見介〕頰堂候先生通報一聲，今日相公誕辰，吾等特來拜

祝。〔末〕三位正來得好，老爺今早分付，只開家宴，不接賀客，倘在朝公卿大小官員下顧，但收帖子。

登記門簿。不必通報。若是三位來。可卽稟知。想老爺要留三位一敘的意思。少待容稟。〔稟介外〕今日本不受賀。這三人是我門下。可請進來。夫人女孩兒且迴避。〔老旦〕我身子勞倦。暫去安息。〔貼附旦耳介〕那後生來了。可去青瑣中窺他。〔老旦〕華堂延外客。〔旦貼〕青瑣斂幽蹤。〔並下衆見拜〕相公獨立青霄。早扶紅日。今逢降岳。特造稱觴。〔外〕深慚非德。繆望長生。旣辱光臨。足知眷愛。堂候官看酒過來。〔衆遞酒介〕

〔排歌〕煙煖鶯啼。雲低鴈回。雨餘新茁蒼苔。夜來南極照天街。最喜今朝綺席開。〔合〕青山洞。碧水隈。人間到處有天台。花搖砌。酒泛杯。直須酩酊不知回。〔旦

貼上偷窺介低聲

〔北寄生草〕果然是文章客。美丰姿。聰俊才。桃源迷路風流輩。他生得這等標致。今世那里有宋朝又得生當代。潘安再世應難配。那人兒打動倩娘情。霎時間定有離魂害。〔外衆飲介〕

〔排歌〕紫燕穿簾。紅塵繞臺。清歌妙舞徘徊。主人不厭燭將排。坐客寧辭山玉

頽。〔合前〕

〔北醉扶歸〕〔旦貼低聲〕偷覷風流態。青瑣恨難開。枉自支頤嘆美哉。此見求

須再。繾綣從今在懷。整備相思害。〔貼〕小姐。天色將晚。請進去罷。〔旦〕且住。〔貼扯介〕明

日再來看他。〔貼〕秋波頻盼久。〔旦〕春意自傷多。〔回看下外與衆飲介〕

〔排歌〕寶鼎香銷。珠簾影飄。壺觴交舉重陪。管絃聲沸興方來。池面波溶返照

迴。〔合前〕

〔前腔〕〔末〕誼在通家。情濃似醅。相忘形迹無猜。清歡逸趣溢春懷。不覺牆東

月影來。〔合前〕

光陰如電逝難追。

百歲開懷能幾回。

今得及時聊一樂。

譙樓更箭又相催。

第八齣 相思露意

〔臨江仙〕〔旦上〕睡融春日揉金縷。閒聽鶯語移時。鳳釵斜亸鬢雲低。新愁添

一點。徒倚獨生吁。〔嘆介〕懶上妝樓學畫眉。春眠乍起繡簾垂。東風不管花無主。誰解停針不語時。奴家前日在青瑣中窺見韓生。看他內含玉潤。外表蘭清。風度襲人。芒寒色正。才華澤物。氣韻芬如。儀容若青霞之冠曉山。言語如爽籟之驚幽律。神峯標映。學海浩茫。谷風乘條。必降彌天之潤。雲蜺巨漢。將爲貫日之光。旣生衣冠甚盛之家。定是社稷非常之器。足慰人意。深縈我思。心上甚是愛他。因此日則憔悴昏沈。夜則轉輾反側。想我大姐已作齊王元妃。二姐將爲皇太子正配。我便有良姻。不過公侯之子。倘遇有才無貌。或有貌無才。及不風流灑落之人。豈不枉了青春。我欲得韓生偕老。難求媒妁通言。水性雲情。不可禁抑。夢魂愁緒。互相纏綿。總上心來。徒生浩嘆。正是針頭不解愁眉結。線縷難穿淚臉珠。

〔賞宮花〕東風透帷紗。牕刺繡遲。意在風流子。魂銷寂寞時。滿眼春愁無著處。羨他蝴蝶一雙飛。

〔卜算子〕〔貼送飯上〕玉粒軟翻匙。金碗香堪茹。小姐請午飯。〔旦〕我身子不自在。不要喫了。〔貼〕昨日好好的。爲何不自在起來。莫非冒了寒。〔旦〕不是。〔貼〕莫非傷了熱。〔旦〕也不是。

〔貼〕卻是爲何。〔旦〕我心上有些不快。〔貼〕小姐差矣。春英做侍女。靠着小姐洪福。喫好穿好。終日歡喜。莫說小姐。生于侯門。長于繡閣。少你那些兒受用。連日朱顏憔悴。不理釵環。綠鬢蓬鬆。常親枕席。綺窗倦繡。金針倒拈。行坐不安。飲食俱廢。如何是好。我說小姐的受用。

〔紅衲襖〕穿的是五花紋錦繡衣。戴著金鳳冠。簇著珠和翠。〔旦〕我不愛他。〔貼〕更有叮咚環珮。在恁裙間墜。〔旦〕也不愛他。〔貼〕羨你每日食前方丈餘。〔旦〕這一發不愛了。〔貼〕隨後的頤。可指侍側的氣可使。〔旦〕雖是他奔走承順。卻不如我意。〔貼〕因甚麼緩急關情也。黛鎖眉峰玉減肌。〔旦〕春英。你道我

〔前腔〕享繁華無事悲。怎知我有深思縈肺腑。〔貼〕小姐有愁。何不說與春英知道。

〔旦〕最恨同胞早歿兄和弟。念彼暮影椿萱日漸低。〔貼〕老爺夫人強健。小姐在廐下。正好享用哩。〔旦〕一時間空自喜。百年後有誰倚。〔貼〕這個不妨。大姐二姐既爲妃子。皆可倚仗。愁他怎麼。〔旦〕須道嫁雞各逐雞飛也。怎教我不心傷不淚垂。〔貼〕人生得失。各有定數。不必多愁。且到後園中看花消遣如何。〔旦〕我身子倦。不去。〔貼〕堂前去引鸚哥兒

要子到好。〔旦〕我也懶去。〔貼〕不然只在庭下看鶴舞有趣。〔旦〕我亦不耐煩。〔貼〕既都不去。待我烹些好茶來解渴。〔旦〕不要。〔貼〕安排些酒來消愁。〔旦〕這丫頭可厭。我身子不快。懶得開口。只管纏我。快走進去。〔貼〕只當斂跡聊求靜。何必多言白惹嗔。〔下潛上聽介〕旦嘆介。莫信直中術。須防人不仁。我自見韓生之後。相思成病。方纔春英問我。本欲說與他知。又恐女孩兒家口沒遮攔。倘露于外。不當穩便。因此托以他故。卻不是好。一種相思似海深。倚欄默默自沈吟。難將我語同他語。〔貼見介〕我曉得了。未必他心似我心。小姐你瞞得我好。我都聽着哩。〔旦〕春英。休要做聲。非是瞞你。恐你口不謹慎。故不對你說。

〔江頭金桂〕〔貼〕十載蘭閨承侍。緊隨身。不少離。朝夕深蒙付畀。凡百知契。今日緣何多過慮。小姐。你既是心上有相思。〔旦〕雖有此心。亦徒然耳。〔貼〕願爲蜂使。不須要金針倦繡。玉指支頤。昏昏終日似醉癡。待我去尋消問息。問息通因達意。

〔笑介〕小姐。這佳期。還你燈前笑縮同心帶。枕上歡成連理枝。

〔前腔〕〔旦〕非是我隄防疑忌。恐傍人講是非。偷把春情泄漏。花殘玉碎。因此

欲言還又止。〔貼〕小姐不說我自曉得。〔旦〕既識得我相思，急須傳與，切記隔牆有耳。言婉聲低，備述晨昏傾慕私，恁忘餐廢寢，廢寢欄杆徙倚。春英，這佳期若得會瀟灑風流客，怎忘卻慇懃撮合姨。〔貼〕小姐耐心，春英明日就去。〔旦〕老爺在堂上，須要仔細些。

一春憔悴倚紅妝。

幾許幽情且暫忘。

若得鵲橋通一渡。

管教織女會牛郎。

第九齣 託婢傳情

〔鳳凰閣〕〔生上〕叨承吏事，奉法公平，清似水，謹持三尺，佐蕭曹，喜得潭潭門日閉，亦無案牘勞神思，從容燕居。年少才名播玉堂，司空掾職豈尋常，朝無苛政，身多暇，終日題詩入錦囊。小生素讀儒書，兼通吏事，蒙賈相公辟爲司空掾，念是祖父通家，特加眷愛，爲忘年忘勢之交，比別的門客不同，可喜可喜。每想自家本非爲掾之人，只因志欲大圖，故此身甘小就。我目今以他依靠，他日後把我薦揚，所謂枉尺而直尋也。今日府中無事，且在寓所一坐。況鄭媽媽又

不在家。謾自消遣一回。

〔駐馬聽〕四海無虞。相府清閒。樂有餘。每日研硃點易。掃石焚香。閣筆吟詩。金樽獨酌。月明時。瑤琴謾鼓清風裏。雖則是爲掾名微。黃扉出入。不失文林佳致。

〔前腔〕〔貼上〕乍離香閨。蓮屨輕盈。舉步徐。不顧苔痕膩滑。轍迹縱橫。道路崎嶇。心忙迤邐。幾多時。茅簷已是吾家矣。〔見介〕春英。何事又走回來。〔貼〕遽問我來歷。因依。〔住介〕倉皇失措。自覺赧然羞恥。〔生〕春英。你此回必有緣故。欲言不言何也。〔貼〕

我母親在那里。〔生〕媽媽出外未回。〔貼〕如此正好講話。〔生〕你既有話。可坐了講。〔貼坐笑介〕我有一樁心事。不好啓齒。〔生〕你來說心事。便是我心上人了。但說不妨。〔貼〕官人。不教你天生這般標致。有個人想你。特來通信。〔生〕是誰。〔貼〕你猜一猜。〔生〕莫非老爺的朋友。〔貼〕不是。〔生〕莫非老爺的親戚。〔貼〕也不是。〔生〕敢是新到的門客。〔貼〕一發不是了。〔生〕教我難猜。你把那人生得或長或短。或瘦或肥。或老或少。且說個形像與我。〔貼〕說也是。官人你聽着。〔西江月〕軟玉溫生素質。輕霞采襯朱顏。綠雲蠶蠶擁雙鬟。脣擬櫻桃鮮綻。星眼碧澄秋水。柳眉黛聳春山。金蓮玉筍盡堪

觀鐵石心腸也亂。〔生笑介〕元來是個女人。據你之言。乃天下絕色。于今罕有。當于古名姬中求之。只恐不能設如此。〔貼〕尙有好處。我比方與你聽。〔西江月〕瀟灑湘江妃子。風流巫峽神姬。才優褒。奴與西施。誰數妖嬈姐已。〔生〕那家寶眷。姓甚名誰。〔貼〕開國元勳之女。當朝皇子之姨。要知居址姓名誰。便是司空賈氏。〔生驚介〕阿呀。我道是那個。元來府中的三小姐。怪哉。小姐是金屋阿嬌。瑤臺仙子。小生乃草萊下士。韋布匹夫。比而論之。真個

〔桂枝香〕天淵殊判。薰蕕相遠。深蒙不計僊凡。一旦俯垂青盼。道靈犀已通。已通遂生牽絆。未知真贋。〔貼〕這是實話。不必疑心。〔生〕自盤桓天池。月窟花雖好。怎得雲梯向上攀。〔貼〕官人不可推拒。辜負我小姐這片好心。〔生〕春英姐。我且問你。小姐身生公族。深居閨閣之中。小生職掌掾房。端坐廳堂之側。兩下裏未曾目接。一時間那得心期。必有緣故。可言其詳。〔貼〕豈無緣故。我仔細說與你知道。〔生〕願聞。〔貼〕

〔前腔〕前日我老爺呵。辰逢華誕。官人稱觴預宴。小姐潛身青瑣相窺。佳麗風流着眼。便春意滿懷。滿懷忻忻稱羨。源源留戀。〔生〕留戀怎麼。〔貼〕要團圓。〔生〕小姐意甚

好。只是事有些難成。〔貼〕若不成呵。他如春蠶到死絲方盡。蠟燭成灰淚始乾。〔生〕多承小姐美情。豈敢辜負。待我設計。做個長便。你先去上覆一聲。

〔醉翁子〕呼喚感小姐芳情款款。願插翅凌虛。上林游翫。〔貼〕既有此興。可卽同去。〔生〕豈敢。〔貼〕卻又爲何。〔生〕恐跡隔雲泥。闌苑春深。覓路難。〔貼〕想你意兒懶了。〔生〕非意懶。便縮地升天。也覺問關。

〔前腔〕〔貼〕官人你當感我小姐長吁短嘆。要誓海盟山。擬在百年同歡。〔生〕我心豈不欲此。〔貼〕作速便好。若遲了呵。〔生〕遲了些便怎麼。〔貼〕深患。倘泄漏春情。未便遊蹤任往還。〔生〕不要性急。緩緩圖之。〔貼〕休怠緩。可逐蝶追蜂。速繞花欄。〔生〕待我稟過老爺。只說身子不快。早晚公務。出入不便。遷在內掾房安歇。如此好尋門路做事。〔貼笑介〕此計甚妙。小姐懸望。我先去道達此情。

機事須囊括。

心期在鳳交。

徘徊花上月。

空度可憐宵。

第十齣 蘭閨復命

〔步蟾宮〕〔旦上〕青瑣窺觀生悒快。苦殺也朝思夕想。繡牀空倚減紅妝。魂逐楊花飄蕩。〔搗練子〕紅嫩嫩。綠深深。風遞鶯聲出柳陰。悵望上林春色好。耳邊消息正沈沈。自從窺見韓生之後。心動神馳。眠思夢想。深沈朱戶。寂寂無聊。轉輾繡衾。悽悽不寐。翠黛愁低斂。紅絹淚暗拋。今早着春英去通言。未知如何。他若肯來。只恐門戶重重。急切不能相會。他若不來。使我心猿意馬。不能檢束。當此晝長人靜。空度青春。怎生是好。正是乍雨乍晴。花自落。閒愁閒悶。日偏長。〔嘆氣介〕

〔駐雲飛〕淚界紅妝。萬轉千回。懶下牀。一點靈犀放。黛鎖眉峰上。嚶。無語自傍徨。凭欄凝望。恨結丁香。芳草牽愁長。目斷遊蜂到蜜房。目斷遊蜂到蜜房。今行坐不安。神思甚倦。不免暫臥片時。多少是好。〔倚桌臥介〕

〔前腔〕〔貼上〕匍匐街坊。只爲多情窈窕孃。染卻風流恙。撞了糊塗瘡。嚶。婉轉覆蘭房。將情傳向鑽穴踰牆。密計須停當。免泄春光惹後殃。免泄春光惹後殃。

阿呀。小姐睡哩。〔旦做夢低聲〕韓德真。你來了。我愛殺你也。〔貼倚旦聽介〕旦手抱貼介。想得你緊。你知之否。〔貼笑介〕小姐不要性急。韓官人就來也。〔旦笑介〕是春英。〔貼〕是我。〔旦〕好惶恐。〔貼〕見了春英。尚且怕羞。若見韓官人。還要怕羞哩。〔旦〕春英。今早自你去後。

〔素帶兒〕無聊賴。倚遍欄杆意渺茫。一便似魚中綸鈎纏仗。慙慙望阮郎。銷盡金猊篆縷香。〔貼〕勞了小姐神思。費了小姐工夫。韓官人都知道了。教多上覆。來時面謝。〔旦〕他心諒。攜雲握雨。訂在何方。

〔昇平樂〕〔貼〕休望天涯咫尺。〔旦〕爲着甚麼。〔貼〕爲海深潭府。山樣巍牆。蜂情蝶思。自覺不便輕狂。〔旦〕雖則如此。思量一計便好。〔貼〕思量探花須近上林傍。方可恁紅酣綠釀。且姑寧耐。不勞神女夢迫襄王。

〔素帶兒〕〔旦〕春風入夢長。難禁斷腸。相思處。這些病早在膏肓。喬才意未降。豈知恤孤鳴獨舞。鳳春英。那韓生呵。當相諒。香銷玉滅。寢廢餐忘。

〔昇平樂〕〔貼〕行藏書生拘檢。這俚香倚玉。豈曾經慣。小姐你是奇珍異寶。可

深祕翠幃珠幌。〔旦〕若是這等悶殺人。也。〔貼〕端詳孤燈權自伴昏黃。待他那月兒幾望。香溫玉潤。此時消卻風魔災瘴。

〔尾聲〕〔旦〕朱鉛冷落心期謊。〔貼〕莫把精神暗裏傷。〔合〕管取兩下相思債盡償。〔貼〕韓官人設計。要稟老爺遷進內揀房安歇。方可成事。〔旦〕如此最好。

心期共訂結連環。

咫尺天涯欲見難。

此去全憑撮合手。

免教紅袖淚痕斑。

第十一齣 氏羌謀叛

〔夜行船引〕〔淨領四將校上〕雄據西夷名號顯。恥稱藩。頻將鬚撚。一奮干戈。中原

原席卷。方見轟雷掣電。陰陽分內外。人物辨華夷。在外爲酋長。王封亦不卑。咱乃氏羌國王是

也。形體並生于天地。名稱無間于古今。聲教殊方。云爲異習。僻居外域。往來紫塞。而聞所未聞。每覲

中朝。出入玉關。而見所罕見。頗知華人禮樂。甚殊雞骨之占年。竊倣上國衣冠。不比鵝毛之禦臘。雖

是蠻貊而祗服。實非馬牛而襟裾。東之日蝨。南之炎洲。同涉鯨波。犯蜿蜒而歸王。西之月蟾。北之水

天共引繩索。荷毳毼而修貢。仰龍飛以輸款。恪遵西服之儀。躬虎拜以獻忱。忝在遠人之列。叵耐中朝無道。皇帝屢更。如今司馬篡位。國號爲晉。仍舊要咱們朝貢。咱心中甚是不甘。且待宣魯于來。商議一個長便計策。宣魯于在那里〔將校請介〕

〔番卜算〕〔丑上〕酣飲樂穹廬。琵琶彈不厭。一枕黑甜餘。那覺流光轉。生長在
氏羌。又尙氏羌主。職稱宣魯于。榮貴真無比。〔相見番語介淨〕宣魯于。中朝無道。皇帝屢更。如今司
馬篡位。國號爲晉。仍要咱們朝貢。咱心中甚是不甘。特與你商議。他國大。咱國小。小固不可以敵大。
爲此歷代稱藩朝貢。目下若不朝貢。他必舉兵來伐。如何是好。〔丑〕啓大王知道。豈不聞在先中朝
皇帝。設險而築城。反築了四海之怨。復讎以窮武。實窮了八荒之財。自古治世之明君。俱無禦戎之
上策。況那晉朝篡人之位。竊人之國。君臣之分已大亂矣。所謂夷狄之有君。不如諸夏之無也。難怪
咱們不行朝貢。〔淨〕雖則如此。他慮各國效尤。必舉兵來伐。把咱們做個樣兒。斷不相饒。你且說個
長便計策。〔丑〕大王放心。咱國中糴草可支十年。乃是足食。甲馬可當十萬。乃是足兵。能戰能守。愁
他怎麼。〔淨〕宣魯于之言。深爲有理。衆將校以爲何如。〔衆〕這計策甚高。〔淨〕咱好快活。咱好快活。

你們聽我道。

〔豹子令〕自古華夷冠履辨。冠履辨。稱臣朝貢例相沿。例相沿。今日中原輕篡奪。難將虛禮縛腥膻。縛腥膻。〔合〕算來各主一山川。從今彼此不相干。

〔前腔〕〔丑〕雄霸西羌羞貢獻。羞貢獻。覬覦中國久垂涎。久垂涎。越志橫行惟我獨。攻城略地讓誰先。讓誰先。〔合前〕

〔前腔〕〔二將〕鐵騎銅駝當百萬。當百萬。休誇駉牝有三千。有三千。足食足兵能固守。中華雖大勢難纏。勢難纏。〔合前〕

〔前腔〕〔二校〕執銳披堅經百戰。經百戰。餐風宿露歷兵燹。歷兵燹。聽得一聲嘶殺也。張牙奮爪似飛鳶。似飛鳶。〔合前〕

發揮新號令。

整頓舊山河。

我自有防備。

他人沒奈何。

第十二齣 協謀出征

〔夜遊朝〕〔末上〕少攻學術鳴當世。蒙簡取入侍儲帷。密邇天光。籌量機務。汲
汲志存經濟。日上彤庭侍袞衣。運謀廊廟贊樞機。逢時報國能忘己。盡吐丹衷映紫微。下官任愷。字
元襄。樂安博昌人也。官拜侍中。兼太子少傅。學本謀身。材堪用世。懿文華國。亶居俊譽之隆。正色立
朝。屢效排奸之力。踐更衆職。夷險一心。肆因銓總之餘。入侍青宮之邃。倚典刑于老成之重。崇道義
于爵齒之尊。式敷衛護之功。仰副責成之意。喜得朝廷明聖。世道太平。但近日邊上飛報。氏羌反叛。
擾害地方。不免聲罪致討。又起兵端。且待中書令庾公到來。商議區處。〔小外上〕

〔西地錦〕曾見清風白簡。更期霖雨黃扉。驟聞邊報夷情事。懷柔之道須知。咫
尺親龍袞。從容接鳳池。化原資贊畫。陪位近台司。下官庾純。字謀甫。潁川鄆陵人也。官拜中書令。性
本不回。才優適用。發跡衡茅之下。願傾葵藿之忠。早奮雲霄。已際攀龍之運。繼司耳目。常懷補袞之
慚。遭遇聖明。久叨任使。屢前而卻。知不足而心有餘。既仆而興。威未加而恩已至。昨約任侍中議氏
羌事情。特來相會。此間是他門首。不免逕入。〔見介末〕庾大人。氏羌之變。朝廷深以爲憂。爲今之計。
當何區處。〔小外〕氏羌之變。非偶然也。有個緣故。〔末〕願聞。〔小外〕秦涼二境。比年屢敗。胡虜縱暴。

百姓荼毒。遂使異類扇動。害及中原。皆由鎮守不得其人。撫綏不得其道耳。〔末〕然也。我們明日早朝。當舉薦一員才德兼全。智勇俱備的大臣。出鎮關中。方好。〔小外〕在朝公卿。難乎其入。必須司空賈充。實堪此任。〔末〕賈充雖有幹理之才。而無剛方之操。不能正身率下。專以諂媚取容。這人去不得。〔小外〕任大人。你但知其一。不知其二。那賈充爲人。下官豈不曉得。

〔泣顏回〕本是小人儒。恃元勳。罔上行私。夤緣宮貴。巧機關。女做王妃。貪心無止期。〔末〕女兒做了齊王之妃。遂其貪矣。怎麼又無止期。〔小外〕任大人。你尙不知哩。他還有一幼女。又將圖太子求婚配。〔末〕事尙未成。便成了呵。與我何預。〔小外〕倚椒房。蒂固根深。弄權綱。把衆凌欺。因此要舉薦他去。是疎斥小人之計也。

〔前腔〕〔末〕嗟伊。狐假虎之威。惟患一身得失。那知四海安危。胡行無忌。從此後勢盛難持。〔小外〕下官所言。正爲此耳。〔末〕可先爲遠思。履霜必見有堅冰至。〔小外〕陰道之盛。必害乎陽。不可不慮。〔末〕這也何妨。且由他蔓引株連。怎傷吾瑤草瓊芝。〔小外〕任大人。你不知我就裏。我們舉薦他去。朝廷以爲重用大臣。殊不知那邊狼子野心。反覆不

常。略有騷動。卽爲失機。他日藉口論之。彼雖是椒房之親。朝廷亦不得以私情而廢公法矣。此正所謂將欲取之。必固與之之術也。〔末〕所言甚當。不可輕動。還要仔細躊蹰。

〔前腔〕〔小外〕躊蹰。此舉正相宜。借重臣威望。信服邊陲。關中之地。又爲衝要之樞。舉薦賈充去呵。〔末〕去便怎麼。〔小外〕懷柔遠夷。假尊崇暗寓著牢籠計。管教他逝水無迴。惡冤家且得相離。

〔前腔〕〔末〕行之。果決莫教遲。同心協力。早奏丹墀。投機乘勢。此言料得能依。庾大人。我和你密切幹成此事。他們怎知。一便似平地風波起。縱使有口辯懸河也。難饒身落湯池。

一封朝奏九重天。

要使奸回離目前。

心似神羊能觸惡。

管教庶位布諸賢。

第十三齣 受詔安邊

〔秋夜月〕〔外上〕蓋世豪雄。允作王家棟。身在朝廷爲輕重。反遭羣小多愚弄。

這怨忿滿胸。這怨忿滿胸。我以禮待人。人未嘗敬我。橫逆由是來。難釋愁眉鎖。近日邊報氏羌反叛。擾害地方。只因鎮守不得其人。撫綏不得其道。致有此變。朝廷欲用一員才德兼全。智勇俱備的大臣。出鎮關中。將以威服遠夷。爭奈侍中任愷。中書令庾純。平素與我有怨。今早朝廷面前。舉保我去。異口同詞。極力稱贊。陽爲尊崇之名。陰寓疎斥之計。其實中傷我也。我想此行所係不小。可惱。可惱。〔怒介〕

〔嬾畫眉〕驟加鉄鉞制西戎。忽若轟霆震夢中。神銷股栗氣沖沖。恐禍至無旋踵。我此去後。朋奸滿朝。有誰在皇上面前。肯方便一言。甚日雙旌返漢宮。我也想來。欲要上表辭官。朝廷決不廝放。衆公卿謂我不忠不勇了。

〔前腔〕金符準擬鎮關中。此去難占吉與凶。我平生呵氣衝天宇。光動斗垣。甲兵百萬枉羅胸。怕狼子頻騷動。怎免干戈戰血紅。〔淨上〕金殿九重明日月。丹書一札下雲霄。三呼三祝君恩重。敕使宣威山岳搖。〔見介〕聽事官稟老爺。朝使到了。〔外〕分付連忙擺香案迎接。

〔丑賚詔上〕

〔生查子〕五色麗天文。特倚元勳重。當寧正懷憂。但願皇圖鞏。聖旨已到。跪聽宣

讀。〔外跪介丑〕皇帝詔曰。夷不亂華。素分冠履。義明討罪。必用干戈。茲者氐羌反叛。逞豺聲以欺天。恣狼性而犯上。良由所任內不足以撫夷夏。外不足以捭窮兇。輕用其衆。而不能盡其力故耳。非得腹心之重。推轂贊成。大匡其弊。恐爲患未已。司空賈充。雅量弘高。遠見明遠。武有折衝之威。文懷經國之慮。信結人心。名震域外。使權統方岳。出鎮關中。則朕無西顧之憂。而遠近獲安矣。其以充爲使。持節都督秦涼二州諸軍事。勉圖偉績。用對殊休。謝恩。〔外〕萬歲萬歲。〔相見介外〕請過聖旨。分付擺飯。管待朝使。〔丑〕小官卽要復命。邊方夷情。比別事不同。豈容延緩。就告別了。匆忙辭紫閣。咫尺向丹霄。〔下外〕朝命旣下。勢不容已。只得打點啓行。且把家事付託一番。堂候官。你快請韓掾史進來。〔淨請介〕

〔懶畫眉〕〔生上〕畫堂何事恁匆匆。〔外〕氐羌反叛。朝廷命我出鎮關中。〔生揖介〕有甚

姦回嫉我翁。〔外〕侍中任愷。中書令庾純。與我有怨。故在朝廷極力舉薦。〔生〕阿呀。邊方夷情。乃利害所關。此行不與泛常同。氐羌反叛。乃是蜂蠆養而成毒。鳥獸飽而忘恩。相公此去。旣膺

推轂之寄。當切枕戈之憂。須緊把烏號控。萬里干城奏懋功。〔外〕德真。你是我通家。知我心事。此行安危所係。吉凶難保。我去之後。你卽搬入府中內揀房安歇。事無大小。悉代我照管。

〔前腔〕〔生〕受知門下感恩隆。遭際今爲間世逢。〔外〕朝夕須要小心。〔生〕勤劬朝

夕罄愚衷。相公此去。四方無警。三錫有加。惟願取承天寵。博帶褒衣嘯晚風。〔淨〕夫人小

姐出來了。韓先生。我和你迴避。〔生別介〕我知恩已受了寧託。〔淨〕你服事難辭旦夕勞。〔並下老

旦旦貼上〕

〔玉山頹〕姦謀陰中致官家命下九重。念衰齡出鎮西陲。衽金革身罹驚恐。威權操縱。早看取華夷一統。〔合〕此別相悲痛。淚溶溶。甚時旌節再旋東。

〔前腔〕〔外〕平生忠勇鎮關中。禦侮折衝。夫人孩兒。王臣蹇蹇。匪躬之故。固所不辭。只是我到那邊。舉目無親。苦清霜鼓角聲高。對淒風旌旗影搖動。〔老旦旦〕骨肉分離。好苦殺人。〔外〕天涯鄉夢。料骨肉夢中歡共。〔合前〕

〔尾聲〕意怔忡。人空惚。山長水遠信難通。彼此相懸恨怎窮。

朝受君言不宿留。

匆匆行色錦貂裘。

此回定顯安邊策。

免卻中原後日憂。

第十四齣 夕陽亭議

〔出隊子〕〔末小外小生淨各冠帶上〕羣鷗馳騁。羣鷗馳騁。特餞元卿出鎮行。簪纓

畢集夕陽亭。祖帳風寒柳色青。立馬持杯。千里離情。出郭送行客。雙旌漾夕暉。離亭一

別後。只看白雲飛。〔末〕司空賈公出鎮關中。奉朝廷旨意。文武百官。都來送行。此是西城外夕陽亭

了。不免少坐片時。待他來作別可也。〔衆〕你看旌旗蔽日。金鼓喧天。賈公到矣。〔左右引外上〕

〔前腔〕欽承王命。欽承王命。秉鉞安邊速去程。清霜冷拂錦貂輕。欸段加鞭壯

氣盈。殫力成功。鬚鼎鐫名。〔相見介衆〕飄飄使節出王畿。爲壯皇圖萬里威。行色一杯燕市酒。

春風三月故山薇。〔外〕雲黯黯。草萋萋。臨歧把臂淚沾衣。陽關不忍聽歌唱。兩地相思一樣悲。〔衆〕

老大人爲邊情而遠行。學生輩奉君命而來送。聊具一觴。少伸寸敬。〔外〕下官深愧菲才。繆膺重任。

遠勞餞送。殊覺榮生。旣承列位厚情。敢不祇領。〔衆遞酒介〕

〔畫眉序〕征旆擁離亭。腸斷驪駒豈堪聽。羨君侯此去細柳安營。願諸蠻耒耜耕耘。期萬馬鞭韁閒靜。〔合〕這回再把天山定。應須早返霓旌。

〔前腔〕〔外〕世道賴清寧。蠢爾腥膻徒自逞。仗皇休此去宣布威靈。月明時雞

犬皆安。天盡處貔貅無警。〔合前外〕感列位相餞。飲酒多了。〔衆〕邊情緊急。不敢久留。就此拜

送。〔拜介外〕今朝一別後。何日更相逢。〔衆〕回首凭高望。應知彼此同。〔下丑急行上〕

〔銷金帳〕朝簪方卸。促騎到郵亭。送司空。敘別情。下官荀勗。字公曾。潁川潁陰人也。官

拜中書監。加侍中。領著作。與賈司空共定律令。爲莫逆之交。如今司空出鎮關中。滿朝文武。欲進忠規。獻替者。莫不忻幸此舉。望切維新之化。惟我憐他。有一挽回之計。當衆公卿面前。不好說得。故此獨來私敘。〔左右報見介外〕荀侍中。你是我好友。何反來遲。〔丑〕下官所以遲來。正爲好友之情耳。衆公卿去。敢盡一言。左右且迴避了。〔左右下外〕請教。〔丑〕你聽我道。

〔宜春令〕今日事。甚不平。論伊爲朝廷鉅卿。〔外〕任大責重。理固然也。〔丑〕遭諸姦

佞。假公罔上。埋機穿。〔外〕逆來順受。無可奈何。〔丑〕可惜恁受制朋謀。眞異哉。委靡

不兢。因此遲來把醉翁提醒。

〔前腔〕〔外〕苟侍中。他陰中我了。明爲軍機。豈容暫停。既承君命。若抗辭推避。非忠
髓。我此去日遠天顏。有誰來代吾力諍。是以憂疑不快。遂作心病。我被任愷庚純擺
佈。勢不能免。進退兩難。計無從出。怎生是好。〔丑〕已有成命。辭之實難。獨有結婚太子一節。勢必頓
駕而留矣。〔外〕此事雖好。有誰爲我謀之。〔丑〕司空你不必愁。

〔前腔〕婚姻事。我會行。在朝堂從容言頃。管教緣諧成聘。司空你且不必急行。可
暫停輪須引領。你今夜呵。望三二星何必憂疑。到明日呵。行六禮自生忻慶。也不用
求歸。應有朝使宣請。〔外揖謝介〕

〔前腔〕蒙調護。可玉成。須防他讒人聲影。雖是姻緣前定。仗冰言一決方爲準。
倘能穀瓊玉交枝。庶免卻桑榆飄梗。苟侍中。你果成得此事。下官感你的恩德。真是鏤
骨銘心。沒齒難泯。〔拜別丑介〕

要成轉日功。

須用回天力。

眼望旌捷旗。

耳聽好消息。

第十五齣 春閨寄簡

〔亭前柳〕〔旦上〕蹙損遠山眉。幽懷誰得知。衾寒愁未起。滴盡淚臙脂。可憐人
隔雲深處。柳外鶯聲。正是斷魂時。〔憶秦娥〕花深深。一鉤羅襪行花陰。行花陰。閒將柳帶。試
結同心。耳邊消息空沈沈。畫眉樓上愁登臨。愁登臨。海棠開後。望到如今。奴家每日思想韓生。愁眉
頻斂。淚眼偷淹。倚繡牀不覺檀口咨嗟。對菱花自知玉容寂寞。此心此恨。拋放不下。好似和針吞卻
線。刺人腸肚繫人心。前日着春英去通情。要他相會。爭奈書生膽怯。逡巡畏縮。不敢進來。許下設個
計兒。搬進府中安歇。以便作事。誰料氏羌反叛。朝廷命我爹爹出鎮關中。臨行之際。分付韓生搬入
府中。照管家事。正是天假良緣。甚遂我願。可喜可喜。今早聞得韓生已在內揀房了。我心急欲會他。
又恐門戶深邃。卒難往來。雖有母親在堂。晚年多病。不耐管閒事。二姐因太子議婚。又居別院。只我
自家主張家事。奴婢秋香冬秀等輩。俱屬鈴束之下。不必愁他。今夜月明。正好行事。且待春英來。與
他商量則個。〔貼上〕

〔前腔〕曉日映重幃。雙雙燕子飛。蘭煙方裊裊。花氣正霏霏。有人獨倚欄杆。觀滿院韶光。何處是佳期。〔點絳脣〕春雨濛濛。淡烟深鎖垂楊院。煖風輕扇。落盡桃花片。〔看旦介〕薄倖不來。前事思量遍。無由見。淚痕如線。界破殘妝面。小姐要會韓生。韓生正要設計進來。誰想老爺有關中之行。正輪機巧。今早搬在內揀房住下。不免去與小姐計較。方便他們成事。多少是好。〔見介旦〕春英。我連日情懷有恨。梳洗無心。香銷了六朝金粉。清減了三楚精神。好生不自在。〔貼〕小姐不必愁煩。今早有個好太醫在那里。若請得他來。你的病就好也。〔旦〕我是心病。非藥所能治。雖華陀扁鵲。有何效哉。〔貼〕這太醫最妙。正是治心病的。強似華陀扁鵲。他不施法灸神針。能消災瘴。不用散丸飲片。可去風魔。其實十分應驗。〔旦〕住在那里。姓甚名誰。〔貼〕遠不遠千里。近只在目前。乃是散相思五瘟使者。見在司空府中內揀房安歇。姓韓。名壽。字德真。〔旦笑介〕呸。這小妮子慣耍癡耍。〔貼〕不是春英癡耍。因是這般病症。須用這般太醫。〔旦〕不要胡說。今早韓官人既到你相見他麼。〔貼〕相府家法。豈敢擅便。如今老爺不在。小姐管家。但憑分付引他相會便了。〔旦〕春英。我只爲着

〔祝英臺〕這酸丁真可媚。釀就我相思。〔貼〕雖然想他。對此春光。且自消遣。〔旦〕花柳鬪妍。鶯燕爭飛。都是我的愁機。〔貼〕放下念頭。不要長吁短嘆。〔旦〕歎歎。凭欄杆。曉望遲遲。滿苑逞嬌呈美。端詳看。沒個比他風味。

〔前腔〕〔貼〕知趣。他是玉樓人。瑤島士。舉止多旖旎。更有材裕濟川。文擅雕龍。堪作並蒂交枝。〔旦〕正愛他才貌兼全。故欲與相親。〔貼〕還未。〔旦〕你又作難。〔貼〕最堪憐。鳳遠秦臺。雲斂巫峰十二。小姐在深閨之內。韓生是小心之人。麤麻線穿針。怎透關兒。

〔旦〕我想前日他不肯來。只因口說無憑。所以不信。沒有高興。如今我題一首詩封去。他若見了。自然肯來。〔貼〕如此甚好。有了簡帖兒。他便信你。不然又是畫餅。〔旦〕取紙筆來。〔貼〕取放介。小姐用些意思。寫些寒溫。這簡帖兒就比靈符。請將一召即來。〔旦〕這個我自知道。不必丁寧。〔寫介〕佇立桃源側。花陰待月明。劉郎能一盼。足慰惜花情。〔貼〕這詩寫得停當。一見就來。〔旦〕封付介。春英。你將此送去。須索小心。

〔前腔〕深倚。傳吾許久春愁。刪抹斷腸詩。你去對他約定。今夜月色繡牕。花影雕

欄便是箇中佳期。〔貼〕若有心話。一發傳去。〔旦〕須知我那萬種相思。只爲一時相覷。準擬要共締鳳盟鴛誓。

〔前腔〕〔貼〕今去。我與恁送煖偷寒。婉轉達衷私。〔旦〕說我相思苦切。〔貼〕去說小姐。釵驪玉橫。鬢亂雲偏。憔悴幾番徙倚。韓官人聽了這話兒。忻然就肯來了。堪喜。管教他度柳穿花。任恁攜雲握雨。料今夜不似昨宵情緒。

修罷緘書欲斷魂。

安排餓眼望黃昏。

風流才子多春興。

管取輕敲月下門。

第十六齣 椽房訂約

〔賀聖朝〕〔生上〕春來花信相縈。那堪啼鳥聲聲。高唐有夢總難憑。看巫岫崢嶸。〔浣溪沙〕雨過紅芳濕未飛。華堂寂寂透朝暉。遊蜂釀蜜竊香歸。金屋無人風竹亂。玉爐盡日水沈微。傷春空有斷腸詩。前日春英到寓所來說。小姐垂盼小生。要求相會。我想潭府深沈。難展探花之手。浮蹤跼踖。常懷捉月之疑。他兩個女孩兒家。不知利害。偶乘花興。遂訂鴛盟。他言之甚易。我行之

實難。故把權詞推托罷了。正要設法圖之。誰料司空出鎮關中。命我搬入內揀房安歇。照管家事。正是天賜其便。當此春明景和。晝長人靜。如何排遣。

〔好姐姐〕自從芳卿致情。林深處花期難訂。柔條嫩萼。須看連理成。若得與小姐成事呵。心歡慶。翔鸞屏裏雙肩並。睡鴨鑪邊兩意傾。小生風情海樣深。小姐色膽天來大。〔笑介〕若沒有恁般大膽。怎容得這等深情。他也風流。我也知趣。正是天生一對兒。小姐乃天上靈苗。人間妙品。雖未曾親承其動履。亦可以想見其形容。

〔前腔〕將伊丰儀細評。必是花模樣。星眸雲鬢。冰肌玉格。溫香笑語生。料他生得般般可意。件件過人。愛殺我也。〔合前〕

〔行香子〕〔貼上〕寄簡傳情。緩步輕行。出重幃轉過中庭。見時須索款語低聲。隄防他隔牆外有人聽。一絨情淚紅猶濕。滿紙春愁墨未乾。此是內揀房了。我且咳嗽一聲。〔咳

介生〕是誰。〔貼〕傳心話的。〔生〕阿呀。春英可進來坐。〔貼見介〕官人喬遷到此。遂着你的意了。

〔生〕正是。多蒙小姐見愛。小生未達寸衷。你正來得好。〔貼〕有何分付。〔生〕自你前日別後。甚感小

姐美情。眠思夢想。度日如年。幸得寓此。有你朝夕來往。可以取便行事。〔貼〕前日別來。你不知我小姐呵。半天風韻。萬種思量。蹙損那淡淡春山。望穿了盈盈秋水。夜則燈盡。清難作夢。朝則日高。憔悴不明眸。針指懶親。幾番搔首。妝臺頻倚。半晌擡身。猛地里望空一聲長嘆。每日問對我千遍閒提。無非爲着你也。〔付簡介〕恐你不信我言。有簡帖送上。〔生接介〕重勞華札。深慰下情。小姐這等用心。小生何由報德。〔開誦詩介〕春英。這詩意兒好。句兒好。字兒好。真是女中三絕。難得難得。〔貼〕官人。你如今既看此詩。當行此事。〔生〕我是知趣人。不必丁寧。

〔玉胞肚〕花牋爲聘。要今宵共締鳳盟。喜襄王夢契神姬。似裴生緣洽雲英。
〔合〕武陵流水本無情。自有飄紅逐水行。〔生〕既如此。甚麼時候好進去。

〔前腔〕〔貼〕更闌人靜。看東牆月光乍明。〔生〕門戶深邃。我不認得。如何是好。〔貼〕我潛來引入房櫳。使同調鳳瑟鸞笙。〔合前〕

〔前腔〕〔生〕心期纔整頓。教人喜氣滿盈。料今宵倚玉偎香。願他時準結朱陳。
〔合前〕

〔前腔〕〔貼〕燈輝月影。綰同心。堪作證明。盡消除愁種。心苗免他行目斷。行雲。

欲到天台訪玉眞。

花香馥馥影沈沈。

隨蜂飛入芳叢裏。

那覺侯門似海深。

第十七齣 赴約驚回

〔憶秦娥〕〔老旦上〕良宵靜。孤燈寂寞傷多病。〔淨丑上〕傷多病。桑榆景迫。衰鸞分

鏡。〔老旦〕萬籟寂無聲。空庭月乍明。天涯人去遠。凝望正關情。自從我相公出外。老身多病。坐臥不

安。每日勉強在地支持。好生不耐煩也。秋香冬秀。小姐睡麼。〔淨丑〕小姐喫過夜膳。將安歇了。〔老

旦〕他是女孩兒家。有甚事在心上。不睡何爲。惟我衰年久病。白髮頻添。舊恨新愁。黃昏畢集。怎睡

得去。相公在外。要歸不得歸。正是蝴蝶夢中家萬里。老身在此。求睡不能睡。忽驚子規枝上月三更。

〔嘆氣介〕

〔山坡羊〕夜迢迢。房櫺深迥。氣瀟瀟。風威尖凜。韻悠悠。譙樓起更。月皎皎。照我

形和影。我相公呵。去幾程。遙同隔世情。一家骨肉悲孤另。望斷關山。空勞延頸。

〔合〕淒清離魂夢不成。伶仃攢眉淚自傾。〔貼引生上低聲〕

〔步步嬌〕探花引蝶尋芳徑。官人乘興行須勁。〔生〕我未識門戶。舉步甚覺生疎。〔貼〕不妨放心走。月色滿中庭。繞遍迴廊更闌人靜。〔生〕舉步輕些。怕有人聽得了。〔貼〕緩步寂無聲。莫愁牕外人窺聽。

〔山坡羊〕〔淨丑〕滿疎樵花陰隱隱。溢幽襟愁懷耿耿。正嚴城鈴鐸振搖。漸金爐蘭麝煙消盡。我夫人呵。鬢已星。那堪別後情。寥寥音似瓶沈井。腸斷碁聲。隔林遙應。〔合前生驚介〕不好了。此處有人說話。轉去罷。〔貼〕這是夫人的臥房。有我在。不要害怕。

〔生低聲〕

〔步步嬌〕潛蹤漸入桃源境。欲把花情罄。竊效鷺鷥行。兩眼生花。身如酪酏。

〔貼〕我扶着你行。慢慢些去罷。〔扶介生〕畏懼切冰兢。料應難去成歡慶。〔老旦〕丫頭外邊有人走動聲響。〔淨〕敢是貓兒。〔老旦〕不是。〔丑〕必是狗兒。〔老旦〕也不是。分明有人脚步聲響。

快出去一看。〔淨丑〕我們去看是甚麼。〔老旦〕臥桌介生躲介淨是誰。〔貼遮生介〕是我。〔淨〕元來

是春英。夜深到此何幹。〔貼〕小姐要茶。着我廚下去取。〔丑〕廚房在裏邊。怎麼反走出來。我知道了。不是小姐要茶。定是你去偷漢。〔貼〕呸。老丫頭見鬼哩。〔丑〕我不見鬼。只見有個人。〔扯生介〕小丫頭口硬。拏去見夫人發落。〔貼搖手介〕你兩個不要高聲。這是韓官人。小姐請去會話。你若方便了。小姐明日賞你。若不方便。自有小姐作主。不干我事。〔丑〕這小丫頭放刁。倚着小姐勢。便要壓我們。〔淨〕罷罷。不要管他別項。只查眼前作弊。〔貼〕我作甚弊。〔淨〕小姐既請韓官人。你該徑送進去。因何半路先討饒頭。儘意快活。把他弄軟了。這般殘貨。怎麼去奉承小姐。〔貼啐介〕不要油嘴。你們快去回覆夫人。遮掩這事。小姐決不虧你。〔丑〕不要信他。這是賒帳。我們只要現的。〔貼〕身邊沒有東西。〔丑〕不要你的。要韓官人身邊的。〔生〕我也沒有。〔丑〕方才你與春英用的。〔生〕何物。〔丑〕便是。腰下這條短棍。也把我兩個弄一弄。快活快活。方便你去哩。〔貼〕休得取笑。夫人知覺。不當穩便。〔淨〕夫人待着哩。我們自己去回話。小姐面上。放他去罷。閉門不管牕前月。〔丑〕一任梅花自主張。〔見老旦介〕果是狗兒。見貓兒銜個老鼠。走去趕他。故此聲響。〔老旦〕雖則如此。今後還當小心。

〔榴花泣〕奴曹知省。倘遇夜間有形響。審須明。疑他不測。忽然生思危。能懼。遇

變自無驚。〔淨丑〕重門夜扃。謹關防。素必遵台令。偶今宵貓犬爭馳。已端相寂
寧無警。夜已深了。請夫人安歇罷。〔老旦〕我神思困倦。只得就寢。可惜更闌人不寐。〔淨丑〕不知月
影在梨花。〔並下生倒地介貼〕官人。他們都睡了。你可起身進去。〔生〕罷了。我從來不曾受此驚恐。
就如死的一般。〔貼〕須掙一掙。〔生〕我掙不得了。沒奈何。你可扶我起來。〔貼〕好笑你後生家恁般
膽怯。〔扶起介〕

〔漁家燈〕乘高興。抖擻精神。須努力。速赴花盟。〔生〕去不得了。〔貼〕中道止。忍負
初情。〔生〕玉樹瓊枝難並。此行未必非前定。高堂夢途迷巫嶺。佳期空作畫餅。
令彼此這悒悒怎禁。〔貼〕官人。你真個不肯進去了。〔生〕非假。多多上覆小姐。容待下次罷。〔貼〕
既是這等。你請轉。待我自進去也。〔走介生扯介〕你且住。我進了許多門戶。豈能認得出去。仍煩你
送一送方好。〔貼笑介〕罷罷。歡喜冤家。沒用貨兒。只得送你出去罷。〔扶介〕

〔剔銀燈〕歷堂階如登峰頂。赴閨闈若臨機擘。〔生〕鴛鴦何日能交頸。枉波查
往來疲病。〔合〕悲命。今宵良會未成。還要把心期再整。

特尋密約赴鴛幃。

雲雨無緣事已非。

夜靜水寒魚不餌。

滿船空載月明歸。

第十八齣 緘書愈疾

〔丹鳳吟〕〔淨上〕承直書房風流伴當。〔丑上〕燒香掛畫能安放。〔合〕終日嬉

嬉。快活無量。〔笑介淨〕琴童。昨夜我官人好端端在此。被春英這小丫頭哄他進去。二更回來。嚇得

心驚膽戰。和衣睡倒。今早看他人不像人。鬼不像鬼。茶飯不喫。坐臥不安。怎生是好。〔丑〕書童。你曉

得我官人平素讀書君子。驀地被這丫頭哄壞了。今日或者又來。我們只在揀房門首待着。定要擺

佈他一番。〔淨〕道猶未了。遠遠望見他走來。我和你躲在空處。〔貼上〕受人之托。必當終人之事。昨

日韓官人赴小姐之約。經過夫人臥房。被秋香冬秀兩個老丫頭撞見。爭奈他年紀兒小。膽氣兒怯。

一時驚倒。不肯進去。仍舊送他出來了。小姐等到夜深。頓成虛度。一場敗興。做了話靶。小姐一心想

他。不肯干休。今早又寫簡帖兒。着我送來。此是揀房門首了。〔淨丑〕拏住。拏住這小丫頭。每日來這

裏何幹。〔貼〕這兩個小厮可惡。是我府中。反來查我行動。〔淨丑〕老爺臨行。托我官人照管家事。你

昨夜哄我官人進去弄壞了他。如今將死。拏你去見夫人。〔貼〕去見夫人便怎麼。〔淨丑〕你是兇身。我是原告。送到官司。精皮膚與你對手做一場。你弄壞了我官人。我兩個也弄壞你。〔貼〕是你官人叫我來。不怕不怕。〔淨丑〕休要口硬。女孩兒家不該與寡漢往來。好好打發我兩個方罷。不然定要拏你去。〔貼〕天那。身邊錢又沒有。鈔又沒有。把甚麼打發你。〔淨丑〕不要錢鈔。只要你身上的東西打發。〔貼〕我身上有那一件東西。可以打發。〔淨丑〕不大。裙子裏邊的這些兒。〔貼〕吓。我雖是府中使女。便是你官人要我。也不能殼。莫說你們這小鬼頭。〔淨丑〕小丫頭誇口。既是這等。昨夜哄他進去何幹。這也不細查你。我們只討個饒頭。你把嘴兒與我們親一親也罷。〔扯介貼叫介〕官人。你家琴童無狀。〔淨丑慌介〕官人來了。怎麼好。躲在戲房裏去罷。劈開生死路。跳出是非門。〔下生做病上〕

〔金蕉葉〕晝忙夜忙。偶憑人隨波逐浪。空跋涉路阻巫陽。只落得氣銷神喪。
〔臥卓介〕春英。我昨夜回來。險些兒送了性命。〔貼〕因此小姐放心不下。特着我來問安。〔生〕多承小姐美意。夜來非我負約。只因病發。故爾中止。〔貼〕官人偶然受驚。非病也。

〔二郎神〕〔生〕心惆悵。把佳期翻爲災瘴。蝶思蜂情都是枉。林深地迴。迢迢柳色花香。正是咫尺天涯。成遠望。這幽衷怎生撇漾。我此一行。不但負了小姐。自覺身子十分危矣。病將亡。苦風魔遺骸。甚日還鄉。春英。我死不足惜。只恐小姐必定恨我敗興。

〔前腔〕〔貼〕堪傷。分疎鴛枕。緣乖鸞帳。雨跡雲蹤無影響。空勞神女。依依夢遠。襄王月下花間。幾凝望。〔生〕可憐耽閣了小姐。未免生怨。〔貼〕他頸低垂翠攢眉上。我小姐爲着官人呵。深思想。豈能禁啼痕界破殘妝。〔生悲介〕小姐因我生愁。我爲小姐成病。今生不偶。當結來生之緣罷。〔貼出簡介〕且不須忙。小姐有一藥方送上。若服此藥。病就好了。〔生〕屢承小姐厚愛。生死難忘。〔接簡看笑介〕此方甚妙。不曾服藥。病減七分了。好快活好快活。〔貼〕是那幾味藥。有此功效。〔生〕春英。你不知哩。〔貼〕不知。〔生〕不多幾件。只是一味肯來。〔貼〕你調說。不信有這等事。且把簡帖內言語。誦與我聽。〔生誦介〕春光將盡燕鶯稀。可惜良宵事已非。寄語風流休閉戶。月移花影到書幃。〔貼〕果然是約自家來就你了。小姐要尋風侶。鬧中取靜。着我做蜂媒。忙裏偷閒。反瞞着我。好笑好笑。〔生〕不必怪他。我想小姐

〔轉林鶯〕昨宵不寐心怏怏。料難拋影裏情郎。鸞牋密切通書幌。相期戾止。免得乖張。從前愁緒。在今宵一筆都勾帳。春英。我今日呵。眞技癢。俛香倚玉。雖死亦何妨。〔貼〕官人。你看我小姐。詩句兒內包籠三更棗。簡帖兒上埋伏九里山。

〔前腔〕天般色膽言非妄。頓忘卻閨闈行藏。攜雲握雨如翻掌。書中啞謎。勝似醫方。纔經病眼。便知他渾身上下都通暢。小姐。你旣瞞我。我只做不知。看你怎麼來。笑天孫。鵲橋不駕。怎得會牛郎。〔生〕春英。你若作難。事又不諧矣。必如昨夜恁般方好。〔貼〕雖則如此。爲官人情分。自當贊成。〔生〕你上覆小姐。千萬不要失約。

今宵神女下陽臺。

莫把佳期作浪猜。

免陟巫峰高十二。

月明深處雨雲來。

第十九齣 醉娛佳期

〔麻婆子〕〔淨上〕美才美才人爭羨。曹植與我是比肩。美容美容人爭羨。潘安讓我坐右邊。〔丑上〕天生我才貌全。出外動觀瞻。春來是處鶯花遍。〔合〕和你

同去偷閒學少年。〔相見笑介淨〕朱兄。我們都是賈相公辟取來的。指望重用。誰想堵陽韓壽在此。我們不得上前了。〔丑〕陸兄。不該計較。本是韓壽才學優長。儀容俊雅。難怪賈相公擡舉他。我們生得平常。只好這般相待。〔淨〕這也罷了。賈相公出鎮。托他家事。搬入府中安歇。今日我們同去一訪何如。〔丑〕如此甚好。希帶希帶。〔行介〕轉灣抹角。〔淨〕此間就是。〔丑〕韓兄在麼。〔生上〕

〔紫蘇丸〕幽牕鎮日聞鶯燕。倚欄杆柔腸九轉。春愁一似柳絲懸。搖漾東風軟。

〔見介〕二位何來。〔淨丑〕聞兄喬遷。特造一拜。〔生〕方在想望。來得正好。〔淨丑〕有一言求教。〔生〕願聞。〔淨丑〕我們要把髭鬚都扯落了。如何。〔生〕身體髮膚。受之父母。不敢毀傷。何故如此。〔淨丑〕韓兄生得好。相公見之。喜似天花。我們生得醜。相公見之。惱如酸醋。思想起來。我們面貌也將就粗粗看得過。只多這口髭鬚。因此發狠。要扯落他。或者相公見了。得其歡心。〔生〕二位差矣。相公敬我。只因有些才學。知些事體。豈爲面貌。〔淨丑〕噫。只道我們不知。人人說你與相公開染坊。〔生〕怎麼開染坊。〔淨丑〕撇青。〔生〕休得取笑。且講正經。〔淨丑〕今日晴明。甚有春興。東城外有一竹林酒館。欲請韓兄到彼一耍如何。〔生〕三月光陰半流水。百年身世一浮萍。旣蒙相挈。願陪一行。〔淨丑〕如

此就請行了。〔行介生〕乘興東城款竹扉。〔淨〕滿前景物不相違。〔丑〕客愁賴有清尊在。〔合〕盡醉花前忘卻歸。迤邐行來。此間已是竹林了。〔生〕果然淇園佳致。渭水清風。一到便覺襟期已坐冰霜窟。眼界分開花柳塵。〔淨〕我們作一小東。閒酌片時。〔丑〕店主人那里。〔末上〕要消愁萬斛。須仗酒千鍾。〔與淨丑介淨丑遞酒介〕

〔山花子〕〔生〕竹林瀟灑清陰遠。齊雲高節琅玕。碧沈沈曾棲七賢。風搖鳳尾蹁躑。〔合〕趁春光逍遙少年。千鍾美酒供笑喧。莫教虛度空自憐。逸興濃時。誰數神仙。

〔前腔〕〔淨丑〕翠筠冷淡塵囂遠。青青能耐歲寒。玉琮瑤涼聲透旋。月來影弄紛然。〔合前〕韓兄。外邊有個水池。可去步一回再飲。〔生起介〕

〔前腔〕徜徉沼邊。旅況通消遣。揮毫綴入詩篇。看佳園羣芳鬪鮮。清歌妙舞留連。〔合前生〕興高坐久。不覺天晚了。

〔前腔〕〔淨丑〕斜陽掛簷。池面霞光斂。遊踪飲興將闌。可回去罷。〔行介〕詠而歸

陶真共歡。相忘月色嬋娟。〔合前生醉介淨〕韓兄已醉。〔丑〕此是賈府門首。我們送他進去。

〔扶進介〕韓兄請進去罷。〔生〕多謝了。明日答席。〔淨〕郊遊選勝笑啣盃。〔丑〕領略韶光亦快哉。

〔生〕我醉欲眠君且去。明朝有意抱琴來。請了。〔淨丑下生〕小姐約我夜間來此相會。因此歡喜多飲幾盃。不覺醉了。天色尚早。且在花臺上暫臥片時。待他出來。多少是好。〔看天介〕月已明矣。好有趣也。江風索我吟。山月喚我飲。醉倒落花前。天地爲衾枕。〔臥地介貼引旦上〕

〔霜天曉角〕沈沈深院。夜靜經行遍。步窄弓鞋偃蹇。相逢欲進難前。〔貼〕小姐。這

是揀房門首了。請進去。〔旦〕春英。我一時乘興到此。羞答答怎生相見。〔貼〕既肯來了。怕甚麼羞。相會間只低着頭。閉着眼。若到妙處。把春英在心上轉一轉。〔旦〕你同我進去。〔貼〕小姐你還不知哩。

這樁事不可四眼見的。只可你兩個親手製造。〔旦〕休要取笑。你先進去說聲。〔貼〕小姐你忒奸猾。今早寫簡帖兒瞞我。臨期又要我做探子。〔進看介〕阿呀。待久睡去了。〔扯生介〕官人起來。小姐到了。快去迎他。〔生不動貼〕好沒趣。那里喫酒醉了。〔出見旦介〕又是好笑的事。〔旦〕怎麼。〔貼〕醉眠着哩。你自去喚他。〔旦看介〕春英。你看他滿身碎月搖花影。一笑春風倒玉山。早知如此。不來也罷。

了〔惱介〕

〔大逐鼓〕相期事久淹。芳心空戀。密簡徒傳。陽臺已渺雲蹤變。枉令人色膽大如天。冒恥擔驚。有誰見憐。〔貼〕官人可醒。起來見小姐。

〔前腔〕嗟伊酩酊眠。正鴛魂飄蕩。蝶夢沈酣。惜花人挫過如花面。也須知紅粉命多慳。雲雨無情。愁盈楚天。〔旦〕春英事既不諧。我們去罷。〔貼〕小姐不要性急。一時間出來了。且待他酒醒。上牀同睡。

〔前腔〕〔旦〕良宵嘆苟延。奈貪眸凝盼。饞口垂涎。苦嫦娥枉離清虛殿。豈勝禁好事隔天淵。寂寞花陰。蹉跎鳳鴛。春英。你再扶他一扶。〔貼扶介〕扶他不起。小姐。你想他久了。難得相會。今既到此。可近他身邊一坐。也能釋興。〔扯旦坐介〕佳人才子。正是一對夫妻。好有趣也。〔對笑介〕

〔前腔〕堪誇並蒂蓮。羨清芬胥茂。雅豔同妍。想赤繩宿世曾經綰。如何對面也無緣。得失從違。事非偶然。〔旦〕春英。在他卓上取筆硯來。待我寫一首詞。放他袖裏。雖未得相

親也留個表記。〔貼取筆硯旦寫介〕何事無情貪睡。忘卻鸞絨來意。明月滿花臺。耽誤玉人心事。沈醉沈醉。不管斷腸流淚。〔右調如夢令〕〔放生袖介內雞啼介旦〕盤桓許久。雞已鳴矣。快進去罷。〔貼〕乘輿而來。敗輿而去。可惱。夜遊紆久聽雞聲。香冷燈殘夢不成。〔旦〕自是武陵消息斷。〔啐生介〕吓。落花流水兩無情。〔並下生醒介〕月色西傾。花陰東逝。夜已深矣。小姐不來。是失信也。〔內雞啼介生〕五更時分。料不來了。自去睡罷。〔伸腰垂袖落簡介〕甚麼東西。〔取介〕是個簡帖兒。寫甚言語。〔誦介〕阿呀。元來小姐到此。見我醉臥。不得交會。留此詞表記。怪哉怪哉。昨夜他就我。我又醉臥。小姐你恩情厚之極矣。但小生兩次違約。罪安逃哉。

〔江兒水〕惱殺傷春酒。一醉眠。卿卿觖望空回轉。久慕小姐冶容。今夜失於刮目。月貌花容雖不見。〔指地介〕好有趣。只這一件。金蓮小印遺蒼蘚。此處留情非淺。小姐既去。耳不聞環珮之聲。鼻尙覺麝蘭之氣。繾綣餘香。怎得芳盟重踐。

纖羅鈎玉步蓮蹤。

留印蒼苔表素衷。

有緣千里能相會。

無緣對面不相逢。

第二十齣 承明雪宴

〔旦貼扮內臣上〕〔旦〕夜深萬籟寂無聲。〔貼〕曉看丹墀展素茵。〔旦〕爲報民間年穀稔。〔合〕天顏喜動宴承明。俺們乃晉朝宮中承奉司內臣是也。今當仲春。下此大雪。看九霄燦玉。千里飛瓊。凍合龍宮。水仙驚偈。寒侵兔窟。山鬼含愁。亂紛紛或高或低。效柳絮之顛狂。輕款款若遠若近。通梅花之信息。尖峯排玉笋。色凌世界壯威風。圓石疊銀盤。光照乾坤增氣概。五門外悠悠颺颺。連雲作巖凝之勢。六宮中慘慘淡淡。與月爭皎潔之輝。只見那建章宮甘泉宮未央宮長楊宮五祚宮長秋宮長信宮長樂宮。重重疊疊。盡妝成瓊樓玉宇。昭陽殿金華殿長生殿披香殿金鑾殿麒麟殿太極殿白虎殿。浙浙瀟瀟。都飛上繡箔珠簾。鳳池邊修竹婆娑。輕盈盈銀鳳尾。踰躄。龍陛下長松偃蹇。明燦燦玉龍形蜿蜒。投林鳥失卻舊巢。宿衛人疑爲清書。長門映耀。燈火無功。永巷昭明。琪瑤並色。巧舞寒穿幽隙。旋飛白戰長空。可占年穀豐饒。獨妒春叢爛熳。因風扶起。壓倒東南萬里山。點地還消。剩添吳楚千江水。帳前隱隱。偏宜低唱淺斟。牆角深深。雅稱尋幽吊古。騷人才減。惟堪體物之吟。隱士固窮。不作干人之態。如今何處堪游目。葛嶺浮圖第一層。今早上位爺傳旨免朝。着光祿司設宴承明。

殿賜文武公卿坐飲賞雪。命散騎常侍羊祜監席。道猶未了。羊常侍已到矣。〔小生上〕

〔搗練子〕嚴風起。六雲飄。建章宮闕積瓊瑤。盡道梅花芳信到。下官羊祜。字叔子。

泰山南城人也。世吏二千石。至下官九世。並以清德聞。自幼誦詩習禮。博學能文。累官散騎常侍。掌機密。統宿衛。直入殿中。甚蒙皇上眷顧。與賈司空交厚。司空出鎮關中。我有挽留之計。免他此行。且待席散。約同荀侍中奏聞皇上。必有定奪。〔相見介旦貼〕羊大人。今日監席甚勞。〔小生〕二位內相。管酒會完備否。〔旦貼〕完備久矣。待衆公卿取齊就席。〔小生〕俱已齊了。〔末小外淨丑上〕

〔翠華引〕〔末〕一夜青山盡老。〔小外〕盈盈點滿簪袍。〔淨丑〕聞得江南三尺。

〔合〕應知呈瑞皇朝。〔旦貼〕衆公卿取齊扣頭。〔衆扣頭介〕萬歲。〔小生〕皇上命下官監席。衆公卿各照朝班叙坐。〔衆應起介〕是。〔旦貼斟酒小生遞送介衆兩傍坐介〕

〔梁州序〕悠颺深夜。繽紛侵曉。白占人間多少。彌漫萬里。驚看瑞葉飄飄。漸覺橫飛朔野。盡壓西山。林木春回早。可占年谷也。最豐饒。喜溢宸衷。勅免朝。〔合〕蒙御宴。愧難報。誓傾葵藿陳廊廟。祈萬壽。比嵩喬。

〔前腔〕〔小生〕清光浮潔。威風增峭。幻出樓臺奇巧。望中一色平鋪。莫辨低高。但覺輕穿重幙。潛度疎櫺。拂樹驚梅早。廣文才力壯也堪笑。並和詩成興益豪。

〔合前〕

〔前腔〕〔衆〕撒梨花遍地瀟瀟。飛柳絮漫空裊裊。正金樽酬酢。玉壺傾到。那管寒侵銅柱。凍合龍崗。路擁藍關杏。冰澌掩蓋靜壓波濤。瑞足江南起頌謠。〔合

前〕

〔前腔〕〔旦貼〕想山陰不閉衡茅。恐乘興扁舟來到。苦漁父收綸。樵夫迷道。謾有白鷗失素。皓鶴奪鮮。綠減蘭芽小。〔內作樂介〕伶工呵手也奏簫韶。上下騰

歡賀聖朝。衆公卿謝恩。〔衆拜介〕萬歲。〔合前旦貼〕衆公卿散班。〔衆應末小外淨下丑小生立介

旦〕苟侍中有何事欲言。就此宣奏。〔丑跪介〕侍中臣苟勗。爲皇太子婚姻事。稽首頓首上言。〔旦〕皇太子妃。他日母儀天下。其責非輕。今有誰家女子。可以應選。〔丑〕司空賈充次女。實堪此選也。

〔節節高〕堪誇懿德饒。邁當朝。幽閒貞靜多才貌。閨中寶女內翹。坤儀道。塗娥

姪奴應相肖。更閒母氏庭幃教。這女子呵。不惟才德兼備。抑且年貌相當。論他祖先。世系門楣。總是高。青宮正喜二星照。〔旦〕上位爺有旨。依卿所奏。卽行禮部擇日成婚。〔丑扣頭〕萬歲。〔起介〕羊常侍有何事欲言。就此宣奏。〔小生跪介〕常侍臣羊祜。爲司空賈充出鎮事。稽首頓首上言。〔貼〕氏羌之變。因邊防不得其人。今使重臣出鎮。將以威服遠夷。又有何說。〔小生〕賈充朝廷重臣。關中蠻夷近地。況目今連日大雪。

〔前腔〕陰凝二尺高。路迢遙。征輪匍匐應難到。且賈充呵。年衰老。筋力消。精神耗。伏望皇上優憐勳戚。加容保。速頒綸綍傳宣召。氏羌小虜。只須別遣一將。可以服之。割雞何必用牛刀。棟梁仍使歸廊廟。〔貼〕上位爺有旨。依卿所奏。着賈司空暫劄近處。另遣將官一員往彼。交代回朝。〔小生扣頭〕萬歲。〔起介〕

〔尾聲〕〔合〕如流納諫皇恩浩。共山呼聲徹層霄。惟願取轉日回天在這遭。

各罄嘉謨獻帝堯。

六龍扶日仰青霄。

三呼三祝情無已。

稽首君恩雨露遙。

第二十一齣 引示池樓

〔三臺令〕〔貼上〕佳人才子堪嗟。牽惹心如亂麻。兩下鏡中花。眼兒裏空自巴巴。春光九十恐無多。可惜良宵幾浪過。怪殺風流攀桂客。真成薄倖誤嫦娥。昨夜小姐赴約。誰想韓官人醉臥不成歡會。回到繡房。甚是懊惱。和衣睡了。今早起來。看他輕勻粉臉。亂挽雲鬢。憂戚戚蹙損了淡淡春山。淚汪汪朦朧着盈盈秋水。手兒內停針弄線。繡不出舊恨新愁。口兒內惜玉憐香。發許多長吁短嘆。好生不自在。我小姐呵。

〔香羅帶〕幽牕舊恨賒。新愁又加。悠悠此情難廝捨。你愛韓生。被他兩次誤了。要將良玉倚蒹葭也。明月上。被雲遮。可憐朗然消永夜。空度韶華也。髻髻釵橫寶髻斜。前晚小姐等他。他至半路而返。昨夜小姐就他。他又沈醉而臥。

〔前腔〕難成連理花。渾如撒沙。佳期豈知爲話靶。多情枉自苦嗟呀也。肌減玉。臉消霞。淚眼偷淹珠點墮。小姐須索耐些性兒。今日不成。還有明日。明日不成。還有後日。好事多磨也。莫悔當初一念差。小姐只因韓官人悞約。口中十分恨他。心內十分想他。我如今瞞

着小姐再來掾房。通個消息。成就他兩邊好事。又恐韓官人看得容易了。我且住在掾房門外。扞以別事。站着待他出來。做些假意兒。再作區處。

〔謁金門後〕〔生上〕萬轉千回縈掛。怎得此情干罷。整頓寒牕空守寡。春愁難

盡寫。飄飄浪迹與萍蹤。誤入蓬萊第幾峯。凡骨未仙塵俗在。罡風吹落醉鄉中。〔嘆介〕小生客館孤

身。蒙小姐見愛。欲圖一會。前晚我進去。被人撞破了。昨夜他出來。我又醉臥了。兩次負約。甚難爲情。未知此後再能相遇否。獨坐無聊。且出掾房門外閒步一番。多少是好。〔出見介〕春英。你又來了。

〔貼〕我自另有幹。不干你事。〔生〕夜來小姐到此。只因朋友強逼多飲。醉臥花臺。有失迎接。得罪太

甚。煩與小姐說聲。〔貼〕小姐何嘗出來。你問他怎麼。〔生〕苦也。小生一介寒儒。小姐千金貴質。多承不棄。方圖相敘。不料兩次不偶。雖則有罪。實非本心。設有所欺。惟天可表。〔貼〕好扯淡。有誰念你。你

說那話兒。我有別幹要去。管不得你這閒帳。〔生扯介〕春英。這樁事是你說起。傳消息。乃我心上人。如何不說心話。方才問你。你推不管。甚麼緣故。〔貼〕我將小姐心事。兩遭兒托你。你都誤了。看你

是無情之人。怎做得偷情之事。〔生〕天那。心事不明。氣殺我也。我爲小姐擔驚成病。昨因有約。心上

快活。多飲幾盃。不覺醉臥。負了小姐美情。自知惶恐。央你轉達。亮我情罪。你若見外。小姐豈知此故。只道我辜恩負義。那有再會之日。我亦不能苟存。多多上覆小姐。數日之後。索我于枯魚之肆。春英從此一別。你也不得再見我了。〔貼笑介〕官人昨日何等性慢。就飲醉了。今日何等性急。就尋死哩。方纔我試你一試。見得真心。與小姐相同。正是一對情人。〔生〕好苦。我夜來醉臥。似死人一般。不知影響。你可把小姐來時的情。去時的意。仔細說一遍。〔貼〕昨夜裏呵。

〔月雲高〕閒庭幽雅。花月俱瀟灑。我小姐呵。爲赴行雲約。久竚陽臺下。誰料沈湎襄王淒涼可憐夜。〔生〕你那時怎麼不喚醒了我。〔貼〕夢適黃梁熟。糊突如聾啞。花影頻移月漸斜。恍惚心驚打草蛇。官人。你喫的酒兒好不少。我喚又喚你不醒。扶又扶你不起。小姐捨不下。自家坐在你身邊守候。雞鳴方去。

〔前腔〕〔生〕多情小姐直恁至誠也。小生一時醉了。敗卻風流興。薄倖真堪吒。春英。我願負荆請罪。拚取皮膚玉手纖纖打。軟款溫存處。一刻千金同價。誓海盟。

山趣倍加。喜地歡天豈有涯。〔貼〕官人。你便說得恁般好。只是小姐恨得緊。怎肯再相見。你請

把這念頭息了罷。〔生〕久慕小姐芳容。未曾識面。倘小姐恨我負約。不肯相見。沒奈何。你可做個方便。待小姐在空閒所在遊耍。你設個法兒。報我一聲。指引去刮目一番。死而無怨。〔貼笑介〕這個通得。後花園中荷池裏邊。有棲霞樓。小姐時常登覽。我明日設法教他上去。你便往池外邊隔水一看。何如。〔生〕甚好。只是我不認得此處。〔貼〕這不難。如今先引你進去認了。就隨我走。〔走介〕

〔一盆花〕過了高堂深度。盡軒牕疎豁。棟宇奢華。曲砌迴廊路橫斜。荷池滉漾垂楊下。〔指介〕池那邊是棲霞樓。你只在此站着看他。他若有顧盼之情。你便近前相見。盡些禮數。

加些意思來打動他。或者皇天可憐。祖宗陰佑。使小姐回心轉意。未可知也。〔生笑介〕甚好甚好。

〔合〕相逢可嘉。相看畫花。各吐心苗愁種。庶免嗟呀。

〔前腔〕〔生〕歷遍幽亭虛榭。羨竹聲簫瑟。波影光華。累石層巒巧棲霞。危樓遙瞰茶蘼架。〔合前生〕明日候你。〔貼〕午後准到。

癡心婦人負心漢。

這等相思空好看。

此去全憑撮合功。

免教旅館愁魂斷。

第二十二齣 池塘晤語

〔虞美人〕〔旦上〕春愁贏得身憔悴。閒把欄杆倚。〔貼上〕蘭香燒斷冷金猊。〔合〕好夢難成。輕斂雙蛾翠。〔沈醉東風〕〔旦〕花正開。月含半規。月初圓。花又蓓蕾。〔貼〕月無三五圓。花欠十分媚。想人間好事難齊。〔合〕及至花開月又虧。全不與東君作美。〔旦〕春英。我與韓生有約。他來會我。被人撞破了。我去會他。他又醉臥了。正是花月不能兼美也。〔嘆介〕兩次不偶。雖是不輪機巧。我看韓生無情于我。我這念頭只索罷了。〔貼〕小姐。不要錯怪了他。他不是那等人。〔旦〕你怎見得。〔貼〕春英昨日見他。把小姐的意責他。他說因小姐有約。心中快活。多飲幾盃。不覺醉了。被我搶白一場。他深自惶恐。〔旦〕他是個讀書人。不搶白他也罷。〔貼笑介〕小姐休要護短。他兩次誤約。若不搶白。怎出得這口氣。請問小姐。還要相見他麼。〔旦〕我的意兒。瞞不得你。欲不見他。此心拋捨不下。欲待見他。又恐看得容易了。如何是好。〔貼〕他要求見小姐。負荆請罪。被我設法。教他在荷池外邊等着。小姐只做不知。去棲霞樓上閒耍。容他一見如何。〔旦〕此意最好。但恐他不認得那里。〔貼〕不消小姐費心。昨晚我已指引他去認了。〔旦〕好知趣丫頭。〔貼笑介〕若不是丫頭知趣。怎生

方便得你。小姐就請去罷。〔旦行介〕春英。你看園中好景致。

〔金井水紅花〕繁綠攢新葢。妍紅綴舊枝。紫燕與黃鸝。各交飛。呼聲相應。好似芳年佳偶。兩兩共歡娛。最苦是相思也囉。孤幃惟有形影相依。懶上妝樓。無心針黹。〔合〕悠悠方寸。春蠶吐絲。良緣未就。空啼子規。落花可惜隨流水。〔貼〕迤邐行來。已到荷池邊了。請小姐登樓。〔旦〕樓梯難上。春英。你可扶我一扶。〔貼扶登介〕小姐。你看四遠好景致。

〔前腔〕柳映煙光潤。花搖日色遲。曲沼煖風吹。水漣漪。登樓凝望。滿眼是妖紅冶綠。高下錦千機。虛度豔陽時也囉。幽情惟有燕鶯得知。託恨舒愁。花間葉底。

〔合前〕

〔鷓鴣引〕〔生上〕芳草池邊徑路欵。朱樓峨聳壓雲低。風流有個人垂盼。縱使眞僊亦自迷。可喜小姐已先在棲霞樓上了。春英眞是我心上人也。約我到此。果不失信。今日飽

看一回。遂我素想。不免整肅衣冠。安排禮貌。〔整衣冠介〕上前參見則個。〔揖介〕小生韓壽拜揖。

〔旦答介〕春英。你可回他話。我害羞。怎麼相見。〔貼推旦介〕此間對面有趣。強似青瑣中窺他。如今正好敘些心話。〔招生介〕官人。小姐甚怪你。可卽跪下請罪。〔生跪介〕小生有罪。惟小姐恕之。〔旦〕春英。你可請他起身講話。〔貼〕小姐有命發放。起來站着。〔生應起介〕小姐聽小生相告。

〔本序〕餓生羈旅。爲多情可愛。平空惹起相思。廢寢忘餐。甫能覓得蝶信。蜂期。奇異。水溢藍橋。火騰祆廟。可憐良夜難成美。〔合〕從此後仍諧葦誼。同效于飛。

〔前腔〕〔旦〕深恥。輕身自許。端爲恁蕙質蘭情。風流標致。盡吐芳心。便欲得共締山盟海誓。誰擬。闌苑幽葩。瑤臺靈種。被人覷做傍牆枝。〔合前〕

〔前腔〕〔生〕羞死。只因分淺緣輕。不輪機。偶傷春空。有斷腸詩。凝望處。咫尺猶隔天涯。還慮。鬢似愁潘。腰如病沈。料應將屬枯魚肆。〔合前〕

〔前腔〕〔貼〕堪比。愛篤秦姬。情深蕭史。綵鸞終跨心期。今日裏莫將既往重提。看取萬種相思。一天好事。都教發付月明時。〔合前〕

〔古輪臺〕解雙眉轉愁爲喜。訂芳期歡聲和氣。忻忻語。相看屈指。趁月影花陰。消卻從前風趣。正楚岫行雲。武陵流水。恩情真是兩無虧。莫教容易。料赤繩繫足何疑。花同並蒂。鴛同交頸。樹同連理。琴瑟與埙篪。音和美。天長地久相終始。

〔尾聲〕〔旦〕些時款曲情無已。〔生〕此會真爲曠世奇。〔合〕惟願早縮同心莫少遲。〔生〕小姐旣恕小生情罪。請期何日相會。〔貼〕明日我自出來回話。不可又醉了。〔生別介〕

今日樓前面締盟。

慰卿青瑣一窺情。

相逢宿注婚姻牘。

何必拘拘射雀屏。

第二十二齣 奉詔班師

〔鵲橋仙〕〔左右引導外上〕總制兵機。弘敷廟策。盡瘁撫綏蠻貊。干城萬里奮威。

權師中寵命蒙三錫。手握麟符寄獨專。宣揚聖諭務安邊。櫛風沐雨方圖進。忽荷皇恩又轉鞭。

下官奉勅出鎮關中。連遇大雪。不能前進。駐軍數日。今得雪消。正欲起程。忽蒙朝廷特旨。宣召還京。

想是苟侍中夕陽亭之議已行矣。又得羊常侍相與贊襄。故此朝廷信從。可喜可喜。昨日接了朝命。

就班師回程。叫左右的。此去京城。還有多少路。〔左右介〕稟老爺知道。離京尚有一程之地。〔外〕既已將近。趨前去罷。〔行介〕

〔憶多嬌〕偃戈戟。還故國。旌旗掩映搖天日。壯氣威聲助忠赤。〔合〕苦茲行役。苦茲行役。要保皇圖磐石。

〔前腔〕〔衆〕雪久積。今乍液。盤桓道路歸心急。且得消停萍梗迹。〔合前左右介〕已進京城。此是老爺府門首了。〔外介左右介老旦旦貼同上〕

〔杏花天〕〔老旦〕燈花昨夜傳消息。〔旦〕喜得椿庭完舊壁。〔貼〕一天和氣融瑞色。不覺離愁頓釋。〔見介〕〔蝶戀花〕〔外〕春事闌珊芳草歇。客裏風光。又過清明節。〔老旦〕

庭院深沈人憶別。落紅處處聞啼鴉。〔旦貼〕咫尺江山分楚越。目斷魂銷。應是音塵絕。〔合〕今日相逢深感切。雲開得見重圓月。〔老旦〕相公出鎮關中。乃遠方重任。何故就回了。〔外〕夫人你尚不知哩。我去不多路。遂遇大雪。不能前進。正憂悶間。蒙朝廷特旨召回。〔老旦〕有何緣故。〔外〕荀侍中奏議。我第二女孩兒爲皇太子妃。且又得羊常侍奏言。雪深三尺。難以進軍。俱奉聖旨准聽。特賜召還。

得與你母女相見。不然。一到關中。身親軍務。況多奸人在朝排擠。那有回家之日。〔旦〕爹爹高年貴體。豈能當此風寒。受此跋涉。母親與孩兒日夜放心不下。今得召回。骨肉忻幸。〔外〕孩兒。我與你母親白頭偕老。富貴雙全。一荷聖上洪恩。二賴祖先餘庇。你二姐得成皇太子婚事。遂我心願了。〔老旦〕此事若成。實門楣之幸。

〔四邊靜〕〔外〕彤庭納禮誠丕赫。宜家慶朱芾。震位燦三星。青宮鼓琴瑟。〔合〕熊羆叶吉。神人喜溢。瓜葛結椒房。門楣幸何極。

〔前腔〕〔老旦〕黃扉毓秀誇弱息。芳齡備坤德。申戒在衿鞶。光輝滿禕翟。〔合前〕〔馬福郎〕〔旦〕兩姊乘龍爲貴戚。〔向貼低聲〕自慨當筭歲。兼妙質。玉鏡臺緣未諧得。〔合〕秦晉尙須擇。相輝映冰玉佳匹。

〔前腔〕〔貼〕婚媾由天難預測。自有鸞鳳侶。堪比翼。青鳥傳音應在卽。〔合前〕華堂喜見雀屏開。莫把姻緣作浪猜。

萬事不由人計較。

一生都是命安排。

第二十四齣 謀踰東牆

〔畫堂春〕〔生上〕庭軒寂寞映斜曛。海棠花落紛紛。東風剗地客魂驚。寒怯圍屏。聞道清明節近。愁來倍覺傷神。莫教綠鬢漸生銀。世事春雲。〔踏莎行〕霧溼樓臺。月迷津渡。桃源望斷無尋處。可堪孤館閉春寒。杜鵑聲裏斜陽暮。情引眉梢。音傳尺素。砌成此恨無重數。凭闌徙倚盼佳期。夢魂不到花間路。小生久慕小姐花容。不得一見。前日多虧春英指引。在樓霞樓邊。隔池相會。各道衷曲。彼此不能禁持。恨無縮地升天之術。若非荷池隔斷。准准得成事矣。我想小姐這般人物。真是天上有世間稀。說不盡他許多好處。

〔皂鶯花〕想像記難真。玉精神帶半醺。芙蓉豔冶同標韻。轉秋波流盼。渾無定。笑生春。語飛瓊。最可愛翠鬢低。蟬影輕。最可愛黛眉勻。遠岫橫。況有蘭情蕙性。幽閒可欽。千嬌百媚。娉婷可矜。名姝絕代誰能竝。小姐未見你之前。不勝想慕。既見你之後。豈得從容。

〔前腔〕入眼便薰心。這風騷不自禁。佳人才子殊相稱。怎能穀鴛枕同盟證。幾

長攀欲銷魂。最苦是對花陰。剔短檠。最苦是聽風聲。擁冷衾。小姐在繡閣。小生在接房。兩下裏呵。各天咫尺。侯門海深。同情千里。巫峰幾層。黃昏清晝無非病。棲霞樓邊會後。將圖新約。不料司空昨日已回。此事又成間阻。眼見鳳約鸞期。裂如瓦解。花情柳思。渙若冰消。如何是好。連日司空在堂。人跡匆忙。不曾相見春英。未有消息。今日司空入朝。處置皇太子姻事。因此庭閒人靜。或者春英出來。商量一個計策。尋覓一條門路。與小姐相會。未可知也。

〔天下樂〕〔貼上〕蝶使蜂媒寄好音。屢經風雨阻花陰。〔見介〕連日因老爺在堂。有礙出入。不曾親近官人。莫罪莫罪。〔生〕春英。我兩次誤小姐之約。自知多罪。前日虧你指引相見。各道衷曲。彼此暢然。但恨不能與他歡會。奈何奈何。〔貼〕小姐久有此心。白棲霞樓會後。愈覺眠思夢想。恰如中酒的一般。官人。你的尊容甚是清減了。

〔香柳娘〕〔生〕爲多情可人。爲多情可人。滿腔春恨。幽居形影傷孤另。〔貼〕機會不偶。只索忍耐。〔生〕苦疎牕月冷。苦疎牕月冷。夢斷楚山深。雲期何日訂。〔貼〕老爺既回。急難相會。〔生〕望伊家曲成。伊望家曲成。撮合奇能。周旋歡慶。〔貼〕官人。

不是春英不用心。

〔前腔〕想裴航遇屯。想裴航遇屯。雲英引領。奈藍橋水溢波濤浸。〔生〕你可另尋一個便路進去方好。〔貼〕有迴廊可循。有迴廊可循。萱室並椿庭。經過必知警。〔生〕若是這等事難成了。〔貼〕這姻緣炭冰。這姻緣炭冰。除非再生。方能交頸。〔生〕春英不要這等說。我與小姐宿世有緣。今生相遇。佳人才子。自古難得雙美。你豈可坐觀成敗。不用些心力。不惟負了小姐情懷。必然斷送我的性命。〔跪介〕沒奈何。我的知心小娘。爲我方便。〔貼跪扶介〕官人何勞如此。折殺奴家也。罷罷。我有一個門路。只怕你做不得。〔生笑介〕只除老爺夫人臥所經過。此外若有門路。上天也去。入地也去。怕他怎麼。〔貼〕官人既有此膽力。何故前晚進去。卽驚倒了。〔生〕這是初遭做事。被人撞破。不免受驚。如今興高膽壯。憑你到那里去。〔貼〕後堂東邊。僻靜之處。有一帶粉牆。亦不甚高。若能跳過此牆。徑到小姐繡房。不必經由老爺夫人臥所。〔生〕有此便處。何不早說。你可指引一看何如。〔貼〕官人要看。就隨我走。〔走介〕轉灣抹角。此間就是。〔指介〕這牆若過得。小姐就得見面了。〔同看牆介〕春英。這牆呵。

〔前腔〕望岩嶢起驚。望岩嶢起驚。約高幾仞。如何插翅能飛進。〔貼笑介〕官人。你這些兒戰兢。這些兒戰兢。怎去跳龍門。子陽蛙在井。〔生指介〕好了。牆邊有這樹。喜喬柯偃形。喜喬柯偃形。躋攀可憑。如梯層引。〔貼〕你看牆內邊。

〔前腔〕太湖石易登。太湖石易登。外通內應。自高臨下猶平徑。〔生〕這計策偷行。這計策偷行。月殿雖高迴。嫦娥得相近。〔貼〕莫輕率逞能。莫輕率逞能。還須力掙牢拴。一念堅雙脛。〔生〕臨期須用竹竿豎起爲號。但要約定幾時。〔貼〕就是明晚罷。

〔前腔〕〔生〕訂來宵締盟。訂來宵締盟。更闌人靜。東牆月上移花影。〔貼〕整合歡鳳衾。整合歡鳳衾。海誓兩心傾。情緣諒相盡。〔合〕這風流匪輕。這風流匪輕。着意温存。天長地永。〔貼〕官人。此會不是當耍。再莫誤約。〔生〕春英若不相信。我有汗巾一幅。

題詩爲聘何如。〔貼〕絕妙絕妙。〔生〕客囊乏物。非玉鏡臺之比。〔貼〕秀才人情紙半張。如今有汗巾題詩。勝于温生多矣。何乃太謙。〔生寫介〕鮫綃瑩白出龍宮。寄贈佳人翠袖籠。留待來宵明月下。海棠枝上拭新紅。〔笑介〕春英。將此送與小姐作爲表記。〔貼收介〕普天下結親的沒有這樣清士人。

情〔生〕休取笑。

未跳龍門先跳牆。

鮫綃題句聘紅妝。

冰人莫訝輕財禮。

秀才人情紙半張。

第二十五齣 佳會贈香

〔意難忘〕〔旦上〕人靜更闌正蟾光皎皎。花影珊珊。懷香愁滿眼。羞怯若爲顏。

〔貼上〕今擬得踐初言。雲雨近巫山。〔合〕只恐是花深柳暗。佳會間關。〔怨王

孫〕〔旦〕夢斷漏悄。愁濃酒惱。寶枕寒生。翠屏塵遠。〔貼〕門外誰掃殘紅。曉來風。〔旦〕玉簫聲杳。人

何處。春又去。忍把佳期負。〔貼〕此情此恨。此際擬托行雲。問東君。〔旦〕春英。你說韓生今夜赴約。此

時不到。又是話靶了。〔貼〕汗巾詩句。特爲聘證。他是風流學士。豈肯忘情。小姐耐心少待。卽刻就來

也。〔旦〕待之已久。好不自在。且閒步一回。〔步介〕

〔五更轉〕輕移步雕欄畔。〔內鼓角介〕聽樓頭鼓角嚴。漏聲滴瀝蓮籌換。韓生。你

旣許呵。爲甚有約不來。教人凝盼。春英。只恐他爲牆高峻。不易登。多稽緩。燈殘

香燼音蹤遠。餓眼將穿。愁魂先斷。說的竹竿曾豎起麼。〔貼〕早已豎起了。

〔前腔〕有樹枝無他患。任崑峨亦可攀。〔旦〕只恐他不慣這等事。〔貼〕恁般技藝何須慣。想他是逐隊遊蜂。尋羣飛鷗。乘月色。趁風光。無拘絆。少待松梢移影中庭半。方降星郎。渡河廝見。〔旦〕既是這等。你往牆邊候他一候。來不再作理會。〔貼〕小姐你坐着。我去就來。〔看介〕

〔二剪梅〕〔生上〕仰瞻峭壁聳雲端。上固艱難。下亦艱難。我那多情小姐。知趣春英。竹

竿早豎起了。樹枝層躡。免盤桓。指望團圓。畢竟團圓。且喜有這樹枝傍牆。牆內又有太湖石。就容易了。且把跳龍門手段試一試。不施萬丈深潭計。怎得驪龍領下珠。〔跳介〕僥倖過牆了。

不知小姐繡房在那里。〔貼候介生抱貼親嘴介〕我心肝上愛的好小姐。〔貼〕啐。好糊塗帳。人也認不真切。要偷情。〔生笑介〕元來是春英。我跳牆喫力。眼就花了。雖不是小姐正身。且把你次身來釋了與小姐。何不出來接我。〔貼〕小姐醉倒在花臺上。事難成了。且請出去。〔生〕休取笑。快些進去。

〔貼報旦介〕小姐新郎到了。〔旦扯貼介〕春英。你住在此伴我。〔貼〕平日伴得你。今夜伴不得你。這

椿事不是三個做的。只好兩個對手。我且迴避。待你們事畢就來。〔推生進介〕結成鸞鳳青絲網。做就鴛鴦碧玉籠。〔下生見旦介〕〔憶秦娥〕春寂寞。可憐辜負花間約。花間約。武陵溪水。東風作惡。〔旦〕臂銷不禁黃金杓。大寒尙怯春衫薄。春衫薄。那堪搵淚。爲君彈卻。〔生〕小姐是金屋嬋娟。俯垂青盼。小生乃衡門薄劣。幸值奇逢。愛我之恩。至是極矣。感卿之德。何以報之。〔旦〕青瑣相窺。風流入眼。黃昏眷戀。寤寐銷魂。擬結鴛鴦。不惜千金之重。願堅海誓。同諧百歲之歡。〔生攜旦手介〕小姐。你姿容絕代。風度過人。

〔醉扶歸〕似瓊樓玉宇神仙伴。多應是風流趣勝謫塵寰。只爲青瑣留情交相感。惹得旅魂飄蕩。自此無拘管。受盡了千愁萬恨廢眠餐。捱至此夕償心願。

〔前腔〕〔旦〕一從那日偷睛見。就把這半天風韻付青鸞。誰料得柳影花陰塵囂遠。爲你做下心苗愁種。空憶韶光變。今夜相會。整備着攜雲握雨遍巫山。〔生〕

小姐不消分付。小生自當着意。〔旦〕須仗你了卻相思欠。〔生〕小姐。夜已深矣。請上牀罷。玉手相攜入繡帷。聲將恩愛慰心期。〔旦〕嬌枝未慣風和雨。分付東君好護持。〔並下貼上〕無端春色

亂芳心。今夜風流入夢深。消卻相思多少恨。殷勤彼此慰知音。〔笑介〕我小姐與官人六禮未行。先赴陽臺之約。兩情久協。纔通錦幔之歡。〔窺介〕我小姐呵。怯怯細腰。含羞謾展。温温嫩乳。解扣輕摩。起金蓮而弱態難支。度靈犀而嬌聲屢作。流紅一謝。春染鮫綃。翠舌半含。香傾肺腑。恍如鴛侶。何當鸞交。誠仙府之奇逢。實人間之快事也。小姐呵。

〔解袍歡〕在青瑣霎時流盼。把芳心直恁迷亂。我爲你偷寒送暖通方便。今夜裏呵。似巫姬遇襄王雲雨瀾漫。只見一個錦襜鬆卸。一個香羅解寬。一個情生百媚。一個眉皺兩灣。愛殺恁合歡被煖翻紅練。顛飛鳳倒舞鸞。貼胸交股樂無厭。看你兩人。今宵事。宿世緣。千金一刻不容閒。

〔前腔〕小姐。我爲你傳書寄簡。擔驚怕受盡多般。今夜裏呵。雙雙自出風流汗。把春英呵。牕兒外有甚相干。你兩個呵。翠幃香煖。我一個呵。花砌露寒。他不管金爐煙斷。他不管銀漏點殘。好笑兩個。分明烈火乾柴燬。春羅上紅點鮮。偷睛燈下笑相看。看了你們。我好動興。風流趣。一念間。忍酸咬得袖兒穿。〔內雞叫介貼〕小姐快些起。

來〔生日披衣上〕

〔山桃紅〕雲情初膩。兩意方酣。無奈那雞聲喚。分開交頸兩鴛。不覺顛倒羅襦。不覺蓬鬆翠鬟。只因趁此時。盡此心。總釋卻傷春怨也。今夜姻緣果是難。〔合〕這風月真稀罕。梯牆往還。但願暮暮朝朝楚岫間。〔貼〕我看官人小姐兩個呵。

〔前腔〕芙蓉雙嬈。鸚鵡同翮。可知道鑿情戰。喜得歡欣美滿。你們儘好受用。竟不顧春英呵。凍壞了瘦骨稜稜。熬殺了芳心戀戀。待到月已西。雞已鳴。恐有傍人

窺矚也。泄漏春光後會難。〔合前日與香介〕此香出于西域。一着人身。經月不散。乃朝廷特賜。

家父命奴家收貯。今諧伉儷。無以寄情。敢將此爲表記。香氣之着身。如妾之在懷耳。〔生受介〕此香非常。此會不易。香氣着我身而不散。卽小姐在我心而難忘也。情同口語。感與忻并。〔旦〕奴家千金之軀。托于足下。不止目前之樂。當爲日後之謀。〔生〕此是小生本心。不勞小姐分付。〔貼〕事已完了。言已盡了。請快些出去。夜間早些來罷。〔生〕小姐。小生別了。〔旦留介〕何忍相捨。

赴約鍾情贈異香。

堪憐此會不尋常。

百年恩愛今宵始。

贏得風流第一場。

第二十六齣 聞香致疑

〔風入松〕〔外上〕煖風輕透碧紗幮。正是困人天氣。畫梁乳燕雙飛語。搖浪影

湘簾紋細。可愛清和佳致。莫負了賞花期。〔浣溪沙〕翠葆參差竹徑成。新荷跳雨淚珠傾。

曲闌斜轉小池亭。風約簾衣歸燕急。水搖扇影戲魚驚。柳梢殘日弄微晴。下官前日蒙皇上特旨宣

回。議定皇太子婚事。處置第二女孩兒出閣成婚。費了多少心力。不勝勞苦。雖則如此。完卻一樁心

事。此懷甚覺寬裕矣。但第三女孩兒未得佳配。再作區處。匆忙之際。不覺斗指南方。時當新夏。庭槐

蔽日。綠潤圖書。隴麥連雲。黃催餅餌。碁罷楸紋。人正懶。爐薰沈水。日初長。當此無事之時。宜作賞心

之樂。院子那里。〔末上〕竚立聽呼喚。奔趨奉使令。覆老爺。有何鈞旨。〔外〕早間分付設酒園亭。可完

備麼。〔末〕完備已久。老爺可差人請客。〔外〕沒有外客。你去請三個掾史進來同敘。〔末請介生淨

丑上〕

〔翫仙燈〕方值公餘。忽辱主公招會。〔見介生〕光景蹉跎付擲梭。〔淨丑〕初晴天氣尙清和。

〔外〕雨餘溪上扁舟好。何日閒來理釣簑。列位請坐了。〔衆告坐介〕方完公務。忽荷傳呼。不知有何分付。〔外〕我與列位會少離多。甚疎雅集。況我久勞乍逸。欲接清談。今日閒暇。請過園亭一坐。少敘闊私。〔衆〕過辱隆恩。聊無寸補。得侍清和之宴。益增感愧之懷。〔外〕院子看酒過來。〔末介外遞酒介衆跪答〕

〔金索掛梧桐〕〔外〕清和景可怡。幾陣梅林雨。水溢池塘。荷葉香浮細。幽亭酬醉也。共歡娛。脩竹長松映玉卮。閒吟遶屋扶疎句。須信淵明趣雅宜。南薰至。新裁白苧扇。動暑潛除。〔合〕論人生最要忘機。挽不住流光逝。

〔前腔〕〔衆〕虛簷燕引雛。碧沼遊魚戲。糝徑楊花。是處因風起。篆煙輕嫋也。吐金猊。睡怯新蟬枕屢移。綠陰滿院清如水。牆外葵榴逞豔枝。休辭醉。閒愁萬斛。管取盡消除。〔合前外〕坐間覺有異香。甚是可愛。你三人身邊誰帶得這香。〔衆〕俱不曾帶香。

〔鎖南枝〕〔外〕香芬馥。雅且奇。是誰佩囊藏在衣。〔衆〕絕似沈檀之美。〔外〕幽遠勝沈檀。〔衆〕又如蘭蕙之佳。〔外〕清嘉過蘭蕙。〔衆〕敢是簷外香風。〔外〕非簷外。〔衆〕那里香來。

〔外〕在座隅。比龍涎有餘趣。〔生指介〕相公你看那。

〔前腔〕花屏障。錦繡機。乘風縹緲多芳氣。〔外〕不是花香。〔生〕我知道了。定是御爐煙。朝回惹衣袂。〔外〕天道初熱。朝衣都已卸了。〔生〕或是金猊內。爇麝臍。〔外〕爐中那有此

香。〔生〕或是鼎俎中。珍羞味。〔外〕席上那有此味。〔淨丑嗅生衣介〕知道了。

〔錦衣香〕我三人雖同輩。羨韓生獨出類。素尚修潔衣冠。鄉人難浼。〔外〕德真果是好潔淨。〔淨丑〕近多香氣。漬襟裾。芳馨透徹甚異。平時神仙隊裏似追陪。令人可意。暫時相聚。卻疑身在萬花叢裏。〔外作疑介〕

〔漿水令〕這奇香溫醇可貴。想從來亦非容易。靈根瑞種世間稀。上方禁苑恐不多儲。〔背介〕關心事堪疑。慮吾家曾受皇恩賜。〔合〕茲良會。茲良會。逢場作戲。忘年分。忘年分。樂雍熙。

晚上危亭亦快哉。

清風如水辟塵埃。

一盃到手先成醉。

萬事無心觸處來。

〔外弔場〕入門休問榮枯事。觀着容顏便得知。自家這幾日。見得第三女孩兒容顏改變。舉止異常。正在狐疑之際。方纔韓壽衣間溫香襲人。我想這香是西域所貢。一着人身。香氣經月不散。皇上獨賜于我。付托女孩兒密藏青瑣中。他那里得來。我一向有事在外。莫非與他做下事了。因此方纔飲酒。事上心來。不覺易醉。可惱可惱。〔嘆介〕將信將疑。不能明白。且待晚間。徑到繡房中。與女孩兒取討此香。看他在否。便知端的。

疑事最關心。

弓蛇盃影參。

幽蹤不易覓。

吞卻線和針。

第二十七齣 索香看牆

〔破陣子〕〔旦上〕綠蔭扶疎。夜西牕。新月娟娟。心疑近事。身如夢。目盼佳期。日

似年。〔貼合〕凝思只黯然。〔洞仙歌〕〔旦〕冰肌玉骨。自清涼無汗。水殿風來暗香滿。〔貼〕繡簾

開。一點明月窺人。人未寢。欹枕釵橫鬢亂。〔旦〕春英。我自會韓生之後。心神甚快。朝隱而出。暮隱而入。形跡不露。料無知者。如此往來。目下雖好。但不知去後若何。〔貼〕韓官人元是貴族。今爲老爺通

家才貌兼全。未曾定婚。小姐乃是夫人愛女。未曾納聘。通一媒妁。諧老百年。亦不難之事。何必愁他。當此夜涼無寐。自須消遣爲妙。

〔解三醒〕〔旦〕芰荷池雨聲輕濺。似瓊珠滴碎還圓。欄杆十二閒凭遍。好清夜。未成眠。玉鈎垂下簾高捲。耿耿明河已在天。〔合〕人不見。蕭牆千里。彼此心懸。〔前腔〕〔貼〕覷流螢飛來庭院。舉齊紈笑撲纖纖。臨風對月聊消遣。堪解慍。理薰絃。雲形屢聳千峯巧。花氣渾飄百和煙。〔合前〕

〔一疋布〕〔外上〕心生慮。苦憂煎。根尋事始緣。黃昏獨到綺牕前。狐疑應立渙。

〔見介旦〕爹爹爲何黃昏來此。〔外〕我非爲別事。前日朝廷所賜異香。如今要用。特來取。可把與我。〔旦〕這香恐是爹爹取去用了。〔外〕胡說。我一向在外。那有閒情用此。我扞你收藏。卻把與誰了。〔旦〕孩兒居深閨之中。無親戚之會。把香與誰。〔外〕既不與誰。香在那里了。〔怒介〕

〔別銀燈〕論女職當承父言。這些物無心收管。不惟負卻君恩眷。視天親殊爲輕淺。〔合〕要將就裏究研。這意兒教人怎安。〔旦跪哭介〕

〔前腔〕望椿庭衰齡懽怵。何須得怒形顏面。異香雖好。不過外物耳。父子乃天性之親。可憐平地風波變。天那好苦。霎時間膽驚心戰。〔合前〕

〔前腔〕〔外〕恁端居重門深院。把珍奇恣行暴殄。〔旦〕暴殄天物。古人深戒。孩兒豈不知道。〔外〕反張利口支吾辨。自輕狂輒同汗賤。〔合前外〕想是春英這小賤人偷去此香。〔貼跪介〕天那。春英做使女呵。

〔前腔〕侍房幃力勤針線。守閨箴敢容偷換。此香或是老爺取用。一時忘了。或是小姐收貯。一時失了。倉皇急遽尋不見。老爺今晚追尋。小姐與我一時無措。〔哭介〕徒多愁淚流

如霰。〔合前旦〕此香是清玩之物。既不能充飢。又不能禦寒。孩兒要他沒用。況獨處閨房。並無親戚往來。不敢私假。那知着落。〔哭介〕今晚爹爹爲此微物。發此大怒。恐傷天和。晚年衰質。豈宜如此。請自三思。勿生多慮。〔外惱介〕噫。沒了我香。又多饒舌。氣死我也。你且進去。少不得有個着實。再作區處。〔貼〕事到頭來沒奈何。〔旦〕枉將疑慮責差訛。〔外〕酒逢知己千鍾少。〔合〕話不投機半句多。

〔旦貼下外轉行介〕此香乃西域所貢。皇上甚愛重之。惟下官與大司馬陳騫。得蒙所賜。其餘雖親

王貴戚皆不得預。皇上殊恩不敢輕用。托他收藏。誰料他與韓壽通情。竟失此。況他近來形容改變。不言可知。雖然如此。我府中門閣嚴峻。內外隔絕。怎能進得。將信將疑。不能明白。如何是好。〔起介〕我有計了。此事只好潛察。不宜揚言。且去暫臥。祥稱有賊。着人四下里遍看牆垣門戶。倘有往來所在。必存痕跡。這事就可知了。〔睡介內打更介外驚起介〕有賊有賊。院子那里。〔末上〕夜中高叫聲如撼。夢裏驚聞走似飛。老爺見賊走在那邊。〔外〕不知走那邊去了。快着多人搜尋。末叫介〕各廊巡夜的都來。〔淨丑執火把上〕貔貅驅小兔。鷹隼逐孤禽。〔外〕將火照明。各處去尋看。〔末引淨丑看介〕

〔滴溜子〕攜燈照。攜燈照。光明如電。穿窬的。穿窬的。潛身怎掩。四週巡邏將遍。

〔外〕仔細用心搜看。〔衆〕各處都尋遍了。沒有些須蹤影。惟東北牆角上邊呵。似狐狸足跡痕。不生草蘚。那賊聽得喊聲。或者踰越逋逃。料在此間。〔外看介〕正是了。這牆頭光光滑滑的。

〔前腔〕東北上。東北上。牆頭痕顯。今夜裏。今夜裏。狐疑可驗。此心不勝兢戰。自知欠謹防。致有此變。你們衆人自今以後。各要勤劬。不宜怠緩。賊既逃了。你們都去睡罷。

〔衆〕捉賊不如辟賊。疑心須要小心。〔下外〕事已明矣。情已真矣。又何疑焉。家門不幸。有這醜事。〔惱介〕可惱可惱。

〔歸朝歡〕冤家的。冤家的。德性喪天。全不顧閨門行檢。桑榆景。桑榆景。衰白可憐。這醜聲羞污了晉元勳冠冕。

〔餘文〕冤家。豈不愆期有待。求佳選。無端白璧輕汗玷。只恐路上行人作話傳。青瑣無端失異香。東牆狐跡見乖張。

大風吹倒梧桐樹。定有傍人說短長。

第二十八齣 鞫詢香情

〔菊花引〕〔老旦上〕光景迫桑榆。猶有閒愁苦。大事已糊塗。羞殺門楣差誤。男正位乎外。女正位乎內。家人利女貞。內外斯無愧。我第三女兒。素多才思。頗重風情。不料相公出鎮。付託韓壽府中安歇。我因病臥。失于隄防。彼此潛通。做成醜事。帷簿不修。我之罪也。相公見女孩兒。形容改變。韓壽又有異香。遂生疑慮。昨晚自去取討此香。已沒有了。相公大惱。形于聲色。倘外人聞

知。壞我宮中兩女體面。殊不雅觀。且待相公出來。將些言語委曲解勸一番。多少是好。

〔望遠行〕〔外上〕元勳簪組。誰料得家聲如許。隱忍藏污。滿腔子憧憧難數。〔見

介〕夫人。養子不教父之過。人皆知之。那養女不教。不知是誰之過。〔老旦〕相公。無稽之言勿聽。弗詢之謀勿庸。自古道。眼見未爲真。況未見者乎。〔外〕你說得好。這曖昧之事。容得你見。想你曾見。不以爲真。而反縱他如此。〔老旦〕以無爲有。空懷載鬼之疑。弄假成真。枉用張弧之計。差之毫釐。繆以千里。倘有後悔。噬臍莫及。相公請自三思。不可造次。〔外怒介〕你還道沒有這事。且問這香如何失了。韓壽從何所得。牆上痕跡。是誰往來。〔老旦〕香是爐中清玩之物。或者女孩兒好香。日久已燒盡了。韓壽之香。別有所得。難必女兒所與。牆上痕跡。野貓黃鼠狐狸出沒。年久所致。韓壽一書生之力。豈能插翅飛過此等高牆。你今日之論。皆憑虛涉空之談。非真知灼見之實。將我繡閣如花之女。當你雷霆不測之威。父子相殘。門楣自玷。天道人倫。皆有所虧。妾爲相公不取也。〔外〕溺愛者不明。你愛着女兒。兀自不肯信哩。我且把些證見與你看。〔老旦〕有何證見。便要明白。〔外〕我與你一個明白。丫頭秋香冬秀春英都喚出來。〔淨丑貼上〕聽得高聲叫。慌忙走來到。必定有蹊蹺。偷香事發了。

〔跪介〕有何分付。外〕你這些奴才。把小姐與韓壽往來情由。何日送香與他。仔細實說。饒你性命。若有一言不實。就打死了。〔淨丑〕我們伏侍夫人。並不知道。〔貼〕這香甚好。天道初熱。小姐怕聞穢氣。每日金爐中燒用盡了。〔老旦〕我道是燒用盡了。這些小物。查問怎麼。〔貼〕夫人說的正是。〔外〕哇。這奴才不許開口。先打秋香冬秀。便知真實。〔打淨丑介淨丑〕老爺饒打。容我們告稟。前日老爺出鎮之時呵。

〔玉交枝〕房櫺深暮。侍夫人挑燈將臥。忽聞得牕外人行。我兩個呵。急出去週圍尋顧。〔外〕見甚麼人來。〔淨丑〕只見春英韓壽手相扶。稱言小姐邀情晤。〔外〕那時怎不拏住了他。淨丑〕也要拏他。想夫人病中。不宜着惱。小姐掌家。勢難違逆。因此上難行阻禦。因此上難行阻禦。我兩人止見這遭。已後事情。都問春英。便知端的。〔老旦〕那有這事。不要聽他。因此上難行阻禦。這奴才怕打。隨口胡說。相公豈可以威逼之。〔貼〕夫人說的是。老爺詳察。〔外〕春英這奴才。如今賴不得了。送煖偷寒。來蹤去跡。都由你起。好把始末根由。從實說明。〔貼哭介〕沒有這事。便打死春英。亦無指實。〔外打介〕這奴才口硬。便打死罷。〔貼介〕好苦。熬打不過。只得說了。老爺饒打。容我告稟。

前者老爺誕日。韓壽赴宴。小姐迴避進去呵。

〔前腔〕潛窺青瑣。見儀容風流雅素。向蘭閨寤寐相思。通鳳簡綢繆傳致。要圖百歲共歡娛。先期一夢行雲雨。〔外〕你怎不阻他。做這勾當。〔貼〕小姐是主。春英是下人。因此上難行阻禦。因此上難行阻禦。〔外〕情真事實。氣殺我也。雖則如此。使打死這些奴才。亦何益哉。〔喝介〕哂且去。〔淨丑〕困魚離網罟。〔貼〕幽鳥脫樊籠。〔並下外〕夫人。如今有了證見。又合理說。〔老旦〕相公不可輕信胡言。還須自存體面。

〔入聲甘州〕堂堂相府。把門楣自壞。醜聲傳播。〔外〕方纔丫頭所言。你會聽麼。〔老旦〕癡愚奴輩。怎當恁怒威如虎。相公。你須要三思着。流言卻成投鼠誤。偏惑猶然見豕訛。〔合〕可歎。全沒此遠大之圖。

〔前腔〕〔外〕盧胡。徒爲恃怙。逞遁辭護女欺夫。把黃扉紫閣。聲名喪在須臾。花殘已知難再補。圭玷誰云尙可磨。〔合前老旦〕相公你且息怒。聽我一言。〔外〕事到如此。又有何說。〔老旦〕此事不論有無。你一朝之忿發之甚易。女兒終身之憂。當之實難。倘他羞憤。自盡而

死。外人聞知。豈不辱你宮中兩女。皇太子齊王視你何如人。你亦何顏立于朝廷衆公卿之上。況韓壽原係通家。是你看他才德兼全。托在府中安歇。分明引盜入室。得成此事。自家不能防微杜漸。卻怨誰來。莫若卽通媒妁。速訂婚姻。一則免吾女別嫁。一則消傍人私議。〔外〕這般胡說。虧你不羞。〔老旦〕我是好話。你須

〔前腔〕躊躕乘時配取。勳名閎閱彼此相符。男才女貌。正是敵體葭莩。〔外〕公侯之女。豈嫁鑽穴之徒。〔老旦〕今朝莫誚鑽穴徒。他日驚看運廟謨。〔合前〕

〔前腔〕〔外〕糝糊情辭鄙魯。我當朝元輔。肯婿莠夫。他草茅韋布。怎入玉簇珠鋪。〔怒介〕你休說那話了。門楣自緣輕玷污。伉儷何勞妄覬覦。〔合前〕

溺愛眞禽犢。

糊塗豈丈夫。

是非終日有。

不聽自然無。

第二十九齣 問卜決疑

〔瑞鶴仙〕〔生上〕僻性耽風月。恨行藏疏淺。霎時機洩。姻緣從此歇。恐豹尾黃

旛使身顛越。

天道有盈虧。泰過還爲否。人事有得失。樂極悲應起。小生與小姐相通。東牆往來。朝

出暮入。攜雲握雨。兩情甚歡。指望求通媒妁。以爲偕老之計。誰料園亭宴會。司空聞我身上異香。疑是小姐所贈。卽行查究。事跡昭彰。小姐驚憂成病。安危未知。春英鎖禁空房。生死難保。我孤身在此。若不逃避。恐有奇禍。〔悲介〕小姐春英受此苦楚。怎忍捨去。但事在難處之際。我亦無可奈何。只得往鄭媽媽家商議。作速動身。保全性命。料得司空饒我不過。〔行介〕

〔神仗兒〕隨機應變。隨機應變。難容稽緩。偷他行籌算。怎免剝牀膚患。須勁捷。

效鵬搏。須勁捷。效鵬搏。〔叫介〕鄭媽媽在家麼。〔丑上〕

〔字字雙〕衡門老寡。晝垂簾。孤塞無是非。盡日閒。清淡。忽聞門外喚聲誼。來

看。〔見介〕原來是我官人。倉皇失措。帶愁顏。何幹。〔生〕鄭媽媽。我的事弄得不好了。〔丑〕官人

身居相府。職掌文房。有何事不好。這等慌張。〔生〕一言難盡。〔丑〕但說不妨。〔生〕我與小姐通情。買

相公知道了。查究實跡。小姐驚憂成病。春英鎖禁空房。料他饒我不過。特來與你商議。意欲逃往他

鄉。保全性命。〔丑〕天那。怎麼又有這件事出來。既有這事。官人就難安身了。〔生〕因是這等。急欲潛

避。〔丑〕雖則如此。且放從容。〔生〕勢在燒眉之急。從容不得了。〔丑〕不妨聽老身一言相告。〔生〕有何計策。〔丑〕沒有計策。老身只把府中事體。度量一二。說與官人裁處。〔生〕願聞願聞。〔丑〕小姐是夫人所愛。老爺難爲他不得。春英是小姐所愛。夫人亦能保全。老爺平素懼內的。夫人有言。並不違忤。況大小姐爲齊王妃。二小姐新爲皇太子妃。豈敢明白此事。自揚醜聲。玷辱他們體面。你放心安坐在揀房內。相見老爺。只做不知。照舊行事。決不難爲你。〔生〕你言雖是。不過寬我之憂。我自惶恐。何顏再往。如今一定要去了。〔丑〕既是疑慮。我近鄰有個張先生。善周易課。能斷人一生榮枯得失。應驗如神。可請他來問卜一卦。以決行止何如。〔生〕這個到好。快請過來。〔丑〕官人既允。老身就去。〔行介〕出門三五步。咫尺是他家。張先生在家麼。〔淨上〕

〔前腔〕筠簾垂肆四方傳。名遠實術不須多要錢。心坦與三個好喜歡緣。婉轉靈如郭璞。驗吾言。欣羨。〔見介〕鄭媽媽有何相喚。〔丑〕我家有個鄉親。請你卜課。〔淨〕如此就行。〔丑〕請進相見。〔見介淨〕官人高姓。〔生〕小生姓韓。〔淨〕對天禱告來。〔生禱介淨占介〕拆拆拆。拆重拆。下坎上坤。地水師卦。第二爻發動。請問占何事。〔生〕目下事在危疑。恐有害及。欲往遠方避。

之何如。〔淨〕此課大吉之兆。富貴將來。不勞遠去。〔生〕何以見之。〔淨〕師卦九二爻。詞曰在師中吉。王三錫命。蓋九二在下。爲衆陰所歸。是有多人輔助。不至爲害。況有剛中之德。上應于五。而爲所寵任。是有抱負。而得朝廷大用。目下當將帥之權。荷恩榮之賜。〔生〕君子問災不問福。豈敢望此。〔淨〕

官人。

〔鬪黑墓〕據理論功名就在眼前。〔生〕目下驚恐。能累身否。〔淨〕閒事虛驚。何足憂煎。早晚要膺國寄。握兵權。似雲路天衢。龍翔鳳展。官人。你不但富貴。還有可喜之事。〔生〕又何以見之。〔淨〕卦中第二爻發動。變而爲坤。坤卦惟第二爻爲陰道之純。是女之貴者。以此論之。又當得一佳配。〔生〕狼狽之中。那有此事。〔淨〕我依經直斷。佳姻非誑言。玉葉金枝。玉葉金枝。光輝燦然。

〔前腔〕〔生〕蒙明示便似撥雲見天。開豁胸襟。雙眉解攢。那些個圖富貴。覓姻媿。祇願無虞。微軀保全。先生直斷。果能如所言。他日成人。他日成人。感當鏤鐫。

〔淨〕就此告別。〔丑〕勞金明早相送。〔淨〕鄰比之間。何須計較。據此陰陽卜易。免他岐路苦亡羊。

〔下生〕我未卜課時。去心如箭。既卜課後。行輿似冰。吉凶未歸于一。定進退實介乎兩難。如何是好。
〔丑〕據老身之見。能決府中事勢。據卜課之說。又合官人行藏。況因禍得福。理之常也。不必多慮。且聽老身相告。

〔掉角兒〕勸郎君不須淚漣。寓蝸居潛蹤排遣。待老身去見夫人。委曲周旋。〔生〕春英有罪。敢怕你難進去。〔丑〕到他行探機察變。那其間取一便。把音傳通彼此。可知寒煖。〔合〕臨危蹈險。江心漏船。惟願得風恬浪靜。早見平安。〔生〕鄭媽媽。

〔前腔〕恁此去如涉大川。使吾心頓加兢戰。恐伊家適遇屯遄。反做了油添熾炭。〔拜介〕攄虔誠告蒼天。消禍患。轉艱危。卽成歡忭。〔合前〕

〔尾聲〕心忙咫尺天涯遠。但願得乾旋坤轉。仍指望依舊團圓。

禍伏蕭牆起不虞。此行休咎在須臾。

平空伸出拏雲手。要把顛連用力扶。

第二十齣 母女傷懷

〔一剪梅〕〔旦扶病上〕平地風波勢拍天。事也屯遭。人也顛連。此情誰肯爲吾

憐。跡旣昭然。心自茫然。好花遭雨打。明月被雲遮。人事多更張。歡樂生悲嗟。〔嘆介〕自從事露

之後。爹爹大怒。幸有母親朝夕勸解。頗得從容。每欲尋個自盡。又想人身難得。拋捨韓生不下。勉強

含羞。苟延性命。以俟後圖。但春英鎖禁空房。爹爹絕其飲食。必欲置之死地。是則可哀也。我今有病。

母親必來看覷。我做個假意兒。用些言語激動他一番。必有保全之計。我在三女之中。最爲爹爹母

親所愛。母親作主。爹爹無有不從。且待他來時。自能理會。〔臥介老旦上〕

〔桃源憶故人〕蕭牆禍起如雷電。閃得恩情翻變。朝夕長吁短嘆。只爲恁門楣

玷。〔旦〕羸軀憔悴魂先斷。不久黃泉廝見。〔老旦坐撫旦介〕孩兒。是你累我受氣。反怨誰來。

〔旦〕母親。我不怨你。只恨自家命運當絕。遭此枉事。天下無不是的父母。我爹爹偏信如此。事之有

無。情之虛實。孩兒再不敢辨。人生百歲。難免一死。我比他人。雖有壽夭之分。生之與死。俱是紛紜之

夢。千休萬休。不如死休。待孩兒尋個自盡。免累母親。譬如初生之時。死于襁褓之中。卻不是好。

〔二犯傍妝臺〕深冤無計籲皇天。包羞忍恥。血淚幾曾乾。人生自古皆有死。豈

惟我死是徒然。祇愁榆景雙親邁。猶賴椒房二姊憐。〔哭介〕我的娘呵。劬勞罔極。一朝棄捐。銜恩重結再生緣。

〔前腔〕〔老旦〕你把淚痕拭卻放心寬。雲消霧釋。畢竟見青天。孩兒豈不知道。恩情浹洽。三冬煖。言語參差六月寒。當存喜懼懷雙老。底事癡迷喪九泉。〔哭介〕

孩兒。自經溝瀆。有誰見憐。徒遺話靶使人傳。〔丑上〕天有不測風雲。人有旦夕禍福。老身別了官人。來到府中。探問小姐春英消息。聞得夫人在小姐房中。迤邐行來。此間正是不免逕入。

〔扣頭介〕夫人萬福。〔老旦〕鄭媽媽。你來得正好。老爺惱你女兒。鎖禁空房。要餓死他。怎生是好。

〔丑〕春英有罪。全仗夫人小姐遮蓋。〔旦〕我亦死在旦夕。不能遮蓋他了。〔淨上〕有事不敢不報。無

言不敢亂傳。〔跪介〕管家婆稟事。〔老旦〕有甚麼事。〔淨〕春英鎖禁空房。是老身收管。老爺分付不

許飲食。夫人分付與他飲食。因此連日瞞了老爺。遵奉夫人之命。仍舊送飯。誰想今日老爺密切分

付。要他氣絕。若夜來不氣絕。你就陪他死。老身思想起來。依了老爺之言。違了夫人之意。事在兩難。

特此稟知。〔旦驚介〕是誰說來。〔淨〕老爺鈞旨。〔旦〕呀。老奴才。休得胡說。春英是你收管。要還我活

的。早晚有些差遲。我就打殺你。淨」小姐息怒。老身是下人。不過奉行上命。若得夫人作主。一力擔當。使老爺不見罪。我就太平了。〔旦立介〕母親。你救春英也不救。〔老旦〕你爹爹之命。管家婆怎敢逆他。若救了春英。管家婆就先打死。春英仍不能免。這是買一個饒一個。非徒無益。而又害之。〔旦〕我家事都是母親作主。爹爹無不從者。方纔母親推干。是要春英死了。春英若死。我亦何顏苟生。罷罷。拚得一死。遂了爹娘之意。天那。痛死我也。〔哭倒介老旦扶介〕孩兒蘇甦。不必性急。我卽着管家婆去放出春英。〔丑〕小姐請起。夫人既有命。容老身管家婆去放春英出來。〔同淨下老旦扶旦坐介淨丑扶貼上〕

〔哭相思〕禁錮幽房身偃蹇。覆盆待盡悲殘喘。〔扣頭介旦悲介〕

〔園林好〕苦高堂威如鍛鍊。吾與汝勢難保全。〔起向貼介〕願取南柯同夢。拚死後。愧生前。拚死後。愧生前。

〔前腔〕〔貼〕思往事心中痛酸。何須用尤人怨天。自恨妬花風雨。輕斷送。枉鮮妍。輕斷送。枉鮮妍。

〔前腔〕〔老旦〕莫非命順其自然。這風波有時靜恬。管取回天轉日。修破闕。再團圓。修破闕。再團圓。

〔前腔〕〔淨丑〕事參商於情可憐。在慈親豈容自安。莫使閨嬌失所。啣重恨。負芳年。啣重恨。負芳年。

〔尾聲〕〔老旦〕深慚白壁青蠅玷。〔旦貼〕淚到無聲恨自吞。〔淨丑〕只望雲散天空月又娟。

天親不可以人爲。得失何能辨是非。

雪隱鷺鷥飛始見。柳藏鸚鵡語方知。

第三十一齣 假公薦舉

〔北點絳脣〕〔末上〕月淡星疎。花凝清露。曉啼鳥。千官蹈舞。玉陛動山呼。雉尾

高張擁玉皇。彤庭金榜燦明光。侍臣鵠立階前地。欲紀堯年化日長。自家乃晉朝黃門官是也。時值早朝。但見星河光淡。鼓角聲悲。白帶千山。知殘蟾之未落。紅涵半海。見初日之將升。闔闔欲開。霓旌

飄飄乎翠樹。冕旒方坐。仙仗森簇于丹墀。樂列殿前。簫韶九奏。班齊陛下。簪笏千官。孔雀徐開扇影還。共睹天顏之穆穆。麒麟不動爐烟上。遙瞻香霧之霏霏。嚴蹕物無聲。治朝春有象。君臣契合。堯舜同休。禮樂光華。夏商莫及。拭目太平新氣象。萬方玉帛盡齊心。聖上已陞寶座了。奏事官早來。

〔前腔〕〔小外上〕四海無虞。東南荼苦。奏天衢。當施時雨。弔伐慰焦枯。花樹熹微

宮漏催。爐烟繚繞殿門開。遭逢欲罄揄揚意。共覩梯航四海來。下官王濬。字士治。弘農人也。累官益州刺史。以勳封關內侯。特加授龍驤將軍。今因東吳國孫皓無道。殘害地方。相應征討。爲此具本。奏請行兵。〔跪介末〕該衙門官所奏事。就此披宣。〔小外〕龍驤將軍臣王濬稽首頓首。冒死敢言。

〔浪淘沙〕孫皓據東吳。南面稱孤。荒淫暴虐廢君模。大旱雲霓民望久。可用征

誅。〔末〕孫皓不君。神人怒憤。固當伐矣。但恐天時人事。有未盡宜者。〔小外〕臣每參訪吳楚異同。孫皓

荒淫凶逆。荆揚賢愚。莫不嗟怨。此一可伐也。以時運論之。宜速征伐。若今不伐。天道無常。倘孫皓卒死。更立賢主。文武得人。則爲強敵。此二可伐也。臣在益州。造船七年。日有朽壞。臣年已七十。死無多日。此三可伐也。三者一乖。則難圖矣。臣願陛下毋失事機。必早爲之計。

〔前腔〕兵甲向東驅。如虎追狐。以寬易暴。使民蘇。莫待天時人事改。後變難圖。

〔末〕聖上有旨。王濬素存大志。屢展奇能。先除巴郡。全活遺男萬餘。已堪戰役。繼守益州。預脩巨艦。數千。久壯軍威。足徵謀國之忠。允稱帥師之任。茲特命爾爲平東將軍。假節都督益梁諸軍事。前往征討。謝恩。〔小外拜介末〕山呼。〔小外〕萬歲萬歲。〔末〕退班。〔小外〕玉陛光生。恩命錫。金鏡聲振。凱歌回。〔下末〕聖上有旨。急宣司空賈充到來面議。〔內應宣介〕

〔臨江僊〕〔外上〕忽聞鳳闕傳宣語。料是征東之計。〔扣頭介〕司空臣賈充。〔末〕聖上有旨。東吳孫皓不君。理應致討。已命王濬爲將。領兵前去矣。但王濬年力向衰。恐難獨任。可推有才識一人。充參謀官以副之。卿當舉其所知。〔外〕臣賈充稽首頓首上言。〔末〕何人堪充此選。〔外〕有堵陽韓壽。可以任之。

〔浪淘沙〕媿美管蕭徒。文武兼敷。龍韜豹略貫如珠。參贊軍機多偉識。不負金符。〔末〕據卿所論。可充任使。見授何等官職。曾立何等事功。〔外〕是魏司徒韓暨之曾孫也。雖抱奇才。未經銓選。

〔前腔〕練達少年儒。譽溢皇都。司空作掾效勤劬。星斗胸羅聊一展。廊廟謀謀。

〔末〕聖上有旨。據稱韓壽素抱經世之猷。堪授參戎之任。茲特命爲參謀官。卽同王濬征吳。克捷之日。不次擢用。〔外扣頭介〕萬歲萬歲。〔末〕退班。〔外起介末〕鳳閣已終綸綍語。龍階漸遠珮環聲。

〔下外〕謀事在人。成事在天。天隨人意。豈曰偶然。我想韓壽乃文武全才。遠到之器也。況是故人之孫。我甚愛重之。收在門下。以爲他日依倚。誰料我不肖之女。與他通情。做成醜事。吾恐敗壞家聲。不敢明白。只得含糊罷了。前日夫人勸我。贅他爲婿。我一時怒中。不曾依允。仔細思之。甚爲有理。但我。是當朝元宰。一人之下。萬人之上。有誰爲匹。多少公侯勳戚。求與爲婚。皆不許諾。韓壽未受官職。不過一書生耳。吾家豈宜白衣之婿。因此持疑不決。適值王將軍征吳。朝廷着我舉用一人爲副。正遂我願也。特舉他去。成得功回。必大富貴。吾乃議與爲婚。倘有不利。難免失機之罪。他若死了。方絕吾女之念。

〔刮鼓令〕狐疑事有無。偶乘機用意圖。坐視他們成敗。可因時作避趨。凶吉兩模糊。人生得喪皆天賦。難將好惡預躊躇。料應不久見榮枯。

弄假便成真。

姻緣繫赤繩。

萬般皆是命。

半點不由人。

第三十二齣 受詔參戎

〔粉蝶兒〕〔生上〕萬種風流。一霎時盡成倜傥。分開交頸鴛鴦。意中愁。眉底恨。有誰知否。東風狼籍十分春。更有何緣見玉人。旅次孤身誰是伴。落花流水鬧愁雲。前日鄭媽媽往賈府中打探消息回來。得知小姐春英賴有夫人護持。皆得保全。司空忿怒已息。含糊此事罷了。先凶後吉。都不出鄭媽媽所料。只是我與小姐。別來許久。枕邊恩愛。帳底溫存。付之一夢。〔嘆介〕月色空梁。不見知心到眼。風聲泣樹。徒悲弱質傷神。奈何奈何。

〔二犯解連環〕離恨上眉頭。寥寥袖手。凭欄望斷雙眸。寸心徒悴。孤蹤強留。感時濺淚。比江水不停流。景悠悠。思悠悠。苦殺海山恩義。被他行摧挫。得一齊休。

〔合〕遙相隔。似女牛。天潢險阻。何日再綢繆。小姐我與你相遇之後。時刻不忘。如今呵。〔前腔〕日隔似三秋。睽違既久。那堪旅邸孤幽。暗魂飄蕩。浮蹤逗遛。忘餐廢寢。

空追憶舊緣由。小姐。你心頭。我心頭。黃昏清晝。兩下裏。數不盡一般愁。〔合前小生捧詔上〕

〔率地錦襜〕恩光赫奕動皇州。簡閱賢材爲國求。丹書一劄授參謀。帷幄行看速運籌。聖旨已到。跪聽宣讀。〔生跪介小生〕皇帝詔曰。底平四方。固不免乎薄伐。決勝千里。實有資

于嘉謨。茲者司空賈充奏稱。堵陽韓壽。性稟英明。才優練達。克繩祖武。夙懷謀國之忠。備歷時艱。已裕濟川之略。特命爲平東經略使。以副王濬。往征孫皓。用揚大武。速建奇功。謝恩。〔左右遞冠帶生換介小生〕拜興。〔云云生拜介小生〕山呼。〔生〕萬歲萬歲。〔相見介小生〕參謀大人。君言不宿于家。況軍務緊急。可速起馬。〔生〕旣膺國命。卽赴戎行。有勞天使。待凱旋之日。踵門扣謝。〔小生〕手捧絲綸傳寵錫。耳聽甲冑建豐功。〔別下〕

〔前腔〕〔丑上〕少年英俊試兜鍪。正是遭逢奮志秋。行看事業遍江南。盡洗今朝暗裏羞。〔見介〕老爹。且喜果不出老身所料。也應了卜課之言。〔生〕便是。我官雖有了。但此行是

寒翁失馬。未知是禍是福。〔丑〕我見老爹做了官。不勝之喜。怎說那話。請問這官從何得來。〔生〕朝

廷命王將軍征伐東吳。賈相公舉薦我做參謀官同去。〔丑〕元來老爺爲小姐分上。自然要擡舉你。〔生〕鄭媽媽。你不知道。這舉薦不是好意。〔丑〕卻是爲何。〔生〕賈相公呵。

〔雁來紅〕狐疑作我仇。恐昭彰反見羞。潛圖陰中乘機偶。此舉歸他彀。我方攻輸墨。未習干戈。此去呵。暴虎馮河真可愁。〔合〕臨時候。枯榮戚休。任逆來須順受。

〔前腔〕〔丑〕請開懷莫過憂。正風雲際會投。看奮神武膚功奏。喜慶消污垢。那時節。老爺夫人見你做了大官。這姻緣仍舊。富貴雙全得好逑。〔合前衆扮將校上〕授鉞辭螭陛。分符運豹韜。〔見介〕元帥王爺差小將稟上。大隊軍馬已發。中軍住札郊外。特請參謀爺去。一同起程。〔生〕知道了。多拜上王爺。我分付些家事。卽刻便行。〔衆應介〕千里威風張武旆。一聲號令促征輪。〔下生〕那邊催得要緊了。只是小姐在府中。不能與他面別。怎生是好。

〔朱奴兒〕論軍務難容暫留。割恩愛淚血染袖。身似飄蓬逐水流。當此際豈堪回首。〔合〕惟願取捷奏冕旒。終得遂鸞盟鳳求。

〔前腔〕〔丑〕望此去功名志酬。腰懸着金印如斗。拭目英雄奮九州。何須用啼

痕襟袖。〔合前〕

殷勤寄語泣臨歧。兩地相思各自知。

若得旌旗旋凱日。便爲花燭結褵時。

第二十二齣 夜香祈祐

〔天下樂〕〔旦上〕玉碎花殘事轉非。雙蛾頻蹙淚偷垂。〔貼合〕不禁萬斛相思

恨。最是孤燈照獨幃。〔旦〕牆角空遺狐跡痕。異香杳杳欲銷魂。〔貼〕情深久斷行雲夢。愁極難迴

織錦文。〔旦〕自嘆有天雖共戴。應知無地再通恩。〔貼〕郎心若似初相識。定覓佳緣慰拆鸞。〔扣頭

介〕春英得罪。已在死數。蒙小姐再生之恩。沒身難報。〔旦〕這是我累你。何消謝得。只是韓生在你

母家。如飄蓬斷梗。我在這里。若羈鳳囚凰。一時間忽見乖張。兩下里遂成間阻。如何是好。〔貼〕運蹇

時乖。璞堅難乎見玉。數窮理極。人定可以勝天。小姐與韓官人伉儷之情。旣已相孚。婚姻之事。亦將

有待。老爺轉展忿恨。雖則可憂。夫人動輒贊襄。實爲可望。小姐且放寬心。不必多苦。〔旦〕春英。你豈

不知我與韓生自那日別來。苦在寸心。終難自慰。形賸異境。豈易相通。〔悲介〕好苦呵。

〔四朝元〕追思心素嬌羞強自支。聽梧桐微雨。瀟淅聲細。寒潤侵羅綺。這山恩海義。這山恩海義。做了比目離羣。連理分枝。鳳隻鸞孤。鴈遙魚逝。空記當初事。嗒。忍不住淚交頤。倚遍欄杆。恍惚渾如醉。韓德真。君心那得知。妾心愁欲死。羸形瘦影。涼涼踽踽。各天殊地。各天殊地。〔貼〕我小姐呵。〔長相思〕長相思。心不絕。思到相思心欲裂。羅幃素月清口眠。淚如懸河積成血。山可崩。海可竭。人生不可輕離別。別時容易見時難。長嘆一回一嗚咽。

〔前腔〕樓頭鴻起。聲聲似怨離。苦孤燈明滅。欹枕憔悴。那堪愁萬縷。這悠悠夢裏。這悠悠夢裏。最恨峽雨巫雲。信杳蹤迷。寂寞神魂。蕭條風致。不比當初事。嗒。翹首望天涯。黃葉紛紛。亂逐西風墜。韓官人與小姐。紫簫久斷吹。素牋不可寄。疎簾淡月。悽悽慘慘。照人無寐。照人無寐。〔丑上〕風觸愁人分外寒。愁人含淚倚闌干。閒雲

阻盡相思路。消息聊通少慰安。〔見介旦〕鄭媽媽爲何能晚來。〔丑〕老身非爲別事。特來報個喜信。〔貼〕小姐正在此愁悶。有何喜事。娘可說知。〔丑〕韓官人做了官。今日起程去了。臨行之際。想着小

姐。不能面別。兩淚交流。多多傳語。〔旦〕官從何來。今往何處。〔丑〕朝廷差王將軍征伐東吳。少一個參謀。你們老爺舉薦他去。今日受了勅命。許多人馬簇擁去了。不久得功回來。姻緣穩穩成矣。〔旦哭介〕天那。可憐韓德真。奴家害了你也。我爹爹是你宿世冤家。〔丑〕韓老爹做了大官。是老爺好意。老身不勝歡喜。特來相報。小姐反生愁煩。到怨着老爺。卻是爲何。〔旦〕鄭媽媽。你但知其一。不知其二。我爹爹此舉。不是好意。韓生此行。不是好事。〔丑〕韓老爹頂冠束帶。威儀軒昂。前呼後擁。聲勢尊嚴。外人見了。稱羨不已。其中委曲。老身豈知。可言其詳。〔旦〕兵凶器也。戰危事也。他是書生。未諳弓馬。豈能身親征伐。我爹爹怪他。無計可施。乘此機會。假公濟私。舉薦他去。或因戰鬥陣亡。或因失機得罪。實是中傷之計。〔貼〕小姐不必多慮。他是個有謀略的人。此去料能成功。因禍得福。不妨不妨。〔丑〕死生有命。富貴在天。愁他怎麼。家裏夜間乏人。告別回去。〔旦〕多起動了。倘有消息。再煩說聲。〔丑〕爲傳消息。因風便。不惜奔馳。載月歸。〔下旦〕春英。我聽了這個消息。又增幾多愁悶。韓生此行。途中未知安危。軍中未決勝負。甚是放心不下。你可取炷香來。我在星月之下。對大祈禱一番。多少是好。〔貼〕這個到好。〔排香卓介〕香已有了。請小姐禮拜。〔旦〕滿目雲山。何處是鳳凰棲止。一天

星斗幾時成。牛女歡期。總上心來。徒增浩嘆。正是天長地久。有時盡。此恨綿綿無絕期。〔拈香拜介〕
〔前腔〕齋明虔意。祈天鑒我私。只爲韓生年少。乍職軍旅。這敷張恐未知。望陰
加蔭庇。望陰加蔭庇。願取耀武宣威。制變臨機。不赤干戈。壺漿簞食。奏凱歡聲
沸。紫。三錫下堯衢。紆紫拖朱。方顯男兒志。那時節呵。身榮晝錦歸。速圖成。伉儷前
愆克蓋。轟轟烈烈。泰來傾否。泰來傾否。

〔前腔〕〔貼〕兵雖凶器。雄材稱展舒。管取運籌帷幄。決勝千里。朝野胥慶美。這
姻緣可擬。這姻緣可擬。再得相逢。重效于飛。煖轉鑪灰。春回衾翠。盡雪今朝恥。
嗟。默默自尋思。此願能諧。不枉風流媚。韓官人。你應成天下奇。莫辜素自許。我
與小姐黃昏白日。時時刻刻。揚眉屈指。揚眉屈指。

鴉鵲忽同鳴。

吉凶不可測。

憂喜兩持疑。

前程暗如漆。

第二十四齣 定策征吳

〔生查子〕〔小外上〕義旅下江南。銳氣衝霄漢。聲罪討凶殘。慰彼蒼生怨。三尺龍泉吐赤光。英雄千載要流芳。長驅直擣東南窟。烈烈轟轟做一場。下官王濬。官拜平東將軍。奉勅征討東吳。與新參謀韓壽。水陸並進。刻日交鋒。我想那孫皓。毒痛肆及于無辜。征討宜加於有罪。虔恭師律。惟賞罰可以成功。鼓舞戎行。非奮揚無以報德。肅清土宇。力易摧枯。混一規模。事同拾芥。勝概橫于千里。歡聲洽乎萬方。氛沴潛消。須仰太陽之普照。鯨鯢就戮。行看東海之無波。將校何在。〔衆扮四將校上〕江晴風煖。旌旗動。木落霜清。鼓角高。〔見介小外〕我們奉勅勤王。各要盡心報國。管陸兵的務要整齊人馬。各分隊伍。聽吾號令。管水兵的務要整齊船隻。各分幫次。聽吾號令。〔衆應介小外〕只待參謀韓爺到。卽進兵了。〔衆〕道猶未了。韓爺早來。〔生上〕

〔前腔〕奉勅贊兵權。幃幄參籌算。決勝運機宜。孰敢顏行亂。〔見介小外〕參謀大人。東吳孫皓。虐甚三苗。屢悖大虞之德。罪踰有扈。難逃神禹之誅。我和你奉命到此。要成一統之規。須有萬全之策。乞賜指揮。〔生〕元帥。我看孫皓。乃狐鼠之陋。無用深計。蜂螿之微。豈能流毒。上賴聖天子神靈。下仗大元戎智勇。可不戰而自下矣。下官襍線之才。壘天之見。何能之有。但職忝參戎。敢陳

愚陋〔小外〕願聞〔生〕元帥先任巴郡守。郡邊吳境。兵士苦役。生男多不肯收養。元帥乃嚴其禁令。寬其徭役。凡生男之家。皆與優卹。以全活者甚衆。今爲壯丁。皆堪軍旅。用此出征。則彼感元帥全活之恩。能效死力。一可當百。此必勝之兵也。〔小外〕下官亦有此意。未敢擅行。今蒙明教。卽取而用之。

〔生〕東吳水國也。利于水戰。元帥在益州打造的船。請問何等式樣。〔小外〕大船連舳一百二十步。可容二千餘人。以木爲城。起樓櫓。開四出門。其上皆得馳馬來往。又畫鷁首怪獸。以懼江神。〔生〕東吳有長江之險。該用此船。但彼素聞益州造船。木柁蔽江而下。乃在險磧要害之處。皆用鐵鎖橫截之。又作鐵錐。長丈餘。暗置江中。以逆距船。則此船無用了。〔小外〕下官打造此船。勞民傷財。盡心竭力。經今七年。付之無用。難道罷了。〔生〕不妨。自有破法。將校過來。聽吾分付。〔衆跪介〕謹聽號令。

〔生〕速用竹木編作大筏數千。亦方百餘步。縛草爲人。妝着盔甲。仍擎器械。使善水性的駕筏先行。筏遇鐵錐。錐必着筏拖去。又作火炬長十餘丈。大數十圍。灌以麻油。船前遇鎖。燃火燒之。鎖必鎔液斷絕。則船行不礙矣。〔小外謝介〕參謀妙計。量彼一丸之卵。不足以勝泰山。螳螂之臂。不足以當車轍。你衆將校過來。可聽參謀爺號令。〔衆跪介生〕闔以外將軍制之。今日之事。正在元帥。下官安敢

攙越〔小外〕如此下官占了〔生〕正當〔小外〕衆將校聽吾號令。

〔催拍〕布韜略申盟將官盡忠勇當慚素餐奉勅征南水陸兼程航海梯山士卒張皇鸚奮鷓搏〔合〕時雨降遠近騰歡不血刃凱歌還。

〔前腔〕〔生〕忝恩命參戎寄專傾葵赤計圖萬全彼起兵端犯我邊疆毒我黎元赫赫王師弔伐爲先〔合前〕

〔前腔〕〔二將〕振軍聲山頽海掀奮威風星搖斗寒掃蕩塵寰二箭無勞啣璧轅前一統輿圖國祚如磐〔合前〕

〔前腔〕〔二校〕視敵國君惡滔天民塗炭久已號冤代虐爲寬後後來蘇爭餽壺箠率化歸王坤轉乾旋〔合前〕

橫江誓衆取凶殘
劍氣凌空星斗寒

管使偏安歸大統
功鐫麟閣並無刊

第三十五齣 誑傳凶信

〔清江引〕〔淨上〕司空掾職虛名望。機變言多謊。〔丑上〕賄賂自公行。法度都拋漾。〔合〕恣狼貪逞狐媚爲欺罔。〔淨〕持法全無準。〔丑〕存心未必公。〔合〕有人來請託。衣食自然豐。〔笑介淨〕朱兄。我和你在賈司空門下做掾史。一向被韓壽奪了魁。使我們不能擡頭。誰想他與府中小姐通姦事露。司空要擺佈他。乘機舉薦他做參謀官。與同王將軍征吳去了。如今我們頭上自覺輕鬆。心中何等快活。〔丑〕陸兄所言最是。〔淨〕我好笑。〔丑〕你好笑甚麼。〔淨〕我想起來。司空把韓壽十分敬重。反被他做這醜事。敗壞相府門風。滿京城流傳話靶。此是一好笑也。韓壽見司空擡舉了。就妝模做樣。眼底無人。甚把我們輕慢。今去出征。料是文人。怎做得武事。利害相關。吉凶未保。此是二好笑也。〔丑〕陸兄。如今我們用些見識。造些言語。做他一個三好笑如何。〔淨〕人心同然。我正欲如此。可設個法兒。〔丑〕府中有個丫頭。叫做春英。其母鄭媽媽。原是韓壽家奴。常在府中走動。小姐最親信他。我們徑到他家。謊說幾句。哄他一哄。〔淨〕怎麼哄他。〔丑〕只說韓壽出征水戰。落在江中溺死。哄他報與小姐必定哀苦。倘司空聞知他死。虛喜一番。卻不是好。〔淨〕有趣有趣。就行就行。〔丑〕穿長街。〔淨〕入短巷。〔丑〕着地行。〔淨〕漫天誑。此間是鄭家了。阿呀。鎖門在此。想

不在家。〔丑〕正好正好。省得他認得我們。後來不好對證。如今說與他近鄰知道。央他寄信罷。〔淨〕停當停當。〔丑問介〕借問一聲。〔內應〕問甚麼事。〔丑〕隔壁鄭媽媽鄉親韓參謀。同王將軍出征水戰。落在江中溺死。我們是鄭媽媽同鄉。也是出征的。今差到京公幹。特來報信。〔內應〕知道了。待鄭媽媽回來說與他知。起動了。〔淨丑笑介〕一場好笑。快活快活。

〔雙鵲〕巧機關真鹵莽。弄虛言一切譸張。自今朝以訛傳訛。紛然流謗。使深閨知凶信。必生悽愴。把他們戲耍。心驚魂蕩。〔下外上〕白雲本是無心物。卻被清風引出來。老漢閒中養病。睡在家裏。方有人央我傳信與隔壁鄭媽媽。既受人之託。必當終人之事。待他回來。說與他知。〔丑上〕

〔清江引〕孤形寡跡無倚仗。白髮因愁長。井臼苦親操。匍匐街坊上。〔外〕鄭媽媽回來了。〔丑〕見鄰叟。有何事。推簾望。〔見介外〕方纔你們有個鄉里。隨王將軍出征。差來公幹的。說韓參謀水戰。落江溺死。因你不在家。託我傳信。〔丑〕天那。好苦。〔外〕各人自掃門前雪。莫管他家瓦上霜。〔別下丑悲介〕

〔雙鴻鴻〕聞凶信心中悒快。這前程孤吾懸望。〔惱介〕恨司空用深謀。將人摧喪。果有此事。不免就去府中報與小姐知道。〔行介〕此心忙行步緊。特來傳向。使他們知得。豈勝惆悵。此間已是繡房了。不免叫聲。〔叫介〕春英。請小姐出來。〔旦貼應上〕

〔糖多令〕何事到蘭房。呼聲甚恐惶。〔丑〕征東水陣厄韓郎。失足江心早喪。〔合〕遭不幸。實堪傷。〔旦〕這話是誰傳來。〔丑〕今日老身有事出外才回。近鄰說我有個鄉里。隨王將軍出征。差來公幹。因便報信。說韓參謀水戰。死于江中了。〔旦〕不信有這等事。天那。好苦。豈不痛死我也。〔哭倒介貼丑扶介〕小姐且請蘇甦。消息未知真否。不必愁煩。

〔刮鼓令〕〔旦〕哀哉俊俏郎。試兜鍪赴戰場。枉自有胸藏錦繡。銳氣文光射斗芒。淪沒水雲鄉。韓德真。你的命運乖蹇。一似麒麟鳳凰。不逢時賞。爲奴牽絆受飛殃。痛吞聲淚血暗沾裳。〔貼悲介〕韓參謀。我可憐你生不遇時。

〔前腔〕分明遭魍魎。使多才遽夭亡。拆散了瓊柯連理。義海恩山一旦荒。最苦這無常。可憐當初許多思想。熬煎月白與昏黃。今日裏依舊恨茫茫。

〔前腔〕〔丑〕訃音雖可傷。恐風聞或未詳。且暫展雙蛾蹙黛。莫作閒愁苦斷腸。

〔貼〕母親。你往外邊仔細訪問。〔丑〕再去詢多方。東吳距京山遙水廣。有誰目擊這行藏。眞和假不久自傳揚。

〔前腔〕〔旦貼〕娘行速撥忙。覓來鴻當細訪。多管是依稀彷彿。疑信悲歡不可量。你可卽去問個端的。定要決災祥。使吾曉然知他音響。老爺夫人莫使他知。好將蹤跡避高堂。〔丑〕這個理會得。不必丁寧。〔旦貼〕隔牆耳言語更須防。

凶信遙傳到繡房。恩情從此訴存亡。

傷心不敢高聲哭。只恐猿聞也斷腸。

第三十六齣 征吳得勝

〔水底魚兒〕〔淨領兵上〕晉國胡行。無名師擅興。侵吾疆境。擄掠害生靈。擄掠害生靈。下官乃東吳大都督孫歆是也。耐晉國恃強。無故加兵于我。差將軍于濬前來征戰。不幸

我國鎮南將軍留憲征南將軍成據宜都。太守虞忠監軍陸晏俱被生擒。平西將軍施洪等望風投

降。連日彼軍倍長威風。我軍全沒鬪志。兵不血刃。攻無堅城。夏口武昌。不能支抗。因此他水軍順流鼓楫。徑抵三山。游擊將軍張象率水兵萬人迎敵。今又望旗而降。止有我一軍在此。正是織縞當強弩之初。孤豚債肥牛之下。可憐呵。爲今之計。且盡我爲臣之分。竭吾報國之心。僥倖退敵。未可知也。分付將校。排列陣勢。揚旗擂鼓。以挫其鋒。不可畏卻。〔衆應排陣介小外生領兵追上〕

〔前腔〕擊鼓鳴鈺。威聲泣鬼神。勢如破竹。攻取石頭城。攻取石頭城。咄前面來將何人。敢來迎敵。及早投降。姑存性命。〔淨〕吾乃東吳大都督孫。親自領兵。你們何故。侵我境土。〔小外生與淨鬪介〕

〔前腔〕仗義興兵。弔民伐暴君。敢來拒戰。盡教伊喪此生。教伊喪此生。

〔前腔〕〔淨〕休得強橫。侵凌至不仁。速當退舍。免輿尸潰亂奔。免輿尸潰亂奔。

〔戰三合敗介小外〕傳令。吳軍逃遁。速着廣武將軍唐彬乘勝追去。〔內應介〕饒他走到焰魔天。脚下騰雲須趕上。〔小外生坐介〕且扎住軍馬。開着轅門。待他們報來。〔末捧降文小生捧印綬上〕

〔前腔〕膽戰心兢。草木皆晉兵。人離國破。投降納款誠。投降納款誠。〔末〕下官乃

東吳光祿勳薛瑩〔小生〕下官乃東吳署太常張夔。晉兵到此。旌旗甲仗。屬天滿江。威勢甚盛。莫不破膽。將士離心。自相攻擊。散亡殆盡。京城破在旦夕。今奉吾主之命。賚捧降文。璽綬來獻。大晉王將軍麾下。求存宗祀。須索小心進見。〔左右稟末小生跪伏小外〕汝等何人。手捧何物。敢來參見。〔末〕亡國小臣薛瑩。奉上降文。〔小生〕亡國小臣張夔。奉上璽綬。〔小外〕你東吳上下偷安。胡行兆亂。天人共怒。自底滅亡。何不先事而見幾。乃爲獨夫之負固。我這里殺伐既行。難受你降了。〔生〕元帥。吾聞用兵者不殺降。用法者當以恕。今彼既知向化。則我與其更生。〔小外〕參謀所言正是。接上看。看。〔遞上看介〕吳郡孫皓叩頭死罪。昔漢室失御。九州幅裂。先人因時。略定江南。遂阻山河。與魏乖隔。大晉龍興。德覆四海。開劣偷安。未喻天命。至于今者。猥煩六軍。衡蓋露次。遠臨江洛。舉國驚惶。假息刻漏。敢緣天朝。含弘光大。謹奉璽綬。委質請命。〔末小生〕大元帥既允。吾主備亡國之禮。素車白馬。肉袒面縛。啣璧牽羊。卽詣轅門納款。〔小外〕既是這等。你二人且去。〔末〕得他心肯日。〔小生〕是我運通時。〔下丑赤身面縛雙手〕

〔梨花兒〕時窮勢窘。免不得牽羊輿襯。且含羞苟全首領。〔跪介〕亡國俘囚孫皓。蒙

大元戎不殺之恩。感聖天子好生之德。願歸大統。永旣微忱。〔小外生解丑縛介〕吳王請起。左右取青衣小帽來換了。〔末換介小外生〕某等奉國威以行事。甫定江山。吳王順天命而伏降。同歸化育。分付將校。收其圖籍。封其府庫。即日班師。〔衆應介〕得勝鞭敲金鑿響。大家齊唱凱歌回。〔轉行介〕
〔四邊靜〕〔小外〕奉行天討東南國。王師自無敵。簞食及壺漿。相迎喜形色。〔合〕
金聲震撼。旌光電拂。勝氣徹雲霄。威風鬼神泣。

〔前腔〕〔生〕無勞幃幄多籌策。皇猷妙不測。干羽舞虞階。七旬有苗格。〔合前〕

〔前腔〕〔丑〕偷安褊小悲窮極。輸誠願啣璧。土地與人民。咸歸大圖籍。〔合前〕

〔前腔〕〔衆〕弔民伐罪嚴師律。收功在時刻。大旱現雲霓。東西望征急。〔合前〕

掃蕩東南不道鄉。率賓納款盡歸王。

天威一怒安天下。功業於湯又有光。

第三十七齣 飛報捷音

〔宴陳平〕〔外上〕黃髮貌如童。福祿兼隆。〔老旦上〕自憐弱息未乘龍。幽思忡忡。

〔鷓鴣天〕〔外〕身閱昇平樂暮齡。顏如玉雪鬢如星。〔老旦〕鳳幃香煖春同老。龍陛恩深寵不驚。
〔外〕時履盛。勢持盈。常存謙抑見幾明。〔合〕瓊花共慰門楣望。亦勝萊兒戲綵情。〔老旦〕相公。你職
列司空。爲百揆之總。官居元宰。作九牧之倡。可謂人臣之極。無欲不遂者矣。今乃眉頭不展。面帶憂
容。卻是爲何。〔外〕夫人。你不知我身受國恩。心存國事。前日朝廷遣將。征伐東吳。一去未有消息。得
失相關。是以憂耳。〔老旦〕我朝征吳。如泰山壓卵。彼豈能當。且朝廷威福。將官忠勇。必定成功。愁他
則甚。〔外〕下官憂國。不過如此。夫人。你和我紫府同榮。白頭偕老。有何不足。常懷戚戚之思。每發嗟
嗟之嘆。〔老旦〕事不關心。關心者亂。你爲朝廷征吳。我爲幼女未配。其事不同。其憂則一。〔外〕國爾
忘家。公爾忘私。待國事太平。我家事自行停當。先公後私。理當然也。何必愁他。院子那里。〔末上〕聽
得一聲呼喚。便拚兩脚奔趨。老爺有何使令。〔外〕分付門上聽事官。但有征東消息。卽來稟報。〔末
應介淨上〕俺是征東軍士。吳國投降。蒙韓參謀老爺差遞飛報。此是賈老爺府門首了。不免進去
走一遭。

〔越調鬪鶴鶉〕俺走的脚似飛騰。風行電掣健勇。恰離了吳國的邊疆。俺急匆

匆自不覺奔馳和那倥傯。只俺這一路上披星戴月經勞碌。過高山。歷險谷。挨得到京城內消停。打點着相府中拜覆。〔末〕那里來的。〔淨〕征東軍士韓參謀老爺差遞飛報的。〔末稟見介外〕你把我們如何出征。他們如何迎敵。喘息定慢慢的試說一遍。〔淨應介〕

〔紫花兒序〕量地方分布了水陸。審機宜相時而動仗。皇靈聲言着征東。天應人從。勢如破竹。端的亂紛紛旗幟搖紅。狠殺人刀箭人馬如龍。威振山傾。銳觸虹衝。

〔柳營曲〕馬軍的馳驟威風。步軍的勁捷英雄。水軍的全不怕波洶湧。振金鏡聲沸。巨艦艤幢。一便似織就千機錦花叢。〔外〕王將軍怎生用兵。韓參謀怎生設計。喘息定可慢慢細說一遍。

〔么篇〕〔淨〕中軍帳王老元帥發揮着號令如風。韓參謀安排下這謀搏虎。整備了計擒龍。一定要掃蕩那江東。似埋伏八陣圖。待臨期隨機用。吳國內甚驚恐。每發兵來交鋒敗北。端的神愁鬼哭。論斬戮與生擒。猛見了則是個把雞鵝。

戲弄。〔外〕他那軍將是這等了。其餘百姓如何。〔淨〕那百姓倒戈攻。都是心悅誠服。爲君的素好淫虐。昏黯黯彷彿醉夢。爲相的那知道豹略與龍韜。爲將的那知道戰爭時要把刀鎗來用。〔外〕他國中君臣失德。我們將官何不曉諭他。早早來投降了。免費財力。喘息定慢慢的再說一遍。

〔小沙門〕〔淨〕都袖手無門可控。捱不過力屈計窮。一個個巍巍端立如翁仲。一個個美衣冠傀儡儀容。〔外〕既是這等。免不得要降了。〔淨〕他着光祿勳薛瑩署太常張夔。

〔外〕着這兩個做甚勾當。

〔聖藥王〕〔淨〕差兩個詣軍中。獻降文璽。綬先通。懇拜得元戎鈞旨許相容。方敢蹈王子嬰降漢踵。赤條條面縛了雙手拱。羞嗒嗒又脚壁牽羊奉。表哀哀乞延喘息保孤宗。〔外〕既受他降。何不班師。

〔尾聲〕〔淨〕只這東吳民踊躍歡聲哄。收拾輿圖朝貢。卽歌凱旋師將他的土地人民歸一統。〔遞書介〕韓參謀老爺有書拜上。〔外〕接了書。打發軍士去罷。〔末介淨〕傳他消

息依軍令。盡我驅馳奉上心。〔下外看書介〕屬吏韓壽拜稟恩相座下。竊叨薦章。繆參戎計。仰鴻休之普被。願蚊負以奚勝。上仗皇靈。下蒙尊庇。百千丁倒懸之命。已賴生全。數十年不道之鄉。悉歸掃蕩。先行楮報。尙肅面陳。〔笑介〕夫人韓生成此大功。必膺上賞。乃下官舉薦之力也。〔老旦〕既是這等。天隨人願。所議婚姻。不負老身之言。〔外〕因此留心。故特舉薦他去。班師回來。下官奏過朝廷。卽央荀侍中羊常侍同去作伐。成親便了。

〔剗鍬兒〕書生俊傑真天縱。出人頭地建奇功。鐘彝鏤忠勇。流芳企崇。〔合〕雲龍景從。恩承帝寵。這段姻緣何勝幸孔。

〔前腔〕〔老旦〕婺光喜溢門楣重。青鸞信出合歡宮。星期早傳送。鵲橋可通。〔合前〕

〔前腔〕〔末〕雀屏射日誇連中。不勞絲幕更牽紅。藍田璧先種。赤繩繫蹤。〔合前〕

天然富貴逼人來。
伉儷佳緣亦喜諧。

正是禹門三級浪。
分明平地一聲雷。

第二十八齣 哀中聞喜

〔探春令〕〔旦上〕攢眉切齒根蒼天。把雙鸞輕拆。百年心事今休矣。〔貼合〕忍

不住吞聲泣。〔鷓鴣天〕〔旦〕白玉樓成促去期。天公故使哲人萎。〔貼〕淚添九曲黃河溢。恨壓三峯

華岳低。〔旦〕雲夢杏。鳳緣擘。風摧連理剩孤枝。〔合〕英魂縹緲烟波遠。截髮空懷薤露詞。〔旦〕韓德

真橫死江中。不得歸葬。一恨皇天無知。奪我所愛。二恨爹爹用計。陰害善人。使我終身失倚。豈勝哀

傷。〔貼〕小姐。天不由人。只索罷了。勿爲無益之悲。致損不貲之體。〔旦〕我與韓德真之交。雖不由父

母之命。實已締夫妻之緣。相應守制。誓不再嫁。但父母在堂。必不容我披麻戴孝。只穿些縞素衣裳。

盡我心喪而已。〔貼〕小姐這等分方。內得伸一念之誠。外不起二親之怒。豈不兩全。〔旦〕早聞着你

備些祭物。可卽取來。對空遙奠一番。〔貼〕祭物已完。必用做祭文才好。〔旦〕我自聞凶信之後。思其

形容笑語。已寫得幾句在此。〔貼〕擺設靈位。朝向何方。〔旦〕天高地遠。鬼神無所不在。他既愛我。必

享我誠。只把桌兒對着他。平日過來的牆角便了。〔貼〕正是。〔擺介〕請小姐行禮。〔旦拜介〕

〔七賢關〕天胡不憇遺。歲厄當辰已。梁壞山頽。一代風流逝。蕭條鳳枕。淒涼雨

期枉卻許多。許多同心誓。縱有恩山義海都拋棄。料江濤浩瀚。芳魄任風吹。
〔哭介〕德真。空教我枝月三更泣子規。〔合〕想着從前情事。無限傷悲。惟願取

後世姻緣再結縈。〔貼〕春英雖是婢子。素蒙主恩。秉此虔誠也。奠一盃酒。我參謀老爺。〔哭拜介〕

〔前腔〕陰精犯少微。玉樹埋塵地。天奪英賢。徂落波心裏。你與我小姐呵。棲霞對

語。東牆赴期。斷送此生。此生成夢寐。到如今呵。冷落花叢拆散鴛鴦睡。我小姐呵。苦

孤燈夜雨。欵枕淚流珠。香銷玉減。束髮亂青絲。誓不爲他人整翠眉。〔合前貼〕三

奠已完。請讀祭文。〔旦跪讀介〕維大晉太康元年冬十月乙亥朔。未亡妾賈午。謹以牲醴。敢昭告于

故夫平東。經略使參謀韓德真之靈曰。嗚呼。以君之德。宜受多福。以君之才。宜享厚祿。胡爲乎位止

參戎。胡爲乎身葬魚腹。嗚呼。蒼天旣無憐才佑德之公。乃有林木池魚之酷。雲散長空。月沈西陸。花

落深林。雪消虛谷。嗚呼。哀哉。嘆箕帚之無緣。痛瑟琴之莫續。不能挽天以鳴冤。寧不臨風而長哭耶。

尙享。〔燒祭文哭收祭品介〕

〔不是路〕〔淨丑上〕慶溢門楣。宿世姻緣成大始。〔旦〕春英。你看這兩個丫頭。爲何嬉笑

走來。可去問他緣故。〔淨丑〕青鸞喜。雀屏中目取紅絲。〔貼〕有甚親事。你來胡說。〔淨丑介〕秋香冬秀磕頭小姐報佳期。〔旦〕有甚佳期。可站起來說。〔淨丑〕這事好得緊。不肯輕說。〔向貼介〕春英。你須上覆小姐。多加賞犒方詳語。〔旦〕韓參謀與我是夫妻。他今既死誓不再嫁。我賞犒你們怎麼。〔淨丑〕今日來呵。好事分明天送至。〔旦〕前日凶信。難道是虛傳來的。〔淨丑〕征東事參謀得勝已班師。〔旦驚起介〕有誰說來。〔淨丑〕就是韓老爺有書來飛報。相公和夫人面議。喜把婚姻許。媒妁將通奠。鴈儀。〔旦貼〕敢是你誤聽了。〔淨丑〕專聽記。眞言不比做猜謎。〔旦貼喜介〕不信有這等事。〔淨丑〕果然如此。果然如此。〔拍手笑介〕好快活。好快活。小姐這等喜信。須用重賜賞犒。〔旦〕果有此事。明日賞你。〔淨〕春間夜裏在夫人房門外邊。拏住韓老爺。春英許說明日討賞。小姐翻轉面皮。徑自賴了。今日不討賒帳。必要現錢。〔丑諱介〕若無現錢。春英教小姐寫個票子。〔貼〕休要胡說。你們且去。〔淨〕善傳青鳥信。〔丑〕撮合赤繩緣。〔並下旦〕若得如此。感謝天地不盡。韓德真。不枉了我和你今生相處。春英。我心中呵。

〔大逆鼓〕驚疑猶恐虛。未辨存亡孰是。悲喜何如。韓德真。自你一別後。我只道瓊
蕊終分蒂。誰承望。又得締陳朱。〔拜天介〕春英。我與你拜謝皇天。蒙加護持。〔貼〕小姐
豈不聞

〔前腔〕從來好事奇。須信福因禍得。古語無欺。〔旦〕雖則如此。難道爹娘就肯。〔貼〕高
堂既幸征吳利。爵祿勳名起霎時。這段姻緣天成就。伊

凶事傷心吉信來。悲歡未決致疑猜。

姻緣本是前生定。且把攢眉暫解開。

第三十九齣 班師議婚

〔稱人心〕〔衆引生上〕參戎決勝。克壯皇猷。隆盛已贏。他降王子嬰。喜今日班

師復命。南伐旋師太華東。干戈不染血腥紅。功成掀揭驚天地。誰謂藍橋信莫通。下官奉勅參謀。征

伐東吳。不戰而降。此不世之奇功也。一旦富貴不求而至。張先生卜課之言。信不誣矣。張先生又說
師卦第二爻發動。變爲坤卦。六二得陰道之純。當有佳配。以此論之。則我與小姐伉儷之緣。終能再

合。賈司空薦我來此。是把成敗試我。成則取之。敗則棄之。他的用心不淺。今我既成功。這婚姻事自難棄我了。且待回京之日。便知分曉。王將軍已從陸路班師去矣。我由水路回京。分付水軍將校。各照幫次行動。不許擾害地方。違者梟首。〔衆應介生〕你看錦纜牽風。牙檣破浪。白雲江上。洋洋一棹鉦聲。碧樹灘邊。渺渺半帆山色。〔開船行介〕

〔柳搖金〕金鏡聲振。霓旌影明。巨艦破滄溟。江遶羅迴帶。山圍錦列屏。彷彿似身居圖畫。彷彿似身居圖畫。不見意中人。歎音容久杳。寥寥此情。〔合〕威風勝氣。勝氣歡聲。勝氣歡聲。搖曳舳艫前進。

〔前腔〕〔衆〕煙波千頃。雲巒萬層。鼓角震空鳴。勢壓金湯破。謀摧鐵鎖橫。猛地里三軍歌凱。猛地里三軍歌凱。翹首望都城。喜行行將近。無多幾程。〔合前衆〕稟

老爺知道。已進京城了。〔生〕徑到衙門裏去。〔坐介末上〕富貴不求而自至。姻緣有定再相逢。〔見介〕賈府堂候官磕頭。〔生〕起來。你是我同門故人。何須行此禮。〔末〕不敢。賈老爺多拜上。在朝議事。不及自家來看。有句話兒。託荀侍中羊常侍二位老爺傳達。已到衙門外廂了。〔淨小生上〕

〔勝葫蘆〕紫鳳啣花出禁門。傳寵命。締佳姻。〔末合〕眞是郎才女貌能廝稱。金輝玉映。管取團圓共欣欣。〔相見介〕韓大人允符廟算。早建奇功。鞏固皇圖。特膺上賞。某等不勝榮羨。〔生〕自慚後進。偶效微勞。未及先施。反蒙下顧。下官何以克當。〔淨小生〕我二人今日之來。一以奉皇上之旨。一以達司空之情。〔生〕有何見諭。願聞其概。〔淨小生〕韓大人。你與司空先是通家。後爲屬吏。他今把三小姐求爲合卺。昨已奏過官裏。特着我二人作伐。此正閨閣相當。恩義兼盡。甚妙甚妙。〔生〕司空當代元勳。令愛又是金枝玉葉。家下堵陽末裔。下官又韋帶布衣。若議此親。自知多歉。二位聽告稟。

〔高陽臺〕裔本蓬桑。材猶樗櫟。深慚智昏菽麥。幸近龍門。前綏得遂。叨執。〔淨小生〕韓大人言之太謙。〔生〕今日。荷忘非偶之嫌也。使蘇羅締緣白璧。二位大人。細思之。龍猪殊類。自知莫及。〔淨小生〕韓大人。你與司空呵。

〔前腔〕材德氣味金蘭。詩書膠漆。通家世關休戚。髻鬢相知。天生恁般家室。皇上爲着司空與足下呵。恩澤龍樓特旨。專鳳選不費那雀屏。遴得羨星郎。期通織。

女。正當七夕。

〔前腔〕〔生〕忻懌巫峽行雲。武陵流水。瑞氣歡聲洋溢。〔低身背介〕海誓山盟。豈料不負宿昔。難得須知前愆。到此一筆都鈎了。這就裏有誰能識。〔揖淨小生介〕荷君家慇懃成就。何勝感激。〔末〕韓老爺今日呵。

〔前腔〕奇特功業驚人。恩榮冠世。不忝人臣之極。更玉葉金枝。窈窕實爲佳匹。叶吉翁婿相看。一似冰映玉。滿庭幃幃。生春色。正堪誇花叢爛熳。一雙鸞鴻。〔餘文〕〔合〕華堂珠履三千客。共聽嚙嚙鼓琴瑟。不覺繚繞歡聲盈吉席。

青鳥翩翩喜信傳。

松蘿共結百年緣。

自知齊大慚非偶。

須信滄溟得委涓。

第四十齣 嬖姻封錫

〔傳言玉女〕〔外上〕瑞氣龍葱。寶鼎篆煙浮湧。〔老旦上〕奏笙簧歡聲沸動。門盈簪紱。看花燭風光如擁。〔合〕梧桐枝穩。雙棲新鳳。〔外〕昨夜祥光騰婺女。〔老旦〕今朝

喜氣應門楣〔外〕雀屏中日諧心卜〔合〕燭影搖紅慶結褵〔外〕夫人韓生功名大就。孩兒年貌相當。蒙皇上主婚。苟羊二公作伐。擇在今日成親了。〔老旦〕今日此舉。不惟遂他們終身之願。實足慰爾我暮景之情。雖出人爲。乃由天合。〔末上〕駕幃窄地迎仙侶。鶴髮華堂舉壽盃。稟老爺夫人知道。筵席已完。只待韓老爺下馬。就行禮了。〔外〕院子。可喚掌禮人伺候。〔末喚介丑上〕門迎珠履三千客。雲滿巫山十二峯。〔見介〕掌禮人磕頭。〔外〕時辰將及。可迎親了。〔丑〕鼓樂喧天。韓老爺已到。分付梅香。伏侍小姐出來。待小人贊禮迎親。〔唱介〕新郎原是舊風流。小姐多情不害羞。又得春英生計較。竹竿暗約過牆頭。第一請。〔云云再唱〕青瑣窺觀賽雀屏。奇香相贈表私情。東牆明證狐狸跡。不用媒人親自成。第二請。〔云云三唱〕相公夫人焦躁。小姐春英守孝。參謀若不成功。做了三樣好笑。第三請。〔云云〕

〔女冠子〕〔生上〕恩榮優渥。書中車馬如簇。〔貼扶旦上〕奇香馥郁。祥光繚繞。姻緣並美。魚水情同。〔丑云云〕伏以男女及時。要遂室家之願。風流得意。何須媒妁之言。一種異香。百

年佳偶。婚無定禮。只因你愛我貪。律有明條。實是先姦後娶。黃堂前向空展拜。堪誇兩個新人。錦帳

內對面交歡。各出一般舊物。請新人行禮。〔云云生旦拜介〕

〔錦堂月〕〔生〕絲幕牽紅。冰人致語。喜他翠鸞成夢。年少風流。自知僥倖奇逢。

今日裏金屋相歡。恰便似瓊枝交拱。〔合〕霞觴捧。看十二巫峯。雨深雲重。

〔前腔〕〔外老旦〕天縱間世英雄。兼人文武。當時朝野欽崇。正坦腹東牀。弱息百年承奉。幸相調琴瑟音諧。願永固海山情共。〔合前〕

〔前腔〕〔旦貼〕相從。伉儷恩濃。唱隨道始。赤繩早繫雙踵。並締蘿蘿。嬌羞不稱。乘龍雖黍綴玉葉金枝。恐難匹神駒彩鳳。〔合前〕

〔前腔〕〔衆〕還同。玉琢金鎔。珠明翠美。富貴姻緣。天送見春滿秦臺。不負紫簫吹弄。水漣漪銀漢橫橋。花爛熳桃源仙洞。〔合前末〕朝廷差荀侍中。賚詔書。羊常侍。禮

物來了。〔淨捧詔生捧金帛上〕

〔卜算子後〕一劄丹書下九重。伉儷承天寵。聖旨已到。跪聽宣讀。〔生旦跪介淨〕皇帝詔

曰。朕惟事君盡忠。臣道之常。所貴初受一命。卽能委身。卓哉人紀。於此攸基。厥有奮志勤王。收功降

敵者不加旌異。曷以示勸。爾平東經略使韓壽。連籌帷幄。決勝千里。不勞血刃。率士來歸。功孰懋焉。特授散騎常侍河南尹。其妻賈氏封沛國夫人。嗚呼。酬功報德。率由典章。輔主匡時。尙冀後績。謝恩。

〔生旦拜介小生〕皇上特念椒房之親。另行金帛之賜。〔生〕有勞二位大人。

〔山花子〕龍章渙汗紅雲擁。微臣鼓舞仁風。喜姻緣命出九重。椒房瓜葛春融。

〔合〕荷清時賢材登用。文謨武略伊呂同。明良喜起世道隆。願取一統皇圖。

江漢朝宗。

〔前腔〕〔旦貼〕情緣契合誇占鳳。兼葭上倚喬松。似隔潢牛女期通。相攜各慰初衷。〔合前〕

〔前腔〕〔外老旦〕家庭骨肉歡聲哄。只望看承蔗境分榮。仰皇休沾濡已濃。罄葵誠奮效無窮。〔合前〕

〔前腔〕〔衆〕王家柱石千官冢。門闌瑞色流虹。羨嫦娥高挹桂紅。仙郎折取芳叢。〔合前〕

〔紅繡鞋〕椿庭萱室優容。優容。奇香誼篤房櫳。房櫳。狐狸跡。顯牆東。天作合。俾參戎。〔合〕成偉績。奏彤宮。成偉績。奏彤宮。

〔前腔〕綸音寵錫榮封。榮封。分明雲起從龍。從龍。機輻輳。慶穹窿。人世上。有誰同。〔合前〕

〔意不盡〕一般佳遇風流種。青瑣懷香千古頌。謾把綴入宮商。永與知音傳諷。才子佳人並美難。情鍾青瑣一窺間。

聊成離合悉歡調。

留與風流醉笑看。

綵

毫

目錄

- 第一齣 敷演家門
第二齣 夫妻翫賞
第三齣 仙翁指教
第四齣 散財結客
第五齣 湘娥訪道
第六齣 爲國薦賢
第七齣 頒詔雲夢
第八齣 別妻赴京
第九齣 拜官供奉
第十齣 長安豪飲
第十一齣 預識汾陽

第十二齣 湘娥思憶

第十三齣 脫靴捧硯

第十四齣 祿山謀逆

第十五齣 游翫月宮

第十六齣 宮禁生讒

第十七齣 知幾引退

第十八齣 祖餞都門

第十九齣 母子慮禍

第二十齣 乘醉騎驢

第二十一齣 歸隱林泉

第二十二齣 漁陽鼙鼓

第二十三齣 海青死節

第二十四齣 訪道仙翁

第二十五齣 永王設計

第二十六齣 泛舟采石

第二十七齣 誓死不從

第二十八齣 展叟單騎

第二十九齣 展武相逢

第三十齣 救主出圍

第三十一齣 難中相會

第三十二齣 官兵大捷

第三十三齣 羅襪爭奇

第三十四齣 蓬萊傳信

第三十五齣 廬山受枉

第二十六齣

遠謫夜郎

第三十七齣

妻子哭別

第三十八齣

仙官列奏

第三十九齣

他鄉持正

第四十齣

汾陽報恩

第四十一齣

欽取回朝

第四十二齣

團圓受詔

綵毫記

明屠隆箸

第一齣 敷演家門

〔末上〕高人妙理通絃索。

換羽移宮且爲樂。

請看水底一燈明。

照見蓮花都不着。

〔滿庭芳〕灑落天才。昂藏俠骨。風流千古青蓮。萬金到手。一日散如煙。許氏清虛慕道。與夫君同隸神仙。官供奉淋漓詩酒。傲睨至尊前。名花邀綵筆。遭讒去國。湖海飄然。正遇永王構逆。抗節迤邐。豪士挺身救難。賴汾陽叩闕陳冤。金雞赦。還鄉復爵。夫婦得重圓。

高常侍含沙妒寵。

郭令公納爵酬恩。

許夫人采眞洞府。

李供奉大隱金門。

第二齣 夫妻翫賞

〔破齊陣〕〔生上〕寶劍秋呼風雨。綵毫夜飲虹霓。名擅雕龍。詩成倚馬。清思裁雲翦水。未抒天外冥鴻翅。且養山中隱豹姿。男兒生自奇。

天才磊落自髫年。斗酒淋漓詩百篇。佛果前身號金粟。仙姿現世是青蓮。小生李白。字太白。隴西成紀人也。梁武昭王嵩九世文孫。太夫人誕白時。長庚入夢。人言是太白星精。學富珠璣。倒神女之三峽。文成雲錦。奪天孫之七襄。清狂玩世。自負王佐帝師。瀟灑出塵。人擬仙風道骨。搖筆而出語驚人。果然不食煙火。策杖而尋幽避俗。生來雅志山林。家本西秦。習五陵之豪俠。客遊南楚。愛七澤之汪洋。相國許公。妻以孫女。名喚湘娥。揚鸞飛鳳。謾誇水月精神。控鶴乘雲。亦有烟霞氣韻。小生宿隸神霄。乃伯陽之苗裔。荆妻舊侍王母。儻飛瓊之後身。各無心於香奩。恥懷繾綣。並栖情於石室。渴慕清虛。今日日朗風和。值芳春之淑景。沙明水碧。當荆楚之歲時。不免請娘子玩賞則個。〔請介正旦扮許湘娥帶侍女上〕

〔花心動〕紫閣青閨理靚粧。好把羅衣初試。嫩草抽茵。新柳垂絲。嬌鶯啼上花枝。春山不及修眉好。問小鬟粉黛還宜。〔合〕向雕闌畫檻。尋芳拾翠。〔相見介生〕

娘子時屈韶華。家臨雲夢。你看雲山重疊。時時鳥度屏風。烟水澄鮮。箇箇魚遊寶鏡。瑤瑟泠泠。波上時來帝子。朱旗獵獵。雲中恍睹荆王。牙檣錦纜。齊飛白浪長天。畫閣朱簾。盡捲紅霞暮雨。真個好一派烟波光景也。我和娘子玩賞片時。卻不是好。〔旦〕正該如此。侍兒們將酒過來。

〔集賢賓〕〔生〕春來雲夢天似水。水邊樓閣參差。十二雕闌霞散綺。看萬頃微茫無際。鷗飛鷺起。映兩岸青蘋白芷。〔合〕圖畫裏。人盡在琉璃寶地。

〔前腔〕〔旦〕絃服新粧春自理。菱花冷侵漣漪。七澤三湘辭賦美。喜得壻相如。可比峽雲巫雨。羞說起高唐風致。〔合前〕

〔琥珀貓兒墜〕〔生〕素書黃石。進履圮橋時。謝傅東山雅自期。白雲明月是心知。〔合〕栖遲洞口。春深幾度薔薇。

〔前腔〕〔旦〕錦心繡口。下筆太淋漓。才子風流世所稀。時來應作帝王師。〔合前〕

官人。妾雖身居閨闈。性帶烟霞。雅慕長生。願希度世。聞廬山女道士李騰空。得金液還丹之術。服炁辟穀。出神飛形。妾身欲攜女使一二。襄糧訪之山中。叩求大道。未審官人。意下如何。〔生〕男子得道。

隸籍木公。女子成真。列名金母。自古有之。娘子宿占仙班。生有道氣。騰空女子。何妨采真。卑人當作詩送行也。〔旦〕多謝官人。又有一事奉告。妾家有薄產數十萬金在揚州。多年不曾經理。意欲煩你一行。尊意肯否。〔生〕廣陵天下佳麗。龍舟帳殿。有煬帝行宮。二十四橋。烟花無恙。卑人正欲一往遊覽。〔旦〕如此甚好。明日打點行李。先送官人東遊。妾乃西行訪道也。

〔簇御林〕〔生〕行宮廢。帳殿移。御堤荒。煙草迷。江都絲管依然沸。傍朱樓。且取金樽醉。〔合〕謾淒其。河橋明日分手各天涯。

〔前腔〕丹霞畔。碧水湄。訪仙蹤。拜女師。玉清金笥玄言祕。餌飛虹。一粒堪遺世。〔合前〕

勞歌一曲解行舟。

人自傷心水自流。

煬帝行宮何處是。

烟花三月下揚州。

第二齣 仙翁指教

〔夜行船〕〔外扮司馬子微上〕家在天台華頂上。丹臺名姓。烟霞骨相。碧落千尋。

紅霞百丈聽一派僊音嘹唳。金幢繡柱響旂鈴。帝許名山住福庭。頂上真人時出現。夜深朗誦蕊珠經。貧道覆姓司馬。名承禎。字子微。洛州溫邑人也。名藏丹室。佩清華大洞之章。身居赤城。傍桐柏真人之府。道高於都水監。拜敕玉霄峯頂。位列於東華君。承恩紫極宮前。隴西李白。原是天上星官。謫居塵世。才華絕代。風骨超羣。貧道慮其纏緜婚宦。迷卻宿緣。終墮落於人間。何由再返於天界。今日此人東遊維揚。道經江陵。不免與之相見。點化他一番。遠遠望見李太白來也。〔生帶從人隨上〕

〔前腔〕白浪黏天浮畫舫。雲飄零亂沙鷗。下上霞氣初澄。遙空更敞。雅稱我芒鞋竹杖。〔相見介外〕李先生稽首。〔生〕仙翁拜揖。念小生與仙翁素乏平生。何以見顧。〔外〕貧道偶見先生仙風道骨。可與神遊八極之表。故爾邂逅。欽注高風。〔生〕多謝弘獎。非所敢當。請問仙翁高姓大名。〔外〕貧道乃天台山隱者。司馬承禎是也。〔生致敬科〕呀。原來是子微先生。道高河上。名在丹臺。凡夫得遇真人。三生至幸。小生進則欲經邦濟世。小建麟閣之助。退則欲學道栖真。早證神仙之位。不知此生緣分如何。望真人指教。〔外〕天機祕密。難盡宣言。子既是神仙中人。不妨洩露。足下

此行。不久當遭逢明主。列職清華。須慎筆端。應防讒口。整爾揚名天闕。終當浪迹江湖。須要外示放曠。內寶靈明。必能返轡上清。逍遙碧落。此外非貧道所知也。〔生下拜科〕多謝尊師指教。使白如撥雲霧而睹青天。願終身佩服明訓。

〔北雙調新水令〕〔生〕仙人偶下白雲鄉。駐颿車清言半餉。松搖晴露滴。蘋挾水風香。心地清涼。似身世遊蓬閬。

〔南風入松慢〕〔外〕知君舊籍隸虛皇。列近侍班行。謫來塵土離仙仗。美才華。綵筆寫琳瑯。瞥然見杲日風神秀朗。好和你超八極。共翱翔。

〔北水仙子〕〔生〕念小生呵。少年流落在荆湘。西望傷心隴樹長。一編十載栖林莽。堪嘆我命雖艱。心自壯。也只得附絲蘿相府東牀。俺待要匡社稷。扶王霸。希謝安。學子房。回首覓不死仙方。

〔北折桂令〕〔外〕你元是紫府仙郎。暫被謫清都無恙。你且去近侍君王。准被着簪筆彤墀。含香畫省。起草明光。切莫弄酒盃落拓。詩賦清狂。也須知如簧可

畏。貝錦難防。有一日。鞀鼓動漁陽。冠蓋走蒼茫。那時節。早歸洞府。急備資糧。

〔清江引〕〔合〕今朝握手江湖上。勸蚤晚拋塵網。朱顏暗裏銷。白髮愁中長。你看今古英雄俱宿莽。〔外〕今日一會。宿世良緣。吾子前途保重。貧道辭別去也。〔生〕多謝仙翁指教。他日相訪於天台石梁。幸無相忘也。

〔外〕邂逅相逢亦宿緣。

〔生〕仙都重會是何年。

〔合〕分明說破前生事。

一夢長庚豈偶然。

第四齣 散財結客

〔小外扮武諤上〕腰間湛盧劍。頭上縵胡纓。救難滅蹤跡。殺人留姓名。自家姓武。名諤。排行十七。東吳人氏。避地江都。膽氣絕人。豪俠好義。生平有一大讎人。被我一劍行誅。又有一大恩人。不是千金難報。聞隴西李太白。高才尙義。結客捐金。昨日取醉平康。六院諸姬。齊來相見。競以輕綃練裙。求其詩賦。太白乘醉落筆。手不停揮。各有贈篇。瀟灑清妙。臨去悉厚贈金帛。日散萬金。我不免去一見此人。果是如何。〔小生扮員半千上〕興到文藻飛。飢來顏色槁。吟成百篇詩。不能易一飽。自家員半千。

高才流落。寓住維揚。聞李太白一代才子。輕財重義。不免去訪他。求他一濟。丑扮張光乍上。朝從都市遊。暮向娼樓宿。身上着羅衣。家中無半粟。自家揚州城中一個浪子。名喚張光乍。家無活計。花酒爲生。少年場中。風流有數。昨日與人賭輸萬貫錢。無從措處。聞此間有個李太白。仗義疎財。極肯交結好漢。不免去走一遭。〔占扮柳條青上〕少年生深閨。逢人便掩面。今日走路傍。哀哀淚如線。妾身乃揚州城中女子。柳條青。父親柳宿。薄宦倉曹。逋欠官糧。追賠禁獄。妾欲賣身救父。一時未得便成。聞此間有一個李相公。仗義專一。憐貧恤苦。不免含羞去見他一面。〔丑〕列位想都是要見李太白先生的。求門上通報。大家進見。〔通報介生上末淨從人同上〕

〔西地錦〕〔生〕潮滿江心放棹。月明橋上吹簫。五陵結客方年少。千金于我鴻毛。門外何人。〔末〕稟上相公。門外有四位客人相訪。〔生〕請進來。〔並進見介生〕四位何來。各請道名姓。〔小外〕小子姓武。名諤。排行十七。東吳人氏。〔小生〕小生姓員。名半千。頗善詩賦。〔丑〕小子姓張。名光乍。少年場中有名子弟。〔生〕這一位小娘子何人。〔占〕妾身姓柳。名條青。乃司倉柳宿之女。父親有難。求見相公。〔生〕請列位見教。下顧爲何。〔小外〕小子生平豪俠。有大離人業。已一劍行誅。又

有一大恩人。思得千金爲報。聞先生輕財重義。特爾相投。倘蒙慨然。吾事畢矣。〔出人頭介〕仇人頭顱。現在此。〔生〕這個沒憑據。焉知真假。〔小外怒起介〕我武十七好漢。怎肯欺人。既爲小人所疑。合當速去。〔生挽科〕烈士不欺人。小人無知。豪傑不必介懷。左右快取千金爲贈。〔小外〕如此多謝。〔生指小生〕此位有何見教。〔小生〕念小生結髮讀書。頗工辭賦。屢舉不第。流落江湖。飢寒困苦。世無郭元振。故敢告急足下。〔生〕僕亦久聞員君大名。願虛懷請教。適纔武十七說報讎殺人。事亦大奇。求君見教一篇。〔小生〕領命。〔沈吟介〕古人好俠烈。其事多咨且。荆卿西入秦。乃與舞陽俱。意氣豈不壯。劍術何其疎。副車中徒爾。空衣斬亦虛。夫君運奇節。長嘯起雄圖。赤雷閃寶劍。清霜泣頭顱。義聲振天地。成功祗須臾。激昂千載下。永爲壯士模。〔生〕奇哉。矢口成篇。雄壯激烈。真才子也。左右快取千金爲員先生壽。〔小生〕多謝。〔生指丑〕此位有何見教。〔丑〕小子無賴。昨與博徒賭輸萬貫。求相公見助。相公倘要往平康取樂。小子最善幫閒。〔生〕左右取萬貫送此人。〔丑〕多謝。〔生〕小娘子爲何事而來。〔占〕妾父薄宦。逋欠官糧。監追在獄。妾身意欲自鬻救父。一時未有因緣。望相公垂憐。救拔苦難。〔生〕娘子言之良苦。不知你所須幾何。〔占〕得五百金足矣。〔生〕左右發五百金。贈這

小娘子〔小外〕李公高義。足冠千古。我四人一同拜謝。

〔駐雲飛〕千古人豪。義氣稜層五岳高。日角揚奇表。天藻藏靈竅。啖金帛等秋毫。垂憐無告。救困扶危。功德標穹昊。定擬仙班地位超。

〔前腔〕〔生〕浪迹萍飄。一片雄心久不消。重義輕金寶。結客連燕趙。啖癖性愛錢刀。王戎和嶠。長物浮雲。不散還須耗。留取花生五色毫。

〔衆〕散財結客不言恩。

天下飢寒盡在門。

隻手一揮三十萬。

定應功德奏天闕。

第五齣 湘娥訪道

〔外扮展靈旗上〕火輪電甲衛清都。使酒天門偶大呼。卻被雷師糾不法。候家聊罰作人奴。某許相國府中老蒼頭。展靈旗是也。與崑崙奴俱是天上九關守將。偶乘醉使氣。兩人大鬧天門。一時同謫。

崑崙奴在崔千牛家。我展靈旗在許相國家。做一個給使。忠心報主。武勇超羣。我家小姐往廬山訪李仙結菴處。小姐車兒早到也。〔旦道扮乘車占扮步搖隨上〕

〔卜算子〕〔旦〕門遶碧溪灣。路出青天半。茆菴只在白雲間。一派簫聲遠。〔外〕

稟小姐。此處已是廬山李尊師隱居。請小姐停車。〔旦〕老蒼頭先入通報求見。〔外跪稟介〕稟上尊師。荆楚許相國孫女。秀士李白妻許氏。遠來訪道。求見尊師。〔內叫〕此間沒有仙人。無道可訪。不勞相見。〔外〕稟小姐。菴內人說沒有仙人。不肯相見。〔旦〕待我親求。〔跪介〕妾身乃相國許公孫女。秀士李白妻。許氏湘娥。久慕玄風。千里拜訪。乞尊師念弟子遠來至情。俯容一見。〔內應〕仙師出來也。〔老旦扮李騰空丑扮侍女上〕

〔前腔〕絳雪駐容顏。紫霧騰霄漢。蕊珠一卷掩松關。石几爐香滿。授訣扶桑大帝君。曾窺丹檢綠韜文。曉來控鶴朝真去。不帶青天一片雲。自家女真李騰空是也。門外何人至此。〔旦〕賤妾許氏。託體相門。猥以凡胎。渴慕大道。遠來參訪。願度迷津。〔稽首拜介老旦〕女娘請起。念貧道山野村姑。隱居避世。有何道術。敢勞軒車。〔旦〕尊師深居名山。籍登天闕。延年度世。出神飛形。無勞過謙。願垂慈憫。〔老旦〕女娘生居華屋。志慕清虛。道骨天成。登真可冀。你聽我道來。

〔北〕二犯江兒水。流星飛電。人世是流星飛電。榮華纔轉眼。似車輪下坂弩箭。

離弦撇香閨。尋仙館。竹色暗紅泉。松聲出紫烟。龍起瑤天。鶴下瓊田。鎮日價泛滄溟。遊閬苑。〔旦〕聞言爽然。灑涼颺。聞言爽然。清都別院。喜來到清都別院。早不覺白泠泠。凡骨頓僂。凡骨頓僂。

〔前腔〕〔旦〕繁華庭院。生長在繁華庭院。香奩珠翠滿。厭修眉蟬鬢。寶鬢花鈿。也明知時光短。因此叩靈壇。齋心禮上仙。手啟霞編。口授真詮。我自願侍龍車。陪鳳輦。〔老旦〕知卿有緣。宿生來知卿有緣。紅塵不戀。受清虛紅塵不戀。請看那仙都裏。桃熟幾番。桃熟幾番。

〔北寄生草〕〔老旦〕調鉛粉。勻顏色。美容華。正少年。秀眉好目流清盼。金釵髮墮連珠串。輕綃縹緲搖紈扇。只解道喜時六幅翠裙長。又誰知悲來三尺紅羅短。

〔前腔〕庭前樹。生連理。錦中花。栽合歡。爭妍妬寵真堪歎。趙姬入殿班姬遠。楊妃薦寢梅妃怨。卻纔的鳳皇臺上聽笙簫。早又奈鴛鴦塚畔悲笳管。〔旦〕多謝尊

師訓誨。聞師曾授金液還丹于聖祖。如蒙不棄。乞示祕方。〔老旦〕你宿有仙緣。我豈敢祕惜大寶。只是此時尚早。你且回去。脫了世事。再來授道。慎勿久戀紅塵也。〔旦〕如此萬幸。弟子今且回去。異日再來。〔老旦〕姑娘請了。

〔老〕多君相門女。

學道愛神仙。

〔旦〕一往屏風疊。

〔合〕乘鸞着玉鞭。

第六齣 爲國薦賢

〔小末扮高力士上〕紫禁鶯花滿玉除。終年出入侍鸞輿。莫言抽筆無文藻。狗監當年薦子虛。自家唐朝內臣高力士是也。官監門大將。列棨戟光榮。近侍崇班。貂璫領袖。問萬乘之寢輿。有懷捧日。司六宮之扇輪。無夢行雲。不握彤管的供奉。長依鳳閣龍樓。未賜鐵券的王侯。儘着蟒衣獅帶。今上開天寶之元。繡口錦心。按辭賦也。合當爲天子。太真占昭陽之寵。雲魂水魄。去脂粉越顯是個仙人。春花秋月。合萬邦景物。盡粧點海宇昇平。暮管朝絃。總四部梨園。只打疊君王行樂。遠遠望見內家承應一部樂工來也。〔末扮李龜年淨扮曹崑崙貼扮賀懷智老旦扮張野狐上〕君王樂譜手親刪。

羯鼓聲高琴瑟間。一自三郎度曲後。許多天樂在人間。〔小末〕你衆人往那裏走。〔衆〕公公叩頭。小人們聞皇上爺今日便殿開宴。召諸學士應制賦詩。小人們在此伺候供應。〔小末〕知道了。你衆樂工俱伶俐絕倫。最善談諧科諢。今日要考你們一考。〔衆〕一憑公公分付。〔小末〕聽我命題。我要個應無比。真可喜。這些兒不如你。天上正好新月。李龜年你就把新月爲題。〔李諾〕有了。嫦娥容貌應無比。三五團圓真可喜。雖然露出這些兒。多少明星不如你。〔小末〕妙哉。皇上爺常愛太真娘的雙乳。曹崑崙你就把他爲題。〔曹諾〕有了。娘娘顏色應無比。玉乳酥胸真可喜。羅衫隱現這些兒。新剝雞頭不如你。〔小末笑科〕更妙。貴妃娘娘常笑安祿山鼻準。賀懷智你就把他爲題。〔賀諾〕有了。胡奴粗大應無比。鼻準隆隆真可喜。像王留下這些兒。高帝龍孫不如你。〔小末〕也好。張野狐輪到你。卻沒有題目怎麼好。〔老旦〕就把公公爲題。〔小末〕這也使得。你就謫來。〔張諾〕有了。公公富貴應無比。玉帶蟒衣真可喜。若還留得這些兒。天上神仙不如你。〔衆大笑介小末〕殿上鐘鼓聲動。想聖駕升殿也。〔衆下小生扮唐玄宗近侍隨上〕

〔喜遷鶯〕皇都淑景。看柳拂珊瑚。花明藻井。璧月生輝。卿雲散彩。笙歌萬戶昇。

平〔小旦扮楊貴妃侍女上〕春夢海棠初醒。曉日新粧寶鏡倚宮娥。隔簾試聽學語新鶯。〔朝見介小生〕寡人隆基。力翦宮妖。嗣登寶位。享國長久。際世昇平。雅志右文。揮灑頗工。容藻凡胎。慕道禱祠。精感靈祇。雕龍繡虎之士。濟濟並列於朝端。驂鸞控鶴之夫。翩翩來集於闕下。性格大饒風韻。聲歌且入歡娛。知音度曲。我三郎之絃索通神。掩扇回眸。這妃子之容華絕世。今日與太真同御便殿開宴。召諸學士應制賦詩。妃子送酒。〔小旦送酒介〕

〔太師引〕〔小生〕帝城浩蕩春如許。麗昭陽罽毼綺疎。試看取五雲宮闕兼帶着六甲行厨。引高歌激楚陽阿舞。細趁著迴風低度。儘堪送金尊玉壺。微醺處。睨佳人皓齒紅膚。

〔前腔〕〔小旦〕椒房沐寵承恩遇。愧自比當熊貫魚。獨占他三千粉黛。怎堪方十斛明珠也。秋風扇篋愁紈素。願長如織女黃姑。奉宸遊秦宮漢都。慎勿使淒涼風雨羊車。〔外扮賀知章末扮崔宗之小外扮王維上〕臣知章。臣宗之。臣維。朝見陛下。願陛下

萬歲萬歲萬萬歲。〔小生〕卿等平身。朕昨日同貴妃幸驪山溫泉遊覽。卿等未曾扈駕。可應制各賦

詩一章。詰朝進覽。〔外末小外應諾小生〕貴妃不妨與衆卿相見。小旦相見外末小外上酒介。

〔針線箱〕〔外末小外〕際明良玉京天府。賜微臣金莖仙露。薦瑠盤鳳臘和麟

脯。倚錦瑟鷓鴣弦。雁柱靈妃自賦唐山曲。天子親歌豐鎬都。〔合〕眞殊遇。千年魚

水。又何妨卜夜歡娛。

〔前腔〕〔小生小旦〕喜良佐鵷鸞筵羽。更淑女王雎內助。正文修武偃昇平日。

好妙選雍熙樂部。昭陽殿裏雕梁燕。太液池中錦浪鳧。〔合前小生〕朕記得漢武君

臣柏梁聯句。今日卿等與宴。朕欲同詠一篇。貴妃亦須廣和。〔外末小外諾小旦〕賤妾身比行雲。才

非詠雪。仰同鳳嘯。願學蛙鳴。〔小生〕就把今日宴會爲題。九重臨化日。萬國喜同風。高殿凌飛鳥。

〔末〕長梁掛彩虹。〔外〕駝峯來域外。〔小外〕鳳吹入雲中。燕鎬皇恩渥。〔小旦〕橫汾聖藻雄。〔小生〕

卿等聯句並工。可令付史館。傳作千秋故事。衆並叩謝。〔皇上首倡。美同白雪。臣等屬和。幸附青雲。

〔解三酲〕〔小生小旦〕和柏梁輝光漢署。叶卿雲喜起姚虞。風流千載明良遇。

美詞華玉散瓊敷。宋家彩筆揚神女。司馬天才駕子虛。〔合〕眞無妬。任燕泥庭

草秀句珊瑚。

〔前腔〕〔外末小外〕賦秋風才凌漢武。詠齊紈思比班好。皇娥白帝應歡聚拊。

孤桐江渚躊躇。七襄文錦天孫杼。五彩神光洛浦珠。〔合前小生〕朕聞隴西有一布衣。

李白道品清高。天才宏放。卿等知否。小旦。皇上適聞李白。妾亦久聞此人。果是不凡。皇上若聘取。

來京。必能潤色鴻業。匡佐太平。〔小生〕妃子乃能薦賢爲國。賢哉。明當厚禮頒詔。聘取高人也。

〔三學士〕〔小生小旦〕安晉東山須謝傅。凌雲曾賞相如。他熊羆自眷垂竿好。

我鱗鳳還愁結網疎。林壑好頒丹詔去。將豪傑起社稷扶。

〔前腔〕〔外末小外〕才子聲名人慨慕。動君王玉帛安車。那綵毫賦擬光文運。

更黃石編堪佐廟謨。好貯圖書東璧府。讎祕典直禁廬。

〔小生〕自古明皇解愛才。〔衆〕璽書早發下蒿萊。

〔小旦〕妾身正沐君王寵。〔合〕不爲相如買賦來。

第七齣 頒詔雲夢

〔唐多令〕〔旦上〕紫府采真回。紅塵轉自哀。舊家門。逕滿青苔。不是遼陽千載。羞寶鏡。對粧臺。曉入瑤臺露氣清。天風吹落步虛聲。塵心不斷俗緣在。千里下山空月明。奴家自別廬山李尊師回家。塵緣雖在。道念轉虔。揮手烟霞。會須有日。良人東遊廣陵。至今未返。想他世味念淺。瀟灑出塵。只是麴蘖情深。清狂負俗。終當不礙其修真。早晚一定回來也。

〔前腔〕〔生〕文氣應三台。雄心出九垓。黃金散盡好歸來。留得奚囊尙在。聊混迹。任人猜。〔相見介〕旦官人回來了。〔生〕娘子。廬山訪道。幾時先回。〔旦〕奴家歸纔三日。到得廬

山。幸遇騰空尊師。他許我道骨可成。人緣未斷。且暫回家。潛修密諦。後會有期。官人。你到揚州。經理家產何如。〔生〕不好對娘子說。小生遇落魄公子。急難貧人。將數十萬金。一時散盡。素手歸來。實無顏色。可見卿面。〔旦〕官人此言差矣。佛氏以施財爲檀越。道家以濟人爲功德。眼中既見困窮。自當救拔。身外無非長物。豈可慳貪。官人以數十萬金濟貧恤苦。上清當書大德。賤妾亦分微功。君誠元振之流。妾豈王衍之婦。何言之陋也。〔生指旦介〕賢哉。賢哉。此男子所難。卿能如此。難得。難得。功出女娘。小生何功之有。

〔玉胞肚〕〔生〕生平慷慨散千金難期復來。念翳桑宣子能憐。歎王孫漂母猶哀。因貪綠蟻向歌臺。又費青蚨佐酒盃。

〔前腔〕〔旦〕君懷磊塊笑倫戎公然守財。濟燃眉功德應深。散纏頭懷抱聊開。揚州騎鶴有時來。何必腰間萬貫回。〔外扮展靈旗上〕報相公娘子。朝廷差官備禮齋詔。徵聘相公。已到郵亭。快擺香案迎接。〔生〕有這等事。只索迎候詔旨。〔末扮使臣上〕奉天承運皇帝詔曰。自古哲后昌時。保世滋大。必資巖穴奇偉。光贊基隆。軒后凝圖。厥資風牧。蒼姬綿曆。實籍非熊。綺皓安劉。東山寧晉。載在史冊。流照於茲。爾隴西隱士李白。天藻清英。玄風遐邁。塵視軒冕。埋光葆真。指翔鴻以明心。託神龜而曳尾。朕是用虛懷欽式。遠慕孤標。安車玄纁。敬聘林壑。斧藻皇業。助我休明。君其感激風雲。星言夙駕。仍敕所在有司。敦促就道。朕不遑啓處。側席降輦。以待高賢。欽者謝恩。生謝恩介。朝使大人拜揖。〔末〕李先生拜揖。皇上久慕高風。隆禮徵聘。宜急赴君命。勿戀山林。〔生〕念白落落布衣。疎狂賤士。文采不足以光大業。道德不足以表明時。有愧徵書。安敢奉詔。願上辭疏。乞朝使大人爲僕轉聞。〔末〕皇上渴慕大賢。折節注想。豈辭疏得免。有司自能敦迫。下官焉敢

代辭就此告別了。〔生〕如此野夫不敢久羈使節。明日聊具酒船。一泛雲夢。卽當祖餞河橋也。請大人暫歸館驛。野夫尋當奉拜。〔別介末〕胥靡已發明王夢。山客應懷魏闕心。〔下旦〕恭喜。朝廷厚禮徵聘。相公雖雅存出世之情。亦當小展匡時之略。便宜應命。不必固辭。〔生〕小生夙懷濟世安民。非碌碌隱者。但權臣女謁。方布列於要津。野性疎才。恐不宜於世路。爲之奈何。〔旦〕旣是朝廷有事。正賴賢良整頓匡扶。爲何辭避。〔生〕容小生再細籌之。

〔玉交枝〕〔生〕璽書遠賚。遇明主。搽求草萊。北山此日驚松桂。還令猿鶴疑猜。布衣那有經濟才。怕朝紳難改疎狂態。〔合〕怎忍撇青蘿紫苔。怎忍別朝霞暮靄。

〔前腔〕〔旦〕君王心愛。要張羅冥鴻下來。十年流落栖江海。忍教寶劍沈埋。豫章此時收異材。豐城此日生光彩。〔合前〕

〔生〕此日東山迎詔旨。

只愁北隴勒移文。

〔旦〕匡時定難男兒事。

好去朝天謁聖君。

第八齣 別妻赴京

〔逍遙樂〕〔生上〕竟不容高臥。王路兼程催似火。行行忍別碧山阿。秦京迢遞。帝闕嵯峨。極目關河。送我紅塵道。奪我白石窩。野人穿薜荔。身不慣朝衫。自家蒙朝廷詔徵。有司日夜催迫上道。不容辭免。只得勉就衣冠。到長安面聖。再作道理。不免請娘子出來。拜別則個。娘子有請。

〔前腔〕〔旦〕紫綬新裝裏。妾亦鸞翹釵鳳髻。笑人其奈白雲何。東山秣馬。北極鳴珂。南浦離歌。〔生〕娘子拜揖。〔旦〕官人萬福。〔生〕王命難辭。官司催急。卑人只得勉行。與娘子分別。倘若久留都下。當差人迎接家眷。〔旦〕鄙諺有之。學成文武藝。貨與帝王家。願相公此行。報效朝廷。務竭忠盡。大助既就。入道未遲。〔生〕卑人就此拜別。

〔柳搖金〕〔生〕春山紫邏。晴湖綠波。野鷺點汀莎。問路逢津卒。隨風送棹歌。何意入利名韁鎖。何意入利名韁鎖。惆悵別烟蘿。望長安日下浮雲奈何。〔合〕禁門金闕。清漏銀河。金闕銀河。新拜鈞陳御座。

〔前腔〕〔旦〕君才王佐文成綺羅。豈肯老巖阿。補袞陳言入。抽毫應制多。好去侍龍池畫舸。好去侍龍池畫舸。輦路鳳皇坡。卿雲有爛。虞庭載歌。〔合前旦〕相公到京。朝見皇上。拜何官爵。千萬早寄好音。慰妾懸望。〔生〕娘子放心。卑人到京。早晚卽有信回。

〔生〕落日下河梁。

〔旦〕游子暮何之。

今逢渭濱獵。

端可帝王師。

第九齣 拜官供奉

〔上林春〕〔外上〕天子臨軒。詞臣入直。已徵到山林隱客。爭看才子如雲。陛見朝紳動色。下官太子賓客。禮部侍郎賀知章。四明鏡湖人也。皇上嘗以李白人才問臣。臣力薦其仙才。天縱。皇上下詔。隆禮聘召來京。今日朝見。下官在此伺候。〔生野服上〕

〔步蟾宮〕日華殿閣罽毼映。爐香裊。隱隱鑿聲。布袍草履上承明。麋鹿難馴野性。〔相見介〕賀大人拜揖。〔外〕李先生拜揖。下官昨日已將先生聘到情由。一一奏聞皇上。今日朝見。

想必就有玉音也。〔內臣上〕皇帝有旨。據禮部侍郎賀知章奏。隴西隱士李白。徵聘到京。聖上御金

鑾殿卽勅賀知章引見殿中故勅〔小生扮唐明皇引內臣宮娥上〕

〔破陣子〕繪弋冥鴻刷羽。簫韶丹鳳儀庭。青藜照夜思劉向。綵筆凌雲羨馬卿。
何妨降輦迎。〔外〕臣奏陛下奉詔徵聘到隱士李白朝見。〔生〕草莽臣李白朝見陛下。願陛下萬
歲萬歲萬萬歲。〔小生〕朕久聞卿名。才華絕代。今睹卿面。風骨超凡。甚慰朕顧慕之意。非止欲藉文
章。潤色鴻業。且願資經略。匡佐太平。方今世務。何者爲急。卿其勿吝敷陳。〔生〕臣山野鄙夫。不諳經
國大計。幸蒙清問。敢不悉竭愚衷。

〔刮鼓令〕匡時媿未能。論經綸屬俊英。臣幼習蟲魚薄技。又學鞞鈴喜論兵。聖
世際昇平。車書九州。笙歌萬井。念隱憂漆室效葵傾。鑒先幾曲突徙薪情。〔小
生〕卿當平世。懷此隱憂。所憂何在。幸明以告我。

〔前腔〕〔生〕宮闈未肅清。大居邊細在庭。臣草莽那知忌諱。城社潛奸久藉憑。
藩鎮擁強兵。寵臣易驕。胡雛欲逞。念深謀須早建維城。看英風誰爲請長纓。
〔小生〕先生面陳。具見忠謀遠識。朕當書紳。可勅中書省。卽拜翰林供奉。仍賜天廚御食。朕當親爲

調羹以示隆眷。〔外生同拜謝介小生下內臣宮女捧冠帶上生服謝恩

〔二犯鮑老催〕〔生〕欣逢聖明。這冠裳一朝寵膺。清階華省。列供奉金門歲星。珍饈賜出天廚盛。親將御手調金鼎。感君恩重。志欲酬。言難罄。誓抒忠讜匡朝政。〔合〕今宵初聽宮漏聲。來朝早候龍旂影。

〔前腔〕〔外〕高才盛名。被殊恩人臣極榮。虛懷采聽。注名字丹書御屏。緋袍宮錦花相映。掖垣晚出天街暝。喜明良。遇筵羽。齊夔龍。竝良規。好上千秋鏡。〔合前生〕念小生遭際。全仗大人吹噓。何以爲報。〔外〕薦賢爲國。朝廷公典。豈是私恩。何報之有。

〔外〕喜濟風雲會。

新承雨露恩。

歲星今不見。

方朔在金門。

第十齣 長安豪飲

〔丑上〕解衣來飲盡公侯。美酒長安只此樓。蹀躞青驄繫垂柳。纍纍紫綬掛簾鉤。小人乃長安城中酒保是也。金波玉液。酒價十千。畫棟雕梁。樓居第一。調羹仙子。手和芍藥。絕賽豪家藥娥。當壚贖人。

面帶芙蓉。不數成都卓女。停車下馬。無非公子王孫。留珮解貂。盡是神仙卿相。翰林供奉李太白老爺。極愛我家酒美。常與諸名士取醉於此。不免張設鋪面。恐今日諸公又來也。〔外上〕游仙自我好。狂客任人呼。清夢在帝所。歸心指鏡湖。自家賀知章也。〔末上〕人間宰詩社。天上掌文星。帝怒經蔥肆。風雷役五丁。自家杜甫是也。〔小生上〕有酒日爲樂。無官百不憂。饒他封萬戶。輸我醉鄉侯。自家孟浩然是也。〔生上〕春衣宿杜陵。急管吹平樂。飲者獨留名。聖賢皆寂寞。自家李白是也。〔相見介〕生〔今日與諸公相約。同醉酒樓如何。衆〕如此甚好。〔生〕叫酒保將酒過來。〔丑上應〕

〔榴花泣〕〔生〕朝班初散。竝馬出銅溝。過紫陌。醉紅樓。雲和一曲倚箜篌。占長安我輩風流。心中隱憂。看五侯甲第連鴛鴦。總難提赤鳳宮中。且相將綠蟻壚頭。

〔前腔〕〔外〕家臨鏡水。吾意記仙游。人易老。歲何遒。蒼茫千頃一漁舟。斝徜徉手拍杯浮。花陰過樓。見垂楊罨畫移清晝。儘歡娛繡襪行春。奈淒涼紈扇知秋。〔前腔〕〔末〕昇平海宇。家國歎金甌。呈趙舞。發吳謳。風姨日姊競溫柔。殢君王

禍水難收。華戎怎侔。想胡雛大嘯東門後。把年華且付沈酣。寄清狂幸有糟丘。
〔前腔〕〔小生〕蕭然布衲。不挂帝王憂。馴野鹿。狎沙鷗。朱門華屋偶來游。喜無
拘傲盡王侯。新糟細筍。似松風颯颯。和山溜。任人間萬事空勞。了吾生一醉何
求。〔旦占老旦上〕沈香亭北。傲雲屏。羯鼓聲高衆樂停。夜半歸來宮漏永。薛王沈醉壽王醒。我衆人

乃唐朝大內供應。一班女樂工是也。今日皇上爺不曾宣喚。且向酒樓取醉一番呀。列位老爺萬福。

〔生〕你衆人是御前供應。這一會來得卻好。勞你們歌舞侑觴。當奉贈纏頭之錦。〔衆諾送酒〕

〔勝如花〕〔旦占老旦〕宜春苑。花萼樓。正對南山龍首。召顛官屢奉鑾輿。倚宮
妃頻傾珠斗。競整頓歌喉舞袖。〔合〕指攏絃春寒玉彀。步生蓮花挑鳳頭。轉盼
迴眸。閃秋波欲溜。斜帶着遠山微皺。動君王一曲涼州。動君王一曲涼州。

〔前腔〕〔生外末小生〕陽阿舞。激楚謳。雙趁纖腰檀口。嫋亭亭扇落桃花。寒俏

俏樓低楊柳。直坐到酒闌時候。〔合前淨上〕小人是河西節度使。哥舒老爺差官。請李爺明

日赴宴。生知道了。覆哥舒老爺。我明日來奉拜。〔淨應下外〕天色已晚。明日早朝。我們散罷。請各

酬贈列位女郎。〔衆〕多謝列位老爺。佐酒銀條脫。追歡金縷衣。只愁歌舞散。化作綵雲飛。〔下外〕太白聞哥舒節度討吐蕃有功。求兄作勒碑文字。已脫稿了。乞見教我輩。〔生〕連日中酒。未暇揮毫。今晚回去篝燈。了此公案也。

〔生〕勸君莫惜金縷衣。

〔外〕高歌一曲梁塵飛。

〔末〕且看欲盡花經眼。

〔小生〕怎忍花前不醉歸。

第十一齣 預識汾陽

〔西地錦〕〔淨扮哥舒翰將士從上〕坐斷河西四郡。威名天下俱聞。陰山夜哭匈奴。

遁。桓桓麟閣元勳。秦時明月漢時關。武帝長征人未還。但使龍城飛將在。不教胡馬度陰山。下官河西節度使哥舒翰是也。起自胡種。戮力皇朝。屢立戰功。歷官節鎮。邇者奉命討吐蕃。連戰連捷。斬首千級。奏凱天朝。論功裂土。大小將士。賞賚有差。獨裨將郭子儀無尺寸功。反喪部下士卒。合當依律處斬也。曾申稱臨敵患病。未可憑信。軍法難容。軍中例當立碑紀勛。已丐求翰林供奉李太白先生作文。昨日請他宴敘。想必到也。〔將士綁小外郭子儀上〕奉哥舒元帥將令。到邊關上擒拏失律。

裨將郭子儀。已到轅門首。在此伺候。〔生從人上〕

〔生查子〕書生愧請纓。大將膺分閫。燕然借勒銘。萬古留雄鎮。來到此間。是哥哥

元帥帥府了。〔見郭介〕呀。看這綁縛漢子。偉幹長軀。丰神軒舉。臨難不懼。必是人豪。帶過來。你這

漢子爲何犯法至此。〔小外〕這是那一位老爺。〔從〕這是翰林供奉李太白老爺。皇上爺第一寵眷

的就是。〔小外〕原來就是這一位老爺。小人願以冤情奉告。小人乃郭子儀。華州人氏。見做哥哥元

帥部下一員裨將。元帥奉命討吐蕃。小人適然染病。不能從征。曾申公文。稟白元帥。同事者妬忌。謗

小人臨陣退縮。元帥聽信讒言。按軍法將行誅戮。冤屈無伸。望老爺拔救。〔生〕你部下軍士。有從行

在此的麼。〔小外〕部下軍士。可憐三百人俱在此。欲赴帥府保救。軍法威嚴。只怕無益。〔生〕我知道

了。叫左右報知元帥。說我到門。〔報介淨〕快請李爺。〔相見介淨〕李先生拜揖。〔生〕元帥拜揖。〔淨〕

久慕才名。疆場武夫。無從樞請。幸惠高軒。〔生〕元帥干城虎將。下官文墨鱗生。荷蒙寵招。實出大幸。

初見台顏。不宜輒有陳說。適纔在轅門首。俄見一漢子。姓郭名子儀。臨刑綁縛。下官望見此人。相貌

奇偉。風骨超凡。停車問之。此人云。西征之役。實是抱病不前。元非臨陣退縮。部下三百人。匍匐保救。

見在門首。望乞元帥寬貸。〔淨〕李先生。你天下奇才。小將雅知欽重。既蒙見教。敢不允從。李先生人
天法眼。說此人奇偉。必是不凡。叫左右帶郭子儀進來。〔帶進介淨〕郭子儀所犯情罪。本該軍法
從事。翰林李爺在此取饒。姑貸汝死。仍復裨將之職。勉力後效。以贖前愆。叫左右去了。他綁縛去罷。
〔小外〕多謝老爺不殺之恩。〔淨〕謝了李爺。〔小外〕叩謝李爺救拔殘命。〔生〕元帥。此人後日功名。
不在元帥之下。〔淨笑〕先生識拔。必不謬言。郭子儀你可牢記此言。努力報効。〔小外〕謝二位老爺。
丈夫殺身報知己。壯士不死立大功。〔下淨〕左右將酒過來。

〔玉芙蓉〕清時擬鳳麟。絕世稱豪俊。際明主。正好匡時補袞。疏陳斧戾千秋訓。
文灑箋毫五色雲。〔合〕斟佳醞且深盃滿引。醉倚營門。高歌擊劍動星辰。

〔前腔〕〔生〕當今一虎臣。手縮元戎印。專征討。長驅力掃妖氛。龍旗忽閃威名
振。麟閣今標圖畫新。〔合前生〕下官就此告別。多謝華筵。〔淨〕多慢從者。小將另日告罪。

〔生〕玉帳頻斟金叵羅。

〔淨〕樂人奏曲盡饒歌。

蒲萄元是涼州釀。

〔合〕珠饌新開熱洛河。

第十二齣 湘娥思憶

〔月雲高〕〔旦占步搖上〕金鑿召對。君王賜殊禮。太乙燃藜下。女史薰香侍。寂寞

春閨。月痕繡牀裏。〔占〕水綠湘江渺。縱有魚箋難寄。門掩房櫳睡起遲。鳥語雕

欄花影移。〔小重山〕〔旦〕夫婿朝回初拜官。凝妝春日上翠樓。寒羅衣冷。疊粉香殘。新禮斗碧玉

嵌星冠。〔占〕秦樹隔長安。靡蕪連楚澤。映清湍。王孫何處解征鞍。靈妃怨。瑤瑟與誰彈。〔旦〕步搖朝

報到來。聞相公已朝見。天子親迎降輦。御手調羹。卽日拜翰林供奉。君恩既重。欲隱不能。報主匡時

丈夫之事。只是相公心本蕭疎。氣太豪邁。仕路險畏。恐易招尤。以此放心不下。〔占〕小姐所見雖是。

相公才名蓋世。聖主寵眷異常。想無他虞。請勿爲念。

〔香羅帶〕〔旦〕君行南浦時。垂楊乍絲。紅英轉眼同逝。小林花開已到荼蘼也。

遊子去。幾時歸。天涯芳草春夢迷。盼斷寶玦青驪也。月落華清河漢低。

〔前腔〕〔占〕龍鬢生網絲。香銷黛眉。鸞笙柱寒閒玉指。蕭郎此去步彤墀也。時

染翰墨淋漓。象牀繡衾涼似水。說甚雲雨堪疑也。神女荆王祇夢思。

〔羅江怨〕〔旦〕長離彩鳳姿。雲霄見稀。一朝應瑞喜來儀。君臣魚水結心期也。捧日擎天。好展平生志。鷗夷霸越歸。留侯拓漢基。那時間。方頓神仙轡。

〔前腔〕〔占〕文章獻赤墀。甘泉紫芝。凌雲辭賦世稱奇。至尊歎息幸同時也。降輦調羹。臣子榮遭際。從龍筆札隨。嬰鱗肝膽批。好抒心斗杓調元氣。

〔旦〕落拓新豐市。

〔占〕迴翔金馬門。

〔旦〕片言能遇主。

〔合〕七尺可酬恩。

第十三齣 脫靴捧硯

〔祝英臺〕〔小生明皇上從宮女內侍小末高力士末李龜年上〕日生香。花釀暝。春色許誰管。殿閣罨罨。芳樹流鶯換。〔小旦〕好倩錦帳留春。華燈照夜。流水年光何短。〔臨

江仙〕〔小生〕上林三月春如海。金尊賞到名花。妝成只恐妬明霞。〔小旦〕輕籠薄護。紅豔隔屏紗。

欲換新聲翻舊譜。東皇別是年華。遍呼樂部選諸家。〔合〕踏雲鵝管。天路玉京賒。〔小旦朝見介

小生〕妃子賜坐。今日沉香亭北。牡丹盛開。對妃子賞名花。不用舊樂。須別選新聲。非絕代才子。不

能辨辨。叫高力士。李龜年。急宣翰林供奉李白。〔小末叩頭領勅旨下。小末急上呼召李白介內應〕李白不在家。與飲中八仙同醉酒樓。可往那裏去呼召。〔小末急行科〕聖上有旨。宣召翰林供奉李白。〔生醉上〕

〔西地錦〕斷送繁絃急管。醅醕白眼青天。醉中深趣華胥宴。向他醒者難傳。

〔小末〕李翰林先生。聖上有旨宣召。可急趨君命。〔生〕我醉也。我醉也。去不得。去不得。〔小末〕怎麼了。聖旨宣召。敢說去不得。我兩個不免扶拽他走。〔見皇上介小末扶生叩頭生呼〕萬歲。萬歲。

萬萬歲。〔小生〕李先生何處醉來。〔生〕臣該萬死。臣不知聖上呼召。與同官共醉酒樓。死罪。死罪。

〔小生〕沉香亭北。牡丹盛開。朕與妃子同賞。不用舊時樂章。另製新聲。非卿不可。故爾相召。〔生〕臣雖中聖。敢不奉詔。願給筆札。〔生吐介小生〕內侍快取水來與李先生淨面。〔小生〕可給金花箋與李先生賦詩。仍着高力士與他脫靴。貴妃捧硯。以助供奉吟興。〔生援筆立就跪白〕臣詩三章已成。

呈聖上御覽。〔小生〕卿何神速也。雕紳倚馬。卿實兼之。貴妃煩你朗誦。〔小旦誦〕雲想衣裳花想容。春風拂檻露華濃。若非羣玉山頭見。會向瑤臺月下逢。一枝濃豔露凝香。雲雨巫山枉斷腸。借問漢

宮誰得似。可憐飛燕倚新妝。名花傾國兩相歡。長得君王帶笑看。解釋春風無限恨。沉香亭北倚闌干。
〔小生〕妙哉。清雅藻麗。大有風人之致。矢口立成。妙麗如此。真仙才也。可命李龜年卽將此詞。度入樂府。被之管絃。
〔末諾小旦進酒〕

〔傾盃玉芙蓉〕〔小生〕上國名花壓衆芳。亭北開清賞。最可喜人主徵歌。學士揮毫。妃子行觴。薄寒曉護茱萸帳。香氣晴薰翡翠裳。
〔合〕斟佳釀。倩仙人玉掌。更兼那。新翻天樂繞虹梁。

〔前腔〕〔小旦〕鈴索風傳百和香。廣殿雲屏敞。卻正好檢點花神。約束封姨。管領東皇。金箋綵筆光千丈。錦瑟瑤笙隊兩行。
〔合〕音嘹唳。借天風送響。惟願取。萬年行樂侍君王。

〔玉芙蓉〕〔生〕仙宮寶嵌妝。帝釋珠交網。羨紅雲讓態。絳月輸香。彩旛護景春無恙。瑞蠟留懽夜未央。
〔合〕停歌唱。覓詞人。醉鄉沉沉裏。摩娑雙眼掃琳瑯。
〔前腔〕〔衆〕輕烟幕尙方。暝日浮仙仗。賀太平帝王欣賞花王。佳人貌比雙成。

樣。才子胸盤五色腸。〔合前〕

〔雁來紅〕〔小生小旦〕憑瑤檻。倚繡牀。舞花奴。醉索郎。金釵委墮。低羅幌。紅暈桃腮上。袞袖輕揩汗粉香。〔合〕天青朗。亭臺夕陽。酒重斟。懽無恙。

〔前腔〕〔生〕荷憐才。聖度汪。恕微臣。酒態狂。千秋盛事垂天壤。新調清平。樂府從今隸太常。〔合前小生〕叫衆樂工。將李供奉清平調歌來聽者。〔衆諾〕

〔朱奴兒〕〔衆樂工〕准備着巫山斷腸。不爭教浥露凝香。羣玉瑤臺路渺茫。只落得雲花並想。〔合〕當筵唱。新詞樂。方待歲歲歌花放。

〔前腔〕分不得纖腰豔妝。卻將比飛燕昭陽。傾國名花兩鬪芳。常帶笑。君王來賞。〔合前小生〕朕將錦段十端。貴妃可將宮羅十疋。酬贈李君。〔生叩頭介〕皇上貴妃寵賚。願皇上萬

歲萬歲萬歲。萬歲。〔小生〕近日吐蕃猖獗。廟堂與他議和。卿可草和蕃篇。明日早朝。送朕親覽。〔生〕領勅旨。

〔小生〕落拓詞臣頻中聖。

風流天子解尊賢。

〔生〕脫靴捧硯從來少。

盛事宮闈萬古傳。

第十四齣 祿山謀逆

〔番卜算〕〔淨扮安祿山將士從上〕裂土控燕韓。部落連蕃漢。包藏逆節伏神奸。一

舉神州亂。營州牧羊兒。生來有貴相。劉石亂中華。虜亦應天象。自家東平郡王安祿山。作人養子。官

至方鎮。天寶入朝。蒙今上封王賜第。天子殊恩。鐵券開裂土之賞。貴妃異寵。錦褕賜洗兒之錢。中外

雖傳醜聲。宮闈實未及亂。彼不過視我爲弄臣。烏鴉豈偶彩鳳。我未免因而生邪念。黑蟆妄想天鵝。

方今天子耄昏。女寵布列。權相竊柄。藩鎮擁兵。乃奸人得志之秋。豪傑奮身之日。不免潛造兵戈。陰

養死士。相機觀變。反叛朝廷。豈不是好。〔門卒上〕稟大王爺。永王爺來拜。〔淨〕快迎接。〔丑扮永王

璘將士從上〕

〔前腔〕磐石貴宗安。靈派天潢遠。高皇龍種骨非凡。豈肯終藩翰。吳楚昔好亂。淮

南畜異志。漢文從代來。日夜窺神器。自家永王璘是也。鳳雛龍種。生來錫土稱孤。蜂目豺聲。天性幸

災樂禍。聞東平郡王陰蓄逆謀。特來密訪。與他同舉大事。不患無成。已到他府門首。將士通報。〔通

報介淨〕殿下拜揖。〔丑〕郡王拜揖。聞郡王大業救世安民。寡人特來請教。〔淨驚介〕殿下何故道此不祥之語。方今主上無過。海宇晏安。我祿山豈肯作此滅門之事。〔丑〕郡王不須疑我。方今主上淫昏。女寵作橫。四夷窺伺。藩鎮阻兵。眼見得天下大亂也。寡人親爲帝胄。位則重臣。豈忍坐視。士馬精強。人地雄偉。寡人遠出郡王下。若郡王起西北。寡人起東南。天下不足定也。〔淨〕殿下今上愛子。地尊禮絕。有志大業。祿山願佐下風。〔丑大笑〕大事若成。寡人與郡王中分天下。孤知郡王繫念妃子。這個卻分不得。敬讓郡王。〔淨大笑〕何論中分。天全一物。足以釋西伯。〔丑〕翰林供奉李白。有文武全才。若得他來相助。何患大事不成也。

〔瑣窗郎〕〔丑〕你英雄蓋世無前。骨相貴不可言。身通宮掖。手握兵權。倘一朝大舉。誰能留難。〔合〕管教他六飛狼狽。百寮竄。擁皇屋。登寶殿。

〔前腔〕〔淨〕論荒淫主上衰年。狐鼠輩竊弄權。賢王有志。出震承乾。願馳驅鞭撻。助凌霄漢。〔合前〕

〔丑〕女謁盈朝主德昏。

〔淨〕乘機一劍擾乾坤。

從來養虎能貽患。

莫怪胡兒解負恩。

第十五齣 游翫月宮

〔小外扮葉真人上〕玉扎丹書位上真。道成妙用自通神。虛空來往罡風裏。大地山河一掌輪。自家葉法善真人是也。括蒼人氏。授道聖師。兼精符籙。化形而出。有入無名。爲自在。彈指而上。天下地。此是逍遙。今乃中秋節序。唐天子久厭人間良夜。欲一觀天上中秋。要與楊貴妃同遊月宮。雖是人主侈心。亦有夙緣合往。昨在殿上與貧道言語相激。願同往月宮。貧道慨然許之。此時翰林供奉李白在傍呵笑。說古來那有此事。語太荒唐。天子說旣如此。你可一併帶供奉同往。此人原是大白星官。謫居人世。亦不妨同行。今晚月望之夕。天子已備法駕從人。只得挈他一遊月府。須索走這遭也。〔下。正旦扮嫦娥侍女旌節隨上〕真有仙娥控白鸞。香風肅肅珮珊珊。青天碧海無人到。桂樹扶疎月殿寒。吾乃月宮仙子嫦娥是也。世人說我是后羿之妻。竊服西王母靈藥。私奔月宮。此言非也。世人又妄分晦朔。全未得真。那有晦朔。上方光景常圓。行有正旁。下界看來時缺。我乃虛無一氣化成。何藉金母之靈藥。試看清冷九天之上。豈有竊藥之仙人。文士好弄筆端。妄言造罪。這也不在話下。

今日乃人間中秋之節。葉真人挈唐天子楊貴妃從臣李白來遊月宮。此三人並是仙班。謫居凡界。天子與貴妃塵中雖已造業。靈根尙未盡消。李白瀟散清狂。風骨正堪入道。數應得一到此。不合阻他。仙凡路殊。難與相見。只許他們一遊便了。〔下小生明皇小旦貴妃外葉真人生李白內侍宮娥幢蓋掌扇上小生〕人間此夕是中秋。〔小旦〕仙子相攜月府遊。〔生〕高處只愁風露冷。〔外〕竦身已在碧雲頭。貧道奏知皇上。法從既隨。銀河已駕。請皇上與從者同登。〔小生〕呀奇哉。果然空中隱隱垂下銀橋來也。〔外〕請皇上穩登。勿生恐怖。

〔新水令〕〔小生〕半空隱隱駕銀橋。步罡風陡生寒峭。仙人衣袂溼。宮女珮環搖。雉尾俄高。早不覺寥天杳。〔外〕皇上來到此處。已是月宮。請徑入則個。

〔步步嬌〕〔小旦〕瓊樓玉宇光籠罩。頃刻飛身到。星河逼絳霄。遠遠望見大殿。金書署廣寒清虛之府。殿署清虛。金書朗耀。塵念霎時消。雙眸閃爍神魂掉。〔生〕你看桂樹之下。有素衣仙女數人。乘白鸞歌舞。〔外〕這是嫦娥仙子的侍女。

〔折桂令〕〔小生〕碧琉璃冷浸霞標。只見桂樹扶疎。合殿香飄。有幾個仙女。婆

娑素袖蕭騷。裂青天。叫雲玉笛。散瑤臺。泣露瓊簫。蛻盡炎囂。颯爾神超。煞強似。濯魄冰壺。換骨佺喬。

〔江兒水〕〔小旦〕侍女紛相見。姮娥不可邀。綺疏貝闕霞光繞。珠幢繡蓋香煙裊。裊。玄文祕檢。弋深奧。何處參求道妙。自愧凡胎。身染蓮花泥淖。

〔雁兒落帶凱歌回〕〔生〕尙自隔紅雲帝座遙。卻下見赤縣神州小。爲甚這孤輪奔馳日夜勞。虧煞你把大地山河照。堪羨這守清虛愛寂寥。疊駕袞閒鳳翹。恥贈銀條脫。羞將金步搖。說甚麼捐佩填橋。靈光保得長明皎。萬里秋毫。早則個輕身慾界超。

〔僥僥令〕〔外〕人間曾不信。天路坐相邀。只素女白鸞長不老。又那里記春秋。限暮朝。

〔收江南〕呀誰沒有升天的羽翼。呵向碧落好遊遨。都只爲塵凡火宅不能拋。這清涼世界轉迢遙。駕天風海濤。駕天風海濤。何處望下方宮殿鬱峩嶢。〔小

〔生〕真人我聽得一派樂音。好清越也。〔外〕這個名爲霓裳羽衣之曲。

〔園林好〕〔小生〕聽宮娥霓裳調高。是仙音凡夫怎操。暢好度玲瓏縹緲。聊記取。入簫韶。刪下里。整雲璈。

〔沽美酒帶太平令〕〔衆合〕五雲車。靈旗導。七寶宮。鸞輿到。回思塵世真堪悼。歲月流。容顏槁。且別去玉京瑤島。怎當得風露寒宵。早則求長生大道。但轉盼月華西了。恁呵。休等到銀蟾沒夜。金烏向曉。呀再來遊。只怕天漢無橋。〔外〕河漢

左移。月輪西墜。請法駕回宮。

〔清江引〕僊人道術真玄妙。剖破虛空竅。金丹亦易成。天路非難到。願得似姮娥長不老。

〔小生〕仙遊喜得譜霓裳。

〔小旦〕高處瓊樓夜轉涼。

〔生〕回首虹橋隨步滅。

〔合〕依然銀海路茫茫。

第十六齣 宮禁生讒

〔小末扮高力士〕貴客何當侮辱。書生性太狂迂。寧爲王生結襪。怎當李白脫靴。我高力士官監門衛大將軍。加開府儀同三司。門多將吏。富貴傾朝。身近龍顏。威權在手。皇太子尙且呼我爲兄。諸王公悉皆尊我爲父。叵耐李白這廝。無非是一個翰林供奉官兒。公然在沉香亭上。伸了兩隻驢脚。令我脫靴。雖然皇上有命。他也不該如此放肆。我高力士。一生好漢。被這廝抹殺盡了。怎消得這一口忿氣。聞得太真娘娘。極愛他才藻。把他稱贊。時常在宮中念他。怎麼是好。不免入宮。求見娘娘。搆起是非。排得太真娘娘恨怨。那時纔好下手。〔淨扮宮女上〕個個長門悲夜月。人人紈扇泣秋風。粉黛三千俱退步。可憐肥婢在宮中。奴家乃太真娘娘宮中侍兒是也。若論我娘娘。且休論羞花閉月。萬種丰姿。好叫他喫烟火的仙子。單只說送暖偷寒。千般妖媚。真個是施香粉的狐狸。有時沉酣盃盞。水晶簾下低垂。軟酥酥半頰紅玉。殢人醉態可憐。有時臥起雕牀。雲母屏邊斜倚。淡溶溶微展秋波。乍醒睡容更妙。君王未曾舉意。早已猜破機關。掩扇回眸。不由人不引入迷魂陣。遣還偶爾失歡。做出許多情態。毀容截髮。一發教送上鬼門關。六宮中美色豈無。縱然容貌過他。只輸他着人的嬌態。一時間眼前不見。便有粉黛羅列。總不是可意根苗。正是三郎有些悔氣。撞着通天精魅。三千寵

愛一身空把牙根咬碎。〔小末笑〕咬碎了牙根。怎麼喫飯。〔淨笑〕正是。近日喫飯不得。將就只用七八碗兒。腰肢都瘦減了。〔小末〕也還看得過。比着伍子胥的腰大十圍。覺略減了些。我要見娘娘。你可通報。〔報介小旦上〕

〔傳言玉女〕曉瞳日曬。啼鶯喚醒春夢。撥不開風流愛寵。東風乍軟。朱戶裏簾鉤齊控。羨酒中豪士。花前高詠。月夕花晨總不閒。夜來沉醉暈紅顏。今朝又報陳歌舞。生怕

君王召玉環。妾乃貴妃楊氏。前同皇上賞牡丹。宣翰林李白撰新樂府三首。爛醉抽毫。一揮而就。清雅新麗。光彩射人。世間有此人品。有此才調。豈不可愛。我最喜他二句。借問漢宮誰得似。可憐飛燕

倚新妝。〔小末叩頭〕奴婢高力士叩頭。娘娘千歲。奴婢適纔聽娘娘口吟新詩二句。莫不就是前日李白賞牡丹的詩麼。〔小旦〕正是。〔小末〕娘娘以爲何如。〔小旦〕詩句絕妙。只是我愧不敢當。

〔小末〕娘娘。奴婢只道娘娘恨此人切齒。元來反喜他。〔小旦〕高內侍。緣何李白能辱人如此。〔小末〕漢家趙飛燕出身倡家。淫亂無行。以此人比娘娘。玷辱極矣。娘娘是一國之母。他爲臣子。輒敢放肆。奴婢切爲不平。〔小旦怒介〕高內侍你說得是。我到一時不會檢點。這厮播弄筆端。譏訕太甚。

全無人臣之禮。可恨可恨。〔小末〕此人白恃文才。輕世傲物。縱酒猖狂。因見皇上爺眷他。愈加放肆。娘娘須用裁抑此人。勿令過度。〔小旦〕我知道了。

〔解三醒〕〔小旦〕只敬他天才出衆。怎知他性賦頑凶。筆端輒敢含譏諷。那些個臣子謙恭。狂奴直是鴉嗤鳳。聖主輕將蛇作龍。難輕縱。難輕縱。管教他立遭貶竄。俛受牢籠。

〔前腔〕〔小末〕娘娘是瑤臺仙種。況兼那寵冠諸宮。衣冠貴族門楣重。怎生比娼女遭逢。淋漓狂態難供奉。玷辱朝班累聖聰。才何用。才何用。少甚麼賢臣補袞。文士雕龍。

〔小旦〕叵耐狂生詩太狂。〔小末〕只愁謗語外傳揚。
但憑換日偷天手。難免嘲風弄月殃。

第十七齣 知幾引退

〔謁金門〕〔生上〕時不遇。剗地蛾眉生妬。天外冥鴻終刷羽。浮雲愁日暮。一領

朝衫不戀我。三寸綵毫生禍胎。胸中雲夢尙無恙。長笑一聲歸去來。下官應聘而來。禮當殊遇。官拜清華。聖恩無以加矣。夙無珪珥之緣。終是山林之骨。內監以脫靴爲釁。宮妃以捧硯生讒。君側之謗難防。枕邊之言易入。屢官不拜。聖眷頓衰。嫌隙已成。料難久住。況主上荒迷於酒色。朝綱大壞于宵人。諸楊竊柄。政以賄成。各鎮擁兵。令從旁出。眼見得天下大亂矣。我不免見機早決。免貽後憂。思量司馬真人臨別言語。驗若蒼龜。此老真聖人也。我看這手中一管綵毫作祟。何用你入夢生花。我待要燒卻你呵。

〔孝南歌〕毫端彩。五色俱。裁雲鏤冰瓊蕊敷。枝穩鳳栖梧。花寒桂生蠹。宮闈萋菲。眩碧成朱。聖主應投杼。一曲清平。頃刻移宮羽。恩也疎。禮也疎。何用再躊躇。小車兒在路衢。念我文擬鷓鴣。武通龍豹。此行指望濟世經邦。誰想竟成畫餅。

〔前腔〕陰符訣。黃石書。姜牙子房期竝。驅長劍起雄圖。丹心報明主。誰知天意不用。男兒中道遭讒阻。一笑回頭。便捐翔鴻去。樵也蘇。釣也漁。烟水是吾廬。好相尋舊酒徒。

〔好姐姐〕清都。丹房藥爐。好去覓舊時仙侶。紅泉無恙。白雲千頃。疎寥陽路。從今發桂還爲主。滿地松陰鶴夢孤。

〔前腔〕懸車明辭禁廬。謝聖主掛冠神武。此生無復含香畫省趨。尋眞處。桃花流水迷雲樹。未許時人問隱居。

〔尾聲〕羊腸虎口人難住。這恩眷敢忘聖主。只恐怕戎馬關山動地呼。

侍奉君王不到頭。

飄然一衲賦仙遊。

從今不作華清夢。

烟雨江湖一釣舟。

第十八齣 祖餞都門

〔挂枝兒〕〔小外扮郭子儀冠服將士從上〕結髮從戎經百戰。一朝裏建節登壇。萬死餘生。千秋高義。河橋忍別恩官。建牙吹角不聞喧。三十登壇衆所尊。家散萬金酬士死。身留

一劍答君恩。下官郭子儀。吐蕃之役。幾乎喪身。幸賴翰林李太白力救。得免伏法。屢立戰功。歷官方鎮。今爲朔方節度使。下官每思性命官爵。皆李公所賜。功名初立。大恩未酬。太白近因高才盛名。爲

內寵所妬。上疏天朝。挂冠歸隱。此公才堪王佐。文爲世宗。正宜補闕拾遺。在帝左右。一旦遭讒去國。朝野不平。下官猛欲上表奏留。犯顏伏闕。奈我疆場之臣。難以力諍。李公今日辭朝長往。不免徑出都門。送別則個。〔外賀知章上〕渭城朝雨浥輕塵。客舍青青柳色新。勸君更盡一盃酒。西出陽關無故人。下官賀知章。今日太白辭官去國。諸公載酒送行。下官去走一遭。〔相見介小外〕賀大人拜揖。

〔外〕郭大人拜揖。公之此來。想爲送別太白。〔小外〕正是正是。李公曠世奇才。正宜匡扶社稷。一朝播去。朝野同嗟。下官雖抱不平。爭奈是疆場外吏。諸公何故不上疏保留。〔外〕太白之去。諸公深惜。奈爲得罪宮禁。力難挽回。整爾挂冠。賜環不久。遠遠望見太白行李來也。〔生道裝上〕脫我今日之紅塵。還我舊時之白雲。家在荆湖臨夢澤。沙清水碧弔湘君。下官上疏辭官。再三懇啓。聖上不准辭。賜宮錦袍一襲。路費五百金。止許給假還山。不時召用。辭朝已罷。遂出都門。長安縉紳諸公。盡在都門十里外送別了。飄然長往。遂出火坑。好不快活也。呀。賀季真。郭節度。緣何不與諸公同別。獨送遠來。〔外小外〕我二人分義與諸公不同。所以遠送一程。不忍就別。〔生〕多謝二公。〔外小外〕左右將酒過來。

〔金井水紅花〕〔外〕紫禁雙龍蠹。青天一鶴還。拂袖去長安。是登仙。孤雲爲伴。遙望沙清水碧。涼月一漁竿。好結束。遠遊冠也囉。羨你蟠龍五彩。吐鳳三都。倚馬千言。醉後花箋。忽滿。爭奈牝雞司日。雄狐作奸。卻使太陽迴照。虹霓蔽天。英雄淚眼。不禁臨岐餞。

〔前腔〕〔小外〕生死深恩在。關河別恨牽。灑涕上離筵。慘無言。天涯頻盼。恨不剖心泣血。昧死向金鸞。頃刻裏。問征鞍也囉。羨你學克武庫。才鬱虹梁。志潔冰盤。一任浮雲舒卷。昨日鸞坡起草。龍墀侍班。今日羊裘烟水。鷗夷釣船。只愁去後。烽火咸陽亂。〔外〕請問太白。足下出都。行蹤何往。好對我們一說。別後也好相聞。〔生〕實告季

真節度二公。山妻近日書來。移家揚州。方外故人司馬子微。客遊金陵。白欲到揚州。一見山妻。卽往金陵會子微。曾有華山道者元丹丘。亦是白烟霞好友。今將往拉此人。同到金陵訪道也。〔外〕足下既訪名山。我輩尙沉苦海。小弟不久亦黃冠入道矣。〔生〕如此甚好。

〔玉鶯兒〕〔生〕名山不遠。訪仙蹤。烟霞宿緣。念卑人已服霞衣。我荆妻亦頂星

冠山空醮筵。天高斗壇久。無瑤瑟湘靈怨。〔合〕喜飄然。風塵滿目。知不到松關。
〔前腔〕〔外小外〕眞凌霄漢。似華陽東門挂冠。授丹書早晚。驅雞與夫人同學。驂鸞木羊上天。茆龍着鞭。許家拔宅成仙眷。〔合前〕我二人只得奉別了。太白前途保重。

〔生〕多謝了。

〔生〕祖帳東門意氣濃。

〔外〕臨歧惜別話匆匆。

〔小外〕欲來華岳峰頭覓。

〔合〕知入雲山第幾重。

第十九齣 母子慮禍

〔霜天曉角〕〔旦占上旦〕長安日下。帝里青驄跨。〔占〕雲夢已離巫峽。廣陵來看瓊花。

〔前腔〕〔小生伯禽上〕白雲西挂。何處嚴親舍。極目紅塵。車馬銷魂。紫禁烟花。母

親拜揖。〔旦〕孩兒到來。相公久宦長安。杳無音信。奴家因楚中舊業荒落。移家廣陵。且喜孩兒伯禽

年紀漸長。既習詩書。兼理家事。揚州薄產。被相公仗義散盡。尙存田畝。足供十口饔飧。只是聞得天

子荒淫酒色。內寵濁亂朝綱。相公在近侍清班。不知稅駕。好生挂念。如之奈何。〔小生〕稟告母親。吾父文成鸞鳳。道合龍蛇。合則致主匡時。希留侯謝傅之迹。不合則奉身而退。追兩疏都水之風。舒卷在我。不須憂慮。〔旦〕汝父才名太盛。物忌所歸。是吾憂也。

〔漁家傲〕人去後。日向淒涼度歲華。蕭蕭的華屋空存。金釵無些。荏苒相門風光換。舊時王謝。自從那夫婿之京。一家兒飄梗路花。也都教粉褪香殘。香殘來空自嗟。

〔剔銀燈〕〔小生〕秦京道。蒼茫的樹遮。家君去。無奈羈身在金馬。一陣陣花飄。在一絲絲垂楊下。一彎彎月伴着一搭搭星河夜。天涯回首故國。雨過楚天青。迢迢夢賒。

〔攤破地錦花〕〔占〕論才華已占斷朝和野。戀酒和花。珊瑚玦落在誰家。學士風流。才子豪奢。望京華。怎到得碧油車。

〔麻婆子〕〔合〕帝王帝王耽燕樂。花奴羯鼓搥。妃子妃子日專寵。宮娥淚似麻。

詞臣叨秩列清華。社稷擔子怎生卸。只恐草動風驚也。那時何處是吾家。

〔旦〕豈有揚州十萬錢。

〔小生〕隋堤柳色尙依然。

〔占〕只愁後夜長安夢。

〔合〕擬傍荆門郢樹烟。

第二十齣 乘醉騎驢

〔生騎驢上〕頭頂星辰碧玉冠。飄然策蹇出長安。故人家住雲臺上。翠撲蓮花掌上看。李白離了長安。往華山訪故人元丹丘。來到這裏。已是華陰界上。我想長安青驄寶馬。怎如驢背逍遙也。

〔意遲遲〕一解金鞍辭輦道。驢背斜陽好。野曠碧天高。涼風颯颯吹秋草。華山仙掌忽當前。遙想那瓊宮路插雲臺杳。〔末扮華陰縣令上〕簿書作令休云俗。勾漏旌陽

俱是仙。最喜華山收部內。蓮花日日縣門前。下官華陰縣令。任華是也。幼攻詩賦。渴慕名賢。曾撰兩

長歌自通於杜子美。李太白。子美有詩見答。只是太白無一字相聞。聞得此君落拓清狂。縱酒遺世。近因牡丹一詠。得罪宮闈。他不知我。我自慕他。幾回欲解印綬。訪之長安。蹉跎未果。這也不在話下。

今日早衙開門。教左右。門外有投牒告狀者。着令進來。〔生騎驢過縣門。門卒喝生下。驢生不肯下。

喧嚷科末〕看你像是一個道士。怎敢騎驢不下。徑過公門。〔生〕方外野人。不知禮法。望大人恕罪。
〔末〕你是何等樣人。從實供來。〔生〕我是海上釣鯨客。不必問我家鄉姓名。〔末〕這廝好無禮。敢造
次狂言。我且問你。你海上釣鯨。以何物爲釣線。〔生〕我以四海爲魚池。三山爲釣臺。虹霓爲絲。明月
爲鉤。〔末〕以何物爲餌。〔生〕以天下無義氣丈夫爲餌。〔末〕誰是無義氣的丈夫。這廝唐突公門。欺
傲官長。不知有禮。安知有義。既犯吾法。合當受刑。左右將刑具伺候。〔生〕是野人有罪了。聽吾一言
奉稟。〔末〕你有甚麼說話。且容你說上來。〔生起立介〕

〔北一枝花〕我本是山林物外豪。管領着風月閒中調。出落我丹山飛彩鳳。安
排着滄海釣神鰲。莫怪哞叨。莫怪哞叨。且喜將日月籠兒跳。等閒把烟霞擔子
挑。終日價與綠酒爲鄰。不眨眼報道黃花綻了。〔末〕不須閒說。且講你平生勾當來。

〔梁州序七〕〔生〕我有時向王侯門啣盃潦倒。有時向田父老插杖逍遙。樂樂
樂。那月明蕩入蘆花棹。受用的風生浦口。受用的露滿蓬梢。受用的鳧雛雁子。
受用的蘭笋菰苗。樂樂樂。舴艋兒夜泊溪橋。襪襪兒冷挂山椒。樂樂樂。准備着

青錢酒館歌樓。青錢酒館歌樓。受用的是喚客繡裙花襖。醉的是殢人玉管金簫。任河漢星低。簾櫳月曉。兩眉端不挂閒煩惱。直待把公侯貌。乾坤傲。永不踏紅塵向市朝。真喚做聖世漁樵。〔末〕你既是野人。受用漁樵風月是有的。怎麼說繡裙花襖。

玉管金簫。你好不誇口。〔生〕大人俱是有的。〔末〕胡說。

〔牧羊關〕〔生〕怎知道歡過後。愁還到。福窮時。禍所招。一霎時送將來。羅網難逃。陪伴他虎穴龍巢。掇賺我羊腸鳥道。怕的是龜亡還爲殼。愁則愁翠死卻因毛。走入在是非場。終朝有。進一步風波平地高。

〔四塊玉〕難難難。恩情化作仇。大怒藏嘻笑。昨日價酒杯來往。逞風騷。把人兒愛惜如珍寶。頃刻裏變浮雲。頃刻裏同蒿草。早覷破這相逢沒下梢。〔末〕看這人絮叨叨。埋怨誰來。莫非害風了。

〔哭皇天〕〔生〕好好好。急忙裏收韁早。猛回頭浪花中拏將柁牢。常言道人情初見應須好。苦殺人從前恩義總難消。我只將一副頭顱來保。待還尋當時節。

屋。舊日漁竿。桃花流水。桂樹山坳。虛飄飄一往孤雲不可招。好拜上你邑侯呵。莫苦問山人蹤跡。怎便說雲水根苗。〔末〕細聽此人言語蹊蹺。必是一位埋名隱跡的貴人。且作意問他。必然說出真情。叫左右。此人一味胡言。必是奸細。可與他紙筆。要他從實供招。是何等人。因甚至此唐突官府。若不肯供。先行責治。〔與紙筆介〕

〔烏夜啼〕〔生〕苦苦裏要問我的真消耗。我只得一筆兒從實供招也。有名字曾達在聖明朝。蒙寵眷強起應君王召。我如今也不論官僚。不計漁樵。非是我人前賣弄忒裝喬。人前賣弄忒裝喬。也只是相逢狹路難推調。莫浪言跨馬高。總不及騎驢好。小可的踏穿烟嶠。控上雲霄。〔寫供狀介〕

〔尾聲〕平生落拓真堪笑。此日疎狂罪怎逃。一筆分明盡供了。策蹇華山遙。又恐山靈惱。明日的徒步雲臺。把洞天遠。〔生送供狀末讀介〕供狀人無名氏。曾用巾拭面。御手調羹。力士脫靴。貴妃捧硯。天子殿前。尙容走馬。華陰縣裏。不許騎驢。呀。原來是李翰林大人至此。〔末跪扶生起〕下官肉眼不識神仙。死罪。死罪。下官非是別人。任華是也。先年因景慕仙才。曾

作長歌以姓名自通。未蒙見答。今日天遣這裏相會。此生大幸。〔生〕原來就是任君。向年領教長歌。詞采流溢。小生氣索。未有報章。幸會幸會。〔末〕近聞先生拜表還山。卻至此貴幹。〔生〕僕往華山訪故人元丹丘。在此經過。〔末〕華山在下官封內。丹丘子亦素往來。如今是天台隱士司馬子微招往金陵去了。〔生〕既如此。野人告別。〔末〕下界凡夫。幸遇仙客。容下官欸留數日請教。方當投轄。未便放行。〔生〕多謝。略在此領教一時。便當奉別。

〔生〕老子青牛出關。

〔末〕肉眼誤作關吏。

〔生〕豈有五千玄文。

〔末〕慚愧不能望氣。

第二十一齣 歸隱林泉

〔憶秦娥〕〔目占上〕黃花瘦。夜涼蟲語秋深後。〔占〕秋深後。藁砧得請歸來時候。

明月不長圓。君恩有時薄。早知行路難。悔不老雲壑。李郎仙才。甚得君王之寵。近聞以脫靴捧硯之故。內侍懷恨。宮妃進讒。夫君見機。力辭官爵。主上不准。詔許給假還山。想早晚到家也。我想世路從來險仄。富貴實蹈危機。世間那有不散的筵席。天子賜金。百官祖餞。蛟龍雖鎗。鸞鳳出籠。步搖。你道

好不快活哩。〔占〕我家相公雅志求仙。夫人亦清心好道。將拜天官仙秩。那堪人世官僚。就是我步搖也。思量做王母瓊華。許家雞犬。他又何羨乎。況當今狐媚盈朝。豺狼遍地。風波將作。謗讟可虞。一離螭頭。便脫虎口。豈不快哉。望夫人多釀些美酒。待相公回也。

〔黃鶯兒〕〔旦〕紅葉下江流。報砧聲萬戶秋。淮南桂樹寒猶茂。沙田蠙稠。蘆汀雁投。銀牀又是吟蛩候。〔合〕倚高樓。天邊破鏡。夫婿大刀頭。

〔前腔〕〔占〕妝匣暗塵浮。冒珠絲庭院幽。金針無語時停繡。蓴羹正收。松醪晚籊。鷓鴣絃雁柱人歸候。〔合前小生上〕帝城秋色早。歸路指湘潭。卻轉淮南路。郵亭報解驂。裏母親有人來報。爹爹回來了。〔生冠帶從人上〕

〔夜遊朝〕宮錦君恩歸白晝。離鷓行早問盟鷗。紫蟹初肥。黃花正綻。纔下馬便開醇酒。〔生〕夫人拜揖。〔旦〕相公萬福。〔小生〕爹爹。孩兒伯禽見。〔占〕老爹。步搖叩頭。〔生旦拜〕相公揮毫紆彩。名冠帝京。見幾乞身。光映雲壑。殊爲可喜。〔生〕下官出山潦草。隱志不堅。立朝散樗。助名未立。負媿良多。〔小生拜〕孩兒久離膝下。未展趨庭。今慰望雲。當圖捧日。〔生〕孩兒起來。〔占叩

頭〕老爺應聘明王。追蹤綺皓。挂冠清世。配美華陽。難得難得。〔生〕步搖起來。〔旦〕相公把立朝事體。細說一番。〔生〕容下官細陳。

〔啄木兒〕〔生〕君恩重。帝寵優。金鼎調羹。勞御手。燕天廚立拜清華。掃雲箋數奉宸遊。奈災來平地。風波驟。詩成貝錦。遭讒口。因此上。及早抽身返故丘。〔旦〕

原來如此。相公知幾引退。豈非高致。〔生〕夫人爲何棄了荆南舊宅。移住揚州。〔旦〕相公聽稟。

〔前腔〕〔旦〕黃金盡。朱戶幽。相國繁華。逝水流。去孤帆。風雨瀟湘。卜新居。煙月揚州。喜一犁綠野。春深後。鳩鳴雉。雉開千畝。好做箇。婦媿夫。畊隴頭。

〔二段子〕〔小生〕全身遠讎。喜歸來。烟波釣舟。青門故俟。鎮逍遙。山間水頭。又何須。頻待朝。天漏。白雲片片。飛巖岫。勅斷風波。不喜不憂。

〔前腔〕〔占〕郎君遠遊。這門庭。清如素秋。閒身便。抽脫羈囚。飄然自由。已呼童多釀松花酒。安排絃索。尊前侑。消受風光。且舞且謳。

〔歸朝歡〕〔合〕危途的。危途的。行難到頭。惡滋味。惡滋味。略教沾口。臨崖馬臨

崖馬絲韁早收。從今去。誰復禁尋花問柳。那管他翻雲覆雨。把冤家搆。連天匝地兵戈鬪。眞個是一往冥鴻不可求。〔生〕夫人。天台司馬眞人。同華山元丹丘道者。在金陵相候。下官歸見夫人。便欲一往叩求真訣。不知廬山李騰空尊師與夫人有信否。〔旦〕先在雲夢曾從方外女眞得一口訣。說妾身機緣還早。且待中年之後。以此不曾再訪。

〔生〕一辭薄宦返林泉。

〔旦〕便是人間散誕仙。

〔小生〕明日金陵尋道友。

〔占〕旌陽拔宅古今傳。

第二十一齣 漁陽鼙鼓

〔傳言玉女〕〔小生小旦侍臣宮女隨上小生〕寶殿金風。又見秋高氣肅。〔小旦〕朝歡暮宴。歎流光去速。〔衆〕嬌歌豔舞。恨惟日猶懷不足。〔合〕願太平天子。萬年玉燭。〔小生〕雕牀合歡衾。繡帳流蘇結。年光不待人。容華易消歇。經心春草芳。轉眼秋苔折。爲歡夜未央。青天流明月。貴妃纔賞中秋。葉眞人挈遊月宮。不覺又是重陽令節了。急景跳丸。去一日少了一日。無端煩惱何爲。流光飛電。期百年誰到百年。有限歡娛難定。月白風清。乃人生難遇之景。民康物阜。

正君王行樂之時。秋來春去。萬事無過啣杯。晝短夜長。古人所以秉燭。貴妃進酒。樂人作樂。

〔畫眉序〕金飆動華屋。西望驪山亂峯。蠹漸潭澄秋水。露涼宵燭。傾玉椀紫泛香萸。媚繡戶黃垂叢菊。〔合〕殿庭喜遇登高會。爽氣乍侵醞醖。

〔前腔〕〔小旦〕秋風響簾軸。金井梧飛候蟲促。看鴈寒箏柱。應絃商曲。釵鈿冷髻。鞞青螺。羅縠映膚鮮紅玉。〔合前〕

〔滴溜子〕〔衆〕秋色好。秋色好。澹遠山似沐。佳人好。佳人好。溜臉波可掬。鼎沸笙歌相逐。新度涼州聲遏雲。又釀蒲萄熟。風露瑤臺。莫管肌生銀粟。

〔鮑老催〕霜紅豔目。芙蓉十丈高於屋。琉璃千頃臨妝束。看僊妃倚半酣。歌綃獨。猛拚日暝蘭膏續。喧天羯鼓停絲竹。夜漏催杯行速。

〔雙聲子〕花氎上。花氎上。一捻弓彎蹴。珠簾內。珠簾內。十隊紅妝簇。賞已遍。賞已遍。恩盡沐。恩盡沐。盼紅輪西嶺。素蟾東麓。

〔尾聲〕愛煞名花與傾國。盡老今生看不足。永樂昇平醉金屋。〔探子上〕報報報。

內侍傳進去。〔小生〕宮門上既有緊急事情。着他進來。〔探子〕報子叩頭。〔小生〕報子勿忙。所說何事。〔探子〕節度使郭子儀。李光弼。差小校來報。安祿山謀反。〔小生〕他怎麼就敢謀反。〔探子〕皇上爺爺。大兵已動了。河北二十四郡。勢如破竹。已過潼關。將逼京城來了。〔小生小旦驚介〕小生報子喘息定氣。細說一番。〔探子應〕祿山憑藉恩寵。久蓄異謀。招兵買馬。鐵騎如雲。積草屯糧。金戈耀日。兵連番漢部落。王師見影遁逃。戰兼步騎梟雄。州縣望風納款。東都僭位。以誅楊氏爲名。藉口晉陽之中。國號大燕。僞署文武官爵。敢肆問鼎之奸。殺氣連天。但見男逃女竄。軍聲動地。惟聞鬼哭神號。藩鎮諸路。斂手抱頭。盡作嬰城之計。郭李二帥。摩拳擦掌。願倡討賊之師。皇上爺爺。火速降詔。命將出師。〔速下小生〕高力士。你可傳旨。即日傳位太子。駕幸西蜀。詔郭子儀。李光弼等。勤王討賊。〔小旦跪〕賤妾猥以陋軀。荷蒙皇上異寵。正謂永承清驥。不想倏遭大難。反賊既以誅楊氏爲名。罪在賤妾。敢效一死。以謝萬姓。請賜自盡。勿悞國家大事。〔小生〕彼不過借你爲兵端。卿亦何罪。誓同生死。豈忍便爲此。暫同西行。迴變有日。

〔小生〕君王樂極轉生哀。

〔小旦〕鼙鼓漁陽動地來。

明日翠華西幸去。

錦江玉壘白天開。

第二十三齣 海青死節

〔字字雙〕〔丑冠服上〕

奴家皇帝鼻豐隆。胡種拖帶奴奴做正宮。打哄三千粉

黛盡花容奪寵。一聲獅子吼河東。怕恐。奴家喚做酪酥娘。皇后衣冠龍鳳章。翠鬢飛雲光

碌秃。金蓮踏殿響砰磅。鼻梁孔似烟肉黑。挖肘窩如麝腦香。爭奈六宮常妬寵。蒲萄架下倒千場。奴

家酪酥娘。大燕皇帝安祿山正宮皇后是也。皇帝窮苦時。在營州牧羊。只奴奴一身。專房得寵。蘆葉

叢中作羅帳。草坡地裏當雕牀。好不恩愛。如今造反。做了甚麼鳥皇帝。三千粉黛。八百嬌娥。朝朝寒

食。夜夜元宵。那裏說起我來。我好氣不過。不免等他升殿坐朝時。趕出去殿上羞我一場。方消我胸

中忿氣。〔下淨安祿山侍臣宮女從上〕

〔梨花兒〕我做皇帝真受用。大碗羊肉和燒葱。三千粉黛日夜弄。嗟只不是當

時可意種。我安祿山起兵。攻破長安。做了大燕皇帝。好不快活也。〔內侍〕請皇帝爺穿袍。〔淨〕這教

做甚名色。〔侍臣〕這教做滾龍袍。〔淨穿翻身介內侍〕請問爺爺做甚麼。〔淨〕穿滾龍袍要打滾裏。

〔內侍〕這是名色。請爺爺戴冠。〔淨〕教做甚麼名色。〔內侍〕這是冲天冠。〔淨戴作頭冲天介內侍〕請問爺爺。這是做甚麼。〔淨〕戴冲天冠。頭要冲天。〔內侍笑〕這也是名色。〔淨怒介〕狗才。早又不說。纔說個名色。〔淨指介〕這是甚麼東西。〔內侍〕這是龍牀。〔淨睡身內侍扶起介〕皇帝爺爺怎麼就睡倒。〔淨〕你說是龍牀。寡人要睡。〔內侍又笑〕這是皇帝爺爺坐了朝見百官的。怎麼好睡。〔淨〕可惡。難道我都不是。〔小淨扮陳希烈上〕宰相陳希烈。帶領文武兩班。朝見皇帝爺爺。萬歲。萬歲。萬歲。〔末扮雷海青上〕太常樂官雷海青。帶領樂工一班。朝見皇帝爺爺。萬歲。萬歲。萬歲。〔淨〕陳希烈。寡人做皇帝也做得過麼。〔小淨〕陛下龍鳳之姿。天日之表。數應君臨萬國。〔淨〕寡人初登寶位。陳希烈你也該說些好話兒頌聖。我這里重重賞你。寡人既是龍鳳之姿。天日之表。你看我鼻準如何。〔小淨〕陛下鼻準高大。這是漢高祖隆準龍顏。又道是高帝子孫盡龍種。〔淨笑介〕好好。你再頌我的大肚腹如何。〔小淨〕陛下天生大肚。這是聖天子洪福齊天。又道是天子以四海爲肚內。〔淨大笑〕一發說得好。〔丑上〕說得好。說得好。教你一場閒氣惱。〔淨忙〕文武百官在此朝見。皇后怎麼好出來。你看花班班的面孔。像甚麼模樣。〔丑〕我正要趁文武百官俱在此。告訴一場。這臊奴未做皇帝

時在營州替人牧羊。我是他結髮夫妻。牧羊時蘆葉叢中做了羅帳。草坡地裏當了雕牀。好不恩愛哩。如今做了甚麼鳥皇帝。終日搜了三宮六院衆美人。把我撇在腦背後。你們說情理。使得使不得。

〔末〕這是皇帝爺忒薄情了些。〔丑〕好。這個官兒公道。你替我出口氣兒。〔下淨〕怎麼好。我家家法還不停當。丞相你怎麼替我一整頓。〔小淨〕外庭之事。臣敢主張。宮闈之內。還是陛下自主。〔淨〕分付光祿進酒。太常演樂。待寡人取醉一番。

〔清江引〕大燕皇帝真瀟灑。開宴朝初罷。佳人碧玉釵。美酒黃金罍。只可恨母夜叉來倒了蒲萄架。〔末將琵琶撞淨面落齒介〕你這臊羯狗。唐天子有甚麼虧負你。你敢造反僭位。我爲大唐供應。豈服侍你這臊羯狗。〔淨大怒作落齒聲〕這厮無禮。撞壞了皇帝的牙門。叫內侍火速綁出去劓了。〔衆應介末〕筑裏藏鉛終不濟。圖中懷刃未爲奇。首倡大義伸臣節。一擊何如博浪椎。〔綁下淨〕內侍快將酒來。替寡人止痛。〔丑內叫〕好好好。這官兒畢竟替我出口氣了。〔淨作落齒唱〕

〔前腔〕殿中作樂真堪耍。災禍從天下。你落我一門牙。我賞你千刀劓。也只恐

早晚間。別人輪到我。陳希烈。方纔這厮無禮。落我門牙。你怎麼頌聖。〔小淨〕臣啓陛下。這叫做主德無牙。又道是賢者而後落齒。〔淨笑〕一發好。一發好。內侍快欵賞丞相金一車。銀一車。綵段百疋。

〔淨〕百二山河帝業成。

三千粉黛列雲屏。

羣臣獻諛如流水。

不及梨園雷海青。

第二十四齣 訪道仙翁

〔外扮司馬子微末扮元丹丘上外〕萬戶傷心泣野燐。衣冠無處避胡塵。〔末〕這番跳出陰陽外。不用桃源學避秦。〔外〕丹丘子。今日李太白來訪你我。可知道了麼。〔末〕貧道也知了。〔外〕太白高才。此來至心求道。我須將丹訣授他。只是此人未盡世緣。還遭國難。既得真訣。涉世也無妨。〔末〕太白初出長安。便走華山。遠訪貧道。真一片有心人。真師授以大道宜矣。〔生道扮上〕一脫朝衣還故山。便從雲外叩玄關。金陵地肺藏勾曲。茅氏三峯積翠間。李白甫到家。見了夫人。輒來金陵。訪司馬真人元丹丘先生。聞二公在荊山華陽洞口。來到這裏就是。詢問山中人云。前面一茅菴。乃二公隱居。

之所不免叩門則個。〔小丑扮道童上〕雲冷青牛出。山深白鹿眠。仙童無一事。石上看流泉。門外何人。〔生〕請問童子。此間是司馬真人隱居麼。〔小丑〕正是。〔生〕乞煩通報。說故人李白相訪。〔小丑稟介末外〕快請進來。〔生〕司馬尊師拜揖。〔外〕太白稽首。〔生〕元先生拜揖。〔末〕太白稽首。〔生〕弟子隱志不堅。爲世塵牽引。有違明訓。詩酒疎狂。竟招釁尤。被讒去國。進退失據。不任慚惶。〔外〕貧道向已言之。此乃大數前定。非關人事。浮雲幻迹。不礙修真。〔生〕白一出都門。便走華山奉訪元先生。因過華陰縣門。得遇任令。說先生方遊金陵。惆悵而返。幸來此處。得挹高風。〔末〕有勞光顧。有失奉迓。適間與司馬真人言。足下真有心人也。〔生〕向蒙尊師許授道要。面訂後期。今弟子已脫世塵。遊身物外。入道此其時矣。望尊師慨然指引。〔外〕君之學道。故有宿緣。不敢祕吝。君可清齋三日。焚香拜授。但君向後還有世網相牽。不能便脫。更須狺狂混俗。庶可自全。〔生〕便是。二位師父想已知道。紉自弟子出都。安祿山反叛。攻破長安。僭號大燕皇帝。太上皇西幸成都。新天子卽位靈武。鸞輿震驚。中原板蕩。弟子雖竄身物外。曾蒙上皇寵眷厚恩。義不忘君。無能匡救。敢問尊師。弟子此後進退禍福如何。伏惟見教。〔外〕正爲國家多難。羅網難逃。混迹和光。斯爲良策。懷忠秉節。保無

大災機緣一來。終證仙果。〔生〕多謝大教。弟子敬當書紳。

〔尾犯序〕〔外〕京洛正胡塵。萬戶傷心。六飛宵遁。佞幸從邪。精忠先隕。豪俊辭美爵。雖還草野。荷榮光。怎負君恩。好辦取和光混迹。臨難顯忠臣。

〔前腔〕〔末〕物外有閒身。鼎沸山河。高臥自穩。喜得君來。向桃源問津。肥遯且相共調猿放鶴。還究竟金丹玄牝。況有這明師指授。片語便通神。

〔前腔〕〔生〕長嘯出風塵。遠禍潛形。免罹鋒刃。杖策名山。遠尋師采真。無吝許清齋焚香拜授。入藥鏡玉清心印。從此去潛修密鍊。迴合葆靈根。〔丑扮使者上〕

稟上翰林李爺。小人是當塗縣令李爺差人。縣令爺是李爺族父。聞李爺辭官出京。暫寓揚州。當塗與揚州密邇。彼處有采石之勝。可以遊覽。方今胡虜猖獗。中原擾亂。彼處僻壤。亦可避兵。李爺故友崔宗之相公亦在彼處。縣令爺差小人專請李爺往會。有書在此。〔生看介〕知道了。我與族父爺相別多年。正思一會。你先回去。我隨後就來。〔外〕分付道童。使者遠來。裏面可整素齋相待。〔丑應同下生〕清齋三日。授道之後。弟子當一往當塗。看族父縣令李陽冰。〔外〕你的因緣。正在彼處。須索

要往。

〔外〕多君北面訪烟蘿。

〔末〕須識人生似擲梭。

〔外〕誰忍相逢又相別。

也知采石有風波。

第二十五齣 永王設計

〔梁州令〕〔丑扮永王上〕江淮鐵騎起天潢。喜士馬精強。朱旗一指海波揚。提虎將。搜豹略。舉龍驤。寡人永王璘是也。因丁家難。久蓄異謀。起兵荊州。長驅海甸。與安祿山犄角。約

中分南北。眼見得大業有幾分了。幕中只少一位軍師主謀。惟有翰林供奉李白。天才豪邁。文武兼資。近聞得他辭官東還揚州。往來金陵太平之間。不免差一員能幹的裨將。帶領精勇軍校數十人。扮作白衣。到那所在擒來。若得他助寡人。何憂大事不成。裨將那裏。〔淨上〕裨將叩頭。大王爺千歲。〔丑〕我聞翰林供奉李白。打從金陵往太平一路。你可帶領壯士數十人扮做白衣。隨路打聽。擒拿前來。我這裏重重有賞。〔應下〕

〔四邊靜〕〔丑〕長安宮闕披榛莽。烟塵蔽天壤。王氣屬荆襄。山河入吾掌。〔合〕

雄圖未張。高人夢想。一網得冥鴻。三軍有殊賞。

〔前腔〕〔淨〕掃清江漢天重朗。神州應如響。歷數在君王。丕基造翻掌。〔合前〕

〔丑〕欲包六合網英豪。

只恐冥鴻惜羽毛。

〔淨〕但得仙才歸幕下。

〔丑〕管教大業屬吾曹。

第二十六齣 泛舟采石

〔遶地遊〕〔貼小旦扮妓女丑從人上貼〕青樓薄命。鎮日羞粧鏡。慕仙才遠離塵境。

〔小旦〕標格霞鮮。風華日暎。喜追隨翱翔玉京。〔貼〕奴家金陵妓女。冷飛卿是也。〔小旦〕

奴家金陵妓女。宋秦淮是也。我兩人身落妓館。心厭風塵。雅慕才華。酷好書史。因慕李謫仙從金陵

到當塗相訪。今日謫仙同左司郎中崔宗之老爺泛舟采石。邀我兩人。不免去走一遭。〔行介貼〕晝

鷓臨清渚。輕鷗起素濤。〔小旦〕乘舟有二女。人道漢江臯。〔丑〕此間已是江干。老爺船泊在此。

〔生官帶穿官錦袍從人上〕

〔引〕扁舟乘興。日落江山勝。載佳人凌波照影。〔小生上〕牛渚雲颿。鷓夷烟艇。送

美酒絃歌聲競。〔淨上〕稟老爺。當塗縣老爺送鼓吹一部。酒肴四席。〔生〕多謝老爺。〔應下〕崔兄

采石泛舟。已約金陵二姬。想必來也。〔丑〕稟老爺。冷宋二姬已到江邊了。〔生〕快請上船。〔旦登

舟見介生〕分付稍水開船。〔旦送酒介〕

〔梁州序〕〔生〕菰雲開霽。蘋風薦冷。一碧微茫萬頃。玉簫金管。長天月落沙明。

只見晚山如黛。遠水拖藍。平展玻璃鏡。隨流飛。一棹畫中行。夾岸峯巒箇箇迎。

〔合〕清瀨轉。紅妝暎。鴛鴦瀾瀾驚難定。論泛賞此回勝。

〔前腔〕〔小生〕瑤空入暮。銀蟾破暝。天上樓船坐迥。蒹葭蕭颯。冷風徐度歌聲。

只見帆低鶴鶴。遂起魚龍。潭影涵深靚。錦袍仙子降下神京。兩腋飄飄羽翼輕。

〔合前〕

〔前腔〕〔旦〕曲闌珊歌扇初停。影踟躕舞裙重整。羨驚鴻出浦。落鴈投汀。眞

箇是采珠洛水。解珮江皋。神女羞堪並。何當塵土質。伴僊卿。疑踏金鰲背上行。

〔合前丑〕稟上爺。老爺身着官錦袍。頭戴華陽巾。仙風道氣。軒軒霞舉。兩岸人觀者如堵。不下千萬。

〔小生笑介〕太白可不道看殺衛玠。〔生笑〕杜子美有詩云。宗之瀟灑美少年。看殺衛玠。還當屬足下耳。〔小生〕還是看二位美人。〔二旦〕我二人因慕李相公。遠從金陵來訪。這兩岸觀者。豈不是慕着天上謫仙人。〔小生〕二位美人卻說得好。

〔前腔〕〔二生〕二神姬鼓瑟湘靈。兩仙郎吹笙緱嶺。恁光生杜若。香掩芳蘅。也何妨縱觀都市。人隘耶溪。千古風流盛。遙空凝紺。碧月華生。紅閣含烟。夜氣清。〔合前〕

〔節節高〕僊槎接漢平。傍疎星。晚天如洗。琉黎淨。銀箏冷。珠斗橫。金尊罄。羅衣不奈江風勁。玉人寒粟膚逾瑩。〔合〕便欲同爲上清遊。白鸞黃鶴堪乘興。〔生〕崔兄二姬。你看水中月色更佳。山人醉矣。便欲騎長鯨。捉水月下。與琴高赤鯉同徜徉也。〔小生〕水晶宮雖好。怎知上界玉樓金闕。太白當作天仙。豈遊水府。〔二旦〕相公若乘醉從龍女。拾明珠。難爲姊妹二人遠來之意了。

〔前腔〕波間月更明。跨長鯨。捉來兔魄。冰壺曠。龍笙應。鼉鼓鳴。蛟宮靜。懷沙肯

作靈均醒。廣寒還許仙音聽。〔合前〕

〔尾聲〕天狼照夜妖氛盛。落江湖且占客星。誰識磯頭垂釣情。〔生〕江上夜闌分

付船上迴舟也罷。崔兄二姬。卑人賤荆。與廬山女道士李騰空有方外之約。僕亦有舊居在彼。欲一往相訪。明當奉別也。〔二旦〕賤妾二人此來。專爲慕愛謫仙。相公旣往匡廬。二妾亦還金陵罷了。

〔生〕多謝二姬遠顧。何以克當。卑人有皇上所賜綵段。貴妃所賜宮羅。當以奉贈。〔二旦〕多謝。

〔生〕木蘭之楫沙棠舟。〔小生〕玉簫金管坐兩頭。

〔二旦〕功名富貴若長在。〔合〕漢水亦應西北流。

第二十七齣 誓死不從

〔生上從人隨上〕清都在人境。飛仙不難遇。欲尋匡廬峯。西泛九江去。來到此處。已是江邊了。從人可叫江船來。〔丑叫介淨末外小生扮江船上〕乘舟九江水。不是九江人。結就青絲網。中原收鳳麟。客官要往那裏去的。〔丑〕我家相公僱船。要往豫章匡廬去。〔淨〕曉得。請你家相公上我船來。

〔生上船介丑〕往匡廬行上水。怎麼向下水行。〔淨〕小將是永王部下裨將。永王差小將迎請李爺。

昨在采石。聞得李爺要往九江來。假扮作稍水在此相候。俺永王爺從荊州下來。已駐師江上。只在前面。請李爺就去相見。〔生〕呀。原來落在賊人計中。永王已反叛朝廷。得罪祖宗社稷。我怎麼肯相見他。〔淨〕李爺少不得要相見的。〔急搖船介〕不覺已到大王駐師之處了。〔丑隨將校上〕姬文恢洪基。先羅涓濱叟。但得王佐才。大業在吾手。〔淨〕稟大王爺。小將設計。已獲供奉李爺。見在舟中。〔丑〕好好。快請上岸來相見。〔衆扶生上岸相見生長揖介丑〕久慕高名。形於夢想。幸得先生到此。寡人如魚之得水。鳥之有羽。願築壇北面。拜先生爲軍師。分付從人。整極大筵席。用全部鼓樂。黃金千兩。綵段百端。禮待軍師。〔生〕大王差矣。大王與聖天子。貴則藩王。親則肺腑。丁此胡馬縱橫。王室多難。鑾輿播越。黎庶逃亡。大王正宜戮力勤王。勒兵討賊。勳名垂天壤之表。宗藩有磐石之安。豈不休美。奈何勾連叛臣。反戈內向。妄窺神器。自取誅夷。我李白素懷忠義。身列清華。受盡上皇特達之知。今天子生成之賜。常思捐糜七尺。以報國恩。豈從汝反乎。〔丑〕先生所見非是。寡人太上愛子。地尊禮絕。靈武之事。未奉詔勅。擅立爲主。天下豈有無父之國哉。寡人仗義起兵。何得稱反。先生從我。建不世之功。有何不可。〔生〕太上皇聞變之日。卽下詔傳位太子。以郭子儀爲兵馬大元帥。出

師討賊。此中外所盡聞。靈武之事。何云擅立。神器有歸。名分已定。相從叛逆。非反而何。〔丑大怒介〕
這斷無禮。敢爾狂言相抗。汝豈謂吾劍不利耶。〔生〕李白非懼死之人。不必以刀刃相恐。大王。你聽
我道來。

〔石榴花〕天潢貴胄。何事逞狂圖。忘帝室。搆胡奴。不思九廟展匡扶。怎猖獗自
取誅鋤。鴟張鬼呼。亮皇天不祐神靈怒。我懷忠久。矢肝腸。肯從邪。暫保頭顱。

〔前腔〕〔丑〕龍輿板蕩。唐室正瞻烏。憑帝子。定皇都。手提精銳控江湖。慕高人
助我馳驅。狂言抗吾。料應伊一命如朝露。說甚麼汗簡馨香。且先交血刃模糊。

〔生〕大王。太白斷不從逆。願伏斧鑕。早賜處分。〔丑〕你不肯從我。少不得是死。叫將校把這斷去了
衣冠。牢固監禁。〔衆諾下〕

〔丑〕軍謀何故不相從。

〔生〕願捨頭顱飲劍鋒。

〔丑〕一入牢籠無羽翼。

青霜寶劍泣芙蓉。

第二十八齣 展叟單騎

〔女冠子〕〔旦貼上旦〕歸裝纔解。又向天涯。郎君瀟灑。非關薄倖。棲心物外。兵戈連四海。還愁路阻江淮。〔貼〕萍蹤何在。隔盈盈衣帶。目盼斷。銀河一派。〔旦〕步搖相公纔到家。就往金陵訪道。安祿山僧據長安。永王璘又作逆荆襄。近日聞得永王提兵東下。將窺江淮。人情恟懼。相公又不在家。如何是好。

〔金索挂梧桐〕兵戈動楚淮。烽火連秦塞。萬乘流離。四海皆奔潰。仙郎訪秣陵。叩仙臺。阻絕危途斷往來。縱然雲水風塵外。還慮才名釀禍胎。愁無奈。蘭香并美世人猜。怎能勾深掩蒿萊。相守裙釵。獨往清涼界。

〔前腔〕〔貼〕華陰洞已開。司馬真人在。世路風波不到松風籟。桃源別一村。許誰來。路截漁郎花下迴。山中那得逢災害。只舉玻璃沉湓杯。停針待。蕭條繡戶網塵埃。一樣的月地雲階。香室清齋。償盡淒涼債。〔外扮展靈旗上〕才名果累人。風塵

到林莽。鴻飛雖冥冥。其奈通天網。報知夫人。老爺不好了。〔旦驚介〕甚麼事。老蒼頭你快說。〔外〕老爺從金陵往當塗。訪族父縣令李爺。泛舟采石。即往匡廬。要替夫人去叩李騰空仙師。被永王璘差

將士在江上劫了去。要逼我老爺做軍師謀主。俺老爺抗節不從。被他剝去衣冠。囚禁在獄。性命尚不可知。〔旦哭介〕原來我家相公遭了這場大禍。兀的不是痛殺我也。〔外貼〕夫人且自寬解。吉人天相。老爺必有個脫禍的日子。

〔三換頭〕〔旦〕獨行江介。誰想條罹災害。他懷忠負義。堂堂王佐才。焉肯助亂階。這的是畢竟被名爲禍媒。抗節王門也。微軀難自愛。牢落蘇卿。問何日羝羊生乳來。〔哭介外貼〕夫人且自寬懷。

〔前腔〕〔外〕連天霧埋。沿途蜂虿。行逢禍也。寄余生虎豺。難免目下災。這其間一定有神明救解。麟鳳寧菹醢。孤桐不作灰。奉勸娘行。且自寬心莫浪哀。〔小

生上〕母親爲何事在此啼哭。〔旦〕孩兒。你父親九江邊被永王璘劫去。逼他執逆。執意不從。被賊拘囚了。〔小生〕呀。原來父親有難。兀的不痛殺我也。〔哭倒介二旦〕甦醒甦醒。

〔東甌令〕〔小生〕心驚駭。淚盈腮。誰道仙遊驀遇災。孤忠肯把平生壞。怎得離麟齟。願皇天鑒祐。脫非災。一掃淨氛埃。

〔前腔〕〔旦〕遭桁桎。作囚纍。命屬懸絲。苦怎捱。鶴鴛強逐。鷓鴣類。難免廝禁害。想全軀完節兩難裁。提起轉堪哀。展靈旗過來。你雖是廝養之輩。我看你英風蓋世。義氣超羣。你一向受先老爺撫養之恩。便是我夫婦並不曾慢你。煩你冒犯干戈。前往江干。打聽老爺消息。你肯去麼。〔外〕念小人夙負義氣。且懷感先老爺與小姐舊恩。怎敢辭干戈雜亂。臨難顧身。小人年紀雖頗老大。氣蓋一世。勇敵萬夫。何怕賊徒猖獗。便當奮身前往。探取老爺消息。〔旦小生貼〕如此多感你深情。我母子當下拜送你。〔拜介外〕怎麼敢當夫人公子下禮。可不折殺老奴也。

〔劉潑帽〕東君運蹇遭顛沛。願捐軀虎穴探來。英雄抖搜平生概。定要救主回。那怕豺狼隊。

〔前腔〕〔旦小生〕忠賢失路真狼狽。謝伊家慷慨胸懷。兵戈直犯江干寨。提起網羅災。義氣千秋在。〔外〕老奴拜別夫人公子。單身就去了。〔旦〕多謝你。路上小心在意者。

〔旦〕忠良何事受災屯。〔小生〕義士臨危不顧身。

直犯兵戈探虎穴。崔家磨勒未爲神。

第二十九齣 展武相逢

〔夜遊朝〕〔小外武謬騎馬上〕俠氣肯居荆聶下。湛寒光劍吐蓮花。遍地烽狼。極天戎馬。待救出高人縲綬。自家武十七郎。向年邂逅李太白。輒以千金爲贈。欲報舊恩。長懷高義。今太白被永王璘這厮劫拏。迫脅助亂。太白抗節不從。將他囚禁江上。永王已提兵犯廣陵。留下三千人守寨。我欲單騎奪取。猶恐衆寡不敵。不免奮勇向前則個。〔外展靈旗騎馬上〕

〔霜天曉角〕青絲絡馬。寶劍金裝靶。欲摧堅壘奪高牙。神武何論衆寡。自家展

靈旗。挺身救主。來到江邊。已近永王駐師之所了。〔小外〕騎馬來者何人。〔外〕汝是何人。莫非永王

部下將帥麼。〔小外〕胡說。吾乃來擒永王的。怎麼說是他的部將。〔外〕原來如此。俺這裏與你有話

講。請各下馬。〔下馬介〕足下高姓大名。怎麼說要擒永王。〔小外〕某家姓武名謬。排行十七。東吳人

氏。向年邂逅翰林供奉李太白於揚州。立談之頃。輒蒙此公贈以千金。常懷高義。如今聞此公被永

王這厮囚禁。命在呼吸。某今仗劍欲救出此公。永王已提大兵向廣陵。留下三千人守江上大寨。某

家待單騎殺入也。〔外〕好漢好漢。在下非別。就是李爺家中老蒼頭展靈旗。聞家爺遭難。亦是單騎

來救主公。幸遇義士。協力同行。可喜可喜。〔小外〕久聞公展大名。神力義勇。大功必成矣。〔外〕就此同往。〔上馬介〕

〔點絳脣〕〔外小外〕四海無家。半生豪俠。心曩大。誰敢攔遮。提一劍。行天下。

〔混江龍〕探丸走馬。五陵年少。盡聞咱。斬頭顱。報怨都城。把碑礫。使酒侯家。赤閃閃。神騶馳電甲。白泠泠。七首泣霜花。恨不得。西征突厥。東蕩勾驪。名姓兒。送入在麒麟畫。按不定。雄心磊塊。銷不盡。俠骨槎枒。

〔油葫蘆〕〔外〕聽說英雄同調者。猛回頭。暗自嗟。俺也曾開天門。驚虎豹。受波查。喝一聲。震豐隆。大地雷霆啞。掂一脚。踢崑崙。斗杓。星河瀉。輕七尺。風塵裏。秉丹心。恩主家。且寂寂埋光。誰待要圖王霸。今日裏。逞威風。仗鏃鏑。

〔天下樂〕〔小外〕正遇着。南北干戈亂似麻。把豪傑。擗捨。神龍遭兇冒。忍交那。騶虞磨虎牙。密匝匝。羅網怎逃。烈錚錚。刀斧可加。急忙裏。匹馬單身去救他。

〔那吒令〕〔外〕犯縱橫。戎馬江天急暮笳。想孤臣。縲紲浮生。逐斷楂。要忠良助。

邪。何分龍與蛇。總堪嗟。幸銜恩千里來豪傑。雙神劍霹靂轟車。

〔寄生草〕〔合〕馳輕騎。風何疾。望軍營。路不賒。流星一道追寒月。青鋒兩口明殘雪。文星正朗妖氛滅。料此去必脫晏嬰囚。待歸來不辱蘇卿節。〔同下〕

第二十齣 救主出圍

〔傳言玉女〕〔生因服丑未扮將校押上生〕江上囚羈。困殺我英雄豪氣。看天陰愁雲壓壘。鸞刀在頸。肯輕落英雄眼淚。想吾家飛將。插天雙翅。北闕辭漢署。南冠作楚囚。豈無劍仙術。腰下失吳鉤。下官李白。因執節不從。永王助亂。被他拘囚在此。只是家鄉咫尺。音信不通。未知我荆妻安否。若何。聞永王提兵向廣陵。想必攻城。官民震動。我家眷存亡。尚不可保。如之奈何。想幼慕兵符。頗精劍術。伏路逃難。何怕戍卒。但手足拘繫。不得展舒。想終無能脫此羅網矣。

〔南畫眉序〕京國歎流離。萬乘蒙塵。百官繫念。孤臣江上亦被羈。拚七尺命若浮雲。保一點心懸天日。〔合〕繡旗畫戟紛成列。請看營門嚴衛。〔小外長鎗外大

刀騎馬殺入營門介〕

〔北醉花陰〕〔外小外〕結陣屯營傍江水。直殺入旌旗盡靡。千騎亂。六軍馳。似蜀將軍破重圍。如入無人地。特赤手。救顛危。拔寶劍。豐城獄底。〔淨扮守將帶戍卒忙

上〕分付大小三軍。有兩員驍將。不知打從何來。殺入營門。我這裏一齊奮勇。〔截殺戰介〕

〔南滴溜子〕外小外軍聲亂。軍聲亂。驚雷迅疾。潮聲沸。潮聲沸。助咱殺氣似一

對天神下世。空中丁甲隨風雲震。這敗卒殘兵。么麼怎敵。〔淨戍卒敗走下丑帶

戍卒忙上〕分付大小三軍。這劫營賊子。不過二人。後面絕無救兵。俺這裏不須驚怕。用心圍住活

擒。拿此二賊便了。

〔北刮地風〕外小外呀。你道我入重圍。只兩個兒。怎知有八面神威。把荒營直踹爲平地。一霎裏刁斗無聲。不移時旌麾奪氣。俺只見血肉淋漓。〔丑〕我且問你。

你兩人是何處將帥。何人差使。陡然殺入我營。何不留下姓名。〔外小外〕你問我姓怎的名。

怎的。奉天符上帝。可知道藥叉神摩利支。只待要掃魔軍。拔救瘡痍。〔丑戰敗外

小外擒丑介小外〕李供奉老爺。被永王這厮囚禁在那裏。你快說。〔丑〕稟上二位將軍。李老爺監

禁在後營木柵之內。〔外小外〕你這厮引我們去。〔丑引外小外〕俺們砍開木柵，救出李爺。〔生上〕何人砍開柵門呀？原來是二位。此間有三千人牢守營寨，你兩人怎麼殺得進來。〔外小外〕我兩人拚死，萬夫難敵。〔內吶喊介〕叫分付大小三軍，二賊已殺入後營，我們結陣把定前營，一齊併力，定要生擒二賊，不許放走了。〔外小外〕外面想已聚集大軍圍住，我兩人須要奮勇殺將出去。就將李爺鎖扭盡行扯斷，帶得寶劍在此。李爺，你素精劍術，我兩人用刀鎗，李爺運劍，一齊殺將出去。〔淨帶兵混戰介〕淨敗下末，又帶卒混戰敗下小外，且喜已殺出營門來也。

〔南鮑老催〕〔合〕重圍殺出頭顱，腥逐劍光泣。江天慘澹寒雲密，羨追風騎，偃月刀，摩空翅。蛟龍掣鎖騰驤起，鶴鷺脫網翱翔逝。空復使牢籠計。

〔南雙聲子〕遭拘繫，遭拘繫，已拚死豺狼隊，相扶掖，相扶掖，多感得英雄輩。真意氣，真意氣，伸大義，伸大義，恁留名青史，爭光白日。

〔尾聲〕看取孤忠照天地，這報主酬恩千古事。方顯得男兒不浪死。〔生〕多謝二位，挺身救難，如今往那裏去好。〔外〕稟上老爺，永王兵犯廣陵，夫人在城中驚懼，我們急往彼處救。

取夫人。〔生〕這說得是。

〔生〕桓桓二義士。

破賊救重圍。

〔小外〕還解家門難。

江淮正鼓鼙。

第二十一齣 難中相會

〔旦小生貼急走上旦〕兵馬破城圍。紅顏逐路塵。寧爲太平犬。莫作離亂人。永王兵馬攻破揚州城。大兵入城。男女四散逃走。妾身與孩兒步搖扮作道姑。將泥垢妝面。隨着逃難男女。混走出城。且喜已脫虎口。只是投奔無門。遊兵滿路。怎生是好。孩兒步搖。我和你信步奔走。再作道理。

〔水底魚〕破碎山河。家門禍事多。夫君蒙難。妾又走兵戈。孩兒你爹爹被囚俘賊中。未知存亡下落。今我與你又被兵火逃亡。好苦好苦。夫君蒙難。妾又走兵戈。〔下生外小外急上〕

〔前腔〕擊鼓鳴鑼。豺狼出沒多。廣陵城陷。黎庶盡奔波。〔生〕一路行來。聞得揚州城已被永王璘這厮攻破了。怎麼是好。〔外小外〕且到城中。再作區處。廣陵城陷。黎庶盡奔波。

〔下淨扮永王遊將帶兵上〕俺永王爺入揚州城。城中男女四散逃竄。吾奉大王爺命巡遊搜捕。軍士們須要用心四處追拏。驅逐入城。〔衆應〕

〔前腔〕躍馬橫戈。霜蹄疾似梭。長驅士女。四野盡張羅。軍士們。前面有一起男女逃走。疾速趕上者。長驅士女。四野盡張羅。下旦小生貼上。

〔前腔〕蓮步難那。殘生逐逝波。流星鐵騎。塵土暗平坡。〔旦〕步搖後面軍馬看看追近。我和你鞋弓襪小。怎生逃走得脫。不免在此坐地。憑他拏住。只是拚死罷了。〔貼〕夫人。賊徒是快馬追來。插翅也難逃了。流星鐵騎。塵土暗平坡。淨帶卒上。坡子地上。有兩個婦人。一個男子。拏住。〔拏介生外小外上〕二位。這前面被賊兵拏住的婦人。好像我家山妻。看介。正是正

是我三人奮勇殺上去。前面賊將好好離鞍下馬。送還官員家眷。若稍遲延。截爲兩段。〔淨〕這是那裏突出的草寇。敢犯吾鋒。〔大戰介淨敗被外斬首賊兵逃散生扶旦對哭生〕原來果然是夫人。我

三人來得卻好。〔旦〕天遣相公們。不先不後。救取妾身。稍遲一步。已死在賊手矣。小生爹爹孩兒

伯禽拜揖。〔生〕夫人孩兒。見了大恩人武十七郎。〔見介外〕夫人。老蒼頭靈旗叩首。〔旦〕生受你。

〔貼〕老爺。婢子步搖叩首。〔生〕起來。〔旦〕相公。你陷身賊營。怎生得脫。生虧了二位。夫人聽我道。
〔懶畫眉〕永王窺鼎動干戈。篡取忠良入網羅。軍麾要我贊謀謨。我忠貞怎把
英風挫。甘受羈囚任坎坷。〔旦〕後來怎麼得脫。

〔前腔〕〔生〕武郎俠氣勝荆軻。展叟威名磨勒過。兩人竝馬奮抽戈。鞭稍一指
營門破。救我纍臣唱凱歌。〔旦〕原來如此。武君乃大恩人。妾當與孩兒爲相公拜謝。〔同拜介

〔旦〕妾夫荷君活命之恩。我母子不勝感刻。小外〕小人受李公大恩。殺身難報。〔旦〕老蒼頭你挺
身前往。要救相公。乃能與武君協力。竟成大功。我母子也當拜謝你大恩。〔同小生拜介外忙答叩
首介〕捐生報主。老奴義所當然。何敢勞夫人公子行此大禮。真個折殺老奴也。〔生〕揚州殘破。勢
不可再留。我和夫人不免暫到匡廬山中。依李騰空仙師避亂。待天下平靜。然後圖歸。〔旦〕相公。只
得如此。一憑你主意便了。〔生〕武兄。我蒙你救難。此恩沒世難忘。我意欲屈兄回到匡廬山中隱居。
你意下如何。小外〕君侯甫脫大難。小子相應隨侍同行。奈我妻子在東吳。與廣陵只一江之隔。未
免震驚。昔聞恩人有難。挺身而來。今當奉別君侯。回去一看妻子。〔生〕如此難以強留。只是卑人何

忍與兄分別。〔小外〕慙回一看家中。後會不遠。就此拜別。〔生泣拜介小外同拜〕軍中幸脫英雄難。
海內長留義俠名。〔下生〕展靈旗你可僱了江船。即往九江去罷。〔外應〕

〔香柳娘〕〔合〕這亂離奈何。這亂離奈何。無方可躲。思量萬乘皆遷播。望潯陽
素波。望潯陽素波。靈岳鬱嵯峨。仙人正高臥。傍青山結窩。傍青山結窩。滅跡烟
蘿。永無災禍。〔下〕

第三十二齣 官兵大捷

〔鳳皇閣〕〔小外扮郭子儀末李光弼將士隨上小外〕宮牆禾黍。龍輦間關。西蜀路。孤臣

飲泣戒師徒。誓掃胡塵清禁籙。〔末〕威名遠著寒賊膽。先聲廟謨。〔小外〕天子西

征蜀道難。胡塵一望滿長安。〔末〕王師大舉清河洛。定見都人泣漢官。〔小外〕下官兵馬大元帥郭

子儀是也。〔末〕下官兵馬副元帥李光弼是也。〔小外〕副元帥。祿山僭號。天子播遷。故國黍離。滿目

京塵。胡馬秋槐。葉落傷心。凝碧管弦。驚魂九廟。廢伏臘之藻蘋。掩面六宮。爲胡奴而膏沐。君父臥薪

嘗膽之日。臣子枕戈泣血之秋。下官與副元帥同受國恩。義均討賊。合當身先士卒。共建忠謀。誓滅

匈奴志不返顧。請計將安出。〔末〕大元帥。賊衆雖強。然惟苟圖目前。都無深謀遠慮。奸邪淫穢。四方之蓄忿已深。暴虐貪殘。人心之思唐益切。今觀士馬之精銳。加以元帥之雄威。賊不足平也。〔小外〕副元帥所見極是。全仗足下智勇。下官何能之有。愚意祿山方恣荒淫。將士亦習奢侈。賊氣旣盈。其強易弱。須多用間諜。益張疑兵。佯北以驕其志。設伏以擣其虛。破賊必矣。〔末〕大元帥妙算。深合機宜。可賀可賀。〔貼扮探子上〕軍聲動京洛。殺氣滿河湟。報報報。安祿山差大將史思明。領賊兵十萬。長驅渡河。前來迎敵。望爺速起大兵征進。〔外〕知道了。探子可再去打探回報。〔貼應小外〕分付大小三軍。分兵伏前面山下叢簿之處。吾與副元帥親統大兵去戰。佯敗奔走。賊必乘勢追逐。度至設伏之所。待賊兵得半。從胸背突出截殺。吾勒轉兵馬併力。可一舉盡殲。俱要奮勇當先。退縮不進。及專擅不用命者斬。〔衆應外〕就此起兵。

〔四邊靜〕〔外末〕王師銳氣吞強敵。神機鬼難測。一戰落旄頭。黃河血流赤。〔合〕掃清宮掖。救寧社稷。太上奉迴鑾。中興紀勳績。〔下淨扮史思明領衆上〕吾乃大燕元

帥史思明是也。奉皇帝命。統兵來殺唐兵。大小三軍奮力向前。論功行賞。〔衆諾〕

〔前腔〕〔淨〕大燕國運方隆赫。神州入圖籍。灰燼豈重燃。尸居但餘息。〔合〕兵如虎翼。形分卵石。斬將復搴旗。邊烽霎時熄。〔小外末領衆打話介小外末兵佯敗走下

淨大呼〕唐兵大敗走了。分付衆軍。一齊努力追殺。須教他片甲不存。全軍盡沒。〔衆應追介小外

末領衆走立定介小外〕分付衆軍。賊兵已入吾計中。可速放炮揚旗。伏兵齊起。〔衆應伏兵起兩

軍夾攻淨兵大敗淨被斬殺小外〕賊將已斬。餘衆或斬或降。分付大小三軍乘勝長驅。攻破長安。

生擒安祿山。恢復大唐者。〔衆應報子上〕報報報。安祿山被賊子安慶緒弑死了。〔小外〕祿山既死。

都城人心搖動。乘勢入城。不許遲緩。〔衆應介〕

〔紅繡鞋〕〔小外末〕大刀壯士橫行。橫行。高蹄戰馬長鳴。長鳴。殲賊將。殄胡兵。清

海甸。復神京。〔合〕賜驩醕。勒勳銘。賜驩醕。勒勳銘。〔報子上〕報報報。永王璘廣陵兵敗。

逃入鄱陽。追至庾嶺。被守將皇甫侁斬首。東南平定了。〔小外末〕可喜可喜。朝廷有福。事勢至此。破

竹何疑。軍士們。努力向前。共建大功。〔衆應〕

〔前腔〕〔小外末〕胡雛奮臂。稱兵稱兵。凶王犄角。揚聲揚聲。唇齒冷。輔車傾。看指

日入東京〔合前並下〕

第三十三齣 羅襪爭奇

〔丑扮老人上〕楊家玉環專寵時。六宮淒涼無粉黛。芳魂已化彩雲飛。空留羅襪餘香在。小人乃御前一個小軍。原是翰林供奉李太白老爺蒼頭。李爺辭官去國。小人流落長安。充了御前一名禁軍。隨太上皇爺西幸。六軍鼓譟思亂。楊妃賜死馬嵬。當時小人在傍。被我拾得一隻繡羅襪。經今數載。香氣不滅。長安人氏聞知。爭來求看。每看一度。索他青蚨十文。積漸致富。如今在長安城中開張一座大酒鋪。儘可過活。只是我家老婆。嗔我終日賣弄這件東西。卻與化塵土的粉骷髏喫乾醋哩。我說。老婆不是愛美人的羅襪。這是我家掙財主的本錢兒。你看門外又有人來了。〔淨外貼上〕弓彎踏繡嶺。步步生香塵。猶存凌波襪。不見凌波人。我們都是來看太真遺下羅襪的。老叟交了青錢。每人十文。請出太真的繡羅襪來。〔丑出介淨〕這是九天仙子留下遺蹤。難得一見。老叟還該與你揚州十萬錢纔是。外貼〕揚州十萬錢。也不消得。只與他陳王平樂酒價十千也罷了。〔譚介末扮清虛道士上〕馬嵬遺襪走塵寰。爭怪君王愛玉環。解感陽城迷下蔡。豈須紅粉在人間。貧道清虛道

士是也。我笑世人愚癡太甚。特來一看呀。列位在此何幹。〔淨〕我們都是長安城中風流子弟。來這老叟家中。借觀楊妃遺下的繡羅襪。道士你來做甚麼。〔末〕既有此物。何不借與貧道一觀。〔淨丑笑介〕了不得。這道士也風騷起來了。〔丑〕也罷。你出家人難得見。也與你一觀。〔末接介〕列位。你與我觀了。我就交你青錢十文。〔淨丑〕你拿錢來。〔末〕列位。那楊妃在那裏。〔淨丑〕呸。癡道士。這是楊妃遺下的羅襪。怎麼就想楊妃在那裏。〔末〕呸。列位好癡。我只道妃子就在這羅襪裏面。原來只是遺下的舊襪兒。怎麼一國如狂。爭來借看。列位。那美人已化爲塵土了。卻留下這一隻舊襪兒。我就說這舊襪兒呵。

〔沽美酒〕繡宮羅。沒半縑。製凌波。五色鮮。卻與佳人脚下穿。行一步。可人憐。相趁着。雕輿翠輦。印香塵。淺籠花毯。踏瑤階。低覆金蓮。半霎時。鳳頭幫綻。半霎時。馬嵬香散。覓凌波。洛浦寒。去風流不還。剛斷送紅羅一片。這羅襪兒。雖在穿羅襪的人。已化爲塵土了。我就說這化爲塵土的。

〔前腔〕白楊根。玉骨穿。黃鼠穴。粉香殘。一樣淒風伴冷烟。分甚麼醜和妍。總不

辨西施鄭旦。領春光道傍語燕。悲夜月塚上啼鵲。蔓野草依稀翠鈿。積荒臺猶疑羅薦。盼芳魂。落那邊。笑癡人尙牽。時時的雙彈淚眼。莫說化爲塵土的。就是現在。美人的那容顏猶假。何況假妝的粉黛。就是說現在的。

〔前腔〕美容華。秀可餐。工歌舞。若爲妍。無價明珠掌上。看施義髻。貼花鈿。有多少喬妝假扮。逞歡樂。豈知憂患娛朝暮。不問流年。那管精枯髓乾。下場頭酒闌人散。奸風光片餉間。你不信吾言。只看那玉環飛燕。〔衆〕這道士也說得有理。我們好沒來由。須索回去也。〔丑〕請問道者。我舊主人李太白老爺。棄官訪道。一向雲遊。你既在雲水。可知他的消息麼。〔末〕你問此公消息。大難方深。初陷賊庭。甫得救脫。旋遭冤枉。繫獄長流。宿業所招。未能自免。〔丑悲介〕原來我主人受苦如此。他是蓋世豪傑。終得無恙否。〔末〕終無大禍。還有超昇時節。你老者戀戀猶有故主之情。可敬可敬。

〔末〕粉褪香消委路岐。

〔丑〕馬嵬玉骨已成泥。

〔衆〕雨淋鈴子秋蕭瑟。

〔合〕正是君王腸斷時。

第三十四齣 蓬萊傳信

〔末道士上〕絳紗彷彿隔纖塵。環珮珊珊若有人。海上少君能召鬼。漢皇只念李夫人。貧道清虛道士是也。上皇日夜思量貴妃。哭泣無已。聞軍人收得羅襪一隻。取入宮看了。愈加悲切。又聞貧道有李少君之術。召見便殿。必欲貧道尋訪妃子遊魂下落。上天下地。四處跟尋。杳無蹤跡。有神人報說。在蓬萊山上。貧道思量貴妃原是彼處仙子謫降。一入唐宮。作過不小。應已墮落。豈得仍住蓬萊。心中不信。又別無訪處。只得出神往彼一訪。呼吸之間。已到蓬萊山畔。不免徑入則個。〔外扮金甲神上〕道士何來。輒敢至此仙都境界。〔末〕貧道奉唐天子勅命。訪楊妃遊魂所在。聞在蓬萊。故敢冒昧至此。乞神將爲貧道一通報。〔外〕楊妃果在此間。應否相見。小將不敢自專。須替你稟過此間仙主。〔末〕多謝。〔外下復上〕我已替你稟過仙主。許容相見。妃子出來也。〔小旦扮楊妃素髻粗衣憔悴持帚上〕

〔祝英臺近〕黛痕銷。啼頰損。往事不堪省。憔悴雲鬟。羞踐清都境。那更舊愛猶牽。新愁未遣。關情處。翠華西幸。胡塵滿天地。至尊乃西竄。三巴輦路危。六軍中道變。含啼別

君王咫尺不得見。至今巫山夢。猶在華清殿。賤妾貴妃楊氏是也。胡奴駕妾以爲兵端。將士遂指妾以爲戎首。雨慘雲愁。倉皇鳥道。香殘粉散。絕命馬嵬。生前既已作過六宮。死後猶得返魂三島。蓬萊仙主。責妾荒淫。嫉妬迷卻。夙根釀亂。召災自作罪業。罰作仙都下使。掃地汲水。好生辛苦。罪業應爾。不敢怨尤。聞人間世有一道士。奉上皇命尋訪妾身消息。仙主許我相見。不免出見道士。一問上皇起居。〔見介末〕貴妃稽首。〔小旦〕師父稽首。請問師父從何處來。〔末〕上皇自西蜀回鑾。日夜思念貴妃。命貧道到此相訪。〔小旦悲介〕上皇別來無恙麼。〔末〕別來無恙。〔小旦〕妾之思念上皇。不減上皇之念妾。仙凡路隔。通信爲難。上皇既遣汝來。有何憑據。〔末〕貧道將行時。上皇賜一鈿合金釵。云持此以見貴妃爲信。〔小旦見哭介〕此物乃七月七夕。樓上憑欄私語時所見。宮娥無一人知者。妾今見之。不勝覩物之感。師父你聽我道來。

〔步步嬌〕鈿合秋光釵痕冷。金屋蒙恩幸。銀河指二星。並蒂花開。合歡袞整。璧月照深盟。芙蓉香。傍鴛鴦暝。

〔五更轉〕自入宮。臨鸞鏡。荷君王。宿世情。三千粉黛。粉黛悲孤影。多少紈扇歌。

長信懷金井。最可憐。夜閣雕欄凭。名花宿酒。宿酒人初醒。斜倚七寶牀邊。猶憶沈香風景。師父妾身記得沈香亭上。牡丹盛開。上皇云。對妃子。賞名花。不用舊樂章。急宣翰林供奉。李太白至。乘醉立草清平調三首。清新雅麗。天子大賞。以爲仙才。賤妾不合聽高力士讒言。屢阻其大用。誰想李太白是這裏仙官。後面如何相見。借問李君近來起居如何。〔末〕太白漂泊流離。身經多難。〔小旦悲介〕此君多難。皆賤妾爲之也。追悔何及。

〔江兒水〕才子登金殿。酖醕帶宿醒。彩毫光與名花映。昭陽飛燕新妝並。玻璃酌酒聊相命。何物含沙射影。一出神京。展轉飄零萍梗。師父。上皇自西蜀回鑾。聖躬安否。〔末〕上皇回鑾。聖躬且喜康健。只是日夜思念貴妃。音樂厭聽。飲食盡減。〔小旦悲介〕上皇信人。眷念不肖之心。始終無間。教妾如何不感他。煩師父爲我傳言。善保聖體。衰年勿苦苦以不肖爲念。

〔玉交枝〕弦歌厭聽久相思。君王至誠。豈無粉黛娛衰景。料不忘海誓山盟。玉京仙館雖注名。金屏舊約還重訂。藕絲牽。今生正縈。葛藤纏。來生不定。〔末〕太

上皇命尋訪貴妃消息。幸得相見仙山。不知貴妃別後起居如何。須對貧道一言。好回覆太上。〔小旦〕師父一言難盡。

〔玉山頽〕胡塵乍警。整大駕倉皇出城。譟軍聲白羽爭喧。掩啼痕紅袖俄傾。香殘玉碎羅襪飄沈。峻嶺古道風烟冷。草花平啼鶻夜夜月華明。〔末〕妃子物故之後。一靈何以得到此仙山。在此問安否。

〔解三醒〕〔小旦〕謫人間原從仙境。謝塵寰復返瑤京。上清嗔我行多情。罰教來給使蓬瀛。提罌松下斟丹井。操箏花前掃落英。堪悲省。這是我塵心不斷。靈骨難成。〔末〕如今要回覆上皇。不知貴妃這裏有何物。可令貧道持歸作信。〔小旦〕我有玉環一枚。原上是上皇賜我的小名。今與師父將去示信。〔與環介〕

〔三學士〕這玉環是吾小名。君將去堪爲信憑。珮環曾說留交甫。條脫應知贈許卿。好與情人寬晚景。莫爲我長淚傾。

〔園林好〕想君王年來鬢星。在人間無多暮齡。受何限風流歡慶。好回首辦前

程好回首辦前程。還有一句要緊說話。替我拜上上皇。

〔僥僥令〕愛河波萬頃。慾海浪千層。似你我相思天地永。怎能勾斷因緣。出死生。斷因緣。出死生。

〔尾聲〕歎雙星佳期有定。歲歲年年。絆此情。只虧煞姮娥無伴。萬古淒清。〔下末〕貴妃已進去了。不免回覆上皇去也。

仙姬住蓬島。

猶復憶人間。

一別指歸路。

蒼茫海上山。

第三十五齣 廬山受枉

〔金瓏玲〕〔生旦小生貼同上生〕翻身離網罟。逃名且住匡廬。〔旦〕塵不到地。清虛。

〔小生〕傍山時放鶴。臨水復觀魚。〔貼〕相看真是野人居。〔生〕夫人。我們來到匡山。

傍着騰空尊師栖住。且喜風塵不到。儘可安居。近日聞得強寇已平。神京恢復。下官山棲谷飲。永作

清世漁樵足矣。〔旦〕相公富貴浮雲。軒冕幻泡。隱居學道。可保餘生。三公九卿。何足挂齒。〔外上〕謫

居紅塵中。埋名六十載。限滿歸去來。九關日相待。我展靈旗。天門使氣。被謫人寰。下賤給使。不憚辛勞。救主酬恩。粗立功效。如今謫限已滿。將返天門。不免辭別主人去也。〔相見介外〕老奴一向蒙老爺與夫人恩養。未能報效。今限期已滿。拜別恩主歸去。幸勿阻留。〔生驚介〕老蒼頭。勇略忠義。乃世間奇男子。永王之難。我夫婦實荷活命之恩。恩德難報。何故一旦告別。你有何限。去將安歸。聞言驚疑。願明對我。〔旦〕老蒼頭。怎忍一旦撇我夫婦而去。〔外〕稟上老爺夫人。老叟來實有限。去實有期。不敢明言。伏願體亮。〔生〕我知道了。看老叟奇男子。定非凡間凡品。我固疑之。限滿之言。已知其故。下官怎敢強留。叫步搖取酒來。與老叟送別者。〔生送酒與外外跪飲生扶起〕

〔一江風〕〔生〕看英軀義烈垂千古。可道非凡侶。播雄風獨犯重圍。救主離豺虎。傷心忍別予。驪駒指路衢。問君此去歸何處。

〔前腔〕〔旦小生〕效勤渠櫛冒經風雨。辛苦支門戶。正批離力截遊軍。又拯裙釵婦。恩深禮亦殊。方回嘆不如。一朝怎唱陽關路。

〔前腔〕〔外〕歎傭奴自賣朱家魯。少小蒙恩遇。絕鞭笞人子相看。不減柴桑主。

身如桓闔徒時來返故都。一尊惆悵迷烟霧。老奴就此拜別了。〔拜生旦小生扶起介外

徑下生〕呀。出門就不見了。展公非凡人。自愧肉眼。不能早識耳。〔淨扮差官從人上〕自家乃御史

宋老爺差官是也。故翰林供奉李白。黨助永王璘叛逆。開府大將軍高公公奏聞朝廷。詔書拏問。聞得在匡山隱居。來此宣詔。不免徑入。〔相見介淨〕此位莫非就是翰林官李公麼。〔生〕下官就是。

〔淨〕朝廷有旨。李白跪下。〔生跪介淨〕聖旨已到。跪聽宣讀。奉天承運皇帝詔曰。國家多難。南北阻兵。永王璘作逆。淮楚自干天討。故供奉李白。不思受太上皇帝厚恩。乃從璘庶人敢行助逆。國法不貸。着御史中丞宋若思。宣撫大使崔渙。拘白潯陽獄。會勘具奏。明正典刑。故勅左右將犯人李白拏下。〔左右拏下旦小生貼與生相對哭介生〕皇天上帝。知白此心。念臣何曾助逆。冤枉冤枉。〔淨〕冤與不冤。你到勘官面前去訴。

〔四邊靜〕〔生〕永王設計拘忠烈。捐軀抗臣節。犯難得逃生。何曾助凶孽。〔合〕冤魂氣結愁雲慘切。瞥爾遇雷霆。終當照日月。

〔前腔〕〔旦哭〕孤忠萬死遭縲絏。殘生付甌雪。素志瑩無瑕。如何反污涅。〔合前〕

〔前腔〕〔小生哭〕嚴親有難肝腸裂。斑斑淚成血。有子愧緹縈。何由籲天闕。〔合前〕

〔前腔〕〔貼哭〕狺狺虎豹司閻闔。忠邪豈無別。慟哭就桁楊。親知死生訣。〔合前〕

〔淨〕詔書似火。星夜打點起身。不可遲緩時刻。〔生〕夫人兒子。我是天地間一烈丈夫。受此枉屈。決

不灑一點淚。你們也不須哭泣。尊官我就打點行了。無煩催促。

〔生〕折節難忘聖主恩。〔旦〕曳裾豈肯向王門。

〔小生〕大明攬轡浮雲散。〔貼〕定見陽光照覆盆。

第三十六齣 遠謫夜郎

〔點絳脣〕〔末扮黃門官上〕漏盡銅龍。晨光初動祥雲擁。天樂鳴空。風裊爐香送。

月照千門響珮環。東華曙色映南山。仙音一派飛龍近。香氣先傳近侍班。自家乃唐朝黃門官是也。

今當早朝時候。文武朝見。倘有奏章。只索在此伺候。〔小外扮郭子儀上〕

〔么篇〕麟閣閣成功。貂裘沐寵君恩重。俯竭丹衷。要把忠冤控。大將已蒙開國賞。孤臣

尙抱覆盆冤。脫驂水念千秋義。豈止淮陰一飯恩。下官中書令汾陽王郭子儀是也。破賊立功。勳存社稷。封王裂土。盟指河山。富貴恩寵極矣。若非恩人李供奉救難全生焉。有今日。金石可泐。此義難忘。今者此公坐永王璘之事。負冤下獄。下官見忠義蒙恩。旣存公道。恩人有難。復軫私情。只得叩闕陳情。願以王爵贖罪。今日早朝。徑入則個。〔朝見介〕萬歲。萬歲。萬萬歲。〔末〕朝見已畢。百官退班。〔小外〕臣有小疏。冒奏皇上。〔末〕有何奏疏。就此披宣。

〔神仗兒〕〔小外〕彤墀仙仗。彤墀仙仗。天門高敞。望日華金掌。一疏批鱗恭上。陳讜論保忠良。陳讜論保忠良。〔末〕汾陽王有何章疏。從實奏聞。

〔入破第一〕〔小外〕臣子儀。啓聖上。國連丁災障。遇胡雛。反戈相向。詔臣建牙列帳。兼總六師。帥諸部掃除凶黨。仰仗天威。長驅一鼓靖漁陽。九廟神靈無恙。遂叨蒙封賞。錫王爵。裂茅土。感雨露皇恩。曠蕩誓竭涓埃爲報。願抒肝膽答吾皇。昭雪沈冤。力陳忠讜。〔末〕汾陽王抒忠雪冤。所陳何事。

〔破第二〕〔小外〕金門侍臣李白遭誣枉。下潯陽詔獄。鈎治永王逆黨。臣知冤

狀義激衝冠。代爲稽顙。念隕雹飛霜。孤忠可亮。〔末〕璘庶人倡亂。李白久在軍中。助逆情真。汾陽王何故爲彼稱冤。願聞其說。

〔袞第三〕〔小外〕臣念李白呵。爲盛名。遭羅網。迫脅樓船上。他抗節懷忠。阻逆謀。甘羈縲。雅志天清日朗。狂狷桁楊。湘水。纍臣惻愴。把千金棄擲。等浮雲。拚餘生草莽。〔末〕李白既不從賊。後來如何得脫。

〔歇拍〕〔小外〕幸義僕砍營。英雄斬將。運劍抽戈。脫羈鞅。皎烈日。凜秋霜。俠氣英風。已見垂聲天壤。叩聖皇。莫使忠賢遭誣受殃。〔小外〕臣之爲李白伸冤。乃朝廷公論。臣還有私情。控訴皇上。

〔中袞第一〕臣昔伏侍哥舒將。犯法幾乎身喪白也。一見獎英雄。推勇壯。脫鋒鏑。纔得有今日勳勞。掃腥羶。立廟廊。生死交情。深恩怎忘。〔末〕卿感恩雖深。只怕李白情罪難赦。

〔煞尾〕白冤狀。甚明儻。皇情不鑒亮。〔免冠俯伏介〕臣情願讓王爵。辭恩賞。贖無

辜。免罪殃。伏遇天日重光大。寬法網。赦遐荒。忍使萬國咸新。一夫罹枉。

〔出破〕須可惜絕代奇才。去國因讒謗。漂零江海逢災障。爲此封章叩闕下情。

不勝慨慷。〔末〕旣如此。汾陽請冠。下官當卽爲轉達天聽。鳴冤贖罪。情何極。友義臣忠兩足誇。〔下〕

〔神仗兒〕〔末卽上〕皇恩浩蕩。皇恩浩蕩。照臨窮壤。況勳臣疏上。忠義情詞。仇爽。

頒曲赦。到潯陽。奉聖旨。據中書令汾陽王郭子儀奏。李白本一代奇才。荷太上皇帝知眷。遭讒去

國。流播江湖。璘庶人聞其才名。橫加迫脅。白執節不從。子儀稱冤非謬。但朕覽其上璘庶人東巡歌。

過爲諛佞。罪亦難逃。姑念此詞。作在庶人逆節未露之先。子儀復力爲伸救。得從末減。免其反罪。長

流夜郎。子儀社稷元勳。急友人於難。至欲解爵贖罪。高義可嘉。仍賜寶玉大弓。用示褒美。所解王爵

不准辭。欽哉謝恩。〔小外拜謝介〕

〔滴溜子〕感吾皇。感吾皇。天恩高廣。救逋囚。救逋囚。全軀烟瘴。又頒老臣嘉貺。

寶玉與大弓。璽書褒獎。願萬歲千秋。聖壽未央。

〔小外〕皇恩全首領。

〔末〕遠謫夜郎天。

〔小外〕雨露春如海。

〔合〕憐才定賜環。

第二十七齣 妻子哭別

〔步蟾宮〕〔生上〕聖主恩深寬斧鑕，歎餘生險似懸絲。長流遠指夜郎西。瘴雨蠻烟迢遞。恩詔下螭頭。殘生脫虎口。遠戍向天涯。離亭悵尊酒。風生九江波。霜凋三楚柳。乾坤一流萍。去住亦何有。李白坐永王之事。繫獄潯陽。幾乎不保首領。蒙郭令公營救。聖主寬恩。貸其死罪。長流夜郎。臣罪應死。天王聖明。焉敢嗟怨。今日便與妻子相別。遠赴謫所。夫人孩兒那裏。〔旦小生貼上〕

〔前腔〕〔旦〕萬死間關餘涕淚。脫奇禍又苦分離。〔貼〕津亭落葉帶霜飛。〔合〕別路淒涼天氣。〔生〕夫人。聖度寬弘。詔旨嚴切。不敢停留。卑人今日便奉別長征也。〔旦〕相公。荒微蕭條。一身獨往。教賤妾如何放心。〔小生〕爹爹獨往。孤身無伴。孩兒情願隨行。庶幾可以朝夕服事。〔生〕萬里之行。多反爲累。孩兒你只在家侍奉母親。不必同往。〔貼〕老爺。萬里遠別。何故匆匆。便再從容數日也不妨。〔生〕詔限時日。少不得要行。大丈夫決志出門。豈容留戀。就此告別。

〔錦纏道〕別親知。走天涯。過龍標五溪。我怎顧得路崎嶇。鬼國羅施。終日裏烟昏霧迷。從此去。竹王祠出鬼。夜窺火。畊田蠻女春犁。不作數行啼。準備着芒鞋斗笠。霜風吹櫛衣。早悟卻餘生皆寄。切莫歎死別與生離。

〔前腔〕〔旦哭〕你男兒值臨分。恥兒女的涕淚。兒女們當此際。怎不悲啼。直恁的孤身迢遞。你本是王堂仙迴翔赤墀。翻做了路傍兒浪蕩天涯。纔說起痛傷悲。若是那客中的衣履綻。教誰來補綴。何人問餒饑。那裏有備晨炊的素女。想夜來燈火伴孤棲。

〔前腔〕〔小生哭〕別親闈。正寒天。風霜慘悽。長途去。怎相隨。盼天涯。不由人不淚下如絲。想此日開醮會。家家燕喜。只吾家抱向隅。悲遠謫。去邊陲。拋閃下孤兒。空慟哭牽衣還執袂。浮生逐馬蹄。遇的是山精木魅。何日裏蒙雨露赦金雞。

〔前腔〕〔貼哭〕恨臨岐。那讒邪把忠良禁持。怎指着鳳爲鷓。兩下裏南北分飛。你本是老節旄蘇卿海湄。翻做了著離騷。屈子湘纍。薄命歎蛾眉。久矣把脂拋。

粉棄。年年管別離。怎經得許多憔悴。從今去又不知後會是何時。〔生〕夫人。我當

日長別金鑾。爲清平一調。今日遠謫夜郎。又因東巡一歌。思量一生。都被這管綵毫作禍。孩兒。你從此可學躬耕南畝。切不可效汝父拈此三寸枯竹也。我與夫人就此拜別。〔旦小生貼並哭介〕

〔古輪臺〕〔合〕各含悲。出門頃刻是天涯。一生彩筆能爲祟。浮萍斷梗。漂寄乾坤。任憑那造物推移。地冷天荒。山空月黑。前嗥猛虎後熊羆。還是天王明聖。許長流。幸免誅夷。遙想那播遷馮衍離亭伯。漂零賈傅才子。數多奇。曾聞道。樂天知命復何疑。

〔尾聲〕離亭尊酒還須醉。醉後分攜總不知。日落河橋去馬嘶。〔生下旦小生貼哭倒地介〕

〔旦〕留君不住益淒其。〔小生〕一片孤颿帶雨飛。

〔貼〕我寄愁心與明月。〔合〕隨君直到夜郎西。

第二十八齣 仙官列奏

〔竅地錦鑑〕〔旦貼扮太上直殿仙官上〕太清宮殿九霞高玉珮羣真絳節朝天香

浮動赤霜袍。一派仙音寶座遙。大道宗虛無。至真合溟滓。手把入空炁。跣霞躡浮景。蕩累神

宇澄。遺塵太霄迥。清都元不遐。人應發深省。我兩人乃太上道君直殿仙官是也。今日羣仙來朝。太

上奏事。只得在此祗候。你看祥雲四起。仙樂盈空。羣仙早到也。〔外司馬子微上〕水抱雲外樓。露

滴松間鶴。明月滿笙臺。臺空碧花落。自家司馬真人是也。〔小外葉真人上〕靈光現真人。形氣參

幻化。獨留追魂碑。千古長松下。自家葉法善真人是也。〔末清虛道士上〕火到陰魂清。丹熟陽神

出。獨往還獨來。天地入超忽。自家清虛道士是也。老旦李騰空上。崑樓久辟穀。服氣吸瓊華。天遠

罡風上。馮陵白鳳車。自家女真李騰空是也。〔外〕列位真人請了。今日羣仙朝見太上。就此玉殿下

行禮。〔各道姓名相見介外〕臣司馬承禎朝見。〔小外〕臣葉法善真人朝見。〔末〕臣清虛道士朝見。

〔老旦〕臣李騰空朝見。〔旦貼〕衆仙有事奏事。無事退班。〔外〕臣承禎奏。唐翰林供奉李白。前身金

粟如來。權位太白星官。其母生白時。夢太白入懷。又夢金粟如來。手執青蓮。摩頂授記。祇緣宿業。久

謫人間。困苦飄零。懲創已極。外示通脫。內保清身。受報既多。宿愆可貸。伏望太上道君陛下。赦過錄

勤許其早證道果。〔老旦〕臣騰空奏白妻許氏以相門之女雅慕神仙密緯潛修亦應證道。〔小外末〕二臣奏世人學道多修飾外觀。缺略內行。勉作功效。罔汰神明。惟李白不修小節。放浪詩酒。內境超然。靈明無恙。合許昇躋。以勸世人。〔旦貼〕太上有旨。李白着司馬承禎許氏着李騰空各授道訣。勤加訓勅。李白證蓬萊仙卿許氏亦同往蓬萊。再積功行。方昇天仙之職。世間學仙弟子許諸仙分別考校。清淨無瑕者。方許昇超。垢染有過者。量行黜落退班。〔衆應叩頭謝起介末〕今唐太上皇帝貴妃楊氏宿根俱隸仙籍。祇緣塵念。謫在人間。乃不勤政事。罔卹黎元。日事燕游。荒淫無度。又牽纏情愛。誓願世爲婚姻。尙應謫墮塵世。續未了之緣。受生來之報。俟懲艾修省。方許超昇。諸公意下如何。〔衆〕正應如此。〔外〕仙界玄律甚嚴。考校最密。世人多迷而不悟。可歎可歎。

〔宜春令〕金書燦。玉榜高。擁祥雲。羣仙正朝。看龍車鳳輦。霓旌列隊。珠幢導。遙空引仙樂。氤氳廣殿散。天香繚繞。〔合〕任滄溟幾度揚塵。仙家不老。

〔前腔〕〔小外〕琅函祕。芝檢弢。蛻囂塵。神明自超。論飛虹絳雪。抽關啓鑰。披玄奧。鍊金丹九轉功成。降羽輪三清自召。〔合前〕

〔前腔〕〔末〕先天地本寂寥。合虛無。迴翔太霄。歎朝生暮死。蜉蝣晷刻真堪悼。王侯第寒雨荒榛。秦漢陵夕陽秋草。〔合前〕

〔前腔〕〔老旦〕黃芽鍊白雪調。運河車全憑斗杓。羨女真度世。西池南嶽遊俱到。龍魚字賜谷傳書。蝌蚪文傳桑授道。〔合前〕

〔外〕千樹桃花萬年藥。〔小外〕數間茆屋一溪烟。

〔末〕尋常甲子無心記。〔老旦〕手指寒松憶歲年。

第二十九齣 他鄉持正

〔貼扮押不蘆花戎裝末淨旦老旦扮將吏從上〕蠻土風烟木葉疎。專城南面上頭居。翠鈿寶機黃金甲。人道奴顏花不如。奴家夜郎王夫人。喚名押不蘆花。良人雄據夜郎。稱王荒裔。雖受大唐正朔。阻險恃兵。不奉朝請。良人去世太早。無子嗣位。奴家還以王夫人統治夜郎。雖生長蠻夷。姿容絕世。耽玩書史。詞賦頗通。近日大唐翰林供奉李白。得罪朝廷。長流至此。奴家聞此人絕代仙才。風神霞舉。心酷愛之。形於夢寐。倘得招贅此人。共諧伉儷。死亦足矣。今日大開筵宴。請李公敘話。已許見顧。

分付從人速整酒席完備。〔衆應丑上〕稟上王夫人。李爺已請到了。〔生上穿宮錦袍華陽巾〕

〔天下樂〕木客窺人山帶烟。蠻荒看月幾回圓。但逢有酒聊堪醉。目送飛鴻揮

五絃。夜郎王夫人請白飲酒。失路之人不敢違命。只得去走一遭。〔丑稟貼出迎介生〕王夫人拜揖。

〔貼〕李大人萬福。大人玉京仙子。天朝貴臣。氣壓千秋。筆生五彩。天遣照臨荒鄙。使賤妾得遂參承。

萬幸萬幸。〔生〕念李白流竄罪人。何當夫人如此青盼。〔貼〕好說。教從人作樂。待我送酒。

〔步步嬌〕天上瓊枝來荒甸。五色卿雲現。文章玉井蓮。何處罡風吹墮。咱庭院。

一見使儂憐。聞名那似瞻卿面。

〔醉扶歸〕〔生〕擁寒爐火冷頻添爨。向茅簷村酤自數錢。分依棲瓦鉢野人居。

敢來叨玳瑁王家宴。玉笙銀甲响泠然。花鈿繡襖光相亂。

〔皂羅袍〕〔貼〕君本玉堂妙選。怎教萬里流落蠻烟。琉璃盞內酒如泉。珍珠簾

外風如箭。他鄉寒夜。淒涼可憐。新知樂事。相逢有緣。勸君暫把雙眉展。

〔好姐姐〕〔生〕感卿卿情深意虔。舉芳尊綢繆宛轉。窮愁旅況。都消在歌舞筵。

杯無算。醉來猶憶金鑾殿。酩酊揮成五彩箋。〔貼〕分付兩行女樂。盛陳歌舞。待我與李相公親把盞者。〔貼送酒手遞與生生接飲介〕我醉了也。〔貼〕李相公在唐天子殿上。醉後草清平調絕妙。今日在蠻府驩宴。醉後亦願乞一詩。教侍女取銷金邊白練絹出來。與李相公索詩。〔生信筆書貼誦介〕滌蕩千古愁。流連百壺飲。良宵且宜談。皓月誰能寢。醉來臥空山。天地卽衾枕。信筆揮成。清虛瀟灑。真謫仙才也。可敬可敬。〔貼呼老旦介〕女使過來。我雅慕李相公仙才。孀居無侶。願招贅相公。永諧伉儷。你替我傳說。〔老旦應對生云〕俺家夫人雅慕李相公仙才。孀居無侶。願招贅相公。永諧伉儷。望相公慨許。便當備花燭賀喜也。〔生正色介〕夫人之言差矣。夫人君長正妻。寡居守節。我李白亦天朝名士。家有糟糠。今日之會。只好飲酒聽歌。豈可及此淫亂。〔老旦傳言介貼〕本以愛慕李君。興念及此。既如此說。亦大有理。李君信端人也。妾亦女中俠烈。義無相強。從此只詩酒往來足矣。〔老旦又傳言生〕如此甚好。

〔香柳娘〕〔貼〕慕李君謫仙。慕李君謫仙。願諧繾綣。襄王夢杳巫山遠。料紅絲未牽。料紅絲未牽。相見若無緣。何如不相見。〔合〕且流連酒邊。且流連酒邊。明

月空圓。淒清孤館。

〔前腔〕〔生〕敢相期百年。敢相期百年。雀屏難選。使君有婦恩非淺。感芳心自憐。感芳心自憐。芍藥意雖傳。蘼蕪怕生怨。〔合前〕卑人醉了。就此告別。〔貼〕不敢久留。就此奉送。相公有暇。還到這裏一談。〔生〕多謝。

〔生〕相逢莫問野鴛鴦。

〔貼〕且聽弦歌對索郎。

〔生〕但使主人能醉客。

〔合〕不知何處是他鄉。

第四十齣 汾陽報恩

〔外扮山神上〕金書開玉冊。帝命守廬山。瀑布香爐好。羣仙日往還。小聖乃廬山山神是也。九江大盜聞李太白家眷住此山中。其妻許氏。女容秀麗。又道是相國孫女。盛有貲裝。聚三百人。以今夜登山。來行劫掠。太白與許氏。俱名登仙籍。將來並往蓬萊。不可不救。叫當山土地督率猛虎。驚走強人。豈不美哉。土地何在。〔末扮土地上〕稟上山王有何分付。〔外〕今夜有九江大盜一起。謀劫李太白家眷。太白與妻許氏。並係仙鄉。強人來時。汝須督率猛虎。親行救護。〔末〕領法旨。

〔合〕大抵乾坤俱一照。

免教人在暗中行。〔下〕

〔淨扮盜首擁衆上〕縱衡合妙算。出沒有神機。刀劍空中舉。艤艫水上飛。自家九江大盜麥虎牙是也。近聞翰林供奉李白家眷寓住匡廬。白妻許氏。乃相國孫女。盛有資財。姿容甚美。早已聚起三百人上山去打劫他。既得珍寶。亦可獲美姝。衆人可速打點上山去。〔下介旦小生貼上〕

〔念奴嬌〕〔旦〕空山地僻。迥無鄰。門與於菟穴近。〔小生〕雪覆楸欄。茅屋冷。蕭瑟誰來相問。〔貼〕北隴雲低。西窗風緊。木葉俱飄盡。〔合〕懷人淚。路斷遐荒無信。

〔小重山〕〔旦〕寂寞遙天戰玉龍。板扉人不到。掩寒松。〔小生〕路迷樵徑斷孤蹤。修竹裏。一縷炊烟濃。〔貼〕時度隔溪風。東林峯欲墮。咽疎鐘。〔合〕天涯破褐擁蒙茸。愁極日。雲樹幾千重。〔旦〕孩兒步搖。老爺自往夜郎。杳無音信。值此大雪。天寒地凍。想蠻荒遷客。淒冷怎捱。教我們怎不罷念。〔貼寬解〕老爺曠代奇才。名聞荒裔。瓢笠到處。必有逢迎。就是客館敗絮。村沾濁醪。老爺曠度超然。必能自遣。不至苦楚。還請夫人寬懷。

〔七犯玲瓏〕〔旦〕〔香羅帶〕天寒白屋貧。幽居無四鄰。蠅鬚聊自館。鷓棲穩。〔梧葉

兒〕幸不到風塵。似漢皓能逃漢。秦娥解避秦。〔水紅花〕不通津。漁郎難問。那有胡麻流出。桑柘自成村。〔皂羅袍〕看千峰雲散。晚天屯。正孤輪雪霽。寒潭印門。連枯草紅殘。燒痕窗窺古道。青昏野燐。〔桂枝香〕東寺餘禪。衲西菴隔女。眞。〔排歌〕悲荒徼。盼遠人。夷歌蠻語不堪聞。〔黃鶯兒〕愁絕夢中身。

〔前腔〕〔小生〕〔香羅帶〕艱危一命屯。飄零數口存。深山堪避地。甘肥遜。〔梧葉兒〕寂寞掩柴門。老樹緣蒼鼠。空階過紫磨。〔水紅花〕採松榛。獼猴成陣。落日漁樵亦斷。山鬼晚相親。〔皂羅袍〕恨三年淚盡夜郎雲。幸雙函時有瑤池信。母仙將證。何緣問津。父冤未雪。無能叩闥。〔桂枝香〕賜似遊絲。胃人如落葉分。〔排歌〕關河凍。雨雪頻。不知何處醉斜曛。〔黃鶯兒〕陶寫見天真。

〔前腔〕〔貼〕〔香羅帶〕雙蛾減黛痕。孤鸞掩鏡塵。舞衫香氣滅。消風韻。〔梧葉兒〕只自守荆裙。抱甕甌。寒澗提筐拾野薪。〔水紅花〕步躑躅。弓鞋幫襯。錦瑟繁華隔世。無夢到行雲。〔皂羅袍〕願得如毛女。鍊輕身。好長隨王母。幢幡引。三漿味美。醍醐

最醇。六銖衣薄。明霞可紉。〔桂枝香〕白鶴留僊訣。金雞望主恩。〔排歌〕牂牁道。灘水濱。天涯迢遞。暗傷神。〔黃鶯兒〕華表問歸人。〔外家人慌上報介〕夫人公子不好了。山上忽到一起強人。約有數百。聲言圍住我家莊門。劫掠財物。鳴鑼擊鼓。看看來近了。如何區處。〔旦小生貼驚介旦〕怎麼好。想是強人道我家相門之後。盛有資財。不知吾年來已貧乏了。孩兒我們學道之人。聽天委命。不可怕死。〔小生〕母親說得是。〔淨領衆上鳴鑼吶喊遶行下旦小生貼相持哭〕

〔憶多嬌〕金鼓近。心膽震。臨危猛拚一命隕。豈知四壁家已窘。〔合〕紅顏白刃。紅顏白刃。須信人生朝菌。〔淨領衆復上鳴鑼吶喊遶行下旦小生貼相持哭〕

〔前腔〕相蹂躪。難閃遁。深山怎期逢禍釁。大節肯虧生可盡。〔合前淨領衆復上鳴

鑼吶喊介末扮土地領神兵猛虎衝散並下淨衆慌張走上介末神兵猛虎復上驚衝淨衆跌走介淨〕衆兄弟不好了。李公是天上文星。神明救護。你看神兵猛虎。彌山寨野而來。我們須索逃命去罷。我輩綠林豪傑。怎當猛虎神兵。莫向山中跋扈。還歸江上橫行。〔並下小外上〕夫人公子。且喜且

喜這一起強人。正待入門下手。山中忽然飛沙走石。神兵四起。跳出一個猛虎。將強人驚走。四散去了。〔旦〕有這等事。我們快快望空拜謝則個。

〔一封書〕夫遭禍。逐臣母子飄零。委路塵。山中寇橫侵。多謝神明救妾身。若非雲路金戈現。怎免崑岡玉石焚。〔合〕嶽嶙峋。治匡君。須信靈山合有神。

〔前腔〕〔小生貼〕山深處隱淪。誰料干戈。驟到門。倉忙與死鄰。隻手誰提羅網人。銅頭六臂冲天起。白額雙睛夾鏡新。〔合前丑扮差官上〕相臣自古先推士。烈士由來解報

恩。小官乃中書令汾陽王郭老爺所差。看取李夫人。來到廬山。已是他家別業。不免徑入。〔小生〕尊官何來。〔丑〕上面站的。莫非就是翰林供奉李爺夫人麼。〔小生〕就是。〔丑〕夫人叩頭。小官是汾陽王郭老爺差官。看取夫人的。俺老爺兩次上疏。力薦李爺。聖上俞允。赦宥前罪。起用原官。仍兼左拾遺。勅命已下。郭老爺特差小官。星夜前來報喜。且具有薄禮。聊表芹意。〔旦〕多謝你家老爺盛情。生受差官遠來。孩兒你可備酒飯相待。〔小生諾丑下旦小生貼〕謝天謝地。〔旦〕孩兒。步搖。不意危苦中。又得此喜信。想老爺早晚回來也。

〔掉角兒〕想連年遭逢厄運。幸今日得聞喜信。沛雨露枯。復蘇震雷。霆蟄龍再奮。從此後增氣色。長精神。同拜舞。沾灑皇恩。〔合〕名揚補袞。光生覆盆。劍還寶器。馬仍神駿。

〔前腔〕〔小生貼〕雪冤人早離塵空。列清班更叨禁近。報恩私相臣高義。愍流離。天王惻隱。好竭節。追折檻。效批鱗。敢自愛持祿容身。〔合前〕

〔旦〕纔從虎口脫非災。〔小生〕又報螭頭拜命來。

〔貼〕否泰循環真不定。〔合〕總由造物巧安排。

第四十一齣 欽取回朝

〔挂真兒〕〔生上〕遠客投荒聊自快。玄冬盡。又見春來。真烝初回。靈光漸現。參破浮雲卅態。卑人自到夜郎。身雖處寂寞之鄉。心不作淒涼之感。或尋全真野衲。商略烟霞。或同

漁父樵夫。逍遙雲水。曠然自適。都無愁悶。山妻愛子。寓住匡廬。幸有李尊師相依。幽棲頗穩。只是山

川遼遠不得通一書信。未免挂懷。且再作道理。〔丑末扮報人上〕此處就是原任翰林供奉李爺行

館。不免徑入。李爺走報人叩頭。〔生〕你遠來何事。〔丑末〕特報李爺。汾陽王郭子儀老爺。御史中丞宋若思老爺。交章論薦李爺高才受枉。章疏再上。聖上嘉納。降旨赦李爺前罪。復官翰林供奉。兼左拾遺。朝命已下。小人們特來報知。〔生〕原來如此。生受你們遠來。〔丑末〕聖旨將到。李爺打點。就該起身回去了。〔生〕說得是。打點明日就行。

〔撲燈蛾〕春從天上來。雨露寬如海。瑕垢一時消。又拜新恩冠帶也。喜陡添光采。料此生何以報涓埃。須辦取懷忠慷慨。又可奈神丹授道赤松回。

〔前腔〕〔丑末〕千秋濟世才。四海蒼生待。簪筆侍彤墀。復際君臣魚水也。羨調和鼎鼐。便膏車秣馬好歸來。莫留戀遐荒野塞。看河梁落日照行杯。〔並下〕

第四十一齣 團圓受詔

〔薄倖〕〔旦小生貼上旦〕草木回春。門闌生喜。報夫君將到。東方千騎。〔小生〕金門賜環。玉階鳴珮。〔貼〕恩無比。已還他清華舊秩。又兼那新銜諫議。〔旦〕萬里投

荒正寂寥。〔小生〕天恩浩蕩下漁樵。〔貼〕雖遊方外傳丹訣。〔合〕好秉精忠答聖朝。〔旦〕孩兒步搖。

老爺蒙恩赦罪復官。已將到家。須打掃門徑。伺候則個。〔小生應〕

〔長相思〕〔生野服上〕歎流離。悲路岐。日落天寒野曠時。孤燈山鬼吹。聖恩垂。雨

露滋。一紙丹書下赤墀。孤臣感涕洟。已分終身麋鹿羣。雪冤實荷聖明君。不愁無地朝丹闕。

只恐初心負白雲。李白蒙恩賜環。回來已到匡廬別業。不免徑入。〔相見各悲介旦〕相公遠謫夜郎。

門庭不勝淒冷。榮歸畫錦。道路亦有光輝。可喜可喜。〔生〕天威聞若雷霆。自分終身魑魅。聖主恩深

雨露。不意復齒衣冠。僥倖僥倖。〔小生拜〕沈寃得雪。父親固喜復朝端。孝養方伸。孩兒且倖依膝下。

〔生〕孩兒起來。〔貼叩頭〕聞命沾恩。暫去依光日月。傳真授訣。終當栖志烟霞。〔生〕步搖起來。〔旦〕

相公你且把到夜郎的風景說一番。〔生〕夫人聽我道。

〔三學士〕路盡南荒多瘴癘。終年霧雨淒迷。窗前嶒嶒窺人立。戶外猩猩隔竹

啼。深夜孤燈青欲滅。古樹裏聞怪鴟。

〔前腔〕〔旦〕聽罷君言淚不止。蠻方風土堪悲。妾居地僻逢強暴。幸有山靈善

護持。一樣淒涼分兩地。今日喜脫禍危。

〔前腔〕〔小生〕一自嚴親行萬里。飄零母子相依。何期罪赦還官服。但願生還老布衣。今日光榮分里開。面聖罷。蚤見幾。

〔前腔〕〔貼〕風捲斷蓬何處逝。迢遙兩下相思。歸來對酒雙眉放。想起離腸兩淚垂。長使在家貧亦可。嗟仕路。眞嶮巖。〔丑家人上〕報老爺夫人公子。朝廷詔書下。〔生〕快擺香案迎接。〔末使臣上〕奉天承運皇帝詔曰。主德大要貴明。臣冤多因不察。翰林供奉李白。天才超邁。志節清貞。宵人好讒。盛名招忌。遂兩遭妻非。益以飄沈。璘庶人之事。白抗節賊庭。以奇計得脫。讒口橫作。長流夜郎。海內冤之。是朕不明之過也。茲汾陽王郭子儀。御史中丞宋若思。交章訟冤。朕惕然省悟。是用赦爾前罪。復卿原官。仍兼左拾遺。以匡朕不逮。望闕謝恩。〔生〕萬歲。萬歲。萬萬歲。〔生末相見介生加冠服〕

〔山花子〕皇情浩蕩如天地。微臣感激恩私。兩叨榮詞垣諫司。青蒲紫禁委蛇。〔合〕鍊丹砂。躡蹻羽衣。如今騎馬登玉墀。早看控鶴驂赤螭。少伯留侯遠共風期。

〔前腔〕〔旦〕前身金粟如來是。又兼香案仙姿。歷塵勞陶鎔聖師。何妨出世匡時。〔合前〕

〔前腔〕〔小生〕真人道果非容易。飽嘗世味難危。汰身心。蓮花污泥不妨侍從金閨。〔合前〕

〔前腔〕〔貼〕浮雲幻泡看三事。風波夷險何辭。任蠻烟鶯花禁墀。冰壺朗照漣漪。〔合前〕

〔大和佛〕〔衆〕絕代才華。果是奇凡骨。豈能爲綵毫作祟。到底有光輝。雲漢共低垂。人間天上班俱貴。並列仙曹。文苑千古見應稀。論詩酒清狂傲睨。風烟裏。眞不損上根靈氣。這齷齪徒爲達人嗤。

〔舞霓裳〕萬金一日揮如泥。揮如泥。萬里夜郎甘如飴。甘如飴。百年伉儷天生對。相門有女碧霞姿。羨夫婦神霄連轡。這樂府合倩金臺玉管題。

〔尾聲〕曇花三寶詮眞諦。又拈出彩毫玄祕。豪客應燒筆研時。

英雄天放作間身

三寸如龍不可馴

拈出當場豪舉事

青蓮千載爲傳神

綵毫記終